

ሂዚቄል ቲንቢቲ ጊዶ ቆፋ

ናቤ ሂዚቄል ዬሩሳላሜይ ከርስቶሳ ዬሌታፔ ካሴ፥ 586 ላይሳን ላሌታናፔ ሲንሳኒኔ ላሌቲዳፔ ጉዬን ዲኤቲዲ ባቢሎንን ዴኢዴሰ። ኢዚ ቲንቢቲን ዮቲዳ ቃላይ ዲኤቲ ቢዲ ባቢሎንን ዲዛይታሲኔ ዬሩሳላሜን ዲዛ አሳታሳ፤ ሂዚቄል ቲንቢቲ ማጻፋይ ኦይዲ አይፌ ዮኦን ሻኬቲሰ። 1. አሳ ቦላ ጸሳ ፒርዳይ ያና ማቲዳይሳኔ ዬሩሳላሜይ ኦይኬታዳ ላሌታና ማቲዳይሳ ቆፍሴሰ (1-3)። 2. ጸሳይ ባ አሳ ኡንኤሊዳኔ ባሌሊዳ ዲማ ዲማ ካዎቲላታ ቃጸያናሰ ዮቲዛ ቃላ (4-24)። 3. ዬሩሳላሜ ኩንዴሳፌ ሰሚን ኢሰራኤሌ አሳ ሚንላናሰ አሜቲዳ ኪታኔ ሲንሳፌ ኢዚሰ ያና ሎኦ ቃዳ ጊሻሰ ዮቲቲዳ ሂዶታ ቃላ (25-39)። 4. ጸሳ ኬሊኔ ኢሰራኤሌ ካዎቲላይ ቤኒይሳላ ሃናናይሳ ሂዚቄል ዲማ ሚሰሌን ቆንጪሲዴሰ (40-48)።

ሂዚቄል ጌታ አማኖይኔ አኬካይ ዲዛ አሳ። ሲንሳፌ ሃናና ዮኦታ ኢዚ አጁታን ቤዪዴሰ። ኢዛ ኪታታፔ ዳሪዛ ባጋቲ ቆንጪ። ለሚሶራ ፖሊቲዳ። ሂዚቄል ቆንጪሲ ቤሲዳይ ጊዶ ዎዚናኒኔ ኣያናን ኦራላቲላ ኮሺዛ ጊሻሰ ኢሶይ ኢሶይ ባ ናጋራ ጊሻሰ ኦይሼታና፤ ሄሳፌካ ቦላራ ዴሬዛ ኦራላቲላን ያና ሂዶታ ቆንጪሴሰ። ሂዚቄል ቄሴኔ ናቤ ጊዲዳ ጊሻሰ ጸሳ ኬላ ጊሻሲኔ ጌሻቲላ ጊሻሰ ዲማ ወዴቲዳይሳ ቤሲዴሰ።

ሃ ማጻፋይ ኦይኪዳ ኩሜላ ቆፋ

ሂዚቄል ናቤቲላሰ ዶሪቴሊኔ ጸሳ ቦንሾ ቤኦ 1:1—3:27

ሂዚቄል ለሚሶን ቆንጪሲዳ ዬሩሳላሜኔ ዩሁዳ ጳዮ 4:1—5:17

ባሺ ማቲዳይሳ ቆንጪሴላ 6:1—7:27

ጸሳ ቦንሾይ ናጋራንቻ ጊዲዳ ዬሩሳላሜ ኣጊ ቡሰ 8:1—11:25

ዩሁዳ ኩንዴሊኔ ዬሩሳላሜ ኩንዴላ 12:1—24:27

ሃራ ካዎቲላታ ቦላ ዮቲቲዳ ፒርዳ 25:1—32:32

ዴሬይ ባ ናጋራፔ ሲማና ማላ ሂዚቄል ኢሚዳ ሴራ 33:1-20

ዬሩሳላሜ ኩንዴላ 33:21-22

ጸሲ ዴራ ዛራናሲኔ ዩሁዳ ኣሻናሰ ኢሚዳ ሂዶታ 34:1—37:28

ጎጌ ጸኔቲሊኔ ኢሰራኤሌ ሲሞ 38:1—39:29

ሲንሳፌ ኦሴታና ጸሳ ኬላ ጊሻሰ ሂዚቄል ቤኢዳ ኣጁታ 40:1—46:24

ጸሓኢ ጊደፌ ፑልቲዛ ሃላ 47:1-12
ኢስራኤሌታ ቆሞን ቆሞን ጋካና ጸንጾ 47:13—48:35

ኅዳ ቦንሾ

1 ሄዡ ታማንላ ላይላን፡ ኦይዳንሉ ኣገናን፡ ኢቻሻንሉ ጋላሳን፡ ታኒ ኮቦሬ ሻፋን ዲኤቲዲ ቢዳይታ ጊደን ዳሼ ሳሎቲ ዶዬቲን ጸሓ ኣጁታ ቤኣዲስ።

2 ካዋ ኢዮኣኪኔይ ዲኤቲዳ ኢቻሻንላ ላይላን፡ ሄ ኣገናን ኢቻሻንሉ ጋላሳን፡

3 ባቢሎኔን ኮቦሬ ሻፋ ማታን ዲዛ ቡዜ ና ቄሴ ሂዘቁላኮ ኅዳ ቃላይ ዪደስ፤ ኅዳ ዋልቃይ ታና ኦይኪደስ።

4 ታኒ ቆቁ ጋ ጸሊሺን ፑዳሃ ባጋፌ ጎቲ ጫርኮይ ዪዛይሳ ቤኣዲስ፤ ኢዛፔ ዋልቃንሉ ዋዋጪ ጊዛ ጳፒ ጊዳ ሻራ ጊታ ፖኦይ ጊዶሊ ዋሊደስ፤ ታማዛስ ጊዶ ኣዳይ ቢራታ ቦንቆ ሚሳቲስ።

5 ታማዛ ጊደን ሸምፖራ ፓጻ ዲዛ ኦይዱ ሜጼቴላታ ሚስሌይ ደስ፤ ኢስታ ሚጳይካ ኣሳ ሚጳ ሚሳቲስ።

6 ኢስታስ ኢሳስ ኢሳስ ኦይዱ ኣይፌሶይኔ ኦይዱ ቁፌይ ደስ።

7 ኢስታስ ሲቲ ጊዳ ሉሌ ቶሆይ ደስ፤ ኢስታ ቶሆይ ማራ ቂንጪፊሌ ማላኔ ቁጩቲዲ ጸልቂዛ ጸርቂማላ ሚሳቲስ።

8 ኢስታስ ኦይዱ ባጋራ ቁፌታ ጋርሳን ኣሳ ኩሼይ ደስ፤ ሄ ኦይዳታሲካ ኣይፌሶቲኔ ቁፌቲ ደቲስ።

9 ኢስታ ቁፌቲ ኢሶይ ኢሳራ ዲሼቴቲስ፤ ኢስቲ ኡባይካ ጉዬ ሲሚ ጸሎንታ ሲቲ ጊዲ ሲንሐ ቤቲስ።

10 ኢስታ ኣይፌሶይ ሃይሳፌ ካሊ ዲዛይሳ ማላ፤ ኢስታ ኦይዳታሲካ ኢሳስ ኢሳስ ሲንላ ባጋራ ኣሳ ኣይፌሶ ማላይ ደስ፤ ኡሻቻ ባጋራ ጋሞ ኣይፌሶ ማላይ፡ ሃዲርሳ ባጋራ ቦራ ኣይፌሶ ማላይ፡ ቃሴካ ኢስታ ኢሳስ ኢሳስ ጉዬ ባጋራ ጎሌ ኣይፌሶ ማላይ ደስ።

11 ኢስታ ኣይፌሶይ ሄሳ ሚሳቲስ፤ ኢስታ ቁፌይ ፑዳ ያንጌቲ ኡቲደስ፤ ኢስታስ ኢሳስ ኢሳስ ናሞኡ ናሞኡ ቁፌይ ደስ፤ ኢሳ ኢሳ ቁፌይ ሃንኮይሳ ቁፌራ ዲሼቲ ኡቲደስ።

12 ኢስቲ ኡባይካ ሲቲ ጊዲ ሲንሐ ቤቲስ፤ ጉዬ ሲሞንታ ጸሓ ኣያናይ ቢዛሶ ኣዋካ ቤቲስ።

13 ሃ ሽምጉራ ፓጻ ዲዛ ሜዴቴላታ ሜዳይ ኤጲዛ ታማ ቦንቆኔ ጸምፔ ሚሳቴስ፤ ሄ ሽምጉራ ፓጻ ዲዛ ሜዴቴላታ ጊዶን ታማይ ያኔ ሃ ቃጾስ፤ ታማዚ ጳሌስ፤ ኢዛ ጊዶፊካ ዋልቃንሉ ኬዜስ።

14 ሃ ሽምጉራ ፓጻ ዲዛ ሜዴቴላታ ዋልቃንሉ ኤሶን ዋዋጪ ጊዛ ማላ ያኔ ሃ ሲሜራቴቴስ።

15 ታ ሃ ኦይዱ ሽምጉራ ፓጻ ዲዛ ሜዴቴላታ ጸላሼ፥ ኦይዱ ኣይፌሶቲ ሽምጉራ ፓጻ ዲዛ ሜዴቴላታ ማታን ኢሲ ኢሲ ኢርዞ ቢታ ቦላ ቤያዲስ።

16 ሄ ኢርዞታ ሜዳይኔ ሃኖታይ ሃይሳፌ ካሊዛይሳ ማላ፤ አልኦ ሹቻ ማላ ጸልቄቴስ፤ ኦይዱታ ሜዳይካ ኢሲ ማላ፤ ኢሲ ኢሲ ኢርዞይ ሃራ ኢርዞራ ቃጾቲ ኡቲዳ ሚሳቴስ።

17 ኢስቲ ቢዛ ዋዴ ሜዴቴላታ ኦይዱ ባጋ ዩያና ዳንዳዬቴስ፤ ሜዴቴላታ ቢዛ ዋዴ ኢርዞቲ ያኔ ሃ ጌቴና።

18 ሄ ኦይዱ ኢርዞታስ ኦቮቮይ ዴስ፤ ሃ ኦይዱ ኢርዞቲ ጊታኔ ባቢሲዛዛ፤ ዩዪ ኣዳናስካ ኢስታን ኣይፌቲ ኩሚዳ።

19 ሃ ሽምጉራ ፓጻ ዲዛ ሜዴቴላታ ቢዛ ዋዴ ኢስታ ሚሌን ዲዛ ኢርዞቲካ ቤቴስ፤ ሄ ሽምጉራ ፓጻ ዲዛ ሜዴቴላታ ቢታፌ ፑዴ ዴንዲዛ ዋዴ ኢርዞቲካ ኢስታራ ኢሲፌ ዴንዴቴስ።

20 ጸሳ ኣያናይ ቢዛሶ ኣዋካ ኢስቲ ቤቴስ፤ ኣያናይ ኢስታ ጊዶን ዲዛ ጊሻሰ ኢርዞቲ ኢስታራ ኢሲፌ ፑዴ ዴንዴቴስ።

21 ዴኦይ ዲዛ ሜዴቴላታ ቢዛ ዋዴ ኢርዞቲካ ቤቴስ፤ ኢስቲ ኤቁዛ ዋዴ ኢርዞቲካ ኤቄቴስ፤ ቃሴ ኢርዞቲ ኢስታራ ኢሲፌ ፑዴ ዴንዴቴስ።

22 ሃ ሽምጉራ ፓጻ ዲዛ ሜዴቴላታ ሁኤፔ ቦላራ ባቢሲዛኔ ማሰቶቴ ማላ ጸልቄዱ ኣይፌ ጫዲዛ ሳሎ ጉፋንሶ ሚሳቴዛይ ሚጨቴ ዴስ።

23 ሄ ሳሎ ጉፋንሶዛፔ ጋርሳ ባጋራ ኢስታ ቂፌይ ሲቲ ጊዲ፥ ኢሶይ ኢሳኮ ሚጨቴ ኡቲዴስ፤ ቃሴ ኢስታ ኡባሲካ ኢስታ ቦላ ካሚዛ ናምኡ ናምኡ ቂፌይ ዴስ።

24 ሃ ሽምጉራ ፓጻ ዲዛ ሜዴቴላታ ፒራዲዛ ዋዴ ኢስታ ቂፌታ ጊሪሳ ሲያዲስ፤ ሄ ጊሪሳይ ዲኦ ሃላ ጉንሳ ማላ፥ ኡባ ዳንዳይዛ ጸሳ ጨንጉርሳ ማላኔ ጮራ ኦላንቻታ ዋጫማ ማላ ሃኒዛይሳ ሲያዲስ። ኢስቲ ፒራዲ ኣጊዛ ዋዴ ባንታ ቂፌዛ ሺጽ ሂስቴቴስ።

25 ኢስቲ ፒራዲዛይሳ ኣጊዲ ባንታ ቂፌዛ ሺሺዳ ማላ ኢስታ ሁኤፔ ቦላራ ዲዛ ሳሎ ጉፋንሶፌ ቦላራ ጊሪሲ ሴቴቲዴስ።

26 ኢስታፌ ቦላራ ዲዛ ሳሎ ጉፋንፊፌ ቆቁ ጊዲ ሲምፔሬ ኣራታ ሚሳቲዛይ ዴስ፤ ሄ ኣራታ ቦላ ኣስ ሚሳቲዛይ ኡቲዴስ።

27 ኢዛስ ጸስ ሚሳቲዛሶፔ ፑዴ ባጋይ ታማን ቦንቂዳ ቢራታ ሚሳቲዛይ፤ ጸስ ሚሳቲዛሶፔ ዲጌ ባጋይ ታማ ሚሳቲዛይ፤ ቤኣዲስ፤ ኢዛ ዩሾን ጳሊዛ ፖኦይ ዴስ።

28 ኢዛ ዩሾን ዲዛ ጳሊዛ ፖኦይ ኢራ ጋላስ ሻራ ቦላ ኤቂዳ ዙላ ሚሳቲስ።

ሄሲካ ጎዳ ቦንቾ ቆንጩል ሚሳቲስ። ታኒ ሄሳ ቤኢዳ ዎዴ፤ ቢታን ዲጌ ጉፋናዳ ኢሳዴ ሃሳያ ጩንጉርስ ሲያዲስ።

2

ናቤቱላስ ሂዘቁላ ጸይጌቲል

1 ኢዚ ታና፤ «ሃይሶ ኣሳ ናዉ! ዴንዳ ኔ ቶሆን ኤቃ፤ ታኒ ኔስ ዮታና» ጊዴስ።

2 ኢዚ ታስ ዮቲሺን ጸሳ ኣያናይ ታ ጊዴ ጌሊዲ ታና ታ ቶሆን ኤሲዴስ። ኢዚ ታስ ዮቲዛይሳካ ሲያዲስ።

3 ኢዚካ ታስ፤ «ሃይሶ ኣሳ ናዉ! ታ ቦላ ማካሊዳ ማካላንቻ ዴፌ ኢስራኤል ኣሳኮ ታ ኔና ኪታይስ፤ ኢስቲኔ ኢስታ ኣዋቲ ሃቕ ጋካናስካ ታ ቦላ ማካሊዳ።

4 ኢስቲ ዬላይ ባይንዳይታኔ ዎዚና ሙሚታ ጊዲዳ ጊሻስ ታኒ ኔና ኢስታኮ ኪታይስ። ኔ ባዳ ኢስታስ፤ ሓባ ሃሪዛ ጎዳይ ዮቲዴስ) ጋ ዮታ፤

5 ኢስቲ ማካላንቻ ኬል ጊዲዳ ጊሻስ ኢስቲ ሲዪኮካ ሲዮንታ ኢጲኮካ ኢስታ ጊዴን ናቤይ ዲዛይሳ ኢስቲ ኤራና።

6 ሃይሶ ኣሳ ናዉ! ኢስታስ ዎይኮ ኢስታ ቃላስ ባቦፋ! ኣጉንፊኔ ኪንዲቾይ ኔ ዩሾን ዲኮካ ቃሴ ማሲማሶታ ጊዴን ኔ ኡቲኮካ ባቦፋ። ኢስቲ ማካላንቻ ዛሬ ጊዲኮካ ኢስቲ ኔና ጊዛይሳስ ባቦፋ፤ ኢስታስ ዳጋሞፋ።

7 ኢስቲ ማካላንቻ ዛሬ ጊዲዳ ጊሻስ ኢስቲ ሲዪኮካ ሲዮንታ ኢጲኮካ ታ ቃላ ኢስታስ ዮታ።

8 ኔኒ ጊዲኮ ሃይሶ ኣሳ ናዉ! ታ ኔስ ዮቲዛይሳ ሲያ! ሄ ማካላንቻ ዛሬታ ማላ ማካሎፋ፤ ኔ ዶና ዶያዳ ታኒ ኔስ ኢሚዛይሳ ማ» ጊዴስ።

9 ሄሳፌ ጉዬ ታኒ ጸሊሺን ኢሲ ኩሼይ ታኮ ሚጩቲዳይሳ ሄራካ ቤኣዲስ፤ ሄ ኩሼዛን ጸሳ ማጻፋይ ዴስ።

10 እዚ ታ ሲንፋን ሄ ጸፋ ማጸፋ ቢርሺዴስ፤ ሄ ጸፋ ማጸፋን ጊዶ ባጋራኔ ካሬ ባጋራ ዚላሲ፤ ዬሆይኔ ዋሶ ቃላይ ጸፊቲ ኡቲዴስ።

3

1 ቃሴ እዚ ታስ፤ «ሃይሶ አሳ ናዉ! ሃይሳ ኔ ሲንፋን ዲዛይሳ ማ፤ ሃይሳ ጸፋ ማጸፋ ማዳኔ ባዳ ኢሰራኤል አሳሰ ዮታ» ጊዴስ።

2 ሂስቲን ታ ሃንጊን እዚ ታና ጸፋ ማጸፋ ባርሲዴስ።

3 ሂስቲዲ እዚ ታና፤ «ሃይሶ አሳ ናዉ! ሃ ታኒ ኔና ባርሲዛ ጸፋ ማጸፋዛ ማ፤ ኔ ኡሎ ኢዛን ኩንፋ» ጊዴስ። ታ ሚን ታ ዶናን ኤሳ ማላ ማልኢዴስ።

4 ሄሳፌ ጉዬ እዚ ታና፤ «ሃይሶ አሳ ናዉ! ዴንዳዳ ኢሰራኤል አሳኮ ባ፤ ታ ቃላካ ኢስታስ ዮታ።

5 ኔኒ ኪቲቲዳይ ኢሰራኤል አሳሳፌ አቲን ኢስታ ሃሳያይ አሳሰ ጌሎንታ ዴሬኮኔ ቃላይ ኤሬቶንታ ዴሬታኮ ጊዴና።

6 ቃሴ ታኒ ኔና ኢስታ ሃሳያይ አሳሰ ጌሎንታ ዴሬታኮ፤ ቃላይ ኤሬቶንታ ዴሬታኮ፤ ኢስታ ቃላ ኤራናስ ዳንዳዬቶንታ ዳሮ ዴሬታኮ ከታቤከ፤ ቱማ ጋይስ ታኒ ኔና ኢስታኮ ከቲዳኮ ኢሰቲ ኔኒ ዮቲዛይሳ ሲያና።

7 ጊዶ አቲን ኢሰራኤል አሳይ ዘባኔ ዎዚና ሙሜ ጊዲዳ ጊሻስ ታ ዮቲዛይሳ ሲያና ኮዪቤቲና፤ ሄሳ ጊሻስ ኢሰቲ ኔ ዮቲዛይሳካ ሲዬቲና።

8 ቤኣ ታኒ ኔና ኢስታስ ሲንፋ ኢሞንታ ሚኖ አሰ ሂስታና።

9 ታኒ ኔና ዬላይ ባይንዳዴኔ ዛላፊካ አፂዳ ሚኖ ሂስታና፤ ኢሰቲ ማካላንቻ ዛሬ ጊዲኮካ ኢስታስ ባቦፋኔ ኮኮሮፓ» ጊዴስ።

10 ቃሴ እዚ ታና፤ «ሃይሶ አሳ ናዉ! ታኒ ኔስ ዮቲዛ ቃላ ኡባ ሚንፋዳ ኡዘጋኔ ኔ ዎዚናን ዎፋ።

11 ሃኢ ባዳ ዲኤቲ ዲዛ ኔ አሳሰ ዮታ። ኢሰቲ ሲዬን ሲዮንታ ኢጺን ኢስታስ፤ ሩኡባ ሃሪዛ ጎዳይ ሃይሳ ማላ ጌስ፤ ጋዳ ዮታ» ጊዴስ።

12 ሄሳፌ ጉዬ ታና አያናይ ፑዴ ጶቁ ሂስቲ ዴንፊዴስ፤ ጎዳ ቦንቾይ ባ ዲዛሶፔ ዴንዲሺን * ታፔ ጉዬ ባጋራ ዎልቃማ ጉጉንፋ ጨንጉርስ ሲያዲስ።

2:10 እጁ 5:1 3:3 እጁ 10:9-10 * 3:12 ጎዳ ቦንቾይ ባ ዲዛሶፔ ዴንዲሺን ጊዛይሳ ኢሲ ኢሲ ጌሻ ማጸፋታን ጎዳ ቦንቾይ እዚ ዲዛሶን ጋላቲቶ ጌስ

13 ቃሴ ሸምፖራ ፓጻ ዲዛ ሜዴቴላታ ቁፌይ ኢሶይ ኢሳራ ቦሼቲሼኔ ኢስታ ሚሌን ዲዛ ኢርዞቲ ሲሲዛ ዋልቃማ ጉጉንላ ጩንጉርሲ ዴስ።

14 ሄሳፌ ጉዬ ታና ኢያናይ ፑዴ ቶቁ ሂሰቲ ሃራሶ ኤፌዴስ፤ ታኒ ጫሞኒኔ ሃንቆ ኢያናን ኩማዳ ባዲስ፤ ጎዳ ጌታ ዋልቃይ ታና ኦይኪዴስ።

15 ኮቦሬ ሻፋ ማታን ቱሊ-አቢቤን ዲኤቲ ዲዛይታኮ ያዲስ፤ ታኒ ዳጋማዳ ኢስታ ጌዶን ላፑን ጋላስ ኡታዲስ።

ሂዘቁላ ሹሜቱል

(ሂዘ. 33:1-9)

16 ላፑንላ ጋላስ ወርሴላን ጎዳ ቃላይ ታኮ ዪዴስ፤

17 ኢዚካ፡ «ሃይሶ አሳ ናዉ! ታኒ ኔና ኢስራኤሌ አሳ ቦላ ናጌ ሂሰታ ሹማዲስ፤ ሄሳ ገሻስ ታ ዶናፔ ኬኢዛ ቃላ ሲያ፤ ታ ኔስ ዮቲዛ ሴራካ ኢስታስ አላ።

18 ታኒ ናጋራንቻዛ፡ «አዳ ኔኒ ሃይቃና» ጌዛ ዋዴ ኔኒ ኢዛ ሴርንታ አጊኮ ዋይኮ ኢዚ ባ ኢታ ሃኖፔ ሲማና ማላኔ ባ ሸምፖ አሻና ማላ ኔ ዮቶንታ አጊኮ ሄ ናጋራንቻይ ባ ናጋራን ሃይቃና፤ ኔናካ ኢዛ ሱላ ገሻስ ታ ኦይቻና።

19 ጌዶ አቲን ኔኒ ናጋራንቻ ሴሪን ኢዚ ባ ናጋራፔኔ ባ ኢታ ሃኖፔ ሲሞንታ ኢጲኮ ኢዚ ባ ናጋራን ሃይቃና፤ ኔኒ ጌዲኮ ኔ ሸምፖ አሻና» ጌዴስ።

20 «ቃሴ ጸሎ አሲ ባ ጸሎቴላፌ ጉዬ ሲሚዲ ናጋራ ኦሊኮ ታኒካ ቆጶዚ ሚሽ ኢዛ ሲንላን ዋሊኮ ኢዚ ሃይቃና፤ ኔኒ ኢዛ ሴርንታ ገሻስ ኢዚ ባ ናጋራን ሃይቃና፤ ኢዚ ካሴ ኦሊዳ ጸሎ ኦሶይ ዛሪ ቆፌቱና፤ ታኒ ኔና ኢዛ ሱላ ኦይቻና።

21 ጌዶ አቲን ጸሎ አሲ ናጋራ ኦቶንታ ማላ ኔኒ ሴሪኮ፡ ኢዚ ኔ ሴራ ሲዪዲ ናጋራ ኦቶንታ አጊኮ፡ ቱሙካ ሸምፖራ ፓጻ ዳና፤ ኔካ ኔ ሸምፖ አሻና» ጌዴስ።

ሂዘቁላ ዶና ዲዴቱል

22 ሄን ጎዳ ዋልቃይ ታና ኦይኪዴስ፤ ኢዚካ ታና፡ «ዴንዳዳ ቆልታቲዛ ዴምባ ባ፤ ሄን ታኒ ኔስ ዮታና» ጌዴስ።

23 ታኒካ ዴንዳዳ ቆልታቲዛ ዴምባ ባዲስ፤ ካሴ ኮቦሬ ሻፋ ማታን ታኒ ቤኢዳ ቦንቾዛ ማላ ጎዳ ቦንቾይ ኤቂዳይሳ ሄን ቤኢዲስ፤ ታኒካ ሲንላ ጉል ጉፋናዲስ።

24 ኢያናይ ታ ጌዶ ጌሊዲ ታና ታ ቶሆን ኤሲዴስ፤ ሂሰቲዲ ታና፡ «ባ፤ ኔ ሶሆ ጌላዳ ኔ ቦላ ፔንጌ ጎርዳ።

25 ሃይሶ አሳ ናዉ! ዋደሮን ዋጺዲ አሳ ጊደን ሲመሬቶንታ ማላ ኢስቲ ኔና ቃቻና።

26 ኢስቲ ማካላንቻ ዴሬ ጊዲዳ ገሻሰ ኔ ኢስታ ሙሮንታ ማላ ኔ ኢንጸርሳ ታ ጎንጊራላራ ኦይፋና፤ ኔኒካ ዶና ዲዴ ገዳና።

27 ጊዶ አቲን ታኒ ኔሰ ፍቲዛ ዋዴ ታኒ ኔ ዶና ደያና፤ ኔኒካ ኢስታስ፡ «ኡባ ሃሪዛ ጎዳይ ሃይሳ ማላ ጌሰ» ጋና። ኢስቲ ማካላንቻ ዴሬ ጊዲዳ ገሻሰ ሲያና ኮይዛይ ሲዮ፤ ሲዮንታ ኢጺዛይ ሲዮ።» ጊዴሰ።

4

ሂዘቁላ ዩሩሳላሜ ገሻሰ ፍቲዳ ለሚሶ

1 «ሃይሶ አሳ ናዉ! ኡርቃፌ ሜዴቲዳ ኢሲ ጸቤ ኤካዳ ኔ ሲንላን ዋላ፤ ሂስታዳ ዩሩሳላሜ ሚሰሌ ኢዛ ቦላ ኦላ።

2 ሂስታዳ ዋታዳሪይ ጊዶሊዛ ማላ ኢዞ ጊዶላ፤ ሚጸ ኢዚን ገጊሳ፤ ቢታ ሺሻ ዶራ፤ ኦላ ዋሳናታ ኢዚ ዩሾን ገጊሳ፤ ገምቤዛ ላሊዛ ዱሩማ ኢዚ ዩሾን ዋጸ።

3 ቃሴ ቢራታ ባሼ ኤካዳ ኔፔኔ ካታማፔ ጊደን ቢራታ ገምቤ ማላ ኤሳ። ኔ ሲንላ ኢዚኮ ዛራዳ ዴሬቃ፤ ኢዛ ዶዴቲዳር ገዳና፤ ኔካ ኢዞ ዶዳና። ሂሲካ ኢሰራኤሌ አሳሰ ማላታ ገዳና።

4 «ታኒ ኢሰራኤሌ ኬላ ሙሪዛይሳሰ ማላታ ገዳና ማላ ኔኒ ሃዲርሳ ሚሌን ኢቻ፤ ኔኒ ሃዲርሳ ሚሌን ኢቹዳ ዋዴታ ኡባን ኢሰራኤሌ ኬላ ባላ ማላ ገዳና ማላ ቤሳና።

5 ኢሰራኤሌ ኬላይ ባ ባላን ዋኒ ቃጸዬታናኮ ኔ ቤሳና ማላ ታ ኔሰ 390 ጋላሳታ ኢማዲሰ፤ ኢሲ ኢሲ ጋላሳይ ኢስቲ ቃጸዬታና ኢሲ ኢሲ ላይላ ቤሴሰ።

6 «ሂሳፌ ጉዬ ኔኒ ኡሻቻ ሚሌን 40 ጋላሰ ኢቻ፤ ሂሲ ዩሁዳ አሳይ ባ ባላን ዋኒ ቃጸዬታናኮ ቤሲዛ ማላታ ገዳና፤ ኢሲ ኢሲ ጋላሳይ ኢስቲ ቃጸዬታና ኢሲ ኢሲ ላይላ ቤሴሰ።

7 ኔ ሲንላ ዩሩሳላሜ ዶዴቲላኮ ዛራዳ ዴሬቃ፤ ኔ ኩሼ ዴንላዳ ማንዳሼ ቲንቢቲ ኢዚ ቦላ ዮታ።

8 ሂ ዶዴቲላ አገናይ ዉራና ጋካናሰ ኔ ሚሌ ሺሮንታ ማላ ታ ኔና ዋደሮን ቃቻና።

9 «ሃኢ ኔኒ ገሰቲኔ ባንጋ፤ ባኤላኔ ሚሲራ፤ ማሊዶኔ ሙርቃ ኤካዳ ኦቶን ዋላ፤ ኢዛፔ ካላ ማ፤ ሂስታዳ ኔኒ ሃዲርሳ ሚሌን ኢቻ ዲዛ 390 ጋላሳታን ማና።

10 ሃቾ ሃቾ ኔ ማና ካላ ጌዳራ ዋላ፤ ኢዛ ዋዴን ዋዴን ኢሲ ዞላ ማ።

11 ኔ ኡያና ሃላካ ማካ ዋላ፤ ሄሳ ኢዛ ዋዴን ዋዴን ናምኡ ኩባያ ኡያ።

12 ሄ ዋላኬቲዳ ካላ ኤካዳ ዴራ ሲንላን ባንጋ ኡኬላ ማላ ሺኣ ኬፊን ኡካዳ ማ።»

13 ጎዳይካ፡ «ሄሳ ማላ ሃኖታን ኢሰራኤሌ አሳይ ታኒ ኢሰታ ላላና ካዋቱላታ ጊዶን ኢሰቲ ቱና ካላ ማናይሳሰ ማላታ» ጊዴሰ።

14 ሂሰቲን ታኒ ዛራዳ፡ «ሃይ! ኡባ ሃሪዛ ጎዳዉ! ሙሊካ ታ ሄሳ ማላን ቱና ኤሪኬ፤ ታኒ ዬላጋቱላፌ ዶማዳ ባዉታ ዋይኮ ዶኣይ ዋዲዳይሳ ማ ኤሪኬ፤ ቱኒዳ አሾይካ ታ ዶናኮ ሸቂ ኤሬና» ጊዴሰ።

15 ኢዚካ ታና፡ «ኤሮ ሎኦ፡ ሺኣ ኬፊን ኡከዛይሳ አጋዳ ኦሻ ኬፊን ኡካ» ጊዴሰ።

16 ቃሴካ ጎዳይ ታና፡ «ሃይሶ አሳ ናዉ! አኬካ፤ ታኒ ዬራሳላሚሰ ካሊ ዪዛሶታ ዱላና ሃናይሰ፤ አሳይ ካላ ሂርጊሼ ማካን ማና፤ ሃላካ ያዪሼ ጉላራ ኡያና።

17 ሄሳን ኢሰታሰ ዲዛ ካሊኔ ሃሊ ፓጫና፤ ኢሶይ ኢሳ ቤኢሼ ጮልኡ ጋና፤ ኢሰቲ ባንታ ናጋራ ጋሶን ጊልቂ ጳያና።

5

ዬራሳላሚ ቦላ ዪዛ ባሻ ማላታ

1 «ሃይሶ አሳ ናዉ! ቃራ ማሻ ኤካዳ ማጋላን ሜዲዛ ማላ ኔ ሁኤኔ ኔ ቡቹ ኢዛን ሜዳ። ሂሰታዳ ኔ ቢናና ሜዛኔን ጌዳራዳ ሄዙ ኬሳ ሻካ።

2 ኔ ዶዲዛ ዋዴይ ዉርሺን ኔኒ ሻኪዳ ቢናናሰ ኢሲ ኩሼዛ ዬራሳላሚ ካታማ ሚሰሌ ጊዶን ጹጋ፤ ናምኣንሉ ኩሼዛ ካታማይ ዩሾን ጊላ ማሻን ቃንጾሬላ ዬጋ፤ አቲዳ ሄዳንሉ ኩሼዛ ጫርኮ ቦላ ላላ፤ ታኒ ኢሰታ ማሻን ዬዴሬላና።

3 ቢናናፔ ጉል ኤካዳ ኔ ሴሎ ማይኦ ጸራን ቃቻ።

4 ቃሴ ሄ ቢናናፌ ጉላራ ኤካዳ ታማን ጹጋ፤ ታማይ ሄፔ ኬዚዲ ኢሰራኤሌ አሳ ማና» ጊዴሰ።

5 ኡባ ሃሪዛ ጎዳይ፡ «ዴሬታ ኡባ ኢዚ ዩሾን ዋላዳ ካዋቱላታ ጊዶን ዋሊዳ ዬራሳላሚ ካታማያ ሃኖ።

6 ጊዶ አቲን ኢዛ ባ ኢታ ኦሶን፡ ባ ዩሾን ዲዛ ቢታታፔኔ ካዋቱላታፔ ጌዴ ኢታዳ ታ ዋጋ ቦላኔ ማራ ቦላ ማካላዴሰ፤ አዳካ ኢዛ ታ ዋጋ ካዳዲሰ፤ ታ ማራካ ካላቤኩ» ጌሰ።

7 ሄሳ ጊሻሰ ኡባ ሃሪዛ ጎዳይ፡ «ኢንቲ ኢንቲ ዩሾን ዲዛ ካዋቱላታፔ አዲ ጨቦቲዛይታ ጊዲዴታ፤ ታ ማራ ካሊቤኬታ፤ ታ

ዎጋሰካ አዛዜቲቤኬታ፤ ሃራይ አቶሺን አንቴ ዩሾን ዲዛ ካዎቴላቲ ናጊዛ ዎጋዮካ ናጊቤኬታ» ጌሰ።

⁸ ሄሳ ጊሻሰ ኡባ ሃሪዛ ጎዳይ፥ «ሄኮ፥ ታኒ ታ ባጋራ ኔ ቦላ ዴንዳዲሰ፤ ካዎቴላታ ሲንላን ታኒ ኔ ቦላ ፒርዳ ኤሃና።

⁹ ኔ ሃራሲዛ ኤቃ ጸሳታ ጎይኒዳ ጋሶን ታኒ ሃይሳፌ ካሴ ኦላ ኤርንታ ሚሺኔ ሃይሳፌ ጉዬካ ኦሶንታ ሚሽ ታ ኔ ቦላ ኦላና።

¹⁰ ሄሳፌ ዴንዲዳይሳን ኔ ጊዶን አዋቲ ባንታ ናይታ፥ ናይቲ ባንታ አዋታ ማና፤ ታ ኔ ቦላ ፒርዳ ኤሃና፤ ኔፔ አቲዳይታ ታኒ ጫርኮን ላላና።

¹¹ ሄሳ ጊሻሰ ኡባ ሃሪዛ ጎዳይ፥ ታኒ ዴኦ ጸሳ ጊዲዳይሳን ጫቃይሰ፡ ኔኒ ታ ኬላ ቱና ሚሰሌታኒኔ ሃራሲዛ ኔ ኦሶ ኡባን ቱኒሲዳ ጊሻሰ ታ ኔና ቡጫ ጳይሳና፤ ታ ኔና ቃጴታ አይፌን ጸሊኬኔ ማሪኬ።

¹² ኔ አሳፔ ኢሲ ኩሼይ ካታማ ጊዶን ኢታ ሃርጌኒኔ ኮሻን ሃይቃና፤ ናምኣንሶ ኩሼይ ካታማ ጊምቤፌ ካሬራ ማሻን ጩራና፤ አቲዳ ሄቫንሶ ኩሼዛ ታኒ ጫርኮሰ ላላና ኔ ማሻ ሾዳ ዬዴላና።

¹³ «ሄሳፌ ጉዬ ታ ሃንቆይ ዶቻና፤ ኢሰታ ቦላ ቦሻይካ ሲማና፤ ታ ኢሰታ ቦላ ሃሎ ኬሲኮ ታሰ ዎፑ ጋና፤ ታ ኢሰታ ቦላ ባሻ ጋሏዳፔ ጉዬ ታኒ ጎዳይ ዚልኤታ ሃሳይዳይሳ ኢሰቲ ኤራና።

¹⁴ «ኔ ዩሾን ዲዛ ካዎቴላታ ጊዶን ኔ ማጉራ አጲዛ ኡባ ሲንላን ታኒ ኔና ቡላሳና ኔ ቂጴሰ አላ ኢማና።

¹⁵ ሃንቆኒኔ ቦሻን ቃሴካ ዩሎኒኔ ሃንቆን ታ ኔ ቦላ ፒርዳ ኤሂዛ ዎዴ ኔ ዩሾን ዲዛ ካዎቴላታሰ ኔኒ ቂጴሲኔ ሚቻሰ፥ ሴራሲኔ ዳጋማሰ ማላታ ጊዳና። ታኒ ጎዳይ ሃይሳ ዮታዲሰ።

¹⁶ ዱኪዛ ዎንዳፌ ማላ ዎጲዛኔ ጳይሲዛ ኮሻ ታ ኢንቴ ቦላ ዬዲዛ ዎዴ ቱማፔ ታ ኢንቴና ጳይሳናሰ ዬዳይሰ፤ ታ ኢንቴሰ ኮሻ ቦላ ኮሻ ኤሃና፤ ታኒ ካሊ ዩዛሶ ሜሊሳና።

¹⁷ ታኒ ኮሻኔ ዎራ ዶኣታ ኢንቴ ቦላ ዬዳና፤ ኢሰቲካ ኢንቴና ናይ ባይንዳይታ ኦላና፤ ታ ኢንቴ ቦላ ኢታ ሃርጌ፥ ሱሊኔ ማሻ ኤሃና፤ ታኒ ጎዳይ ሃይሳ ዮታይሰ» ጌሰ።

6

ኢሰራኤል ዙምቡላታ ቦላ ዮቴቲዳ ቲንቢቲ

¹ ጎዳ ቃላይ ታኮ ዩዲ፥

2 «ሃይሶ አሳ ናዉ! ኔ አይፌሶ ፑዴ ኢሰራኤሌ ዙምቡላታኮ ዛራዳ ሃንቁታሼ ኢስታ ቦላ ቲንቢቲ ዮታ።

3 «ኢሰራኤሌ ዙምቡላቶ! ኡባ ሃሪዛ ጎዳ ቃላ ሲዪቴ! ኡባ ሃሪዛ ጎዳይ ዙምቡላታሰ፡ ፖጎኖታሰ፡ ካካታሲኔ ዙሌታሰ፡ ታ ኢንቴ ቦላ ማሻ ኤሃና፤ ኢንቴ ኢስታ ቦላ ጎይኒዛሶሆታካ ጳይሳና።

4 ኢንቴ ኢስታ ቦላ ያርሾ ያርሺዛሶሆቲካ ላሌታና፤ ቃሴ ኢንቴ ኢስታ ቦላ ኤጻኔ ጩዋሲዛሶሆቲካ ሜቄሬታና፤ ሹኬቲዳ ኢንቴ አሳታ ኢስታሰ ጎይኒዛ ኤቃ ጸሳታ ሲንላን ታ ዬጋና።

5 ታኒ ኢሰራኤሌ አሳ አሃ ኢስታ ኤቃታ ሲንላን ኢቺሳና፤ ኢንቴ ሜቄላታካ ኢንቴ ያርሺዛሶሆታ ዩሾን ላላና።

6 ኢንቴ ኢስታን ዲዛ ካታማቲ ኡባይ ካይሰ ጊዳና፤ ኢንቴ ጎይኒዛሶቲ ኡባይ ላሌታና፤ ሄሳዶካ ኢንቴ ያርሺዛሶሆቲ ቱናናኔ ላሌቲ ጳያና፤ ኢንቴ ኤቃ ጸሳቲ ኒፒ ጊ ሜቄሬታና፤ ኢንቴ ኤጻኔ ያርሺዛሶሆቲ ኒፒ ጊ ሜቄሬታና፤ ኢንቴ ኩሼ ኦሶቲ ዲፒ ጊ ጳያና።

7 ኢንቴ አሳይ ሹኬቲዳ ኢንቴ ጊዶን ኩንዳና፤ ታኒ ጎዳ ጊዲዳይሳ ኢንቴ ሄሳን ኤራና።

8 « (ታኒ ኢንቴፌ ማሻፌ ኬሲ ኤኪ አቲዳ ጉላታ አሻና፤ ሄሳፌ ጉዬ ካዋቱላታ ጊዶኒኔ ዳሬታ ጊዶን ኢንቴና ታ ላላና።

9 ሃይቲ ሃይቆፔ አቲዳይቲ ዲኤቲ ቢዳሶን ዲሼ ኢስቲ ታና ቆፓና፤ ኢስቲ ታፔ ሃኪዲ ላይማቱላን ኩሚዳ ዋዚናኒኔ ዚታይ ኩሚዳ ኤቃ ጸሳታ ካሊዛ ኢንቴ አይፌታን ታና ሚሺሲዴታ፤ ባ ኦሒዳ ኢታቲላፌኔ ሃራሲዛ ኤቃ ጸሳታፔ ዴንዲዳይሳን ኢስቲ ባርካ ባና ሃራሴታና።

10 ቃሴካ ታኒ ጎዳ ጊዲዳይሳ ኢስቲ ኤራና፤ ታኒ ኢስታ ቦላ ኢታ ሚሽ ኤሃና ጊዳይሲ ጮ ሃዳ ጊዳና።

11 « (ኡባ ሃሪዛ ጎዳይ፡ ዪሎን ኔ ኩሼ ባቃ፤ ኔ ቶሆንካ ቢታ ቃካሼ፡ ወ! ወይ) ጋ ዋሳ፤ ኢሰራኤሌ አሳይ ኦሒዳ ኢታቲላፌኔ ሃራሲዛ ሃኖፔ ዴንዲዳይሳን ማሻን፡ ኮሻኒኔ ኢታ ሃርጌን ወራና።

12 ሃሆን ዲዛይቲ ኢታ ሃርጌን ሃይቃና፤ ማታን ዲዛይቲ ማሻን ኩንዳና፤ ቃሴ ሼምፖራ ፓጻ አቲዳይቲ ኮሻን ወራና፤ ታ ሃንቆዛ ሃይሳ ማላን ኢስታ ቦላ ፖላና።

13 ኢስታ አሳፔ ሹኬቲዳይቲ ያርሾ ያርሺዛሶሆታ ዩሾ ኡባን፡ ኢስታ ኤቃ ጸሳታ ጊዶ ኡባን፡ ዙምቡላታ ቦላ ኡባን፡ ዙማታ ጾራ ቦላ ኡባን፡ ጨለላ ሚላ ጋርሳታን ኡባኒኔ ዋጋ ዋላታ ጋርሳታ ኡባን፡ ባንታ ኤቃ ጸሳታሰ ሳዊዛ ያርሾ ያርሺዛሶሆታ ኡባን ዬጌቲ አቲዳይታ ኢንቴ ቤኢዲ ሄ ዋዴ ታኒ ጎዳ ጊዲዳይሳ ኢንቴ ኤራና።

14 ታኒ ታ ኩሼዛ ኢስታ ቦላ ዴንፋና፤ ኢስቲ ዲዛሶሆታ ዲጌሃን ባዘ ቢታፌ ቢዲ ፑዴሃን ዲቢላ ጋካናስ ቡላ ሂስታና፤ ታኒ ጎዳ ጊዲዳይሳ ኢስቲ ሄ ዎዴ ኤራና» ጊዴስ።

7

ኢስራኤል ወርሴል

1 ጎዳ ቃላይ ታኮ ዩዲ፥

2 ታና «ሃይሶ አሳ ናዉ! ኡባ ሃሪዛ ጎዳይ ኢስራኤል ቢታስ፥ ሃይሶ ወርሴል! ቢታይ ቦላ ኦይዱ ባጋራካ ወርሴል ዩስ።

3 ሃኢካ ኔ ወርሴል ጋኪዴስ! ታኒ ታ ሃንቆዛ ኢንቴ ቦላ ጉሳና፤ ኢንቴ ሃኖ ማላ ታ ኢንቴ ቦላ ፒርዳና፤ ሃራሲዛ ኤቃ ጸሳታስ ኢንቴ ጎይኒዛ ጊሻስ ታ ኔስ ቤሲዛ ቂጻቴ አማና።

4 ታ ኢንቴና ቃዴታ አይፌን ጸሊኬ፤ ታ ኢንቴና ማሪኬ፤ ኢንቴ ሃኖታ ማላ ታ ኢንቴ ቦላ ፒርዳና፤ ኢንቴ ጊዶን ዲዛ ሃራሲዛ ኤቃ ጸሳታ ታ ቆንጨሳና፤ ታኒ ጎዳ ጊዲዳይሳ ኢንቴ ሄ ዎዴ ኤራና» ጊሴ።

5 «ኡባ ሃሪዛ ጎዳይ፥ ሂኮ ቦሻይ! ሴቴቴ ኤሮንታ ቦሻይ» ዩስ።

6 ወርሴል ጋኪዴስ! ወርሴል ጋኪዴስ! ኢንቴ ቦላ ዴንዲዴስ፤ ሂኮ ጋኪዴስ!

7 ኢንቴና ሃኖ ቢታይ ቦላ ዲዛይቶ! ኢንቴና ጳይሳና ፒርዳይ ኢንቴ ቦላ ጋኪዴስ፤ ዎዴዚ ጋኪዴስ፤ ዙምቡላታ ቦላ ኡፋይሳ ኢሊስ ጊዶንታ ሺሮይ ጋኪዴስ።

8 ሃኢ ማታን ታኒ ታ ሃንቆዛ ኢንቴ ቦላ ጉሳና፤ ታኒ ታ ሃንቆ ኢንቴ ቦላ ፖላና፤ ኢንቴ ሃኖታ ማላ ታ ኢንቴ ቦላ ፒርዳና፤ ሃራሲዛ ኤቃ ጸሳታስ ኢንቴ ጎይኒዛ ጊሻስ ታ ኢንቴስ ቤሲዛ ቂጻቴ አማና።

9 ታ ኢንቴና ቃዴታ አይፌን ጸሊኬ፤ ታ ኢንቴና ማሪኬ፤ ኢንቴ ሃኖታ ማላ ታ ኢንቴ ቦላ ፒርዳና፤ ኢንቴ ጊዶን ዲዛ ሃራሲዛ ኤቃ ጸሳታ ታ ቆንጨሳና፤ ታኒ ጎዳ ጊዲዳይሳ ኢንቴ ሄ ዎዴ ኤራና።

10 « ሂኮ ጋላሳ! ሄ ጋላሳይ ጋኪዴስ! ኢንቴ ባሻይ ኢንቴ ፔንጌን ዴስ! ኢታቴላ ጉፊይ ጉምቢዴስ፤ ኦቶሬቴል ጨዩዴስ።

11 ማካላይ ዲጫዳ ኢታቴል ሾጨዛ ጉፊ ጊዳዲስ፤ አሳፔ አይኮይካ አቴና፤ ኢስታ ጮራቴላፌ፥ ኢስታ አቆታፔኔ ኢስታ ቦንቾፌ አይኮይካ አቴና።

12 ዎዴዚ ጋኪዴስ፤ ጋላሳይካ ማቲዴስ! ሃንቆይ ዴፊ ኡባ ቦላ ጋኪዳ ጊሻስ ባይዚዛይ ጨጮፖ፤ ሻሚዛይካ ኡፋዬቶፎ።

13 ኢስቲ ናምኣይ ሽምፖራ ፓጻ ዲሺን ባይዚዳይሲ ባ ባይዚዳይሳ ዛርፖ፤ ሄሳቶካ ኩሜላ ኢስራኤል ቦላ ዮቴቲዳ ኣጂታይ ላሜቲና። ባ ናጋራ ጋሶን ኦኒካ ባ ሽምፖ ኣሻና ዳንዳዬና።

14 ታ ሃንቆይ ኣሳ ኡባ ቦላ ዪዳ ጊሻስ ኢስቲ ዛዬ ዛይኮኔ ኡባ ሚሽ ገገሲኮ ኦላሶ ባናይ ኦኒካ ዳና።

ኢስራኤል ናጋራ ጋሶን ያና ቂጻቲ

15 « ሳካራ ኦላይ ዳስ፤ ሶራ ኢታ ሃርጌይኔ ኮሻይ ዳስ፤ ካታማፔ ካሬን ዲዛይቲ ኦላን ዉራና፤ ካታማን ዲዛይቲ ኮሻኒኔ ኢታ ሃርጌን ዉራና።

16 ኢስታፌ ኬሲ ኤኪ ኣቲዛይቲ ሾባ ጊደፌ ጎዲን ሂርጊሼ ፒራጲ ቢዲ ዙምቡላ ቦላ ጉጉሚዛ ሃራጴታ ማላ ባንታ ናጋራ ጋሶን ዚላሊሽ ዙማ ቦላ ዳና።

17 ኩሼ ኡባይ ዶጫና፤ ያሻን ጉልባቲ ኡባይካ ሃጻና።

18 ኢስቲ ማቃ ማይኣና፤ ኢስቲ ዳጋማን ሺርታና፤ ኢስታ ኡባ ኣይፌሶይ ዬላ ማይኣና፤ ኢስታ ኡባ ሁኤይካ ቡሊሴታና።

19 ኢስቲ ባንታ ቢራ ኦጌን ኦላና፤ ኢስታ ዋርቃይካ ቱና ማላ ቆዳታና፤ ጎዳ ዋልቃማ ሃንቆ ጋላስ ኢስታ ቢራይኔ ዋርቃይ ኢስታ ኣሸና፤ ኢስታ ቢራይኔ ዋርቃይ ኢስቲ ናጋራን ኩንዳና ማላ ኢስታስ ቆጴ ጊዲዳስ፤ ቢራይኔ ዋርቃይ ኢስታ ካልሴና፤ ኢስታ ኡሎካ ኩሚና።

20 ኢስቲ ባንታ ሎኦ ኣሌቆን ኦቶሬቲዳ፤ ሄይታ ባንታ ሃራሲዛ ኤቃ ጸሳታኔ ማሲ ገገሲዳ ዬላቺዛ ሚሰሌታ ኦላናስ ጎኤቲዳ። ሄሳ ጊሻስ ታኒ ሄ ሎኦ ኣሌቆዛ ኢስታስ ቱና ኬሳና።

21 ታኒ ኢስታ ኣሌቆታ ኣላጋታስ ዲኦስ፤ ቢታ ቦላ ዲዛ ኢታታስ ቦንቃስ ኣላ ኢማና፤ ሄይቲካ ኢስታ ቱኒሳና።

22 ታኒ ታ ኣይፌሶ ሃራሶ ዛራና፤ ቦንቹቲዳ ታ ኬላ ፓንጋቲ ጌላናኔ ቱኒሳና።

23 « ሱሬ ፒርዳይ ቆዩን ቢታይ ሱላ ጉኮን ኩሚዳ ጊሻስ፤ ካታማያካ ማካላ ኦሶን ኩሚዳ ጊሻስ ኔኒ ሳንሳላታ ገኒሳ።

24 ካዋቴላታ ጋርሳፌ ዳሮ ኢታታ ኤሃዳ ኢስታ ኬላን ዲዛ ኣቆታ ታ ቦንቂሳና፤ ዋልቃማታ ኦቶሬቲል ታኒ ቆይሳና፤ ኢስቲ ጎይኒዛሶሆታ ቱኒሳና።

25 ሺርይ ዪዛ ዋዴ ኢስቲ ሳሮቴል ኮያና ሺን ዴሜቲና።

26 ሚቶይ ሜቶ ቦላ ቃሴ ኢታ ዮኦይ ኢታ ዮኦ ቦላ ያና፤ ኢስቲ ናቤፔ ኣጂታ ዴማናስ ባጴታና፤ ዋጋ ቲሚርቲይ ቄሴፔ፤ ዘሬይካ ጨማፔ ቆያና።

27 ካዎይ ዩካና፤ ሃላቃይ ሂደታ ቃንጻና፤ ሄ ቢታ ኣሳ ኩሼይ ባቦን ኮኮራና። ታኒ ኢስታ ኦሶ ማላ ኢስታስ ኢማና፤ ኢስቲ ሃራታ ቦላ ፒርዲዳ ማላ ታኒ ኢስታ ቦላ ፒርዳና። ታኒ ጎዳ ጊዲዳይሳ ኢስቲ ሄ ዎዴ ኤራና፡ ጌስ» ጊሼ ዪዴስ።

8

ጸሓፊ ኬላን ኤቃ ጸሓፊስ ጎይኖ

1 ኡሱፑንላ ላይላን፤ ኡሱፑንላ ኣገናን፤ ኢቻሻንላ ጋላሳን ታኒ ታሶን ኡታ ዲሺን፤ ዩሁዳ ጨማቲካ ታ ሲንላን ኡቲ ዲሺን፤ ኡባ ሃሪዛ ጎዳ ዎልቃይ ታና ኦይኪዴስ።

2 ታኒ ሄራካ ቲሺ ሂስታ ጸላሼ ኣሳ ና ሚሳቲዛ ሚስሌ ቤኣዲስ፤ ኢዛስ ጸስ ሚሳቲዛሶፔ ፑዴ ባጋይ ታማን ቦንቂዳ ቢራታ ሚሳቲዛይሳ፤ ጸስ ሚሳቲዛሶፔ ዲጌ ባጋይ ታማ ሚሳቲዛይሳ ቤኣዲስ፤ ኢዛ ዩሾን ጸሊዛ ፖኦይ ዴስ።

3 ኢዚካ ኩሼ ሚሳቲዛ ሚሽ ዩዲዲ ታ ሁኤ ቢናና ኦይኪዴስ፤ ኣያናይ ታና ሳኣፔኔ ሳሎፔ ጊዶን ዴንሒዲ ጸሓ ኣጃታን ዩሩሳላሜ ኤፊዴስ፤ ፑዴሃ ባጋራ ዲዛ ጸሓ ኬላ ጊዶ ዳባባ ጌሊዛ ፔንጌራ ጌልሒዲ፤ ጎዳ ቃናቴ ዴንሒዲ ኤቃ ጸሓይ ዲዛሶ ታና ኤፊ ጋሊዴስ።

4 ሄኮ ካሴ ታኒ ቆልታቲዛ ዴምባን ኣጃታን ቤኢዳ ኢስራኤሌ ጸሓ ቦንቾይ ሄን ዴስ።

5 ኢዚካ ታስ፡ «ሃይሶ ኣሳ ናዉ! ፑዴሃ ባጋ ዴላ» ጊዴስ። ታኒካ ጸላዲስ፤ ሄኮ ያርሾ ያርሺዛሶ ፔንጌፊ ፑዴሃ ባጋራ ጌሊዛሶ ቦላ ጎዳ ቃናቴ ዴንሒዲ ኤቃ ጸሓይ ዴስ።

6 ቃሴካ ኢዚ ታስ፡ «ሃይሶ ኣሳ ናዉ! ኢስራኤሌ ኣሳይ ታና ታ ጌሻ ኬላፊ ሃሳናስ ሃይሳን ኦሊዛ ሃራሲዛ ኤቃ ጸሓታስ ጎይኒዛይሳ ኔ ቤኣይ? ኔ ቡሮ ሃይሳፊካ ሃራሲዛ ኤቃ ጸሓታስ ጎይኖ ኔ ቤኣና» ጊዴስ።

7 ሄሳፊ ጉዬ ኢዚ ታና ዛጎ ፔንጌ ኤሂዴስ፤ ሄኮ ታኒ ጊምቤዛ ጸሊሺን ጸኤይ ቤቲዴስ።

8 ኢዚ ታና፡ «ሃይሶ ኣሳ ናዉ! ጎዳ ሉካ» ጊዴስ፤ ታኒካ ጊምቤዛ ኣሳ ሉካዳ ኢሲ ፔንጌ ዴማዲስ።

9 ቃሴካ ኢዚ ታና፡ «ኣኔ ጌላዳ ኢስታ ሃይሳን ኦሊዛ ሃራሲዛ ኤቃ ጸሓታስ ጎይኖ ኢታ ቱናቴላ ዴላ» ጊዴስ።

10 ታኒካ ጌላዳ ጸሊሽን ቲራን ጎሽቲዛ ሽምፖራ ፓጻ ዲዛ ማዴቱላቲኔ ዲማ ዲማ ቱና ዶኒቲ ኡባይ፡ ኢሰራኤል ኬላ ኤቃ ጸሳታ ሚሰሌ ኡባይ ገምቤዛ ቦላ ዩዩ ኣቆናሰ ዎጮቲዴሰ።

11 ኢሰታፌ ሲንላ ባጋራ ኢሰራኤል ኬላፌ ላፑን ታሙ ጨማቲ ኤቂ ዴቲሰ፤ ቃሴ ሳፋኔ ና ያኢዛኔያይካ ኢሰታ ጊዶን ኤቂዴሰ። ኡባይካ ኤጻኔ ጨዋሲዛ ሚሽ ባንታ ኩሼን ኦይኪ ዴቲሰ፤ ሎኦ ሳዎ ሳዊዛ ኤጻኔ ጨዋይ ቱሉ ጊ ኬዜሰ።

12 ቃሴ ጸሲ ታና፡ «ሃይሶ ኣሳ ናዉ! ኢሰራኤል ኬላ ጨማቲ ኢሶይ ኢሶይ ቆልኣ ጊዶን ቆማሶን ባንታ ኤቃ ሚሰሌ ኬላን ኢሰቲ ኦሊዛይሳ ቤያይ? ጋሶይካ ኢሰታ፡ ጎዳይ ኦና ቤዬና፤ ጎዳይ ቢታ ኣጊዴሰ» ጊዴሰ።

13 ቃሴካ ኢዚ ታና፡ «ሃሳፌካ ኣጂዛ ሃራሲዛ ኤቃ ጸሳታሰ ኢሰቲ ጎይኒዛይሳ ኔኒ ቡሮ ቤያና» ጊዴሰ።

14 ሃሳፌ ጉዬ ኢዚ ታና ጸሳ ኬላሰ ፑዴሃ ባጋራ ዲዛ ፔንጌዛኮ ኤሂዴሰ፤ ሄን ቲሙዜ ጌቲቲዛ ባንታ ኤቃ ጸሳሰ ዩኪዛ ማጫሳቲ ኡቲዳይሳ ቤያዲሰ።

15 ኢዚካ ታና፡ «ሃይሶ ኣሳ ናዉ! ሃይሳ ቤያይ? ሃሳፌካ ኣጂዛ ሃራሲዛ ኤቃ ጸሳታሰ ኢሰቲ ጎይኒዛይሳ ኔኒ ቡሮ ቤያና» ጊዴሰ።

16 ሃሳፌ ጉዬ ኢዚ ታና ጎዳ ኬላሰ ሶ ባጋ ዛጎ ኤፌዴሰ፤ ሄሳን ጸሳ ኬላ ፔንጌን ዳራንቻፌኔ ያርሺዛሶሆፔ ጊዶን ናምኡ ታማኔ ኢቻሽ ጊዲዛ ኣቱማሳቲ ዴቲሰ፤ ኢሰቲ ባንታ ዘኮ ጎዳ ኬላኮ፡ ባንታ ኣይፌሶ ኣርሼይ ሞኪዛ ባጋ ዛሪዲ ኣርሼሰ ጉፋኒ ጎይኔቲሰ።

17 ጎዳይ ታና፡ «ሃይሶ ኣሳ ናዉ! ሃይሳ ቤያይ? ዩሁዳ ኣሳይ ሃይሳን ኦሊዛ ሃራሲዛ ኤቃ ጸሳታሰ ኢሰቲ ጎይኒዛይሲ ላፋ ሚሹ? ኢሰቲ ቢታ ማካላ ኦሶን ኩንሊዲ ዛሪ ዛሪዲ ታና ሃንቁላናዉ ቤሲዜ? ሄኮ ኢሰቲ ታና ኣይ ማላ ጫዪዛኮ ታና ሃንቁላናሰ ባሰ ዳንዳዬቲዳ ኡባ ኢሰቲ ኦሊዛይሳ ቤኣ።

18 ሄሳ ጊሻሰ ታኒ ኢሰታ ቦላ ሃንቆን ያና፤ ታኒ ኢሰታሰ ቃጂቲኬኔ ኢሰታ ቦላ ያና ሃኖታፔ ታ ኢሰታ ኣሺኬ፤ ኢሰቲ ታኮ ዋሲኮካ ታ ሲዪኬ» ጊዴሰ።

9

ኤቃ ጸሳሰ ጎይኒዛይታ ሃይቆ

1 ሄሳፌ ጉዬ ታኒ ሲዩሺን ባ ቃላ ቆቁ ሂሰቲዲ፡ «ካታማዮ ቃጸያና ዶሬቲዳይቲ ባ ኦላ ሚሻ ኦይኪዲ ሃ ዬቶ» ጊ ዋሲሺን ሲያዲስ።

2 ሄኮ ጳይሲዛ ኦላ ሚሽ ባ ኩሼን ኦይኪዲ ኡሱፑን ኣሳቲ ፑዳሃ ባጋን ዲዛ ጋና ባጋ ፔንጌዛራ ዬዳ፤ ኢስታራ ላይኖ * ማይኢዲ፡ ባ ሚሌን ጸፊዛ ሚሽ ኮሮጀን ኦይኪዲ ኢሲ ኣሲ ዴስ። ኢስቲ ጊዶ ጌሊዲ ጸርቂማላፔ ኦሴቲዳ ያርሺዛሶ ላንቄን ኤቂዳ።

3 ሄሳፌ ጉዬ ኢስራኤሌ ጸሳ ቦንቾይ ኪሩቤፔ ቦላራ ካሴ ባ ዲዛሶፔ ዴንዲዲ ጸሳ ኬላ ዳርማቶ ቢዴስ። ጎዳይ ላይኖ ማይኢዲ ባ ሚሌን ጸፊዛ ሚሽ ኮሮጀን ኦይኪዲ ኣዴዛ ዴይጊዴስ።

4 ጎዳይ ዴይጊዲ ኢዛ፡ «ዬሩሳላሜ ካታማ ኡባ ባዳ ኢዚ ጊዶን ኦሴቲዳ ሃራሲዛ ኤቃ ጸሳታ ጊሻስ ሚሼቲዲ ዬኪዛ ኣሳታ ሊጴ ቦላ ማላታ ዋላ» ጊዴስ።

5 ታኒ ሲዩሺን ኢዚ ሃራታስ፡ «ኢዛ ጌዶ ካሊዲ ካሊዲ ካታማይን ዲዛ ዋጲቲ! ኦናካ ሚሼቲ ኣሾፍቲ።

6 ጨማታ፡ ናቴላታኔ ጌላኦታ፡ ማጫሳታኔ ጉላ ናይታ ኡባካ ሹኪቲ፤ ጊዶ ኣቲን ማላታራ ዲዛ ኣስ ኦናካ ቦቾፍቲ። ዋጲ ታ ኬላን ዶሚቲ» ጊዴስ። ሄሳ ጊሻስ ኢስቲ ጸሳ ኬላ ሲንላን ኤቂዲ ዋጲ ጨማታን ዶሚዳ።

7 ሄሳፌ ጉዬ ጎዳይ ኢስታስ፡ «ታ ኬላ ቲኒሲቲ፤ ዛጎታካ ኣሃን ኩንሲቲ፤ ቢቲ» ጊዴስ፤ ኢስቲካ ኬዚዲ ካታማ ጊዶን ኡባን ዩዪዲ ዋጲ ዶሚዳ።

8 ኢስቲ ዋጲን ዲሺን ታኒ ታርካ ሊጴ ቦላ ዱጌ ቢታን ጉፋናዳ ኣዬ ኣና! «ኣቤት ኡባ ሃሪዛ ጎዳዉ! ኔኒ ዬሩሳላሜ ቦላ ባሽ ዬዳዳ ኢስራኤሌ ኣሳፔ ኣቲዳ ጫሻታ ኡባ ጳይሳና ሃናይ?» ጋ ዋሳዲስ።

9 ኢዚ ዛሪዲ ታስ፡ «ኢስራኤሌ ኬላ ናጋራይኔ ዩሁዳ ኬላ ናጋራይ ኬሂ ዳሪዴስ፤ ቢታያ ሱላ ጸላ ጊዳዲስ፤ ቃሴ ካታማያ ጌላቲላን ኩማዲስ፤ ጋሶይካ ኣሳይ፡ ጎዳይ ቢታ ኣጊዴስ፤ ጎዳይ ቤኤና፡ ጌቲስ።

10 ሄሳ ጊሻስ ታኒ ኢስታስ ኢስታ ሃኖ ማላ ኢማና ኣቲን ታ ኢስታስ ቃጴቲኬ፤ ኢስታ ቦላ ዩዛ ሜቶፔ ታ ኢስታ ኣሺኬ» ጊዴስ።

* 9:2 ላይኖ፡ ላይኖ ጌቲቲዛይሲ ኣማራቃ ቃላን ቤፍታ ዋይኮ ሃሬ ጌቲቲስ። 9:4 ኣጂ 7:3፤ 9:4፤ 14:1

11 ሄሳፌ ጉዬ ላይኖ ማይኢዲ፥ ባ ሚሌን ጸፊዛ ሚሽ ኮሮጀን ኦይኪዳ ኢሳዳይ ሲሚዲ፥ «ኔኒ ታና ኣዛዚዳ ማላ ኦላዲሰ» ጌዴሰ።

10

ጎዳ ኬላፌ ጸሳ ቦንቾ ሻኬቲል

1 ታኒ ጸሊዛ ዋዴ ሲምፔሬ ጌቲቲዛ ኢንቁፌ ኦሴቲዳ ኣራታ ሚሳቲዛይ ከሩቤታ ሁኤ ቦላ ሳሎ ማላ ሚጨቲ ዲዛ ሚሽ ቤኣዲሰ።

2 ጎዳይ ላይኖ ማይኢዳ ኣዴዛ፥ «ከሩቤታፔ ጋርሳ ባጋራ ኢርዞታ ጊዶራ ካንላዳ ባ፤ ሂሰታዳ ታማ ቦንቆ ኔ ኩሼን ኩጳታ ኤካዳ፥ ካታማይ ቦላ ላላ» ጌዴሰ። ታ ጸሊሺን ኣዴዚ ታማ ኤካናሰ ጌሊዴሰ።

3 ኣዴዚ ጊዶ ጌሊዛ ዋዴ ከሩቤቲ ጸሳ ኬላፌ ዱጌሃ ባጋራ ኤቂዳ፤ ጊዶ ዛጎዛካ ሻራይ ኩሚዴሰ።

4 ጎዳ ቦንቾይ ከሩቤታ ቦላፌ ዴንዲዲ ጸሳ ኬላ ዳርማቾ ቢዲ ኤቂዴሰ። ጎዳ ኬላ ሻራይ ኩሚዴሰ፤ ዛጎዚ ጸሊዛ ጎዳ ቦንቾን ኩሚዴሰ።

5 ከሩቤታ ቁፌታ ጊሪሳይ ኡባ ዳንዳይዛ ጸሳይ ሃሳይሺን ሲዬቲዛ ጨንጉርሳ ማላ ካሬ ዛጎን ሲዬቲሰ።

6 ጎዳይ ላይኖ ማይኢዳ ኣዴዛ፥ «ከሩቤታ ማታፔ ኢርዞታ ጊዶፌ ታማ ኤካ» ጊዲ ኣዛዚን፥ ኢዚ ጌሊዲ ኢርዞታፔ ኢሳ ኣቻን ኤቂዴሰ።

7 ከሩቤታፔ ኢሶይ ባንታ ጊዶን ዲዛ ታማኮ ባ ኩሼዛ ዬዲዲ፥ ኢዛፔ ጉል ኤኪዲ፥ ላይኖ ማይኢዳ ኣዴዛ ኩሼን ዋሊን ኢዚካ ኤኪዲ ኬዚዴሰ።

8 ከሩቤታ ቁፌፔ ጋርሳ ባጋራ ኣሳ ኩሼ ሚሳቲዛዚ ቤቲሰ።

9 ታኒ ጸሊዛ ዋዴ ከሩቤታ ሚሌሶን ኦይዱ ኢርዞቲ ዴቲሰ፤ ኢሲ ኢሲ ከሩቤ ሚሌን ኢሲ ኢሲ ኢርዞይ ዲዛይሳ ቤኣዲሰ፤ ሄ ኢርዞቲ ኢንቁ ማላ ጳሌቲሰ።

10 ኢሰቲ ኦይዳይካ ኢሶይ ኢሳ ሚሳቲቲሰ፤ ኢሲ ኢሲ ኢርዞይ ሃራ ኢርዞራ ኢሲፌ ኦይኬቲ ኦሴቲዳ ሚሳቲሰ።

11 ኢርዞቲ ባና ዴንዲዛ ዋዴ ከሩቤቲ ባናሰ ሲሚዲ ኦይዱ ባጋ ባናሰ ዳንዳይቲሰ፤ ከሩቤቲ ቢዛ ዋዴ ኢርዞቲ ያኔ ሃ ጎንታ

ሲቲ ጊ በቴሰ። ከሩቤቲ ቢዛ ዎዴ ኢርዘቲ ያኔ ሃ ጎንታ ሁኔይ ሲሚዳ አዋ ባጋካ በቴሰ።

¹² ኢስታ ኩሜላ ቦላን፣ ኢስታ ዘኮን፣ ኢስታ ኩሼን፣ ኢስታ ቁፊታኒኔ ኦይዱ ኢርዘታ ኡባን አይፌይ ኩሚዳሰ።

¹³ ኢርዘቲ፣ «ኤፑቲዛ ኢርዘታ» ጌቲቲ ዳይጌቲሺን ታ ሲያዲሰ።

¹⁴ ኢሲ ኢሲ ከሩቤሰ ኦይዱ አይፌሶይ ዳሰ። ኮይሮይሲ ከሩቤ አይፌሶ፣ ናሞኣንሶዚ አሳ አይፌሶ፣ ሄፃንሶዚ ጋሞ አይፌሶኔ ኦይዳንሶዚ ጎሌ አይፌሶ ሚሳቴሰ። *

¹⁵ ሄሳፌ ጉዬ ከሩቤቲ ፑዴ ዳንዲዳ። ሄይቲካ ታኒ ኮቦሬ ሻፋ ማታን በኢዳ ሼምፖራ ፓጻ ዲዛ ሜዴቴላታ።

¹⁶ ቃሴ ከሩቤቲ ባና ቃጺዛ ዎዴ ኢስታ ሚሊን ዲዛ ኢርዘቲካ ቃጺቴሰ፤ ከሩቤቲ ቢታፌ ፑዴ ዳንዳናጌ ባንታ ቁፊታ ያንጊዛ ዎዴካ ኢስታ ሚሊን ዲዛ ኢርዘቲካ ኢስታፌ ሻኬቴቴና።

¹⁷ ከሩቤቲ ሲቲ ጊ ኤቂዛ ዎዴ ኢርዘቲካ ኤቃ ጌቲሰ፤ ከሩቤቲ ቢታፌ ፑዴ ጵቁ ጊ ዳንዲዛ ዎዴ ኢርዘታ ጊዶን ሼምፖራ ፓጻ ዲዛ ሜዴቴላታ አያናይ ዲዛ ጊሻሰ ኢርዘቲካ ኢስታራ ኢሲፌ ዳንዳቴሰ።

¹⁸ ሄሳፌ ጉዬ ጎዳ ቦንቾይ ጸሳ ኬላ ዳርማቻፌ ዳንዲዳ ከሩቤታ ቦላ ኤቂዳሰ።

¹⁹ ታኒ ዳሌሺን ከሩቤቲ ባንታ ቁፊታ ያንጊዳ ኢርዘታራካ ኢሲፌ ቢታፌ ፑዴ ዳንዲ ቢዳ። ኢስቲ አርሼይ ሞኪዛ ባጋራ ዲዛ ጎዳ ኬላ ዩሾን ዲዛ ጊምቤ ፔንጌን ኤቂዳ፤ ኢሰራኤሌ ጸሳ ቦንቾይካ ኢስታፌ ቦላራ ዳሰ።

²⁰ ሃይቲ ኮቦሬ ሻፋን ኢሰራኤሌ ጸሳ ጋርሳን ታ በኢዳ ሼምፖራ ፓጻ ዲዛ ሜዴቴላታ፤ ኢስቲካ ከሩቤታ ጊዲዳይሳ ታ አኬካዲሰ።

²¹ ኢስታሰ ኢሳሰ ኢሳሰካ ኦይዱ አይፌሶይኔ ኦይዱ ቁፊይ ዳሰ፤ ኢስታ ቁፊታፔ ጋርሳ ባጋራ አሳ ኩሼ ሚሳቲዛዚ ዳሰ።

²² ኢስታ አይፌሶይካ ኮቦሬ ሻፋ ማታን ታ በኢዳይታ ሚሳቴሰ። ኢስቲ ኢሶይ ኢሶይ ሲቲ ጊዲ ሲንሐ በቴሰ።

11

ኢሰራኤሌ ዳራ ካሌሊዛይታ ቦላ ፒርዴቲዳ ፒርዳ

^{10:12} አጁ 4:8 * ^{10:14} ከሩቤ ጊዛይሳ ኢሲ ኢሲ ጌሻ ማጻፋን ቦራ ጌቲቴሰ

^{10:14} ሂዘ 1:10፤ አጁ 4:7

1 ሄሳፌ ጉዬ አያናይ ታና ፑዴ ዴንሊዲ አርሼይ ሞኪዛ ባጋራ ዲዛ ጎዳ ከላ ገሞቤ ፔንጌ ኤሂዴሰ። ጌሊዛሶ ፔንጌ ቦላ 25 አቱማሳቲ ዴቲሰ፤ ኢሰታ ጊዶን ዴራ ካሌሊዛ አዙሬ ና ያኢዛኔያኔ ባናያ ና ፓላጺያ ቤኣዲሰ።

2 ጎዳይ ታና፡ «ሃይሶ አሳ ናዉ! ሃ አቱማሳቲ ሃ ካታማን ኢታ ሃልቾ ሃልቺዛይታኔ ጌኔ ዘሬ ዘሪዛይታ።

3 ኢሰቲካ፡ «ከላቲ ከጼታና ዋዴይ ሃኢ ጊዴና። ሃና ካታማያ አሾ ዶይሲዛ ዲሰቲ፤ ኦኒካ አሾ» ጌቲሰ።

4 ሄሳ ጊሻሰ ኔኒ ኢሰታ ቦላ ቲንቢቲ ዮታ! አሳ ናዉ! ቲንቢቲ ዮታ» ጊዴሰ።

5 ሄሳፌ ጉዬ ጎዳ አያናይ ታ ቦላ ዋዲዲ ታሰ፡ «ጎዳይ፡ ኢሰራኤል አሳዉ! ኢንቲ ሄሳ ማላ ጌታ፤ ታኒ ኢንቲ አይ ቆፒዛኮ ኤራይሰ።

6 ሃ ካታማይን ኢንቲ ዳሮ አሳ ዋዲዲ ኦጌ ኡባን አሃ ኩንሊዴታ።

7 «ሄሳ ጊሻሰ ኡባ ሃሪዛ ጎዳይ፡ «ኢንቲ ዋዲዲ ሄን ኦሊዳ አሃቲ ኢሰታ አሾ፤ ቃሴ ሃ ካታማያካ አሾ ዶይሲዛ ዲሰቲ፤ ጊዶ አቲን ሃ ካታማይፔ ታኒ ኢንቲና ከሳና።

8 ኢንቲ ማሻሰ ያዪዴታ፤ ታኒ ሄ ኢንቲ ያዪዳ ማሻ ኢንቲ ቦላ ኤሃና» ጌሰ።

9 ታኒ ኢንቲና ሃ ካታማይፔ ከሳዳ አላጋታ ኩሼን አላ ኢማና፤ ታ ኢንቲና ቃጸያና።

10 ኢንቲ ማሻን ወራና፤ ታኒ ኢንቲና ኢንቲ ቢታን ፒርዳና። ታኒ ጎዳ ጊዲዲይሳ ኢንቲ ሄ ዋዴ ኤራና።

11 ሃ ካታማያ ኢንቲሰ አሾ ዶይሲዛ ዲሰቲ ጊዲኩ፤ ኢንቲካ ኢዚ ጊዶን አሾ ጊዴኬታ። ታኒ ኢንቲና ኢንቲ ቢታን ፒርዳና።

12 ታኒ ጎዳ ጊዲዲይሳ ኢንቲ ሄ ዋዴ ኤራና። ኢንቲ ኢንቲ ዩሾን ዲዛ ካዋቲላታ ዋጋ ካሊዳ ጊሻሰ ታ አዛዞ ፖሊቤኬታ፤ ታ ዋጋካ ናጊቤኬታ» ጊዴሰ።

13 ታኒ ቲንቢቲ ዮቶ ቦላ ዲሺን ባናያ ና ፓላጺያይ ሃይቂዴሰ፤ ታኒካ ሲንላ ጉል ጉፋናዳ፡ «አቤት ኡባ ሃሪዛ ጎዳዉ! ኢሰራኤልፔ ጫሻ አቲዳይታ ሙሌራ ቆይሳኔ?» ጋዳ ታ ቃላ ቶቁ ሂሰታ ዋሳዲሰ።

ዲኤቲ ቢዳይታሰ ጎዳይ ኢሚዳ ሂዶታ

14 ሄሳፌ ጉዬ ጎዳ ቃላይ ታኮ ዪዲ፤

15 «ሃይሶ አሳ ናዉ! ኔ አሻቲ ኔ ዳቦቲኔ ኢሰራኤሌ አሳይ ኡባይ ዲኤቲዲ ጎዳፔ ሃኪዳ፤ ሃና ቢታያ ኑስ ጸንጾ ጊዳ ኢማታዱስ» ጊዲ ዲኤቶንታ ዩሩሳላሜን አቲዳይቲ ሃሳይዳ።

16 «ሄሳ ጊሻስ ኔ፤ ሓባ ሃሪዛ ጎዳይ፡ ታኒ ኢስታ ሃሆን ዲዛ ካዎቴላታ ጊዶን ዩዲኮካ፤ ዳሬታ ጊዶን ላሊኮካ፤ ኢስቲ ቢዳ ዳሬ ኡባን ጉላ ዎዴ ታኒ ኢስታራ ጊዳና፤ ጊዴስ።

17 «ሄሳ ጊሻስ ኔ፤ ሓባ ሃሪዛ ጎዳይ፡ ካዎቴላታ ጊዶፌኔ አንቲ ላሌቲዳ ቢታታፔ ታኒ አንቲና ሽሻ ዛራና፤ ኢሰራኤሌ ቢታካ ታኒ ዛራዳ አንቲስ ኢማና፤ ጌስ።

18 «ኢስቲ ጉዬ ሲሚ ዪዲ ቱኒዳ ኢዚ ሚሰሌታኔ ሃራሲዛ ኢዚ ኦሶታ ታ ጳይሳና።

19 ታኒ ኢስታስ ኢሲ ዎዚና ኢማና፤ ቃሴ ኦራላ ኣያናካ ኢስታ ጊዶን ታ ዎላና። ታኒ ኢስታፌ ሹች ሚሳቲዛ ዎዚና ዲጋዳ አሾ ማላ ሹሳ ዎዚና ኢማና።

20 ሄሳ ጊሻስ ኢስቲ ታ ኣዛዞ ፖላና፤ ታ ዎጋካ ናጋና። ኢስቲ ታ ዳሬ ጊዳና፤ ታኒካ ኢስታ ጸስ ጊዳና።

21 ጊዶ ኣቲን ባንታ ዎዚና ቱኒዳ ሚሰሌታኮኔ ሃራሲዛ ኦሶታኮ ዛሪዳይታስ ኢስታ ኦሶ ማላ ታ ኢስታስ ኢማና» ጊዴስ።

ዩሩሳላሜፔ ጎዳ ቦንቾ ሻኬቲል

22 ሄሳፌ ጉዬ ከሩቤቲ ባንታ ቁፌታ ያንጊዳ፤ ኢርዞቲ ኢስታ ሚሊን ዳቲስ፤ ኢሰራኤሌ ጸሳ ቦንቾይካ ኢስታፌ ቦላራ ዳስ።

23 ጎዳ ቦንቾይ ካታማይ ጊዶፌ ዴንዲ ቢዲ ኣርሼይ ሞኪዛ ባጋራ ዲዛ ዙማ ቦላ ኤቂዳስ።

24 ኣያናይ ታና ፑዴ ዴንፊዳስ፤ ጸሳ ኣያናይ ታስ ኢሚዳ ኣጂታን ባቢሎኔን ዲዛ ዲኤቲዳይታኮ ታና ኤፌዳስ። ሄሳፌ ጉዬ ታኒ ቤኢዳ ኣጂታይ ታፔ ሻኬቲ ቢዴስ።

25 ሂስቲን ጎዳይ ታና ቤሲዳ ሚሻታ ኡባ ዲኤቲላን ዲዛይታስ ዮታዲስ።

12

ሂዘቁሊ ሌሚሶን ቤሲዳ ማላታታ

1 ጎዳ ቃላይ ታኮ ዪዲ፤

2 «ሃይሶ አሳ ናወ! ኔኒ ማካላንቻ ዴራ ጊደን ዳሳ። ኢስቲ ማካላንቻ ጊዲዳ ጊሻስ ኢስታስ አይፌይ ዳስ ሺን ዴሜቴና፤ ኢስታስ ሃይላ ዳስ ሺን ሲዬቴና።

3 ሄሳ ጊሻስ አሳ ናወ! ኢስቲ ቤኢሺን ጋላስ ኔስ ዲዛ ሚሽ ሺሻ ኤካዳ ጎዴታናስ ጊጌታ፤ ኔ ዲዛሶፔ ዴንዳዳ ሃራሶ ባ። ኢስቲ ማካላንቻ ጊዲኮካ አኬካናስ ዳንዳዬቴስ።

4 ጋላስ ኢስቲ ዴሊሺን ኔስ ዲዛ ሚሽ ጎዴቲ ቢዛ አሳ ማላ ኬሳ፤ ኦማርሲካ ኢስቲ ዴሊሺን ዲኤቲ ቢዛ አሳ ማላ ኬዛ።

5 ኢስቲ ዴሊሺን ኔ ኬላ ጎዳ ሉካዳ ኔስ ዲዛ ሚሽ ኬሳ።

6 ኔኒ ኬሲዳ ሚሻ ኢስቲ ዴሊሺን ጋዴይ ፉሚሺን ኔ ሃሺን ቶካዳ ኬዛ። ታ ኔና ኢስራኤሌ ኬላስ ማላታ ኦሊዳ ጊሻስ ጋዴ ቤኦንታ ማላ ኔ ሲንላ ካማ» ጊዴስ።

7 ታኒካ ኢዚ ታና አዛዚዳ ማላ ኦላዲስ። ዲኤቲ ቢዛ አሳ ማላ ጋላስ ታስ ዲዛ ሚሽ ሺሻ ቃቻዳ ጎዴቲ ቢዛ አሳ ማላ ኬሳዲስ፤ ኦማርስ ታ ኬላ ጎዳ ታ ኩሺን ሉካዲስ፤ ኢስቲ ዴሊሺን ቃቻ ዋሊዳ ሚሻ ሃሺን ቶካዳ ፉሚሺን ባዲስ።

8 ዋንቴላ ጋላስ ማላዶራ ጎዳ ቃላይ ታኮ ዪዲ፤

9 «ሃይሶ አሳ ናወ! ማካላንቻ ኢስራኤሌ አሳይ ኔና፤ «ኔኒ ኦሊዛይ አዜ?» ጊዲ ኔና ኦይቺዴስ ጊዴኔ?

10 ኔኒ ኢስታስ፤ «ኡባ ሃሪዛ ጎዳይ ሃ ቲንቢቴይ፤ ዬሩሳላሜን ዲዛ ሃላቃሲኔ ኢስራኤሌ አሳ ኩሜላሳ»

11 ኔኒ ኢስታስ፤

« ታኒ ኢንቴስ ማላታ፤

ታኒ ኦሊዳ ማላ

ሄሳሶ ኢስታ ሶላካ ሃናና፤

ኢስቲ ዲኤቲዲ

ሃራ ቢታ ባና» ጋ።

12 «ኢስታ ጊደን ዲዛ ሃላቃይ ኦማርሳራ ባስ ዲዛ ሚሽ ሺሺ ቶኪዲ ኬዛና፤ ኢዚ ባቃቲ ባና ማላ ጊምቤይ ሉኬታና፤ ቢታ ቤኦንታ ማላ ባ አይፌሶ ካማና።

13 ታኒ ታ ጌቴ ኢዛ ሲንላን ዬጋና፤ ኢዚ ዋጺማዴንካ ኦይኬታና፤ ታኒ ኢዛ ካላዳዌታ ቢታ ባቢሎኔ ኤሃና፤ ጊደ አቲን ኢዚ ሄ ቢታ ቤኦንታ ሃይቃና።

14 ኢዛ ዩሾን ዲዛ ኢዛ ማዲዛይታኔ ኢዛ ኦላንቻታ ኡባ ታኒ ኡባሶ ፒስኪ ሂስታና፤ ታኒ ኢስታ ማሻን ዬዴላና።

15 «ኢስታ ታኒ ዴሬታ ጊደኒኔ ካዎቴላ ጊደን ላሊዛ ዎዴ ታኒ ጎዳ ጊዲዳይሳ ኢስቲ ኤራና።

16 ኢስቲ ባንቲ ቢዳ ካዎቴላታ ጊደን ባንታ ቱና ኦሶ ፓጻና ማላ፡ ታኒ ኢስታፌ ጉላታ ኦላፔ፡ ኮሻፔኔ ኢታ ሃርጌፌ ኬሲ ኤካና ማላ ኦላና። ታኒ ጎዳ ጊዲዳይሳ ኢስቲ ሄ ዎዴ ኤራና» ጊዴሰ።

ያሻን ኮኮሪዛ ናቤ ማላታ

17 ጎዳ ቃላይ ታኮ ዪዲ፡

18 «ሃይሶ አሳ ናዉ! ኔ ካሐ ኮኮራሼ ማ፤ ቃሴ ኔ ሃላካ ጋዢጋዢኔ ባባሼ ኡያ።

19 ቢታን ዲዛ አሳሰ፡ ሉባ ሃሪዛ ጎዳይ ኢሰራኤሌ ቢታን ዲዛ ዬሩሳላሜ አሳሰ፡ ኢስቲ ባንታ ካሐ ሂርጊሼ ማና፤ ባንታ ሃላካ ጋዢጋዢኔ ባቢሼ ኡያና። ሄን ዲዛ አሳይ ኡባይ ጌናንቻ ጊዲዳ ጊሻሰ ኢስታ ቢታይ ካይዛና።

20 ካሴ ኢስታን አሲ ኩሚዳ ካታማቲ ካይዛና፤ ቢታያካ ቡላታና። ታኒ ጎዳ ጊዲዳይሳ ኢንቲ ሄ ዎዴ ኤራና ጌሰ» ጋ ጊዴሰ።

አሳ ለሚሶስ ጎዳይ አሚዳ ዛሮ

21 ጎዳ ቃላይ ታኮ ዪዲ፡

22 «ሃይሶ አሳ ናዉ! ኢሰራኤሌ ቢታን፡ «ዎዴይ አዳቂዴሰ፤ አጁታይ ኡባይካ ሃዳ ጊዲዴሰ» ጊዲ ኢንቲ ቶሴ ዮቲዛይ አዜ?

23 ሄሳ ጊሻሰ ኢስታሰ ኔኒ፡ ሉባ ሃሪዛ ጎዳይ፡ ታኒ ሃይሳ ሃ ቶሴዛ ዲጋና፤ ኢስቲ ዛሬላዲ ሃይሳ ሃ ቶሴዛ ኢሰራኤሌ ቢታን ጎኤቱቱና ጌሰ ጋ። ቃሴካ ኔኒ ኢስታሰ፡ «አጁታይ ኡባይካ ፖሌታና ዎዴይ ማቲዴሰ።

24 ሃይሳፌ ጉዬ ኢሰራኤሌ ዴራ ጊደን ዎርዶ አጁታይኔ አሰ ሙሬኖ ኦሶይ ዴና።

25 ታኒ ጎዳይ ሃሳያና ኮዪዳይሳ ሃሳያና፤ ታ ሃሳይዳ ቃላይካ ጋምኦንታ ፖሌታና፤ ኢንቲኖ ማካላንቻ አሳቶ! ታኒ ዮቲዳይሳ ኡባ ኢንቲ ላይላን ታኒ ፖላና ጌሰ ኡባ ሃሪዛ ጎዳይ» ጊዴሰ።

26 ቃሴካ ጎዳ ቃላይ ታኮ ዪዲ፡

27 «ሃይሶ አሳ ናዉ! ኢሰራኤሌ አሳይ፡ «ሃይሲ አዴዚ ቤኢዛ አጁታይ ቡሮ ዳር ላይላፌ ጉዬን ሃናናዛ፤ ኢዚ ዮቲዛ ቲንቢቴይካ ዳር ላይላፌ ጉዬን ሃናናዛ» ጌሰ።

28 ሄሳ ጊሻሰ ኔኒ ኢስታሰ፡ ሉባ ሃሪዛ ጎዳይ፡ ታኒ ዮቲዳ ቃላፔ ጋምኦናዚ ዴና፤ ታ ጊዳ ኡባይ ፖሌታና ጌሰ» ጊዴሰ።

13

ዋርዶ ናቤታ ሂሌቲል

¹ ጎዳ ቃላይ ታኮ ዩዲ፥

² «ሃይሶ አሳ ናዉ! ቲንቢቲ ዮቲዛ ኢሰራኤል ናቤታ ቦላ ኔኒ ቲንቢቲ ዮታ፤ ባፔ ሜጲ ኤኪዲ ቲንቢቲ ዮቲዛይታ፥ ጎዳ ቃላ ሲዩቲ!

³ ኡባ ሃሪዛ ጎዳይ፥ ሲሲ ሚሺካ ቤኦንታ ባንታ ኣያና ካሊዛ ኤያ ናቤታስ ኣዬ ኣና!

⁴ ኢሰራኤል አሳዉ! ኢንቲ ናቤቲ ላሌቲዳሶሆታን ዲዛ ሻናታ ማላ።

⁵ ጎዳ ጋላሳን ዩዛ ኦላን ዲርሳይ ሚኒ ኤቃናሰ ዳንዳያና ማላ ጳልቄቲዳ ኢሰራኤል ጊምቤዛ ሚንፊ ጊምባናሰ ኢንቲ ሄ ኬዚቤኬታ።

⁶ ኢሰታ አጁታይኔ ኢሰታ ቲንቢቲይ ዋርዶ። ኢሰቲ ጎዳይ ከቶንታ ዲሺን ጎዳይ ሃይሳፉ ጌሰ ጌቲሰ። ኢሰቲካ ባ ዮቲዳይሲ ፖሌታና ጌዲ ናጌቲሰ።

⁷ ታኒ ዮቶንታ ዲሺን፥ ሳዳይ ሂዘጌሰ ጊሼ ኢንቲ ዋርዶ አጁታኔ ዋርዶ ቲንቢቲ ዮቲዛይሳ ጌዴኔ?» ጌሰ።

⁸ ሄሳ ጊሻሰ ኡባ ሃሪዛ ጎዳይ፥ «ኢንቲ ዮቲዳ ቲንቢቲይኔ ኢንቲ ቤኢዳ አጁታይ ዋርዶ ጌዲዳ ጊሻሰ ታኒ ኢንቲ ቦላ ዴንዳዲሰ።

⁹ ታ ኩሼይ ዋርዶ አጁታ ቤኢዛይታ ቦላኔ ሙሬኒዛ ናቤታ ቦላ ዴንዳና። ኢሰቲ ታ ዴራ ዱላታን ጌሌቲና፤ ኢሰራኤል አሳ ማዘጋባን ጸፊቲቲና፤ ኢሰራኤል ቢታካ ጌሌቲና። ታኒ ኡባ ሃሪዛ ጎዳ ጌዲዳይሳ ኢንቲ ሄ ዋዴ ኤራና።

¹⁰ «ሳርይ ባይንዳ ዲሺን፥ ሳርይ ዴሰ ጊሼ ታ ዴራ ባሌፊቲሰ፤ ቃሴ ዴሬዚ ሹች ኬሊሺን ኢሰቲ ኣኖን ሜሼቲሰ።

¹¹ ሄሳ ጊሻሰ ኣኖን ሜሺዛይታሰ፥ ሱላዚ ዋዳናይሳ ዮታ! ሃንሺሺ ኢራይ ቡካና፤ ታኒ ዋልቃማ ሹቻ ማላ ሻች ዬዳና፤ ጎቲ ጫርኮይካ ዴንዳና ጌዲ ዮቲቲ።

¹² ኬላዚ ላሌቲዛ ዋዴ ዴሬይ፥ ሳኒቲ ሜሺዳ ኣኖይ ኣዋ ቢዴ?» ጌዲ ኢንቲና ኦይቾንታ ኣጌና» ጌሰ።

¹³ ሄሳ ጊሻሰ ኡባ ሃሪዛ ጎዳይ፥ «ጊምቤ ዲርሳ ዳይሳናሰ ታኒ ታ ዩሎን ጎቲ ጫርኮ ዬዳና፤ ታ ሃንቆን ሻች ዬዳና፤ ሃንሺሺ ኢራ ጌታ ባሻራ ኪታና።

14 እንቴ ኣኖን ማሺዳ ከላ ታ ላላና፤ ኢዛ ዮቺ ቤታናሽ ጋካናስ ታ ላላና፤ ጊምቤዚ ኩንዲዛ ዋዴ እንቴ ኢዛ ጊደን ዉራና፤ ታኒ ጎዳ ጊዲዳይሳ እንቴ ሄ ዋዴ ኤራና።

15 ሄሳ ጊሻስ ታኒ ታ ባሻዛ ጊምቤዛ ቦላኔ ኣኖዛ ማሺዳ ኣሳታ ቦላ ዬዳና፤ ታኒ እንቴና፡ ሪምቤዛ ጊምቤዛራ ጋሊዲ ኣኖ ማሺዳይቲ ዴቴና።

16 ዬሩሳላሜስ ቲንቢቴ ዮቲዳይቲኔ ሳሮይ ባይንዳ ዲሺን ሳሮቴላ ኣጁታ ኢዚስ ቤኢዳ ኢስራኤል ናቤቲ ጳይዳ፡ ጋይሰ።

ዋርዶ ቲንቢቴ ዮቲዛ ማጫ ናቤታ ቦላ ዮቲቲዳ ቲንቢቴ

17 «ሃይሶ ኣሳ ናዉ! ባፔ ሜጲ ኤኪዲ ቲንቢቴ ዮቲዛ እንቴ ዴራ ማጫ ናይታኮ ኔ ኣይፌሶ ሃንቆን ዛራ፤ ኢስታ ቦላ ቲንቢቴ ዮታ።

18 ኢስታስ ኡባ ሃሪዛ ጎዳይ፡ ሳሬ ሸምፖ ዋጺማዴ ማላ ኦይካናስ ሙሬኖ ሚሽ ሲኪሲዲ ባንታ ቄሴን ኣሊዛይታሲኔ ዴማ ዴማ ቆሞ ቢታ ጎስ ሁኤስ ጊግሲዛ ማጫሳታስ ኣዬ ኣና! ታ ኣሳ ሸምፖ ዋጺማዴን ጌልሊዲ እንቴ እንቴ ሸምፖ ኣሻኔ?

19 ኩቹ ጊደንታ ባንጋሲኔ ባርስ ጊደንታ ካሳስ ጊዲ ዋርዶ ሲዩዛ ታ ዴራስ እንቴ ዋርዶቲሽ ሃይቃና ቤሶንታይሳ ዋጺሽ፡ ዳናስ ቤሶንታይታ ኣሺሽ ታ ሱንሐ ዴራ ሲንላን ካዉሺዴታ፡ ጌሰ።

20 «ሄሳ ጊሻስ ኡባ ሃሪዛ ጎዳይ፡ ሳእንቴ ካፎ ጲሬን ኦይኪዛ ማላ ኣሳ ሸምፖ ኦይኪዛ ሙሬኖ ሚሻ ቦላ ታ ዴንዳዲስ፤ ታኒ ኢዛ እንቴ ቄሴፔ ዲላ ኦላና፤ እንቴ ጲሬን ካፎ ኦይኪዛ ማላ ኦይኪዳ ታ ዴራ ታ ኬሳ ኤካና።

21 ታኒ እንቴ ቢታ ጎሳ ዳፋ ዬጋዳ ታ ዴሬዛ እንቴ ኩሼፔ ዋላ ኤካና፤ ሃይሳፌ ጉዬ ኢስቲ እንቴ ሸኔን ኣቁቴና፤ ታኒ ጎዳ ጊዲዳይሳ እንቴ ሄ ዋዴ ኤራና።

22 ታኒ ቆሆንታ ጸሎዛ እንቴ ዋርዶራ ጩጪሲዳ ጊሻስ፡ ናጋራንቻይ ባ ኢታ ኦፔፔ ሲሚዲ ባ ሸምፖ ኣሾንታ ማላ እንቴ ኢዛ ኢዛ ናጋራን ሚንሐሊዴታ።

23 ሄሳ ጊሻስ ሃይሳፌ ጉዬ ዋርዶ ኣጁታ ቤኤኬታ፤ ሙሬኖዛ ሙሬኔኬታ፤ ታ ዴራ እንቴ ኩሼፔ ዋላ ኤካና፤ ታኒ ጎዳ ጊዲዳይሳ እንቴ ሄ ዋዴ ኤራና፡ ጌሰ» ጊዴሰ።

14

ኤቃ ጸስ ጎይኒዛይታ ሂሉቴሐ

1 ኢስራኤል ጨማታፔ ጉላቲ ታኮ ዩዲ ታ ሲንላን ኡቲዳ።

2 ሂሰቲን ጎዳ ቃላይ ታኮ ዩዲ፤

3 «ሃይሶ አሳ ናዉ! ሃይቲ አሳቲ ኤቃ ጸሳታ ባንታ ዋዚናን ዋሊዲ፤ ባንታ ኢታቴላ ቆጶዚ ሹቻ ማላ ባንታ ሲንላን ዋሊዲ፤ ሂሰቲን ኢሰቲ ታፔ ኢሲ ሚሽ ኦይቻና ማላ ቃላ ኢሞዬ?»

4 ሄሳ ጊሻሰ ኔኒ ኢሰታሰ፤ ሉባ ሃሪዛ ጎዳይ ኢሰራኤል አሳፔ ኦኒካ ኤቃ ጸሰ ባ ዋዚናን ዋሊዲ፤ ባ ኢታቴላ ቆጶዚ ሹቻላ ባ ሲንላን ዋሊዲ ናቤኮ ዪኮ ታኒ ጎዳይ ታ ሁኤራ ኢዛሰ ኢዛ ኤቃ ጸሳታ ቆዳ ማላ ኢዛሰ ዛራና።

5 ባንታ ኤቃ ጸሳታ ጋሶን ታፔ ሻኬቲዳ ኢሰራኤል አሳ ኡባ ዋዚና ሃ ታኮ ዛራናሰ ታ ሄሳ ኦላና፤ ጌሰ።

6 «ሄሳ ጊሻሰ ኢሰራኤል አሳሰ፤ ሉባ ሃሪዛ ጎዳይ፤ ማሬቲቴ! ኢንቴ ኤቃ ጸሳታፔ ሲሚቴ! ሃራሲዛ ኢንቴ ኦሶ ኡባ አጊቴ!

7 « ኢሰራኤል አሳፔ ኦናካ ጊዲን ዋይኮ ኢሰራኤል ቢታን ዲዛ ቤቴ አሳፔ ኦናካ ጊዲን፤ ታፔ ሻኬቲላን ኤቃ ጸሳታ ባ ዋዚናን ዋሊዲ፤ ባ ኢታቴላ ቆጶዚ ሹቻ ሂሰቲ ባ ሲንላን ዋሊዲ ታፔ ኦይቻና ናቤኮ ዪኮ ታኒ ጎዳይ ታ ሁኤራ ኢዛሰ ዛር ኢማና።

8 ኢታቴላን ታኒ ታ አይፌሶ ሄሳዴኮ ዛራና፤ ቶሶሲኔ ቁጭሰ ታ ኢዛ ኬሳና፤ ታኒ ኢዛ ታ ዴራ ጊዶፌ ዲጋና፤ ታኒ ጎዳ ጊዲዳይሳ ኢንቴ ሄ ዋዴ ኤራና።

9 « ናቤዛ ቲንቢቲ ዮታና ማላ ባሌሊኮ፤ ሄ ናቤዛ ባሌሊዳይ ታና ጎዳ፤ ታኒ ታ ቄሴ ኢዛ ቦላ ዴንላዳ ታ ዴሬ ኢሰራኤል ጊዶፌ ኢዛ ቆይሳና።

10 ኢሰታ ቆሆይ ኢሰታሰ ጊዳና፤ ናቤዚኔ ኢዛ ኦይቻና ዩዳዴይ ናሞኣይ ኢሲ ጊና ቂጻቴ ኤካና።

11 ሄሳፌ ጉዬ ኢሰራኤል አሳይ ኦጌ ባሊዲ ታፔ ሻኬቲና፤ ሲሚዲ ባ ናጋራን ኡባን ባና ቱኒሴና። ኢሰቲ ታ ዴሬ ጊዳና፤ ታኒካ ኢሰታ ጸሳ ጊዳና፤ ጌሰ ኡባ ሃሪዛ ጎዳይ» ጊዳሰ።

ዩሩሳላሚ ቦላ ዋልቃማ ፒርዳ

12 ጎዳ ቃላይ ታኮ ዩዲ፤

13 «ሃይሶ አሳ ናዉ! ኢሲ ዴሬይ ታናን አማኔቶንታ ኢዲዲ ናጋራ ኦሊኮ፤ ታኒ ታ ኩሼዛ ዩዳዳ ካላ ፑልቶ ሜሊሲኮ፤ ኮሻ ዩዳዳ ሜሄኔ አሰ ዋዲኮ፤

14 ናሄይ፤ ዳኔሊኔ ኢዮቢ ሃ ሄሻቲ ሄን ዲኮካ ኢሰቲ ባንታ ዲሎቴላን ባንታ ሼሞፖ ጸላላ አሻና» ጌሰ ኡባ ሃሪዛ ጎዳይ።

15 «ታኒ ዋራ ዶኣታ ዴራ ቦላ ከቲን ሄ ዶኣቲ ዴራ ቶንላ ሂሰቲን፤ ኢሰታፌ ዴንዶይሳን ሄራ አሲ አቆና ዳንዳዮንታ ዋራ ጊዲኮ፤

16 ኡባ ሃሪዛ ጎዳይ፡ ታኒ ዴኦ ጸሓ ጊዲዳይሳን ጫቃይሰ፤ ሃ ሄዡ አሳቲ ሄ ቢታን ዲዛኮካ ኢሰቲ ባንታና አሻና ኣቲን ባንታ ኣቱማ ናይታ ዋይኮ ማጫ ናይታ አሻናሰ ዳንዳዬቴና። ቢታያ ጊዲኮ ዋራ ጊዳና። ጌሰ።

17 «ዋይኮ ታኒ ሃ ቢታ ቦላን ማሻ ኤሃዳ፡ ሃ ቢታራ ማሻይ ካንሉ» ጋዳ ማሄኔ አሰ ጳይሲኮ።

18 ኡባ ሃሪዛ ጎዳይ፡ ታኒ ዴኦ ጸሓ ጊዲዳይሳን ጫቃይሰ፡ ሃ ሄዡ አሳቲ ሄ ቢታን ዲዛኮካ ኢሰቲ ባንታና አሻና ኣቲን ባንታ ኣቱማ ናይታ ዋይኮ ማጫ ናይታ አሻናሰ ዳንዳዬቴና። ጌሰ።

19 «ዋይኮ ታኒ ቢታይ ቦላ ኢታ ሃርጌ ዬዳዳ፡ ታ ሃንቆን አሳይ ሱሉ ጉሳና ማላ ኦላዳ አሳኔ ማሃ ዋዳ ዉርሲኮ።

20 ታኒ ኡባ ሃሪዛ ጎዳይ ታኒ ዴኦ ጸሓ ጊዲዳይሳን ጫቃይሰ፡ ኖሄይ፡ ዳኔሊኔ ኢኖቢ ሄ ቢታን ዲኮካ ኢሰቲ ባ ጸሎቴላን ባንታና ጸላ አሻና ኣቲን ባንታ ኣቱማ ናይታ ዋይኮ ባንታ ማጫ ናይታካ አሼቴና።

21 «ኡባ ሃሪዛ ጎዳይ፡ ታኒ አሳኔ ማሄ ዋዳናሰ ዬራሳላማ ቦላ ታ ኦይዱ ፒርዳታ፡ ማሻ፡ ኮሻ፡ ዋራ ዶኣታኔ ኢታ ሃርጌ ዬዲዛ ዋዳ ኢዚ አይ ኬና አጼ ኢታ ማሽ ጊዳንዴ!

22 ጊዲኮካ ሃፔ አማርዳ አሳቲ ኬሲ ኤኪዲ አታና፤ አቱማ ናይቲኔ ማጫ ናይቲ ኢንቴኮ ያና፤ ኢንቴ ኢሰታ ሄማሉኔ ኢሰታ ኦሶ ቤኢዳ ዋዳ ታኒ ዬራሳላማ ቦላ ኤሂዳ ማቶዚኔ ጋሊዳ ኢታ ባሻዚ ኡባይ ሊኬ ጊዲዳይሳ ኢንቴ ኤራና።

23 ኢሰታ ሄማታኔ ኢሰታ ኦሶ ኢንቴ ቤኢዲ ማኔታና፤ ታኒ ኢሰታ ቦላ ጮ ሃዳን ኦሶንታይሳ ኢንቴ ኤራና» ጌሰ።

15

ዋይኔ ቱራ ለሚሶ

1 ጎዳ ቃላይ ታኮ ዩዲ፤

2 «ሃይሶ አሳ ናዉ! ዋይኔ ቱራይ ዋራን ዲዛ ሃራ ሚላታ ኡባ ሃጋፌ አዛን አጳዜ?»

3 ጎኢዛ ሚሽ ኦላናሰ ኢዛ አኖፔ ኤኬቲ ኤሪዜ? ኢሲ ሚሽ ካቃናሰ ኮጫይ ኢዛፔ ኤኬቲ ኤሪዜ?

4 ኢዚ ኤዳና ማላ ታማን ዬጊዳፔ ጉዬን ናሞኡ ባጋ ጸራ ታማይ ሚዲ ጊዳዛ ላቢኮ ሄሲ ጎኣናሰ ዳንዳይዜ?

5 ሎኦ ጊዲ ኡቲዲ አይ ጎኣካ ኢሞንታ ኣጊኮ ታማይ ጸጊዳፔኔ ላቢዳፔ ጉዬ ኬሂ ጎኣይ ባይንዳዝ ጊዳና።

6 «ሄሳ ገሻሰ ኡባ ሃሪዛ ጎዳይ፥ ታኒ ዋራ ሚላ ገደን ዲዛ ዋይኔ ኣኖ ታማን ኤጸና ማላ ታ ኣላ ኢሚዳይሳሶ ዬሩሳላሚን ዲዛይታካ ኣላ ኢማና።

7 ታኒ ታ ኣይፌሶ ኢታቴላን ኢስታ ቦላ ዛራና፤ ኢስቲ ታማፔ ኬሲ ኤኪ ኣቲዳ ገዲኮካ ቡሮ ኢስታ ታማይ ማና፤ ታኒ ታ ሲንላ ኢታቴላን ኢስታኮ ዛሪዛ ዋዴ ታኒ ጎዳ ገዲዳይሳ ኢንቴ ኤራና።

8 ኢስቲ ኣማኔቶንታ ኣገዳ ገሻሰ ታኒ ቢታዮ ኣሲ ባይንዳ ቡላ ኬሳዲሰን ጌሰ» ገዴሰ።

16

ኣማኖይ ፓጪዳ ዬሩሳላሚ ሃኖቴላ

1 ጎዳ ቃላይ ታኮ ዩዲ፥

2 «ሃይሶ ኣሳ ናዉ! ዬሩሳላሚስ ኢዛ ኦሊዛ ሃራሲዛ ኦሶታ ኢዚሰ ቆንጩራ ዮታ።

3 ኡባ ሃሪዛ ጎዳይ ዬሩሳላሚስ፥ ሳ ማይዛይኔ ኔ ዬሌታይ ካናኔ ቢታፌ ዩዴሰ፤ ኔ ኣዋይ ኣዋሬ ቢታ ኣሳ፤ ኔ ኣዪያካ ሂቴ ቢታ ኣሳ።

4 ኔ ዬሌቲዳ ጋላስ ኔ ጉልኣይ ቃንጾቲቤና፤ ጌያናስ ሃላን ሚጩታቤካ፤ ማጺኔን ሾሼታቤካ፤ ጫርቃንካ ጸጾታቤካ።

5 ቃዴታ ኣይፌን ኔና ጸሊዲ ዋይኮ ኔስ ሚሼቲዲ ሃይታፔ ኢሲኖካ ኔስ ኦሊዳዴይ ዴና፤ ኔኒ ዬሌቲዳ ጋላስ ካዴቲዳ ገሻሰ ዴምባን ዩጌታ ኣታዳሳ።

6 «ታ ሄራ ካንላ ባሼ ኔኒ ኔ ሱላን ሞሬታዳ ቃኬቲሺን ቤኣዲሰ፤ ኔኒ ኔ ሱላ ገደን ኢቻ ዲሺን ታ ኔና፥ ሸምፖራ ፓጸ ዳ» ጋዲሰ።

7 ታኒ ኔና ዴምባ ጋዴን ዲዛ ካላ ማላ ዲቻዲሰ፤ ኔኒ ዲጫ ጋካዳ ኢንቁ ማላ ኣልኦ ገዳዳሳ፤ ኔ ቋንላቲ ኡቲዳ፤ ኔ ቢናናይካ ዲጪዴሰ፤ ገዶ ኣቲን ኔኒ ኣዪ ኡሎፔ ዬሌቲዳ ማላ ፒጺኒ ካሎ ዳሳ።

8 «ቃሴካ ታ ሄራ ኣቋ ባሼ ጸላዲሰ፤ ኔ ጌሎ ጋኪዳ ጌላኦ ገዲዳይሳ ቤኣዳ ታ ማይኦ ማጫራ ኔ ቦላ ዩጋዳ ኔ ካሎቴላ ካማዲሰ፤ ኔስ ጫቃዲሰ፤ ኔናራ ቃላ ጌላዲሰ፤ ኔ ታሳ» ጌሰ ኡባ ሃሪዛ ጎዳይ።

9 «ታኒ ኔ ቦላይ ሱላን ሞሬቲዳይሳ ሃላን ሚጫ ጌሻዳ ዛይቴ ቲያዲሰ።

10 ታኒ ኔና ጸባቤ ቃሚሳ ማይዛዳ ጋልባፌ ኦሴቲዳ ሎኦ ጫማካ ኣላሳዲሰ፤ ሎኦ ላይኖፔ ኦሴቲዳ ጎሴ ኔና ጎዚሳዲሰ፤ ቃሴ ቤሎ ኩታካ ቁማይሳዲሰ።

11 ኔና ታ አሌቆን ፖጪሳዲስ፤ ኔ ኩሼን ሳጋዮ፣ ኔ ቆጆን ማጪፋራ አላዲስ።

12 ቃሴ ኔ ሲጴኒኔ ኔ ሃይላን ጉቲቻ አላዲስ፤ ኔ ሁኤንካ ሎኦ ካላቻ ጎጲሳዲስ።

13 ኔኒ ዋርቃኒኔ ቢራን አሌቁታዳሳ፤ ኔ ማይኦይ ኡባይ ሎኦ ላይኖ፣ ሲልኮኔኔ ጸባቤ፤ ኔ ቁማይ ሊቆ ጲሌ፣ ኤሲኔ ዋጋራ ዛይቲ። ኔኒ ኬሃ ፑላታዳ ካዎ ማቾ ገዳዳሳ።

14 ታ ኔስ ኢሚዳ ቱማፔ ዴንዲዳይሳን ኔ ፑላቴሊ ኩሜል ገዲዳ ገሻሰ ኔ ዋሬይ ካዎቴላታ ገደን ኤሬቲዴስ» ጌስ ኡባ ሃሪዛ ጎዳይ።

15 «ገደ አቲን ኔኒ ኔ ፑላቴላን ጨቁታዳሳ፤ ኬኢዳ ኔ ሱንላ ኔኒ ላይማቴላስ ጎኤታዳሳ፤ አጂ ቢዛ ኡባራ ኔ ሼኔ ማላ ላይማታዳሳ፤ ኔኒ ኔናቴላ ቤታስ ቤታስ አላ ኢማዳሳ።

16 ኔ ማይኦታፔ ጉላታ ኤካዳ ኔ ላይማታሼ ጎይኒዛሶሆታ አሌቁሳ ገገሳዳሳ፤ ሄሳ ማላ ሃኖታይ ሃይሳፌ ሲንላን ሃኒቤና፤ ሃይሳፌ ጉዬንካ ሃኔና።

17 ታኒ ኔስ ኢሚዳ ዋርቃፌኔ ቢራፔ ኦሴቲዳ ሎኦ አሌቆታ ኤካዳ አቱማሳ ሚስሌታ ኔስ አላዳሳ፤ ሂስታዳ ኢስታራ ላይማታዳሳ።

18 ኔ ጸባቤታ ኤፋዳ ኢስታ ቦላ ጎጳዳሳ፤ ቃሴ ታ ዛይቲኔ ታ ኤጻኔ ኢስታስ ሺሻዳሳ።

19 ቃሴ ኔ ማና ማላ ታ ኔስ ኢሚዳ ቁማ፣ ሄሲካ ሙሩታ ጲሌ፣ ኤሲኔ ዋጋራ ዛይቲ ሳዎ ቱኑ ገዛ ኤጻኔ ማላ አላዳ ኔ ኢስታስ ያርሾ ሺሻዳሳ፤ ሄሳ ማላ ኦሶይ ፖሌቲዴስ።

20 «ቃሴካ ኔ ታስ ዬሊዳ አቱማ ናይታኔ ማጫ ናይታ ኢስቲ ማና ማላ ኤፋዳ ሚስሌታስ ያርሻዳሳ። ሄሳ ኔ አሊዛይ ኔ ላይማቲዛይሲ ጉጺኔ?

21 ኔኒ ታ ናይታ ሹካዳ ኤቃ ጸሳታስ ያርሻዳሳ።

22 ሃ ሃራሲዛ ኔ ኦሶታኒኔ ኔ ላይማቴላ ኡባን ኔ አዬይ ኡሎፔ ኔ ፒጺኒ ካሎ ዬሊቲዳ ማላ ኔ ሱላን ሞሬታዳ ቃኬታሼ ዲዛ ዬላጋቴላ ዋዴታ ኔ ቆፓቤካ።

23 « (አዬ አና! ሃኔ ኔስ አዬ አና!) ጌስ ኡባ ሃሪዛ ጎዳይ፤ ኔ አሊዳ ኢታ ሚሻታ ኡባፌካ ቦላራ ሃራ ጉጃዳ፣

24 ኔስ ፖጎኖ ገገሳዳሳ፤ ሄ ኡባን ኔስ ጎይኒዛሶሆታ አላዳሳ።

25 አይዱ አጌ ዶናን ኡባን ጎይኒዛሶሆታ ገገሳዳሳ፤ ኔናቴላ አጂ ቢዛ ኡባስ ላይማቴላስ ሺሻዳ ኔ ፑላቴላ ቱኒሳዳሳ።

26 ዚታ ኬዚዳ ኔ ሾሮ ገብጼ ኣሳታራ ላይማታዳሳ፤ ቡቴፔ ዳሮ ኔ ላይማቴላን ታና ሃንቁላዳሳ።

27 ሄሳ ገሻሰ ታኒ ታ ቁሴ ኔ ቦላ ዴንላዳ ኔሰ ኢሚዛ ጎኣታፔ ፓጪንቻዲሰ፤ ኔ ኢታ ሃኖታፔ ዴንዲዳይሳን፤ ኔ ፖኮ ኦሶን ዬላቲዛ ኔ ሞርኬ ፊሊሰጾሜ ማጫ ናይታ ኣሞሰ ኣላ ኢማዲሰ።

28 ኔና ቡሮ ኣሎንታ ገሻሰ ኣሶሬታራካ ላይማታዳሳ፤ ሄሳፌ ጉዬካ ኣላቤካ።

29 ኔ ቱናቴላ ዛልኣንቻታ ቢታ ባቢሎኔ ጋካናሰ ዳርሳዳሳ፤ ሂሰታዳካ ኣላቤካ።

30 « ሳይላይ ባይንዳ ላይማ ማጫሳ ማላ ሄሳ ኡባ ኔ ፖሊዳይ ኣይ ማላ ላፋ ዋዚናይ ኔሰ ዳኔ?» ጌሰ ኡባ ሃሪዛ ጎዳይ።

31 ኦይዱ ኦጌ ዶና ኡባን ኔሰ ፖጎኖታ ጎይኒዛሶሆታ ገሻሳዳሳ፤ ገዲኮካ ሃራ ላይማን ኣቂዛ ማጫሳታ ማላ ሚሼ ቃንጸሳቤካ።

32 « ሳሃይ ላይማ ማጫሳዬ! ኔኒ ኣዚናይ ዴኢሺን ሃራ ኣዴራ ላይማቲዛ ማጫሳ ማላ።

33 ኣይ ላይማ ማጫሳሰ ኢሞታይ ኢሜቲሰ፤ ኔ ገዲኮ ኔ ላጌታሰ ጌዴ ኢሞታ ኢማሳ፤ ኣዋ ባጋራካ ዪዳይቲ ኔናራ ላይማታና ማላ ባሌላናሰ ሞጎታ ኢማሳ።

34 ሄሳ ገሻሰ ኔ ላይማቴላይ ሃራታፔ ዱማ፤ ላይማታናሰ ኮይዛዴይ ኔናራ ገጋናሰ ሜቶቴና፤ ኔኒ ኢዛሰ ኢሞታ ኢማሳ ኣቲን ኢዚ ኔሰ ኢሞታ ኢሜና፤ ኔ ሃኖታይ ሃንኮይታፔ ዱማቴሰ ጌሰ» ጌሰ ኡባ ሃሪዛ ጎዳይ።

ዬራሳላሜ ቦላ ያና ፒርዳ

35 ሃኔ ላይማ ማጫሳዬ፤ ኣኔ ጎዳ ቃላ ሲያ!

36 ኡባ ሃሪዛ ጎዳይ፤ «ኔኒ ኔ ላይማቴላ ኣሞን ኔ ማይኦ ቃራዳ ኔ ካሎቴላ ኔ ላጌታ ቤሲዳ ገሻሰ፤ ሃራሲዛ ኤቃ ጸሳታ ኔ ጎይኒዳ ገሻሰ ኢሰታሰ ኔኒ ኔ ናይታ ሱላ ያርሺዳ ገሻሰ።

37 ኔኒ ኢሰታን ኡፋዬቲዳ ኔ ላጌታ ኡባ፤ ኔ ሲቂዛይታኔ ኔ ኢጸዛይታ ኡባ ታ ሺሻና፤ ኡባ ባጋፌ ኔ ዩሾን ሺሻዳ ኢሰታ ሲንሳን ኔ ካሎቴላ ታ ቃራና፤ ኢሰቲካ ኔ ካሎቴላ ኡባ ቤኣና።

38 ታኒ ላይማቲዛ ማጫሳታ ቦላኔ ሸምፖ ዋጂዛ ማጫሳታ ቦላ ፒርዲዛ ማላ ኔ ቦላ ፒርዳና፤ ታ ሃንቆኒኔ ሚሾናን ሸምፖ ዋጂናሼ ጋካናሰ ታ ሃሎ ኬሳና።

39 ታኒ ኔና ኔ ላጌታሰ ኣላ ኢማና፤ ኢሰቲካ ኔ ፖጎኖታኔ ኔ ዙሞቡላ ቦላ ጎይኒዛሶሆታ ላላና፤ ኢሰቲ ኔ ማይኦ ቃሪ ኤካና፤ ሎኦ ኔ ኣሌቆታ ቦንቂ ኤካና፤ ኔና ፒጸኒ ካሎኔ ኩሼ ሜላ ኣሻና።

40 ኢስቲ ኔ ቦላ ዳሬ ዳንፋና፤ ሹቻራ ኔና ኩራካና፤ ማሻራ ኢስቲ ኔና ቃንጾሬፋና።

41 ኔ ኬሳታ ታማን ጹጋና፤ ዳሮ ማጫሳታ ሲንላን ኔ ቦላ ቂጻቲ ኤሃና፤ ኔ ላይማቴላ ታ ኔና ዲጋና፤ ሃይሳፌ ጉዬ ኔ ሲቆታስ ኔ ሚሽ ቃንጸካ።

42 ሄሳን ኔ ቦላ ዲዛ ታ ሃንቆይ ኢርጸና፤ ታ ሴላ ሃንቆይ ኔፔ ሃካና፤ ታ ጮኡ ጋና ኣቲን ሃይሳፌ ጉዬ ሃንቁቲኬ።

43 «ኔ ታና ሃይታን ሃንቁላዳሳ ኣቲን ኔ ዬላጋቴላ ዋዴታ ቆፓቤካ፤ ሄሳ ጊሻስ ኔ ኦሶ ማላ ታ ኔስ ኢማና» ጌስ ኡባ ሃሪዛ ጎዳይ። ኔ ኦሊዳ ኢታ ኦሶታ ቦላ ሃራ ዚታቴላ ጉጃቤኪ?

ዬራሳላሚ ማጫ ናይታ ናሞኣታ

44 «ዬራሳላሚ! ኣስ ኡባይ ሌሚሶ ሃሳይሹ፥ ለማጫ ናይ ኣዪን ኬዜስ» ጊ ኔ ቦላ ሌሚሶ ሃሳዬስ።

45 ቱሙ፡ ኔኒ ባ ኣዚናኔ ባ ናይታ ሻቲቲዛ ኔ ኣዬይ ና፤ ኔኒ ባንታ ኣዚናታኔ ባንታ ናይታ ሻቲቲዛ ኔ ሚቹታ ማላ። ኢንቲ ኣያ ሂቲ ቢታ ኣሳ፤ ኢንቲ ኣዋይ ቃሴ ኣሞሬ ቢታ ኣሳ።

46 ኔስ ባይራ ሚቹያ ኔፔ ፑዴሃ ባጋራ ባ ማጫ ናይታራ ዲዛ ሳማሪያ፤ ኔስ ካሎ ሚቹያ ኔፔ ዱጌሃ ባጋራ ዲዛ ሶዶሞ።

47 ኔኒ ኢስታ ኦኔ ቡሲኔ ኢስታ ኢታ ኦኔ ካሎ ጸላ ጊዶንታ ጉላ ዋዴን ኢስታፌ ቦላራ ኢታ ኦሊዛር ጊዳዳሳ።

48 ታ ኡባ ሃሪዛ ጎዳይ ታኒ ዴኦ ጸሳ ጊዳዳይሳን ጫቃይስ፡ ኔኒኔ ኔ ማጫ ናይቲ ኦሊዳይሳ ማላ ኔ ሚቾ ሶዶማኔ ኢዚ ማጫ ናይቲካ ኦሊቤቴና።

49 ኔ ሚቹያ ሶዶማ ኦሊዳ ናጋራይ ሃይሳ፡ ኢዛኔ ኢዚ ማጫ ናይቲ ኦቶራንቻ፡ ካሊዳይታኔ ኢንጄ ዱስ ዲዛይታ፤ ኢስቲ ማንቆታኔ ሚቶቴቲዳይታ ማዲ ኤሬቴና።

50 ኢስቲ ኦቶራንቻ ጊዳዲ ታ ሲንላን ሃራሲዛ ሚሽ ኦሊዳ፤ ሄሳ ጊሻስ ኢንቲ ቤኢዳ ማላ ታ ሲንላፌ ጳይሳዲስ።

51 ሳማሪያይ ኔ ኦሊዳ ናጋራስ ባጋ ጊዳናይሳካ ኦላቤኩ፤ ኔኒ ጊዳኩ ኢዚፔ ኬሂ ኢታ ጊዳዳ ኦሶ ኦሶን ሄ ኡባን ኔኒ ኔ ሚቹታ ጸሎ ኣሳ ማላ ሚሳቲሳዳሳ።

52 ኔኒ ኔ ሚቹታ ጸሎ ማላ ቆዲዳ ጊሻስ ዬላ ማይኣ፤ ኔ ናጋራይ ኢስታይሳፌ ኬሂ ኢታ ጊዳዳ ጊሻስ ኢስቲ ኔፔ ጸሎ፤ ኔኒ ኔ ሚቹታ ጸሊሲዳ ጊሻስ ዬላ ቁማኦ።

53 «ታኒ ጊዳኩ ሶዶሞኔ ኢዚ ማጫ ናይታ፡ ሄሳፉካ ሳማሪያፔኔ ኢዚ ማጫ ናይታፔ ኤኬቴዳ ዲኦ ታ ዛራና፤ ኢስታፌ ዲኤቲዳይሳ ታ ዛሪዛ ዋዴ ኔፔ ዲኤቲዳይሳካ ዛራና።

54 ኔ ኦሊዳ ኡባን ኔ ካዉያናኔ ኬሃ ዩላታና፤ ሄሳን ኔ ሚቹቲ ሚኔታና፡፡

55 ኔ ሚቹ ሶዶማኔ ኢዚ ማጫ ናይቲ፥ ቃሴካ ሳማሪያይኔ ኢዚ ማጫ ናይቲ ካሴ ባ ዲዛ ሃኖታን ሲማና፤ ኔኒኔ ኔ ማጫ ናይቲካ ካሴ ኢንቲ ዲዛ ሃኖታን ሲማና፡፡

56 ካሴ ኔ ኦቶሬቲዛ ዎዴ ኔ ሚቹ ሶዶሚስ ሱንሐ ጸይጋናሰካ ኮያቤካ፡፡

57 ሄሲ ኔ ናጋራይ ቆንጫናፔ ሲንላን ሃኒዴስ፤ ሃኢ ጊዲኮ ኔ ዩቮን ዲሼ ኔና ካቋዛ ኤዶሚ ማጫ ናይታሲኔ ኢዚ ሾርታ ኡባስ፥ ቃሴ ፊሊስጶሚ ማጫ ናይታስ ቂጼስ ኣታዳሳ፡፡

58 ኔ ፖኮ ሃኖሲኔ ኔ ኢታ ኦሶስ ቤሲዛ ቂጻቴ ኤካና» ጌሰ፡፡

ሚርናስ ላሌቶንታ ጫቆ ቃላ

59 ኡባ ሃሪዛ ጎዳይ፥ «ታ ቃላ ካቋዳ ገሻስ ታናራ ጌሊዳ ጫቆ ቃላ ላላዳሳ፤ ሄሳስ ኔ ኦሊዳ ማላ ታ ኔ ቦላ ኦላና፡፡

60 ጊዶ ኣቲን ኔ ናቴላን ዲሺን ታ ኔናራ ጫቂዳ ቃላ ቆፓና፤ ቃሴ ሚርናስ ኤቂ ዳና ጫቆ ቃላ ታ ኔናራ ጫቂታና፡፡

61 ኔኒ ኔስ ባይራ ሚቹታኔ ካሎ ሚቹታ ሞካ ኤኪዛ ዎዴ ኔ ሄሚሐ ቆፓ ኤካዳ ዩላታና፤ ኢስቲ ኔስ ማጫ ናይታ ጊዳና ማላ ታ ኔስ ኢማና፤ ጊዶ ኣቲን ታ ኔናራ ጌሊዳ ጫቆ ቃላ ማላ ጊዴና፡፡

62 ሄሳ ገሻስ ታ ኔናራ ጫቆ ቃላ ኦራሲሳና፤ ታኒ ጎዳ ጊዲዳይሳ ኔ ሄ ዎዴ ኤራና፡፡

63 ታኒ ኔ ኦሊዳ ሞሮ ኡባ ኣቶ ጊዳ ዎዴ ኔ ቆሆይ ኔ ዎዚናን ካርፒ ጊ ጌሊዛ ዎዴ ኔ ዩላታና፤ ኔ ካዉሻቴላፌ ዴንዲዳይሳን ኔ ዶና ሙሌካ ዶያካ» ጊዴሰ፡፡

17

ጎሌታ ለሚሶኔ ዎይኔ ቱራ ለሚሶ

1 ጎዳ ቃላይ ታኮ ዩዲ፥

2 «ሃይሶ ኣሳ ናዉ! ኢሰራኤሌ ኣሳ ማሌሶ ማሌላ፤ ኔ ኢስታስ ለሚሶን ማሌሶ ዮታ፡፡

3 ኡባ ሃሪዛ ጎዳይ፥ «ዎጋ ቂፊይኔ ኣዱሲኔ ጮራ ባሌይ ዲዛ ኢዛስ ሚቃይ ማሳራ ጊዲዳ ጊታ ጎሌይ ዴስ፡፡ ኢዚካ ሊባኖሴ ዩዲ ዚጋ ሚላ ጸራን ኡቲዲ ኤንቁሎዛ ጸንቂዴስ፡፡

4 ሄ ሚላዛ ጸራፔ ኤንቁሎዛ ጸንቂ ኤኪዲ ዛልኣንቻታ ዴሬ ኤፊዴስ፤ ዛልኣንቻታ ካታማን ቶኪዴስ፡፡

5 « ነሃሳፌ ጉዩ ሄ ቢታፌ ዜሬሐ ኤፊዲ ሎኦ ቢታን ሃላ ኩሚዳሶን ሃሐ ናጌ ሚላ ማላ ቶኪዴስ፡፡

6 ኢዚ ሞኪዳ ዋዴ ቃንፊኔ ዳዩዳ ዋይኔ ቱራ ጊዲዳስ፤ ሃጋቲ ጎሌዛ ባጋ ዲጨዳ፤ ጸጸቲ ጊዲኮ ኢዛ ጋርሳን አቲዳ፤ ሄሳ ጊሻስ ኢዚ ዋይኔ ቱራ ጊዲዳስ፤ ሃጋታ ኬሲዳስ፤ ጨለላ ሃይላታካ ኬሲዳስ።

7 « ቃሴ ዋጋ ቄፊቲኔ ጮራ ባሌን ካሜቲዳ ጊታ ጎሌይ ዳስ፤ ሄ ቶኬቲዳ ዋይኔ ሚላዚ ሃላ ዳማናስ ባ ቶኬቲዳሶፔ ባ ጸጸዛ ጎሌዛኮ ዩዲዳስ፤ ሃጋካ ኢዛኮ ሚጨዳስ።

8 ጊዶ አቲን ሃጋ ኬሳና ማላ፤ አይፌ አይፋና ማላኔ ሎኦ ዋይኔ ሚላ ጊዳና ማላ ኢዛ ማታን ዳር ሃላ ዲዛሶን አራዳ ቢታን ካሴ ቶኬቲዳስ) ጌስ።

9 «ኔኒ ኢሰታስ፤ ሓባ ሃሪዛ ጎዳይ፤ ሄ ቱራይ ዲጫኔ? ኮይሮ ጎሌዚ ሹላና ማላ ጸጸዛ ሾዲን ኢዛ አይፌዚ ቆቆፊቲኔ? ኡንቁሎይካ ኡባይ ሜላና፤ ኢዛ ጸጸፔ ሾዳናስ ሚኖ ቄሴኔ ዳር አሳ ዋልቃ ኮሼና።

10 ኢዚ ሃራሶን ቶኬቲዳ ኦይካንዴሻ? አርሼይ ሞኪዛ ባጋ ጫርኮይ ሾጨኮ ሄን ባ ዲጨዳሶን ኢዚ ሙሌራ ሜሌኔ?) » ጊዳስ።

ለሚሶዛ ቢርሼላ

11 ሄሳፌ ጉዬ ጎዳ ቃላይ ታኮ ዪዲ፤

12 «ሃይሳ ማካላንቻ ኬላ አሳስ፤ ሃይታ ለሚሶታ ቢርሼላ አዛኮኔ ኢንቲ ኤሬኬቲ?» ሄሲካ ባቢሎኔ ካዋይ ዩሩሳላሚ ዪዲ ኢዚ ካዋዛኔ ኢዚ ዳናታ ዲኢ ኤኪ ባቢሎኔ ሲሚ ቢዳስ።

13 ቃሴ ካዋ ኬላ አሳፔካ ኢሳ ኤኪዲ ኢዛራ ኢሲፌ ቃላ ጌሊዳስ፤ ኢዛካ ጫቄሊዳስ፤ ቢታይ ቦላ ኤሬቲዛ አሳታ ዲኢ ኤኪ ቢዳስ።

14 ኢዚ ሄሳ ኦሊዳይ ሄ ቢታይን ዲዛ ካዋቲላያ ካዉያዳ ኢዛራ ጌሊዳ ቃላ ናጋዳ ዳና ማላ አቲን ናምኣንሎ ዳንዶንታ ማላ ኦላናሳ።

15 ጊዶ አቲን ዩሁዳ ካዋይ ኢዛ ቦላ ማካሊዲ፤ ፓራታኔ ዳር ኦላንቻታ ዳማናስ ቃሰታኔታ ጌብጼ ቢታ ከቲዳስ። ኢዛስ ሄሲ ሃናንዴ? ሃይሳ ማላ ኦሊዳይ ኬሲ ኤኪ አታንዴ? ጌሊዳ ጫቆ ቃላ ላሊዳዳይ ቃጸዬቶንታ አታንዴ?

16 «ኡባ ሃሪዛ ጎዳይ፤ ሓኒ ዴኦ ጸሳ ጊዲዳይሳን ጫቃይስ፤ ኢዚ ጫቆዛ ካዲዲ ጌሊዳ ቃላ ላሊዳሶን ኢዛ አራታ ቦላ ኡቲሲዳ ካዋዛ ቢታ ባቢሎኔን ኢዚ ሃይቃና።

17 ባቢሎኔ ኦላንቻቲ አስ ዋዳናስ ካታማይ ጊምቤ ዩሾን ቢታ ዶሪዛ ዋዴኔ ሚጸታ ጊግሲዛ ዋዴ ጊብጼ ካዋ ፓሮኔ ኦላንቻታራኔ ዳሮ ቡቴታራ ዩዲ ኦላን ኢዛ ማዳና ዳንዳዬና።

18 ካሴ ኢዚ ጫቂዳ ጫቆዛ ካጺዲኔ ካሴ ባ ጌሊዳ ቃላ ላሊዲ ባ ኩሼ ኢሚዳፔ ጉዬ ሃይታንታ ኡባ ኦሊዳ ጊሻስ ቃጻዬቶንታ አቴና። ጌሰ።

19 «ሄሳ ጊሻስ ኡባ ሃሪዛ ጎዳይ፥ ታኒ ዴኦ ጸሳ ጊዲዳይሳን ጫቃይሰ፤ ኢዚ ጫቂዳ ጫቆዛ ካጺዲ ጌሊዳ ቃላ ላሊዳ ጊሻስ ታኒ ታ ጫቆ ቃላ ኢዛ ሁኔ ቦላ ኤሃና።

20 ታ ጌቱ ኢዛ ቦላ ሚጫና፤ ኢዚ ታ ዋጸማዴን ኦይኬታና፤ ኢዚ ታስ አማኔቶንታ አጊዳ ጊሻስ ታ ኢዛ ባቢሎኔ ኤፋዳ ሄን ኢዛ ቦላ ፒርዳና።

21 ባቃቲዛ ኢዛ ኦላንቻቲ ኡባይ ማሻን ሃይቃና፤ ጫሻ አቲዳይቲ ዲማ ዲማሶ ላሌታና። ሃይሳ ሃሳይዳይ ታና ጎዳ ጊዲዳይሳ አንቴ ሄ ዋዴ ኤራና። ጌሰ።

22 «ኡባ ሃሪዛ ጎዳይ፥ ታኒ ሁኔራ አዲሳ ዚጋ ጸራፔ አንቁሎዛ ጸንቃ ኤካዳ ኡባፌ ቶቃ ዙማ ሁኔን ቶካና።

23 ቶቁ ጊዳ ኢሰራኤሌ ዙማ ሁኔን ቶካና፤ ኢዚ ሃጋታ ኬሳና፤ አይፌ አይፋና፤ ሎኦ ዚጋ ጊዳና፤ ዲማ ዲማ ቆሞ ካፎቲ ኡባይ ሄን ባስ ዲሳሶ ኬጻና፤ ኢዛ ሃጋታ ኩዋን ሸምፓና።

24 ዋራ ሚሐ ኡባይ፥ አዲሳ ሚሓታ ዚቁ ሂስቲዛይ፥ ቃንሓ ሚሓታ ቶቁ ሂስቲዛይ ታና ጎዳ ጊዲዳይሳ ኢስቲ ሄ ዋዴ ኤራና፤ ጨሊላ ሚሓታ ታኒ ሜሊሳይሰ፤ ሜላ ሚሓታ ታኒ ጨሊሊሳይሰ። ጌሰ።

«ታኒ ጎዳይ ሃይሳ ሃሳይዲሰ፤ ኢዛካ ኦላና» ጊዴሰ።

18

አሲ ባ ኦሊዳ ኦሶ ማላ ፒርዴታና

1 ጎዳ ቃላይ ታኮ ዩዲ፥

2 «ኢሰራኤሌ ቢታ ጊሻስ፥ ላዋቲ ቃዉኤ ዋይኔ ሚን ናይታ አቺ ዚልኢዴስ። ጊዲ አንቴ ቶሴ ዮቲዛይ አዜ?

3 «ታኒ ኡባ ሃሪዛ ጎዳይ! ታኒ ዴኦ ጸሳ ጊዲዳይሳን ጫቃይሰ፤ ሃይሳፌ ጉዬን አንቴ ሃይሳ ማላ ቶሴ ኢሰራኤሌ ቢታን ዮቲኬታ።

4 ቤኢቲ አሳ ኡባ ሸምፖይ ታሳ፤ ዬሊዳይታ ሸምፖይ ታስ ጊዲዳ ማላ ኢስታ ናይታ ሸምፖይካ ታሳ፤ ናጋራ ኦሊዳ ሸምፖያ ሃይቃና።

5 ሱሬቴላኒኔ ዋጋን ኦሊዛ አሲ አሲ ዲኮ፥

6 ዙምቡላታ ቦላ ኤቃ ጸሳታስ

ያርሼቲዳይሳ ኢዚ ማና፤
 ኢሰራኤል ቢታንካ ዲዛ
 ኤቃ ጸሳታኮ ጸሌና፤
 ባ ላጌዛ ማቼይራ
 ላይማቴና፤
 ማጫሳ ዋጋይ ዪሺን
 ማጫሳራ አቄና።

- 7 ኦናካ ኡንኤሌና፤
 ጊዶ አቲን ኦይሶ ኤኪዳ
 ሚሻካ
 ታልኤ ኤኪዳዴሰ ዛሬሰ፤
 ጋፊዳዴሰ ባ ካሐ፥
 ካሎቲዳዴሰ ባ ማይኦ
 እሜሰ አቲን
 ዋልቃራ ባሰ ቦንቂ ኤኬና።

- 8 ኢዚ ዲቻሰ ታልኤና፤
 ቡቲ ዳሮ ዲቺካ ኤኬና፤
 ባ ኩሼ ሞሮፔ ናጌሰ፤
 አሳሰ ሱሬ ፒርዳ ፒርዴሰ።

- 9 ታ ማራ ካሌሰ፤
 ታ ዋጋካ
 ሱሬቴላን ፖሌሰ።
 ሄሲ ጲሎ አሳ፤
 ኢዚ ሼምፖራ ፓጻ ዳና» ጊዴሰ።

- 10 ኡባ ሃሪዛ ጎዳይ፥ «ሃ ቢታኔዛሰ ሼምፖ ዋጲዛ፥ ዋይኮ
 ሃይሳፊ ካሊ ዲዛይታፔ ኢሳ ኦሊዛ ኢሲ ማካላንቻ ናይ ዴኢኮ፥

- 11 ኢዛ አዋይ ሄይታፔ
 ኢሳካ ኦላንታ አጊኮ፥
 ናዚ ዙምቡላታ ቦላ
 ያርሾሰ ሽቂዳይሳ ሚኮ፥
 ባ ላጌዛ ማቼይራ
 ላይማቴኮ፥

- 12 ሃዬሳኔ ሜቶቴቲዳዴ
 ኡንኤሊኮ፥
 ዋልቃራ ዳፊ ኤኪኮ፥
 ኦይሶ ኤኪዳይሳ ዛርንታ ኢጲኮ፥
 ኤቃ ጸሳታኮ ሲሚኮ፥

ሃራሲዛ አሶታ ኦሊኮ፡

13 ዲቻሰ ታልኢኮ፡

ቡቴ ዳሮ ዲች ኤኪኮ፡

ሄሳ ማላ አሲ ሸምፖራ ፓጻ ዳኔ? ሙሌካ ዳና! ኢዚ ሃይታ ሃራሲዛ ሚሻታ ኦሊዳ ጊሻሰ ኢዚ ቱሙካ ሃይቃና፤ ባ ሱፋን ባርካ ኦይሼታና፤ ቱሙካ ሃይቃና።

14 «ሃ ኢታ አዴዛ ናዚ ጋኪዲ ና ዬሊኮ ኢዛ ናዚ ካሴ አዋይ ኦሊዳ ናጋራ ኡባ ቤኢዲ ኢዛፉ ኦፉንታ ኣጊኮ፡

15 ዙምቡላታ ቦላ

ያርሾ ሸሸዲይሳ

ኢዚ ሞንታ ኣጊኮ፡

ኢሰራኤል ቢታን ዲዛ

ኤቃ ጸሳታ ጎይኖንታ ኣጊኮ፡

ባ ላጌዛ ማቼይራ

ላይማቶንታ ኣጊኮ፡

16 አሰ ኡንኤፉንታ ኣጊኮ፡

ታልኤ አማናሰ

ኦይሶ ኦይቸንታ ኣጊኮ፡

ዎልቃራ ቦንቂ ኤኮንታ ኣጊኮ፡

ጊዶ ኣቲን ባ ካል ጋፊዳዴሰ፡

ባ ማይኦ ካሎቲዳዴሰ ኢሚኮ፡

17 ባ ኩሼ ኢታ አሶፔ

ሸሸ ኤኪኮ፡

ዲች ዎይኮ ቡቴፔ

ዳሮ ዲች ኤኮንታ ኣጊኮ፡

ታ ዎጋ ናጊኮ፡

ታ ማራ ካሊኮ፡

ኢዚ ሸምፖራ ፓጻ ዳና ኣቲን ባ አዋ ናጋራን ሃይቁና።

18 ጊዶ ኣቲን ኢዛ አዋይ ኣሳ ማታ ናቂዳ ጊሻሰ፡ ባ ኢሻፔ ዎልቃራ ቦንቂ ኤኪዳ ጊሻሰ፡ ዴራ ጊዶን ቤሶንታ ሚሽ ኦሊዳ ጊሻሰ ኢዚ ባ ናጋራን ሃይቃና።

19 «ኢንቴ ጊዲኮ፡ ሳይ ባ አዋ ናጋራን ኣይሰ ቃጻዬቴ?» ጌታ። ናዚ ሱሬኔ ቱማ ኦሊዳ ጊሻሰ፡ ታ ማራካ ሚንሉ ናጊዳ ጊሻሰ ኢዚ ሸምፖራ ፓጻ ዳና።

20 ሃይቃናሰ ቤሲዛይ ናጋራ ኦሊዳ ሸምፖ። ናይ ባና ዬሊዳይታ ናጋራን ቃጻዬቴና፤ ሄሳ ማላንካ ዬሊዳይቲ ባ ናይታ ናጋራን

ቃጻዬቴቴና። ጸሎይ ባ ጸሎቴላ ኣይፌ ማና፤ ናጋራንቻይካ ባ ናጋራ ጋቴ ኤካና።

21 «ጊዶ ኣቲን ናጋራንቻይ ባ ኦሊዳ ናጋራ ኡባፌ ሲሚዲ ታ ማራ ኡባ ናጊኮ፤ ሱሬኔ ቱማ ጊዲዳ ኦሶ ኦሊኮ ኢዚ ሙሌካ ሼምፖራ ፓጻ ዳናፔ ኣቲን ሃይቁና።

22 ኢዛ ቆሆይ ኡባይ ቆዴቴና። ኢዚ ጸሎቴላ ኦጌን ቢዳ ጊሻሰ ሼምፖራ ፓጻ ዳና።

23 ቱማፔ ናጋራንቻ ሃይቆን ታ ኡፋዬታዚና? ጌሰ ኡባ ሃሪዛ ጎዳይ። ሃሳፌ ቦላራ ኢዚ ባ ቢዛ ኢታ ኦጌፔ ሲሚዲ ሼምፖራ ፓጻ ዲኮ ታና ኡፋይሴኔ?

24 «ጊዶ ኣቲን ጸሎ ኣሲ ባ ጸሎቴላፌ ሲሚዲ ናጋራ ኦሊኮ፤ ናጋራንቻይ ኦሊዛ ቱና ሚሽ ኦሊኮ ቱማፔ ኢዛዴይ ሼምፖራ ፓጻ ዳኔ? ኣካይ፤ ኢዚ ኦሊዳ ጸሎቴላፌ ኢሶይካ ኢዛሰ ቆዴቴና፤ ኢዚ ኣማኔቶንታ ኢዲዳ ጋሶኒኔ ኢዚ ኦሊዳ ናጋራ ኡባ ጋሶን ኢዚ ሃይቃና።

25 «ኢንቴ ጊዲኮ፤ ሳዳ ኦጌይ ሱሬ ጊዴና ጌታ። ኢንቴኖ ኢሰራኤሌ ኣሳቶ! ሃኢ ሲዪቴ! ታ ኦጌይ ሱሬ ጊዴኔ? ጌላይ ኢንቴ ኦጌ ጊዴኔ?

26 ጸሎ ኣሲ ባ ጸሎቴላፌ ሲሚዲ ናጋራ ኦሊዛ ዋዴ ባ ናጋራ ጋሶን ሃይቃና፤ ባ ኦሊዳ ቆሆ ጋሶን ኢዚ ሼምፖራ ፓጻ ዴና።

27 ናጋራንቻይ ጊዲኮ ባ ኢታ ኦሶፔ ሲሚዲ ኣማኔቴላን ዲኮ ኢዚ ባ ሼምፖ ኣሻና።

28 ኢዚ ባ ኦሊዳ ቆሆ ኡባ ዩሺ ኣኬኪዲ፤ ባ ኦሊዳ ኢታቴላ ኦሶ ኡባፌ ሲሚዳ ጊሻሰ ኢዚ ሼምፖራ ፓጻ ዳና ኣቲን ሃይቁና።

29 ኢሰራኤሌ ኣሳይ ጊዲኮ፤ ሳዳ ኦጌይ ሱሬ ጊዴና ጊዴ። ኢንቴኖ ኢሰራኤሌ ኣሳቶ! ታ ኦጌይ ሱሬ ጊዴኔ? ጌላይ ኢንቴ ኦጌ ጊዴኔ?

30 «ሄሳ ጊሻሰ ኢንቴኖ ኢሰራኤሌ ኣሳቶ! ሄሳ ጊሻሰ ኢንቴ ኦሶ ኦሶ ማላ ታ ኢንቴ ቦላ ፒርዳና፤ ሃኢ ማሮቴላን ጌሊቴ፤ ኢንቴ ናጋራን ቆሮንታ ማላ ኢንቴ ናጋራ ኡባፌ ሲሚቴ።

31 ኢንቴ ታ ቦላ ኦሊዳ ቆሆ ኡባ ዋራ ኦሊቴ፤ ኢንቴሰ ኦራላ ዋዚናይኔ ኦራላ ኣያናይ ዴኦ፤ ኢንቴኖ ኢሰራኤሌ ኣሳቶ ኣይሰ ሃይቁቲ?

32 ኦኒካ ሃይቃናይሳ ታ ኮይኬ ጌሰ ኡባ ሃሪዛ ጎዳይ፤ ታኮ ሃ ሲሚዲ ሼምፖራ ፓጻ ዲቴ» ጊዴሰ።

19

ኢስራኤል ዳናታ ገሻስ ዚላሌቲዳ ዚላስ

1 ጎዳይ፥ «ኢስራኤል ዳናታ ገሻስ ዚላስ ዚላላና ማላ ታስ
ጥቲዴስ፤

2 ኢዚካ ታስ፥

« ሳኔ እያ ካሴ

ጋሞታ ገደን

እይ ማላ ጋሞ!

ዎዳላ ጋሞታ

ገደን ኢቻዱስ፤

ባ ማራታካ ሄን ዲቻዱስ።

3 ባ ማራታፔ ኢሳ ኢዛ ዲቹን፥

ኢዚ ሚኖ ጋሞ ገዲዴስ፤

ኢዚ ሻንካቴል ታማርዲ

እስ ሚዴስ።

4 ካዎቴላቲ ኡባይ ኢዛ ሃኖ ሲዪዳ፤

ኢስቲ ቦኪዳ ኦላን

ጌሊዲ ኦይኬቲዴስ፤

ኢስቲካ ኢዛ ሲጴን ዳፎ ኣሉ

ጎቹዲ ገብጾ ቢታ ኤፊዳ።

5 « ሳኢ ሂደታ ኦሊዳይሲ

ጨልቃሚዳይሳ፥

ኢዛ ናገዳይሲ ፖሌቶንታይሳ

ቤኢዳ ዎዴ፥

ባ ማራታ ገደፌ

ናሞእንሶዛ ዲቻዳ፥

ሚኖ ጋሞ ኬሳዱስ።

6 ኢዚ ጋሞታ ገደን ኖቹ ገዴስ፤

ሚኒ ሚኒካ ቢዴስ፤

ዎጲ ሙስ ኤሪዲ እሳካ ሚዴስ።

7 ኢዚ ኢስታ ሚጸ ሚንሐፊሊዴስ፤

ኢስታ ካታማታካ ካይዚሲዴስ፤

ቢታይኔ ቢታን ዲዛ እሳይ ኡባይ

ኢዛ ጸጎፔ ዴንዲዳይሳን

ኮሮሪዳ።

8 ኢዛ ዩሸን ዲዛ ካዎቴላቲ

ኡባይ ኢዛ ቦላ ዴንዲዳ፤

ባንታ ዳሬ ኡባፌ
 ኢዛ ቦላ ሸቂዳ፤
 ባንታ ጊቱ ኢዛ ኦይካና ዩጊዳ፤
 ኢዚ ኢስታ ኦላን
 ጌሊዲ ኦይኬቲዳስ።

- 9 ሲጼን ዳፎ ዩጊዲ
 ኮላ ጊዶን ጌልሊዳ፤
 ባቢሎኔ ካዎኮ ኤፊዳ፤
 ናሞኣንሉ ኢዛ ጨንጉርሲ
 ኢስራኤል ዙማታ ቦላ
 ሴቴቶንታ ማላ፤
 ኢስቲ ኢዛ ቃሾ ኬል ጌልሊዳ።

- 10 « ሳ ኣያ ሃላ
 ደናን ቶኬቲዳ
 ዎይኔ ቱራ ማላ፤
 ጎሻ ጋዴን ዳሮ ሃሊ ዲዛ
 ጊሻስ፥ ዳዩዳ ኣይፊዳ
 ዎይኔ ቱራ ሚሳታዲስ።

- 11 ኢዚ ሃጋቲ ካዎቴላስ
 ቤሲዛ ሚኖ ጉፊታ።
 ጨፒ ጊዳ ሃይላታ ጊዶን፤
 ባ ኣዲሳቴላኒኔ
 ባ ጮራ ሃጋታን
 ሎኣ ቤታዲስ።

- 12 ጊዶ ኣቲን ሃንቆን ቋቃሌታዲስ፤
 ዱጌ ቢታን ኦሌታዲስ፤
 ኣርሼይ ሞኪዛ ባጋ ጫርኮይ
 ኢዞ ሜሊሲዳስ፤
 ኢዛ ኣይፊዳ ኣይፊዛ ቆቆፊዳስ፤
 ሚኖ ኢዚ ሃጋቲ ዳጋሚዳ፤
 ታማይካ ኢስታ ሚዳስ።

- 13 ሃኢ ሃል ሳሜቲዳ ሜላ ቢታን
 ባዘን ቶኬታዲስ።

- 14 ኢዚስ ዎጋ ሃጋታ
 ኢሳፌ ታማይ ኬዚዳስ፤
 ኢዛ ኣይፊዳ ኣይፊዛ ሚዳስ፤
 ካዎቴላስ ጊዲዛ ኢሲ ሚኖ

ሃጋይካ አቲቤና፤
ሃይሲ ዚላሳ፤ ጨፎጮ ጋላስ
ሚላሳስ ጊዳና ጋ» ጊዴስ።

20

ማካላንቻ ጊዲዳ አሰራኤል

¹ ኑኒ ዲኤቲዳ ላፑንላ ላይላን፣ ኢቻሻንላ አገናን፣ ታማንላ ጋላሳን፣ አሰራኤል ጨማታፔ ጉላቲ ጎዳ ኦይቻናስ ዩዲ ታ ሲንላን ኡቲዳ።

² ጎዳ ቃላይ ታኮ ዩዲ።

³ «ሃይሶ አሳ ናወ! አሰራኤል ጨማታስ ኡባ ሃሪዛ ጎዳይ፣ ላኒቴ ታ ቆፋ ኦይቻና ዩዴቲ? ታኒ ዴኦ ጸስ ጊዲዳይሳን ጫቃደስ፤ አንቴ ታና ኦይቺዲ ኤራና ማላ ኮይኬ» ጌስ ጋዳ ዮታ» ጊዴስ።

⁴ ኡባ ሃሪዛ ጎዳይ፣ «ሃይሶ አሳ ናወ! ሃይታንታ ኔ ፒርዳስ ሺሻኔ? ቱማፔ ኔ ኢስታ ፒርዳስ ሺሻኔ? ሃራሲዛ ካሴ ኢስታ አዋታ ኦሶዛ ኢስታስ ቆንጨሳ።

⁵ ኢስታስ፣ ታኒ አሰራኤል ዶሪዳ ዎዴ፣ ያቆቤ ዛሬታስ ታ ኩሼ ዴንላዳ ጫቃዲስ፤ ጌብጼ ቢታን ታናቴላ ኢስታስ ቆንጨሳዲስ፤ ታ ኩሼካ ዴንላ ጫቃዳ ጎዳይ ታኒ አንቴ ጸሳ» ጊዴስ።

⁶ ታኒ ኢስታ ጌብጼ ቢታፌ ኬሳዳ ኡባፌ ሎኦ ጊዲዳ ማላኔ ኤሲ ጎጊዛ ቢታ ታ ኢስታስ ጊጊሳ ዎላዳ ቢታ ጌልላና፣ ጋዳ ጫቃዲስ።

⁷ ቃሴ ታኒ ኢስታስ፣ ላኒቴፌ ኢሶይ ኢሶይ አንቴ አይፌታ ሼምፒሲዳ ቱና ሚሰሌታ ዲጊቴ፤ ጌብጼ ኤቃ ጸሳታን አንቴና ቱኒሶፒቴ። ጎዳይ ታኒ አንቴ ጸሳ» ጋዲስ።

⁸ «ኢስቲ ኢሶይ ኢሶይ ጊዲኮ ታ ቦላ ማካሊዳ፤ ታ ዮቲዛይሳካ ሲያና ኮዬቤቴና፤ ኢስቲ ባንታ አይፌታ ኢስታ ቦላ ዎላዳ ቱና ሚሰሌታ ዲጊቤቴና፤ ጌብጼ ኤቃ ጸሳታካ አጊቤቴና። ሄሳ ጊሻስ ኢስቲ ጌብጸን ዲሺን ታኒ ታ ሃንቆ ኢስታ ቦላ ጉሳና፤ ፖላና ጋካናሼ ኢስታ ቦላ ዬዳናስ ቃቻዲስ።

⁹ ጊዶ አቲን ኢስቲ ካሴ ዲዛ ካዎቴላ ጊዶኔ ኢሰራኤል አሳ ጌብጼፔ ዎዛናስ ታኒ ቃላ ጌሊዛ ዎዴ ኢስታ ማታን ታ ቆንጨዳ ካዎቴላታ ሲንላን ታ ሱንላ ቱኖንታ ማላ ታ ሱንላ ጊሻስ ጌንጫዲስ።

¹⁰ «ሄሳ ጊሻስ ታኒ ኢስታ ጌብጼፔ ኬሳዳ ባዞ ኤሃዲስ።

11 አሲ ናጊዛኮ ሸምፖራ ፓጸ ዋሊዛ ማራ ታ ኢስታስ ኢማዲስ፤ ታ ዋጋካ ታ ኢስታ ኤሪሳዲስ።

12 ቃሴ ኢስታ ጌሺዳይ ታና ጎዳ ጊዲዳይሳ ኢስቲ ሄ ዋዴ ኤራና ማላ ታሲኔ ኢስታስ ጊዶን ማላታ ጊዳና ማላ ታ ሳምባታ ኢስታስ ኢማዲስ።

13 «ጊዶ ኣቲን ኢስራኤል ኣሳይ ባዞ ቢታን ታ ቦላ ማካሊዳ። አሲ ናጊዳኮ ሸምፖራ ፓጸ ዋሊዛ ታ ዋጋ ናጊቤቴና፤ ታ ማራ ማንሊዳ፤ ታ ሳምባታካ ሙሌራ ቱኒሲዳ። ሂስቲን ታኒ ታ ሃንቆ ኢስታ ቦላ ጉሳዳ ባዞ ቢታን ኢስታ ጳይሳናስ ቃቻዲስ።

14 ጊዶ ኣቲን ታኒ ኢስታ ጊብጾፔ ኬሲሺን ቤኢዳ ካዋቴላታ ሲንላን ታ ሱንሊ ቱኖንታ ማላ ታ ሱንላ ጊሻስ ጌንጫዲስ።

15 ቃሴ ታኒ ኢስታ ኡባፌ ሎኮ ጊዲዳ ማሊኔ ኤሲ ጎጊዛ ቢታ ታ ኢስታስ ኢማዳ ቢታ ታ ኢስታ ጌልሊኬ ጋዳ ታ ኩሼ ዴንላዳ ባዞ ቢታን ኢስታ ሲንላን ጫቃዲስ።

16 ጋሶይካ ኢስቲ ታ ዋጋ ማንሊዳ፤ ታ ኢስታስ ኢማዳ ማራካ ናጊቤቴና፤ ታ ሳምባታካ ቱኒሲዳ፤ ኢስታ ዋዚናይ ኢስታ ኤቃ ጸሳታራ ኦይኬቲዴስ።

17 ታኒ ጊዲኮ ኢስታ ቃዴታን ጸላዲስ ኣቲን ባዞ ቢታን ኢስታ ሙሊራ ጳይሳቤኬ።

18 ባዞ ቢታን ኢስታ ናይታስ፣ ሳሳኤ ኢንቲ ኣዋታ ማራ ካሎፍቴ፤ ኢስታ ዋጋካ ናጎፔቴ፤ ኢንቲና ኢስታ ኤቃ ጸሳታን ቱኒሶፔቴ።

19 ጎዳይ ታኒ ኢንቲ ጸሳ። ታ ማራ ካሊቴ፤ ታ ዋጋ ናጋናስ ማኒቴ።

20 ታሲኔ ኢንቲስ ጊዶን ማላታ ጊዳና ማላ ታ ሳምባታ ኢንቲስ ዲማ ጋላስ ሂስቲቴ፤ ጎዳይ ታኒ ኢንቲ ጸስ ጊዲዳይሳ ኢንቲ ሄ ዋዴ ኤራና፤ ጋዲስ።

21 «ኢስታ ናይቲ ታ ቦላ ማካሊዳ፤ አሲ ናጊዲ ሸምፖራ ፓጸ ዳና ማላ ታ ኢማዳ ማራ ካሊቤቴና፤ ታ ዋጋ ማኒ ናጊቤቴና፤ ታ ሳምባታካ ቱኒሲዳ። ሂስቲን ታኒ ታ ሃንቆ ባዞን ኢስታ ቦላ ጉሳዲስ፤ ታ ሃንቆይ ፖሌታና ጋካናስ ኢስታ ቦላ ኤሃናስ ቃቻዲስ።

22 ጊዶ ኣቲን ታኒ ኢስታ ጊብጾፔ ኬሲሺን ቤኢዳ ካዋቴላታ ሲንላን ታ ሱንሊ ቱኖንታ ማላ ታ ኩሼ ሺሻዲስ።

23 ቃሴካ ታኒ ኢስታ ካዋቴላታ ጊዶን ላላናይሳኔ ዲማ ዲማ ዴሬታ ጊዶ ጳርጫናይሳ ባዞ ቢታን ታ ኩሼ ዴንላዳ ኢስታ ሲንላን ጫቃዲስ።

24 ጋሶይካ ኢስቲ ማራ ካጵዳ፤ ታ ዋጋ ናጊቤቴና፤ ታ ሳምባታ ቱኒሲዳ፤ ኢስታ ኣይፌይ ኢስታ ኣዋታ ኤቃ ጸሳታራ ሺዲዴስ።

25 ሄሳ ጊሻስ ታኒ ኢስታ ሎኦ ጊዶንታ ማራሲኔ ኢስታ ሸምፖራ ፓጻ ዋሶንታ ዋጋስ ኣላ ኢማዲስ።

26 ኢስታ ባይራ ናይታ ታማን ጹጊ ያርሺዲ ቱናና ማላ ኣላዲስ፤ ታ ሄሳ ኦሊዳይ ኢስቲ ዳጋሚዲ ታኒ ጎዳ ጊዲዳይሳ ኤራና ማላሳ።

27 «ሄሳ ጊሻስ ኣሳ ናዉ! ኢስራኤል ኣሳስ ኡባ ሃሪዛ ጎዳይ፥ ሓንቲ ኣዋቲ ታናን ኣማኔቶንታ ኣጊዲ ሃይሳን ታና ጫዪዳ።

28 ታኒ ኢስታስ ኢማና ጫቂዳ ቢታ ኢስታ ኤሃ ጌልሊዳ ዋዴ ቆቆ ጊዳ ዙምቡላታ ኡባኔ ጨለሎ ሚል ኡባታ ቤኢዳ፤ ሄን ባንታ ያርሾ ያርሺዲ፤ ባንታ ካላ ያርሾ ሺሺዲ፥ ሳዎ ቱኦ ጊዛ ኤጸኔ ጨዋሲዳ፥ ኡሻ ያርሾካ ሺሺዲ ታ ሃንቆ ዴንፊሊዳን ጌስ።

29 ታኒካ፥ ሓንቲ ቢዛ ቆቃሶሆዚ ኢዚ ኣዜ?፥ ጋዲስ። ሃች ጋካናስ ኢዛ ሱንላይ ባማ ጌቲቲ ጴይጌቲስ፤ ኢዛስ ቢርሽላይ ጎይኒዛ ቆቃሶሆታ ጉሳ» ጌስ።

30 ሄሳ ጊሻስ፥ «ኡባ ሃሪዛ ጎዳይ ኢስራኤል ኣሳስ፥ ሓንቲ ኣዋቲ ኦሊዳ ማላ ኢንቲኒካ ኢንቲናቴላ ቱኒሴቲ? ቱኒዳ ኢስታ ኤቃ ሚስሊታ ኣሞቴላን ኣይስ ጸጌቲቲ?

31 ኢንቲ ያርሾ ሺሺዛ ዋዴ ኡባን ኢንቲ ናይታ ታማን ጹጊ ያርሺሼ ኤቃ ጸሳታን ሃች ጋካናስ ቱኒሼ ዴታ፤ ኢንቲና ኢስራኤል ኣሳቶ! ኢንቲ ታ ቆፋ ኦይቻና ማላ ታ ኢንቲስ ኤር ጎ? ታኒ ዴኦ ጸስ ጊዲዳይሳን ታናን ጫቃይስ፤ ኢንቲ ታና ኦይቻና ማላ ታ ኢንቲስ ኤኖ ጊኬን ጌስ» ጋዳ ዮታ።

32 ኡባ ሃሪዛ ጎዳይ፥ «ኢንቲ፥ ሓኒ ሚላሲኔ ሹቻስ ጎይኒዛ ካዎቴላ ማላኔ ኣላሚ ቦላ ዲዛ ዴራ ማላ ጊዳና ኮዮስ» ጊዲ ቆፔታ። ጊዶ ኣቲን ኢንቲ ቆፋይ ሙሌካ ኢንቲስ ሃኔና።

ጎዳይ ቃጸዬሲኔ ማሪስ

33 «ኡባ ሃሪዛ ጎዳይ፥ ታኒ ዴኦ ጸስ ጊዲዳይሳን ታናን ጫቃይስ» ታኒ ታ ሚኖ ቄሴኒኔ ሚጨቴዳ ታ ኩሼን ሃንቆ ጉሳሼ ታ ኢንቲ ቦላ ካዎታና።

34 ካዎቴላታ ጊዶፌ ታኒ ኢንቲና ኬሳና፤ ኢንቲ ላሌቲዳ ቢታ ኡባፌ ታ ሚኖ ቄሴኒኔ ሚጨቴዳ ታ ኩሼን ሃንቆ ጉሳሼ ኢንቲ ላሌቲ ቢዳ ዴሬ ኡባፌ ታ ኢንቲና ሺሻና።

35 ታኒ ኢንቲና ካዎቴላታስ ዲዛ ባዞ ቢታ ኤሃና፤ ሂስታዳ ሄን ታ ኢንቲና ቆንጨን ፒርዳና።

36 ጊብጼ ባዘን አንቴ አዋታ ካሴ ታ ፒርዲዳ ማላ አንቴናካ ታ ፒርዳና ጌሰ ኡባ ሃሪዛ ጎዳይ።

37 ታኒ አንቴና ታ ካዋቴላ ጉፌ ጋርሳራ አላና፤ ታ ጫቆ ቃላራካ አንቴና ጋላ ኦይሴላና

38 ታ ቦላ ማካሊዳይታኔ ታና ቆሃዳይታ ታኒ አንቴ ጊዶፌ ዲጋና፤ ሃኢ አሰቲ ዲዛ ቢታፌካ ታ አሰታ ኬሳና፤ ጊዶ ኣቲን አሰቲ አሰራኤሌ ቢታ ጌሌቴና። ታኒ ጎዳ ጊዲዳይሳ አንቴ ሄ ዋዴ ኤራና» ጌሰ።

39 አሰራኤሌ አሳቶ! ኡባ ሃሪዛ ጎዳይ አንቴና፡ «አንቴ ሃኢ ታኒ ዮቲዛይሳ ሲዮንታ አጸኮ ቢዲ ኡባይካ አንቴ ኤቃ ጸሳሰ ጎይኒቲ! ጊዶ ኣቲን አንቴ ሃይሳፌ ጉዬ ዛሪዲ አንቴ ያርሾኒኔ አንቴ ኤቃ ጸሳታን ታ ጌሻ ሱንላ ቱኒሴኬታ።

40 ታ ጌሻ ዙማ ቦላ፡ ቶቁ ጊዳ አሰራኤሌ ዙማ ቦላ ሄን አሰራኤሌ አሳይ ኡባይ ታሰ ኡባ ሃሪዛ ጎዳሰ ጎይናና። ታኒካ ሄን አንቴና ሞካ ኤካና፤ አንቴ ካላ ያርሾ፡ አንቴ ባይራ አሞታኔ ጌዬዳ አንቴ ያርሾታ ኡባ ታኒ ሄን ኮያይሰ።

41 አንቴ ላሌቲ ዲዛ ካዋቴላ ጊዶፌ ታኒ አንቴና ኤሂዛ ዋዴኔ ሃራ ቢታታፔ ታኒ አንቴና ሺሺዛ ዋዴ፡ ሳዎ ቶንጉ ጊዛ ያርሾ ኤኪዛ ማላ ታኒ አንቴና ኤካና። ታኒ አንቴ ጊዶን ጌሽ ጊዲዳይሳ ካዋቴላታ ሲንላን ቆንጨሳና።

42 ታኒ ካሴ አንቴ አዋታሰ አማናሰ ታ ኩሼ ዴንላ ጫቂዳ አሰራኤሌ ቢታ አንቴና ዛራ ጌልላዛ ዋዴ ታኒ ጎዳ ጊዲዳይሳ አንቴ ሄ ዋዴ ኤራና።

43 ሄን አንቴ አንቴ ኦጌኔ አንቴናቴላ ቱኒሲዳ ኦሶታ ኡባ አንቴ ኣኬካና፤ አንቴ ፖሊዳ ኢታ ኦሶ ኡባን አንቴርካ አንቴና ሃራሴታና።

44 አንቴኖ አሰራኤሌ አሳቶ! አንቴ ኢታ ኦጌኔ አንቴ ኢታ ኦሶ ማላ ጊዶንታ ታ ሱንላ ጊሻሰ ጋዳ ታ አንቴና ዋቹዛ ዋዴ ኡባ ሃሪዛ ጎዳይ ታኒ ጸሰ ጊዲዳይሳ አንቴ ኤራና» ጌሰ።

ዲጌሃ ባጋ ዴራ ቦላ ዮቲቲዳ ቲንቢቲ

45 ጎዳ ቃላይ ታኮ ዪዲ፡

46 «ሃይሶ አሳ ናወ! ዲጌሃ ባጋ ሲማዳ ጸላ፤ ዲጌሃ ባጋ ዴራ ቦላ ዮታ፤ ዲጌሃ ባጋን ዲዛ ዋራ ቦላ ቲንቢቲ ዮታ።

47 ዲጌሃ ባጋ ዋራሰ፡ ሳዳ ቃላ ሲያ!፤ ጋ፤ ኡባ ሃሪዛ ጎዳይ፡ ሳኒ ኔ ቦላ ታማ ኦይላና፤ ታማዚካ ጨሊላኔ ማላ ሚሳ ኡባ ማና፤ ፖፖልኡ ጊዛ ላጮዚ ቶኤና፤ ዲጌሃፔ ቢዲ ፑዴሃ ጋካናሰ ዲዛ አሳ ኣይፌሶ ኡባ ላባና።

48 ታኒ ጎዳይ ሄሳ ኦይሴሊዳይሳ አሲ ኡባይ ቤኣና፤ ሄ ታማይካ ቶኤና፤ ጌሰ» ጌዴሰ።

49 ታኒካ ዛራዳ፤ «ኡባ ሃሪዛ ጎዳዉ! ኣዬ ኣና! ኢሰቲ ታ ጊሻሰ ኡባ ጋላስ፤ ላኪ ለሚሶ ጸላ ዮቴሰ» ጌቴሰ» ጋዲሰ።

21

ፒርዳሰ ጊጊ ኡቲዳ ጎዳ ማሻ

1 ጎዳ ቃላይ ታኮ ዪዲ፤

2 «ሃይሶ አሳ ናዉ! ኔ አይፌሶ ጌዴ ዬሩሳላሜኮ ዛራ፤ ጸሳ ኬላ ቦላ ቃላ ዮታ፤ ኢሰራኤሌ ቢታ ቦላ ቲንቢቲ ዮታ።

3 ኢሰታሰ ጎዳይ፤ ታ ኔ ቦላ ዴንዳዲሰ፤ ታኒ ታ ማሻ ኮሆፔ ሾዳዳ ጸሎ አሳኔ ኢታ አሳ ኔ ጊዶፌ ዲጋና።

4 ጸሎኔ ዋርዶ ጳይሳና ታ ማሻይ ዱጌሃፔ ፑዴሃ ጋካናሰ ዲዛ ዴራ ኡባ ቦላ ኮሆፔ ሾዴታና።

5 ታኒ ጎዳይ ታ ማሻ ኮሆዛፔ ሾዲዳይሳኔ ዛራዳ ጉዬ ኮሆን ጉዬ ጌልሶንታይሳ አሲ ኡባይ ኤራና።»

6 «ሄሳ ጊሻሰ ሃይሶ አሳ ናዉ! ሜቂዳ ዋዚናን ጫሞ ኦሌ ኦላ።

7 ኢሰቲ ኔና፤ ላይሰ ኦላይ?» ጊ አይቺኮ፤ ኔኒ፤ ሳንላራ ዪዛ ኢታ ዋሬ ጊሻሰ ኦላይሰ፤ ዋዚና ኡባይ ታሃና፤ ኩሼ ኡባይ ደጫና፤ ሼምፖ ኡባይ ፖቶ ጋና፤ ጉልባቲ ኡባይ ሃጸና፤ ጋ ዮታ። ኡባ ሃሪዛ ጎዳይ፤ ሳኢቲ ሄሲ ያናኔ ፖሌታና፤ ጌሰ» ጌዴሰ።

8 ጎዳ ቃላይ ታኮ ዪዲ፤

9 «ሃይሶ አሳ ናዉ! ቲንቢቲ ዮታ፤

ጎዳይ፤ ማሻ! ማሻ፤

ሌፌቲዳኔ ቁጩቲዳ ማሻ!

10 ሌፌቲዳይ ሲፋናሰ፤

ቁጩቲዳይ ዋልቃንላ ማላ

ጸላናሳ።

ሂሰቲን ሄሲ ኡና

ዋኒ ኡፋይሳና ዳንዳይዜ?

ኢዛ ማሻዚ ታ ናዛ

ካዋቴላ ጉፌ

ጮ ጉፌ ማላ ካዲዴሰ።

11 ኩሼን ኦይካና ማላ

ማሻይ ቁጩቲዳ ኢሜቲዴሰ፤

ዋዲዛይሲ ኩሼን ኦይካናሰ

ማሻይ ለፊቲዱ አሜቲዳስ።

12 ሃይሶ አሳ ናዉ!

ሃይሲ ታ ዳሬ ቦላ

ኢስራኤል ዳናታ

ኡባ ቦላ ዪዳስ፤

ሄሳ ጊሻስ ዬሆኔ

ዋሶ ሲሳ፤

ኢስቲ ታ ዳሬዛራ ኢሲፌ

ማሻስ አሜቲዳ፤

ሄሳስ ኔ ጊሻስ ኔ ቲራ ኢጫ።

13 ቱማፔ ፓጩይ ያና፤

ኢዛ ማሻይ ካዲዳ

ካዋቱላ ጉፊዛስ

ዉርሴሊ ባይንዳ

አጊኮ ዋናኔ?፤ ጌስ።

14 «ሃኢካ አሳ ናዉ! ቲንቢቲ ዮታ፤

ኔ ኩሼካ ባቃ።

ማሻይ ናምኡቶ ዋይኮ

ሄቹቶ ሾጮ፤

ሄሲካ ኬሂ ዋዲዛ፤ ሲፊዛኔ

ኡባሶራ ኢስታ ዶዲ

ኦይኪዳ ማሻ።

15 ዋዚና ኡባይ ታሃና ማላ፤

ኩንዲዛይቲ ዳራና ማላ፤

ታኒ ኢስታ ፔንጌታ ኡባን

ፖፖልኡ ጊዛ ማሻ

ዋላዲስ።

ኦዬ አና፤ ፖፖልኡ

ጋና ማላ ቁጩቲዳስ፤

ሲፋናስካ ኮሆፔ

ሾዴቲዳስ።

16 ሃይሶ ማሻዞ!

ኔ ቃራቲዳ ባጋራ ሃዲርሲኔ

ኡሻች ቃንጸ።

17 ታኒካ ታ ኩሼ ባቃና፤

ታ ሃንቆይካ ኢርጸና ጋዲስ

ታኒ ጎዳይ» ጊዳስ።

ባቢሎኔ ካዎዛ ማሻ

18 ጎዳ ቃላይ ታኮ ዪዲ፥

19 «ሃይሶ አሳ ናዉ! ባቢሎኔ ካዎዛ ማሻይ ዪዛ ናምኡ ኦጌታን ማላታ ቱስ ኤሳ። ናምኡ ኦጌቲካ ኢሲ ዳሬፔ ዶሜቲስ። ካታማ ኤፊዛ ኦጌቲ ሻኬቲዛሶን ማላታ ቱስ ኤሳ።

20 አሞኔታ ካታማ ኤራባ ቢዛ ማሻስ ኢሲ ኦጌዛን ማላታ ቱስ ኤሳ፤ ቃሴ ዩሁዳኔ ገምቤቲዳ ዩሩሳላሜ ካታማ ቢዛ ማሻስ ናምኦንሶ ኦጌዛን ማላታ ቱስ ኤሳ።

21 ባቢሎኔ ካዎዚ ባ ባናሶ ማርሒ ዳማናስ ዳጋላ ኦጌታን ኤቃና፤ ባ ዋንዳፊታ ቃሴሒዲ ሳማ ዩጋና፤ ባ ኤቃ ጸሳታካ ዞሬ ኦይቻና፤ ቲሬ ሚጪ ጸላና።

22 ኢዚ ቢዲ ገምቤ ፔንጌ ላሊዛ ዱሩማታ ኤሃና ማላ፥ ዋቆናስ አዛዛና ማላ፥ ጨቄቲሰ ሰሳና ማላ፥ ገምቤ ፔንጌዛ ላሊዛ ዱሩማታ ካታማታ ፔንጌን ኤሳና ማላ፥ ቢታ ሺሺ ዶራና ማላኔ ሚጸታ ገሊሳና ማላ ዩሩሳላሜ ሳማይ ኢዛስ ኡሻቻ ኩሼን ኬዚዳስ።

23 ሄሲካ ኢዛራ ጫቄቲዳ አሳታስ ባላ ካሌሶ ሚሳቲዳስ። ኢዚ ገዲኮ ኢስታ ቆሆ ኢስታ ቆፍሳና፤ ኢስቲ ዲኢ ኤኪዲካ ባና።

24 «ሃሳ ገሻስ ኡባ ሃሪዛ ጎዳይ፥ ሳንቲ ኦሒዳ ሚሽ ኡባን ኢንቲ ቆንጩራ ናጋራ ኦሒዲ ኢንቲ ቆሆዛ ኢንቲ ቆፍሲዳ ገሻሲኔ ሃሳካ ኢንቲ ኦሒዳ ገሻስ ኢንቲ ዲኤቲ ባና።

25 « ሳይሶ ጌኔኔ ቱና ገዲዳ ኢስራኤሌ ዳናዙ! ኔ ቃጸዬቲዛ ዋዳይ ጋኪዳስ) ጌስ፤ ቱናኒኔ ኢታቲፋን ኩሚዳ ኢስራኤሌ ዳናዙ፥

26 ኡባ ሃሪዛ ጎዳይ፥ ሳኔ ሁኤን ዲዛ ጎሳ ቢርሻ፤ ኔ ካላቻ ዴንፋ። ሃይሳፌ ጉዬ ካሴይሳ ማላ ሃኔና፤ ዚቂ ገዳይ ቶቁ ጋና፤ ቶቁ ገዳይካ ዚቂ ጋና።

27 ቡላሳና! ቡላሳና! አዋቲሒ ቤሲዛዳይ ያና ጋካናስ ኢዛ ቤኒ ማላ ሃኑኩ፤ ታ ኢዛስ ኢዞ አላ ኢማና) ጌስ።

28 «ሃይሶ አሳ ናዉ! ኡባ ሃሪዛ ጎዳይ ኔና አሞኔታ ገሻሲኔ ኢስታ ጫሻ ገሻስ፥

ሪማሻ! ማሻ!

ዋቆናስ ሾዴቲዳ

ዳይሳናስ ቁጩቲዳ፥

ዋልቃንፋ ማላ ፖፖልኡ

ጋና ቁጩቲዳ ማሻ።

29 ኔ ገሻስ ቤኢዳ ዋርዶ አጁታይ፥

ኔሰ ዮቴቲዳ
መሬኖይ ዲኮካ፥
ኢሰታሰ ጌኔ ጸኣይ ኩሚሺን፥
ኢሰታ ባሬይ ጋኪሺን
ሲፊታና በሲዛ ኢታታ
ቆጼ ቦላ ዋጳና።

30 ማሻ ኮሆዛን ዛራ፤
ኔ ሜጼቲዳ ቢታን፥
ኔ ዩሌቲዳ ዳሬን ሄን
ታ ኔ ቦላ ፒርዳና።

31 ታኒ ታ ሃንቆ ኔ ቦላ ጉሳና፤
ታኒ ታ ሃንቆ ታማ
ኔ ቦላ ኤላና፤
ኢታቴላን ኤሬቲዳ
ሜንጾ ኢታ ኣሳታሰ
ታ ኔና ኣላ ኢማና።

32 ኔኒ ኤሶ ሚሉ ጊዳና፤
ኔ ዳሬን ኔ ሱሊ ጉካና፤
ሃይሳፊ ጉዬ ኔና ቆፍሲዛ
ሚሺ ዳና፤
ታኒ ጎዳይ ሃይሳ
ዮታዲሰ)
ጌሰ» ጊዳሰ።

22

ዩሩሳላሜ ናጋራ

¹ ጎዳ ቃላይ ታኮ ዩዲ፥

² «ሃይሶ ኣሳ ናዉ! ኔ ኢዚ ቦላ ፒርዲኪ? ሃኖ ሱሉ ጉሲዛ
ካታማይ ቦላ ፒርዲኪ? ሃራሲዛ ኢዚ ኦሶዛ ኢዚሰ ቆንጨን
ዮታ።

³ ኡባ ሃሪዛ ጎዳይ ኢዚሰ፥ ሃኔ ኔ ጊዳን ሸምፖ ዋጵኒኔ ኤቃ
ጸሳታ ገገሶን ኔና ቱኒሲዳሬ! ኔ ቦላ ፒርዳ ኤሶሲዛ ካታማዬ!

⁴ ኔኒ ጉሲዳ ሱላን ቆሃዳሳ፤ ኔ ገግሲዳ ኤቃ ጸሳን ቱናዳሳ። ሄ
ጋሶን ኔ ባሬ ማቲሳዳሳ፤ ኔ ላይሊካ ቃንላዳሳ፤ ታ ኔና ካዎቴላታሰ
ቂጼሰ፥ ዳሬ ኡባሰ ናቸሰ ኬሳና።

5 ሃኔ ካወሺኔ ሺርይ ኔናን ኩሚዳሬ! ማታኒኔ ሃኮን ዲዛይቲ ኔና ቂታና።

6 « ሳኔ፤ ኔ ጊደን ዲዛ ኢሰራኤል ዳናቲ ኢሶይ ኢሶይ ሱል ጉሳናሰ ባ ማታን ጎኤቲቲሰ።

7 አዋቲኔ አዬቲ ኔ ጊደን ካወዱዳ፤ ቤቲ አሳቲ ኡንኤቲዳ፤ ዪኦቲኔ አምኤቲ ቱጋ ቤኢዳ።

8 ጌሻ ሚሻታ ታይታ ካወሻዳሳ፤ ታ ሳምባታታካ ቱኒሳዳሳ።

9 ሺምፖ ዋታናሰ ፓፑንል ጋሊዛይቲ ኔ ጊደን ዴቲሰ፤ ዙምቡላታ ቦላ ዲዛ ኤቃ ጸሳታሰ ያርሼቲዳይሳ ሚዛይቲኔ ላይማቲዛይቲ ኔ ጊደን ዴቲሰ።

10 ባ አዋ ማቼይራ ዚንኢዛይቲ ኔ ጊደን ዴቲሰ፤ ማጫሳ ዋጋይ ዪዛ ዋዴ ዋጋ ማላ ጌዮንታ ዲዛ አገናታን ማጫሳታ ዋልቃን ኦይኪዛይቲ ኔ ጊደን ዴቲሰ።

11 ኔ ጊደን ኢሶይ ባ ላጌዛ ማቼይራ ላይማቲሰ፤ ሃራይ ባ ናዛ ማቾ ቱኒሴሰ፤ ሃራይ ቃሴ ባ አዋ ናኤይራ ዋልቃን ዚንኤሰ።

12 ኔ ጊደን ዲዛ አሳቲ ሱል ጉሳናሰ ማጋንጾ ኤኬቲሰ፤ ኔኒካ ዬሎኔ ቡቲ ዳሮ ዲቾ ኤካዳ ኔ ላጌዛፔ ቤሶንታ ዋጄ ቦንቃሳ፤ ታናካ ባሊታዳሳ ጌሰ ኡባ ሃሪዛ ጎዳይ።

13 « ሳኒ ኔሰ ቤሶንታ ኤኪዳ ጎኦ ቦላኔ ኔኒ ጉሲዳ ሱላ ቦላ ታኒ ታ ኩሼ ባቃና።

14 ታኒ ኔና ቃጸዪዛ ጋላሰ ኔ ዋዚናን ኔ ሙርታ ኤቃኔ? ዋይኮ ኔ ኩሼይ ሄ ዋዴ ሚናና ዳንዳይዜ? ታኒ ጎዳይ ሃይሳ ዮታዲሰ፤ ኢዛካ ታኒ ኦላና።

15 ታኒ ኔና ካዋቲላታ ጊደን ላላና፤ ዴሬ ኡባ ጊደንካ ላላና፤ ኔ ቱናቲላካ ታኒ ኔ ቦላፌ ጌሻና።

16 ካዋቲላታ ጊደን ቱናዳ ታኒ ጎዳ ጊዲዳይሳ ሄ ዋዴ ኔኒ ኤራና » ጊደሰ።

ጌሺዛ ጎዳ ታማ

17 ጎዳ ቃላይ ታኮ ዪዲ፤

18 «ሃይሶ አሳ ናዉ! ኢሰራኤል ከላይ ቢራታ ሺኦ ማላ ጊዲዴሰ፤ ኢሰቲ ኡባይካ ታማ ጊደን ሴሪ አቲዛ ጸርቂማላ፤ ቆርቆሮ፤ ቢራታኔ ኢርሳሴ ሺኦ ማላ።

22:7 ኬሳ 20:12፤ 22:21-22፤ ዛሬ 5:16፤ 24:17 22:8 ሊዌ 19:30፤ 26:2

22:11 ሊዌ 18:7-20 22:12 ኬሳ 22:25፤ 23:8፤ ሊዌ 25:36-37፤ ዛሬ

16:19፤ 23:19

19 ሄሳ ገሻሰ ኡባ ሃሪዛ ጎዳይ፥ ሐንቴ ኡባይካ ቢራታ ሺኣ ማላ ገዲዳ ገሻሰ ታኒ ኢንቴና ዩሩሳላሚ ሺሻና።

20 አሳይ ቢራ፥ ጸርቂማላ፥ ቢራታ፥ ኢርሳሴኔ ቆርቆሮ ሴሪሳናሰ ታማን ዩጊ ዋምፒናን ፑኒዛ ማላ፥ ታኒካ ታ ሃንቆኒኔ ታ ቦሻን ኢንቴና ካታማይ ገደ ሺሻዳ ሄን ታ ኢንቴና ሴሪሳና።

21 ታኒ ኢንቴና ሺሻዳ ታ ሃንቆ ታማ ኢንቴ ቦላ ታ ፔኖን ኤላና፤ ኢንቴካ ሄን ሴሪ አታና።

22 ቢራይ ታማ ጮጮን ሴሪዛ ማላ ኢንቴካ ካታማይ ገደን ሴራና። ታኒ ጎዳይ ታ ሃንቆ ኢንቴ ቦላ ጉሲዳይሳ ሄ ዋዴ ኢንቴ ኤራናን ጌሰ» ገዴሰ።

ኢሰራኤል ዳናታ ናጋራ

23 ጎዳ ቃላይ ታኮ ዪዲ፥

24 «ሃይሶ አሳ ናዉ! ሐሄኔ ኔኒ፤ ሃንቆ ጋላሲካ ኢራ ዴሞንታ ቢታ፥ ጋ ዮታ።

25 ኢዚ ዳናቲ * ባ ዋዲዳይሳ ፑዚሼ ጸገዛ ጋሞ ማላ ኢዚ ገደን ዲላቴቴሰ፤ ዴራ ዋዴቴሰ፤ ኢሰታ አቆታኔ ኢሰታሰ ዲዛ አልኦ ሚሻታ ቦንቂ ኤኬቴሰ፤ ዳሮ ማጫሳታ አሞኤታ ሂሰቴቴሰ።

26 ኢዚ ቄሴቲ ታ ዋጋ ቦላ ማካሌቴሰ፤ ታ ጌሻ ሚሻታካ ቱኒሴቴሰ። ኢሰቲ ጌዪዳይሳ ቱናፔ ሻኬቴና፤ ጌሺኔ ጌሽ ገደንታይሳ ሻኪ ታማርሴቴና፤ ታ ሳሞባታታ ዩጊ አገዳ፤ ሄሳ ጋሶን ታ ኢሰታ ገደን ካዴታዲሰ።

27 ኢዚ ገደን ዲዛ ጌታ አሳቲ ሃይቂዳይሳ ፑዚዛ ካና ሱይቴ ማላ፤ ኢሰቲ ቤሶንታ ዲሬቴሰ ሺሻናሰ ሱሰ ጉሴቴሰ።

28 ኢዚ ናቤቲ ጎዳ አኖን ቲዪዛ ማላ ዋርዶ አጂታኒኔ ሙሬኖን ኢሰታሰ ቡሪ ሺሼቴሰ፤ ኢሰታሰ ጎዳይ ዮቶንታ ዲሺን፥ ሐብ ሃሪዛ ጎዳይ ሃይሳ ማላ ጌሰ፥ ጌቴሰ።

29 ሄ ቢታን ዲዛ አሳይ ቦንቄቴሰ፤ ቦንቄሰ፤ ፒርዳ ጌላሲዲ ሂዬሳኔ ሜቶታንቻታ ኡንኤፍቴሰ፤ ቤቴ አሳካ ቆሃቴሰ።

30 «ታኒ ቢታዮ ዳይሶንታ ማላ ዲርሳ ዲሪዛዴ፥ ላሌቲዳ ባጋራ ታ ሲንላን ኢዚ ገሻሰ ኤቂዛዴ ኢንቴ ገደፊ ታ ኮያዲሰ፤ ገደ አቲን ኢሳዴካ ዴማቤኬ።

31 ሄሳ ገሻሰ ታ ሃንቆ ታ ኢሰታ ቦላ ጉሳና፤ ታ ዋልቃማ ሃንቆዛን ታ ኢሰታ ጸጋና፤ ኢሰቲ ኦሊዳይሳ ታ ጌዴ ኢሰታ ቦላ ዛራና ጌሰ ኡባ ሃሪዛ ጎዳይ» ገዴሰ።

* 22:25 ዳናቲ ገዛይሳ ኢብራዊታ ማጻፋን ናቤቲ ጌሰ።

22:26 ለቄ 10:10

23

ላይማኖትና ናሞኑ ሚቺታ

¹ ጎዳ ቃላይ ታኮ ዪዲ፡

² «ሃይሶ አሳ ናዉ! ኢሲ አይፔ ዩሌቲዳ ናሞኑ ማጫቲ ዴቲሰ።

³ ኢሰቲ ቡሮ ናቴላን ዲሼ ጊብጾ ቢታን ላይማኖት ዶሚዳ፤ ሄን ኢሰቲ ዲሼን ቋንቋ ቲራን ኡቲዴሰ፤ አዴ ናይቲ ኢዛን ካኢዳ፤ ኢሰታ ጌላኦቲላይካ ኤኬቲዴሰ።

⁴ ኢሰታፌ ባይሪይ ሱንላይ ኦሆሎ፤ ካሎይ ሱንላ ኦሆሊሶ። ኢሰታ ናሞኑካ ታ ኤኪን ታሰ ማጫ ናይታኔ አቲማ ናይታ ዩሊዳ። ኦሆላ ሳማሪያ፡ ኦሆሊባ ዩሩሳላሜ ቆንጨሴቲሰ።

⁵ «ኦሆላ ታሰ ማሾ ጊዳ ኡታዳ ሃራራ ላይማኖቱሰ፤ ኦላንቻ ጊዲዳ ባ ሲቆ አሶሬታራ ላጌላናሰ አሞታዱሰ።

⁶ ኢሰቲ አቻ ቴራ ሚሳቲዛ ማይኦ ማይኢዳ ዴሬ አይሲዛይታኔ አዛዚዛይታ፤ ኢሰቲ ኡባቲካ ማላ ሎኦ፡ ናቴላኔ ፒላታ ቶጋንቻታ።

⁷ ኢዛ ባናቴላ ላይማኖት ዶሬቲዳ አሶሬ አሳሰ አሳ አማዱሰ። ኢዚራ ላይማኖቱ አሳታ ኤቃ ጸሳታ ኡባን ቱናዱሰ።

⁸ ኢዛ ጊብጾን ዶሚዳ ላይማኖት አጋቤኩ፤ ሄን ኢዚ ዩላጋቲላ ዋዴ አቲማሳቲ ኢዚራ ዘንኢዳ፤ ኢዚ ጌላኦቲላ ቋንቋ ጎርፔሬሊዳ፤ ባ አሞቲዳ አሞቲላ ኢዚ ቦላ ፖሊዳ።

⁹ «ሄሳ ጊሻሰ ኢዚራ ኢሲፌ ላይማኖት አሞቲዳ አሶሬ ላጌላታሰ ታኒ ኢዛ አሳ አማዱሰ።

¹⁰ ኢሰቲ ኢዛ ቃሪዲ ካሎ አሺዳ፤ ኢዚ አቲማ ናይታኔ ማጫ ናይታ ኢዚፔ ቦንቂዳ፤ ኢዛካ ማሻን ሲፊዳ፤ ኢዛካ ማጫሳታ ማታን ሃይሲኤሰ አታዱሰ፤ ፒርዳይ ኢዚ ቦላ ፒርዴቲዴሰ።

¹¹ «ኢዚ ሚቺያ ኦሆሊባይ ሄሳ ቤኣሼ ዚታኒኔ ላይማኖት ባ ሚቺይፌ አቆ ሞሬቲዳሮ ጊዳዱሰ።

¹² ቃሴካ ሃሪዛይታራኔ አዛዚዛይታራ፡ ሴሎ ማይኦ ማይኢዳ ኦላንቻታራ፡ ፒላታ ቶጋንቻታራኔ ማላ ሎኦ ጊዲዳ አሶሬ ናቴላታራ ላይማኖት አሞታ ካላዱሰ።

¹³ ኢዛካ ባና ቱኒሲዳይሳ ቤኣዱሰ፤ ኢሰቲ ናሞኑይካ ኢሲ ኦጌ ቢዳ።

¹⁴ «ኢዛ ባ ላይማኖት ጉጃ ጉጃ ባዱሰ፤ ኢዛ ጎዳ ቦላ ዋጮቲ ኦሴቲዳ ጾቃ ዞኦ ቃላሜን ቲዬቲዳ ካላዳዋ ዴሬ አዴታ ሚሰሌ ቤኣዱሰ።

15 ኢስቲካ ባንታ ጸሳን ቃባቶ ዳንጪዳይታኔ ባንታ ሁኔ ቦላ ቁራጩ ጸጸዳይታ። ኢስቲ ኡባይካ ካላዳዌፔ ዪዳ ባቢሎኔ ዳሬ ዳናታ ሚሳቲቲስ።

16 ኢዛ ኢስታ ሚሰሌታ ቤኢዳ ማላ ዚታ ኣሞን ጸጌታዳ ካላዳዌታኮ ኣስ ኪታዲስ።

17 ባቢሎኔቲካ ኢዚኮ ዪዲ ኢዚ ሂጸኮ ጌሊዳ፤ ባንታ ዚታ ኣሞን ኢዞ ቱኒሲዳ፤ ኢዛ ኢስታን ቱኒዳፔ ጉዬ ኢዛ ኢስታ ኢጸዳ ኢስታፊ ሃራሶ ሸርኢ ጋዲስ።

18 ኢዛ ቆንጩን ላይማቲዳፔኔ ባ ካሎቴላ ቃሪዳ ዎዴ፥ ታኒ ኢዚ ሚቹይፊ ሃራሶ ሸርኢ ጌዳ ማላ ኢዞ ኢጸዳ ኢዚፔ ሸርኢ ጋዲስ።

19 ጌዶ ኣቲን ካሴ ጊብጾን ኢዛ ናቲቲላን ላይማቲዳይሲ ቆፊቲን ካሴይሳፊ ኣቆ ላይማታዲስ።

20 ኢስታ ኣቲማቴላይ ሃሬይሳ ማላ፥ ኢስታፊ ኬዚዛ ዜሬላይ ዎዳላ ፓራይሳ ማላ ጌዲዳ ባ ላጌሶታራ ላይማታናስ ኣሞታዲስ።

21 ኔኒ ጊብጾ ቢታን ዲዛ ዎዴ ኔ ጌላኦቴላ ኣሚዳይሳኒኔ ኔ ናቲቲላ ቆንላን ኣቲማሳቲ ካኢዳይሳን ኔ ጌላኦቴላ ቱናቴላ ኣሞታዳሳ።

ጎዳይ ናሞኡ ሚቹታ ቦላ ኤሂዳ ፒርዳ

22 «ሃኔ ኦሆሊቤ! ኡባ ሃሪዛ ጎዳይ፥ ሳኔ ኢጸዳ ኢስታፊ ሸርኢ ጌዳ ኔ ላጌሶታ ታ ኔ ቦላ ዴንላና፤ ኢስታካ ኡባ ባጋፊ ታ ኔ ቦላ ኤሃና።

23 ኢስቲካ ባቢሎኔታኔ ካላዳዌታ፤ ኢስታራ ፓቆዳ፥ ሱሄ፥ ቆኣይኔ ኣሶሬቲ ኡባይ ዳቲስ፤ ሄይቲካ ማላ ሎኦኔ ሚኖ ጌዲሺን ኡባቲካ ፓራ ቶጌዲ ዳሬ ኣይሲዛይታኔ ኣዛዚዛይታ፥ ፓራ-ጋሬ ኣዛዚዛይታኔ ቋቃ ሹሜታ።

24 ኢስቲ ኦላ ማሳራ፥ ፓራ-ጋሬኔ ጋሬ ኤኪዲ ዳሮ ዳሬይ ኔ ቦላ ያና፤ ኢስቲ ዎጋ ጎንዳሌኔ ቁሪ ጎንዳሌ ኦይኪዲ፥ ቢራታ ቆቤ ዎሊዲ፥ ኔ ዩሽን ሳልፋና፤ ኢስቲ ኔ ቦላ ፒርዳና ማላ ታ ኔና ኢስታስ ኣላ ኢማና፤ ኢስቲካ ባ ዎጋን ኔና ቃጸያና።

25 ታ ዚልኤቴላ ሃንቆ ኔ ቦላ ኤሃና፤ ኢስቲካ ኔ ቦላ ሃንቆን ኬዛና፤ ኢስቲ ኔ ሲቆኔ ኔ ሃይላ ቃንጸና፤ ኔ ባጋታፔ ኣቲዳይቲ ማሻን ሲፊታና፤ ኔ ማጫ ናይታኔ ኣቲማ ናይታ ኔፔ ቦንቂ ኤካና፤ ኢስታፊ ጫሻ ኣቲዳይታካ ታማይ ማና።

26 ኢስቲ ኔ ማይኦ ቃሪ ኤካና፤ ዶሬቲዳ ኔ ኣሌቆታ ኔፔ ዎሊ ኤካና።

27 ኔኒ ጊብጽን ደሚዳ ላይማቴላኔ ዚታ ታ ኔፔ ዲጋና፤ ኔካ ኔ አይፌታ ሄይታንታኮ ዳንላካ፤ ሃይሳፌ ጉዬ ኔ ጊብጽ ቆፓካን ጌሰ።

28 «ኡባ ሃሪዛ ጎዳይ፥ ሳኔ ሃራሴታዳ ኢሰታፌ ሸርኢ ጊዳይታሲ ኔ ኢጲዛይታሰ ታ ኔና አላዳ አማና።

29 ኢሰቲካ ኔና ኢጲሼ ኔኮ ሺቃና፤ ኔ ዳቡርዳይሳ ኡባ ኔፔ ኢሰቲ ቦንቃና፤ ኔ አዬይ ኡሎፔ ኬዚዳ ማላ ካሎ አሻና። ዬላቺዛ ኔ ዚታ አሞይ ቆንጫና፤ ኔ ላይማቴላይ ከዋይ ባይንዳ ቱናቴላይ ሃይሳ ኔ ቦላ ኤሂዴሰ።

30 ጋሶይካ ኔኒ ካዎቴላታራ ላይማታናሰ አሞታዳ ኢሰታ ኤቃ ጸሳታን ቱናዳሳ።

31 ኔኒ ኔ ሚቹይ ኦጌን ቢዳ ጊሻሰ ታኒ ኔና ኢዚ ጹኣ ኦይላናን ጌሰ።

32 «ኡባ ሃሪዛ ጎዳይ፥
« ላኮኔ ጨማ ጊዲዳ ጹኣ፥
ኔ ሚቹይ ጹኣ ኔ ኡያና፤
ጹኣዚ ዳሮ ኦይኪዛ ጊሻሰ
ጫሼኔ ናቕ ኔ ካላና።

33 ኔ ሚቹ ሳማሪያ ጹኣን፥
ሺርቺዛኔ ላሊዛ ጹኣን፥
ማሶኒኔ ጨጫን ኔ ኩማና።

34 ኔኒ ጮንጎርሳዳ ኡያና፤
ሂሰታዳ ኔኒ ጹኣዛ
ሜንፊሬላና፤
ኔ ጳንላካ ጋራና፤
ኡባ ሃሪዛ ጎዳይ
ታኒ ሃይሳ ዮታዲሰን ጌሰ።

35 «ሃሳ ጊሻሰ ኡባ ሃሪዛ ጎዳይ፥ ሳኔ ታና ደጊዳ ጊሻሲኔ ታሰ ዘኮ ዛሪዳ ጊሻሰ ኔኒ ኔ ላይማቴላኔ ዚታ ጋቴ ቶካናን ጌሰ» ጊዴሰ።

36 ጎዳይ ታሰ፥ «ሃይሶ አሳ ናዉ! አሆሊ ቦላኔ አሆሊቢ ቦላ ኔ ፐርዳኔ? ሂሰቲኮ ሃራሲዛ ኢሰታ ኦሶዛ ኔ ኢሰታሰ ዮታ።

37 ኢሰቲ ላይማቴዳ፤ ኢሰታ ኩሼይካ ሱላን ሞሬቲዴሰ። ኢሰቲ ባንታ ኤቃ ጸሳታራ ላይማቴዳ፤ ባንታ ኤቃ ጸሳታሰ ቁማ ጊዳና ማላ ሃራይ አቶሺን ኢሰቲ ታሰ ዬሊዳ ናይታካ ኢሰታሰ ታማን ጹጊ ያርሺዳ።

38 ሃሳፌካ ሃራ ሚሽ ኢሰቲ ታ ቦላ ኦፊዳ፤ ሄ ጋላሲካ ጸሳ ኬላ ታይሳ ቱኒሲዳ፤ ታ ሳምባታካ ካዉሺዳ።

39 ኢስቲ ባንታ ናይታ ኤቃ ጸሳታሰ ያርሺዳ ጋላስ ታ ኩላ ጌሊዲ ቱኒሲዳ። ኢስቲ ታ ኩላን ሄሳ ማላ ኦሊዳ።

40 «ሄሳፊካ ቦላራ ኣዳቲ ሃኮ ቢታፌ ያና ማላ ኣስ ከቲዳ፤ ኢስቲካ ዪዳ፤ ኔኒ ኔ ቦላ ማጮታዳሳ፤ ኔ ኣይፌሶ ፑላሳዳኔ ኣሌቆታን ፑላታዳ ናጋዳሳ።

41 ሎኢ ጊጊዳ ኣርጃታን ኡታዳሳ፤ ታ ኤጸኔዛኔ ዛይቲዛ ኔ ዋሊዳ ጸራጴዛ ኣርጃታ ሲንላን ዋላዳሳ።

42 «ካኢዛ ኣሳታ ካቺ ኢዚ ዩሾን ዴሰ፤ ሺሮ ማጲዛ ኣሳታራ ባዘፌ ዪዳ ማሶቲዛይቲ ዴቲሰ፤ ማጮሳይ ቦላኔ ኢዚ ሚቺይ ቦላ ሳጋዮ፤ ኢስታ ሁኡንካ ካይሺዛ ካላቻ ዋሊዳ።

43 ታኒካ ታ ዋዚናን፤ «ኢዚ ቦላይ ላይማቴላን ጊልቂዳሪራ፤ ሃኢካ ኢዚ ዴኦይ ሄሳ ማላ ጊዲዳሪራ ላይማ ማጮሳይራ ዚንኤቶ» ጋዲሰ።

44 ኢስቲካ ኢዚራ ዚንኢዳ፤ ኣሲ ላይማ ማጮሳራ ዚንኢዛ ማላ ሃ ዬላይ ባይንዳ ማጮሰ ኦሆሊራኔ ኦሆሊባራ ዚንኢዳ።

45 ጌሻቲ ጊዲኮ ላይማ ማጮሳታ ቦላኔ ሸምፖ ዋጲዛ ማጮሳታ ቦላ ቤሰዛ ፒርዳ ፒርዳና፤ ኢስቲ ላይማ ማጮሰ ጊዲዳ ጊሻሰ ኢስታ ኩሺይ ሱላን ሞሬቲዴሰ።

46 «ኡባ ሃሪዛ ጎዳይ ዴራ ኢስታ ቦላ ዴንፊላ ኤሃ፤ ሺሮሲኔ ቦንቃሰ ኢስታ ኣላ ኢማ።

47 ዴሬይ ኢስታ ሹቻን ኩራካና፤ ኢስቲ ጌላ ማሻን ኢስታ ቃንጾሬላና፤ ኢስታ ኣቲማ ናይታኔ ማጮ ናይታ ዋጳና፤ ኢስታ ኩላካ ጹጋና።

48 ሄሳ ታኒ ማጮሳቲ ኡባይ ናጌታና ማላኔ ኢንቲ ኢታ ሃኖ ካሎንታ ማላ ዚታቲላ ቃቂ ኦሶንታ ማላ ታ ቢታፌ ቲቃና።

49 ኢንቲ ኢንቲ ዚታ ጋቲ ኤካና፤ ኢንቲ ኤቃ ጸሳታ ጎይኖን ኦሊዳ ናጋራ ቂጻቲ ኢንቲ ቶካና፤ ታኒ ኡባ ሃሪዛ ጎዳ ጊዲዳይሳ ኢንቲ ሄ ዋዴ ኤራና» ጊዴሰ።

24

ዲሰቲ ለሚሶ

1 ኮኒ ዲኤቲዳ ኡዲፋንላ ላይላን፤ ታማንላ ኣጊናን፤ ታማንላ ጋላሳን ጎዳ ቃላይ ታኮ ዪዲ፤

2 «ሃይሶ ኣሳ ናዉ! ሃቕ ሃኖ ጋላሳዮ ዲማ ማዝጋባ፤ ባቢሎኔ ካዋይ ዬሩሳላሜ ሃ ጋላሳይን ዶዲ ኦይኪዴሰ።

3 ሃ ማካላንቻ ከላሰ ሃይሳፌ ካሊ ዲዛ ሌሚሶዛ የታ፤ ኡባ ሃሪዛ ጎዳይ፥

« ሲራታ ዲሰቲ ታማ ቦላ ዋላ፤
ሃሳፌ ጉዬ ኢዛን ሃሰ ጉጃ።

4 ጌዳፔኔ ሚሳፌ ቃንጸዳ፥
ሎኦ ሎኦ ኣሾ ሙጸዳ፥
ደሬቲዳ ሜቄላታ
ጨከሪላዳ
ኢዛን ዩጋ።

5 ወዴዛፔ ሞጾ ደርሰ
ኤካ ሹካ፤
ኢዛ ሜቄላ ደይሳናሰ
ኤሶ ሚሰ ዳርሳ ዋላ፤
ሱጵ ጋናሼ
ጋካናሰ ደይሳ፤
ሜቄላዚካ ካጸ፣ ጌሰ።

6 «ኡባ ሃሪዛ ጎዳይ፥
ሺኢዳ ቢራታ ዲሰቲይሰ፥
ኢዚ ሺኢ ዩደንታሪሰ፥
ሱሰ ጉሲዳ ካታማይሰ
ኣዬ ኣና!
ሻካናሰ ሳማ ዩጎንታ
ኢሳ ኢሳ ኬሳዳ ካይሰ ኣሻ።

7 ኢዚ ጊደን ኣሳ ሱሒ ዴሰ፤
ዛላ ቦላ ቆንጨሶን

ጉሳዴሰ ኣቲን
ቢታይ ካማናሰ ዳንዳይዛ
ጋዴን ጉሳቤኩ።

8 ታ ሃንቆይ ኤጸና ማላኔ
ሃሎ ኬሳናሰ
ታሰ ኢንጃታና ማላ፥
ኢዚ ካማናሰ ዳንዳዮንታ ማላ፥
ኢዚ ሱላ ዛላ ቦላ
ቆንጨሶን ጉሳዴሰ፣ ጌሰ።

9 «ሄሳ ጊሻሰ
ኡባ ሃሪዛ ጎዳይ፥

- ሰላም ገብረዳ ካታማይሰ
 እዩ እና!
 ታኒ ኢዛ ጸጌታና
 ሚሰ ገጋና።
- 10 ኤሶ ሚሰ ዶራ፤
 ታማካ ኤሳ።
 ሳዋ ጉጃዳ አሸዛ
 ሎኤሳ ዶይሳ፤
 ማቄሳዚካ ሚጮ።
- 11 ሺኣዚ ሴራና ማላኔ
 ቢራታ ሺኣዚ
 ታማኝ ጸጌታና ማላ፥
 ሚላ ዲሰቴይ ሴላና ጋካናሰ፥
 ታማዚ ቦንቃናሽ ጋካናሰ
 ጮጮዛ ቦላ ዋላ።
- 12 ዳር ዋልቃይ ወሪኮካ
 ዶሪቲዳ ቢራታ ሺኣ
 ታማኝካ ዩዳና ዳንዳዬና።
- 13 « ሳ ቱኒዳይ ኔ ባላጌ አሶና፤ ታ ሃንቆይ ኔ ቦላ ፖሊታናሽ
 ጋካናሰ ሃይሳፌ ዌዬ ኔ ጌሽ ጊዳካ፤ ጋሶይካ ታኒ ኔና ኔ ቱናቴላፌ
 ጌሻና ኮዩንካ ኔ ጌያና ዶሳቤካ።
- 14 « (ታኒ ጎዳይ ሃይሳ የታዲሰ፤ ታ ኦላናሰ ዋዴይ ጋኪዴሰ፤
 ታ ጉዬ ጊኬ፤ ቃጴቲኬኔ ሲጳኬ፤ ኔ ኦጌ ማላኔ ኔ አሶ ማላ ኔ
 ቦላ ፒርዴታና) ጌሰ» ጊዴሰ።

ሂዘቁላ ማቺይ ሃይቆ

- 15 ጎዳ ቃላይ ታኮ ዪዲ፥
- 16 «ሃይሶ አሳ ናዉ! ኔኒ ኔ አይፌ ሸምፒሲዛ ሚሽ ታኒ ታ
 ሃንቆን ኔፔ ኤካ ዲጋና፤ ኔኒ ጊዲኮ ዋሶፋ፤ ዩኮፋ፤ አፋንፊካ
 ጉሶፋ።
- 17 ኔ ቃላ ዘቂ ሂሰታዳ ካየታሽ ሚላላ አቲን ሃይቂዳይሳሰ
 ዩኮፋ፤ ኔ ሁኤፔ ቁራጮ ዲጎፋ፤ ኔ ቶሆፔ ጮማ ኬሶፋ፤ ኔ ዶና
 ጋላ ካዋፋ፤ ሸቺካ ሞፓ» ጊዴሰ።
- 18 ታኒካ ዋንታራ ዴራሰ ሄሳ የታዲሰ፤ ሄ ጋላሳ አማርሳ ዋዴ ታ
 ኬላ አዬያ ሃይቃዲሰ፤ ዋንቴላ ጋላሰ ማላዶ ጎዳይ ታና አዛዚዳ
 ማላ አላዲሰ።
- 19 ዴሪዚ ታና፥ «ኮሰ አይ ኪታ የታና ኮያዳ ኔ ሃይሳ ኦሊዳኮ
 ኮሰ የቲኪ?» ጊ አይቺዴሰ።

20 ታኒካ ዴራስ ዛራዳ፥ «ጎዳ ቃላይ ታኮ ዪዲ፥

21 ኢሰራኤል ከላስ ኡባ ሃሪዛ ጎዳይ፥ ለኢንቲ ጨቁቲዛ ዋልቃ፥ ኢንቲ ኣይፌ ሽምፒሲዛሶዛኔ ኢንቲ ዋዚናሰ ኡፋይሰ ጊዲዳ ጸሳ ከላ ታይሳ ታ ቱኒሳና። ኢንቲ ዩጊ ቢዳ ኢንቲ ማጫ ናይቲኔ ኣቱማ ናይቲ ማሻን ወራና።

22 ታ ኦሊዳ ማላ ሄ ዋዴ ኢንቲካ ኦላና፤ ኢንቲ ዶና ጋሊ ካሜኬታ፤ ሾቸካ ሜኬታ።

23 ኢንቲ ሁኤፔ ቁራጨ ዳጌኬታ፤ ኢንቲ ቶሆፔ ጫማ ኬሴኬታ፤ ኢንቲ ኢንቲ ናጋራን ጊልቃና፤ ኢሶይ ኢሳራ ቶኪ ሽምፓና ኣቲን ካዮስ ኡቲኬታኔ ዩኬኬታ።

24 ሄ ዋዴን ሂዘቁላ ኢንቲስ ማላታ ጊዳና፤ ኢዚ ኦሊዳ ማላ ኢንቲካ ኦላና፤ ጊዴስ። ኡባ ሃሪዛ ጎዳይ ታና ጊዲዳይሳ ሃይሲ ሃኒዛ ዋዴ ኢንቲ ኤራና» ጌሰ።

25 ጎዳይ ታና፥ «ሃይሶ ኣሳ ናወ! ባንታ ዋልቃ፥ ባንታ ኡፋይሳ፥ ባንታ ቦንቸ፥ ኢስታ ኣይፌስ ሽምፖሶኔ ኢስታ ዋዚናሰ ኡፋይሰ ጊዲዳ ኢስታ ማጫ ናይታኔ ኣቱማ ናይታ ጋላ ታ ኢስታፌ ኤኪዛ ዋዴ፥

26 ሄ ጋላስ ኬሲ ኤኪ ኣቲዳ ኣሲ ሄ ፓፑንላ ዮታናሰ ኔኮ ያና።

27 ሄ ጋላስ ኔ ዶናይ ዶዬታና፤ ኔኒካ ኢዛራ ሃሳያና፤ ሄሳፌ ጉዬ ኔ ዶና ዱዴ ጊዳካ፤ ኔ ኢስታስ ማላታ ጊዳና፤ ታኒ ጎዳ ጊዲዳይሳ ኢሰቲ ሄ ዋዴ ኤራና» ጊዴሰ።

25

አሞኔ ቦላ ዮቲቲዳ ቲንቢቲ

1 ጎዳ ቃላይ ታኮ ዪዲ፥

2 «ሃይሶ ኣሳ ናወ! ኔ ሲንሐ አሞኔ ቢታኮ ዛራዳ ኢስታ ቦላ ቲንቢቲ ዮታ።

3 ኢስታስ፥ ሉባ ሃሪዛ ጎዳ ቃላ ሲዪቲ፤ ኡባ ሃሪዛ ጎዳይ ታ ከላይ ቱኒዳ ዋዴ፥ ኢሰራኤል ቢታይ ቡላቲዳ ዋዴ፥ ዩሁዳ ኣሳይ ዲኤቲ ቢዳ ዋዴ፥ ኢንቲ ኢስታስ ሃሹ! ጊዳ ጊሻስ፥

4 ኣርሼይ ሞኪዛ ባጋራ ዲዛ ዴሬዛሰ ኢንቲ ሃሬታና ማላ ታ ኢንቲና ኣላ ኢማና። ኢሰቲካ ኢንቲ ጊዶን ባንታ ዱንካኔ ቶኪዲ ዳና፤ ኢንቲ ሚላታ ኣይፌ ማና፤ ኢንቲ ማሊካ ኢሰቲ ኡያና።

5 ታኒ ኤራባ ካታማ ጋሜላቲ ሄሜቲዛሶ፥ አሞኔ ዶርሳቲካ ሄሜቲዛሶ ከሳና፤ ታኒ ጎዳ ጊዲዳይሳ ኢንቲ ሄ ዋዴ ኤራና፤ ጋ ዮታ።

6 ኡባ ሃሪዛ ጎዳይ፥ ለእንቴ ዋዚና ኢታቴላ ጋሶን ኢሰራኤል ኩንዴላን እንቴ ኡፋዬቲዲ ኩሼ ባቂዳ ገሻሲኔ ጉፒ ካኢዳኔ ቂዲዳ ገሻሰ።

7 ታኒ ታ ቄሴ እንቴ ቦላ ዴንላና፤ ታኒ ካዋቴላቲ እንቴፊ ቦንቃና ማላ ኦላና፤ ታ እንቴና ካዋቴላታ ገደፊ ሾዳና፤ አሳፔካ ሻካዳ ዳይሳና፤ ታ እንቴና ዲፒ ሂሰታና። ታኒ ጎዳ ገዲዳይሳ እንቴ ሄ ዋዴ ኤራና፤ ጌሰ።

ሞክሴ ቦላ ዮቴቲዳ ቲንቢቲ

8 «ኡባ ሃሪዛ ጎዳይ፥ ሞክሴይኔ ሴይሬይ፥ ቤኢቲ፥ ዩሁዳ አሳይ ሃራ ካዋቴላታ ማላ ገዲዳሰ ገዳ ገሻሰ።

9 ኢሰታ ቢታ ዛዋ ቦላ ዲዛይታኔ ኢዚሰ ቦንቾ ገዲዳ ካታማታ ቤቲ-ያሽሞቴ፤ ባኣሊ-ሜኦኔፔኔ ቂሪያታይሜፔ ዶማዳ ሞክሴ ሚጸ ቃራ ዩጋና።

10 ሞክሴቲኔ አሞኔቲ ኢሰታሰ ሃሬታና ማላ ታ ኢሰታ አርሼይ ወሊዛ ባጋራ ዲዛ ዴራሰ አላ አማና፤ አሞኔ አሳሰ ሃይሳፊ ጉዬ ካዋቴላታ ማታን ኢሰታ ቆፍሲዛ ሚሺ ዴና።

11 ታኒ ሞክሴ ቃጸያና፤ ታኒ ጎዳ ገዲዳይሳ ኢሰቲ ሄ ዋዴ ኤራና፤ ጌሰ።

ኤዶሜ ቦላ ዮቴቲዳ ቲንቢቲ

12 «ኡባ ሃሪዛ ጎዳይ፥ ኤዶሜይ ዩሁዳ ቦላ ሃሎ ኬሲዳ ገሻሲኔ ሄሳን ሞራንቻ ገዲዳ ገሻሰ።

13 ኡባ ሃሪዛ ጎዳይ፥ ታኒ ታ ቄሴ ኤዶሜ ቦላ ዴንላና። ኢዛ አሳኔ ሜሃ ታ ዋዳና፤ ታ ኢዛ ቡላ ሂሰታና፤ ቲማኔፔ ቢዲ ዳዳኔ ጋካናሰ ኢሰቲ ማሻን ወራና።

14 ታ ዴሬ ኢሰራኤል ዴንላዳ ኤዶሜ ቦላ ሃሎ ኬሳና፤ ኢሰቲካ ታ ሃንቆ ማላኔ ታ ቦሻ ማላ ኤዶሜ ዴራ ቦላ ኦላና፤ ታኒ ሃሎ ኬሲዳይሳ ኢሰቲ ሄ ዋዴ ኤራና፤ ጌሰ።

ፊሊሰጾሜ ቦላ ዮቴቲዳ ቲንቢቲ

15 «ኡባ ሃሪዛ ጎዳይ፥ ፊሊሰጾሜቲ ዋዚና ኢታቴላን ዴንዲዲ ሃሎ ኬሲዳ ገሻሲኔ ዩሁዳካ ካሴ ጋሞኢዳ ሞርኬቴላን ካዲዲ ዳይሳናሳ።

25:8 እሳ 15:1—16:14፤ 25:10-12፤ ኤር 48:1-47፤ አዋ 2:1-3፤ ሶፎ 2:8-11

25:14 እሳ 34:5-17፤ 63:1-6፤ ኤር 49:7-22፤ ሂዘ 35:1-15፤ አዋ 1:11-12፤

ኣብ 1-14፤ ሚል 1:2-5 25:15 እሳ 14:29-31፤ ኤር 47:1-7፤ ኢዩ 3:4-8፤

አዋ 1:6-8፤ ሶፎ 2:4-7፤ ዛካ 9:5-7

16 ኡባ ሃሪዛ ጎዳይ፡ ታኒ ታ ቄሴ ፊሊሰጾሜ አሳ ቦላ ዴንፋና፤ ኬሊቲ አሳ ቃንጾና፤ አባ ጋጸን አቲዳይታካ ቆይሳና።

17 ታኒ ኢስታ ቦላ ዋልቃማ ሃሎ ኬሳና፤ ታ ቦሻንካ ኢስታ ቃጸያና፤ ታ ኢስታ ቃጸዪዛ ዋዴ ኢስቲ ታኒ ጎዳ ጊዲዳይሳ ኤራና፤ ጌሰ» ጊዴሰ።

26

ጲሮሲ ቦላ ዮቲቲዳ ቲንቢቲ

1 ነኒ ዲኤቲዳ ታማኔ ኢሲንሳ ላይላን፡ አገናሰ ኮይሮ ጋላሳን ጎዳ ቃላይ ታኮ ዪዲ፡

2 «ሃይሶ አሳ ናዉ! ጲሮሲ ዬሩሳላሜ ገሻሰ፡ ሩሬታ ፔንጌይ ሃሹ ሜቃዱሰ፤ ኢዚ ፔንጌቲ ታሰ ዋቂ ጊ ዶዬቲዳ፤ ሃኢ ኢዛ ላሌቲዳ ገሻሰ ታ ኢዛ ዱሬታና» ጊዴሰ፡

3 ኡባ ሃሪዛ ጎዳይ፡ ሃኔ ጲሮሴ ታ ኔ ቦላ ዴንዳዲሰ፤ አባ ዳምባላይ ዴንዲዛ ማላ ታ ኔ ቦላ ዳሮ ዴሬ ዴንፋና።

4 ኢስቲ ጲሮሲ ገምቤዛ ሙሌራ ቆይሳና፤ ኢዚ ናጌ ገምቤታካ ላላና፤ ታኒ ኢዚ ቢታ ፒታ ቆይሳዳ ካሎ ዲዛ ዛላ ኬሳና።

5 ታኒ ኡባ ሃሪዛ ጎዳይ ሃይሳ ዮቲዳ ገሻሰ ኢዛ አባ ጊዶን ጌቲ ሚጨ ሜሊሲዛሰ ጊዳና፤ ካዋቲሳቲ ኢዚሰ ዲዛዝ ቦንቃና።

6 ሄ ቢታን አባፌ ሃኪ ዲዛ ጉታቲ ማሻን ወራና፤ ታኒ ጎዳ ጊዲዳይሳ ኢስቲ ሄ ዋዴ ኤራና።

7 «ኡባ ሃሪዛ ጎዳይ፡ ሐዋታሰ ካዋ ጊዲዳ ባቢሎኔ ካዋ ናቡካዳናጾሬ ፓራታራኔ ፓራ-ጋሬታራ፡ ቶጋንቻታራኔ ዳሮ ኦላንቻታራ ፑዴሃ ባጋፌ ጲሮሲ ቦላ ታ ኤሃና።

8 ኢዚ ዴራሰ ጊዶን ዲዛ ኔ ጉታታ ማሻን ወርሳና፤ ኢዚ ዩሾን ኬላ ኬላና፤ ኔ ገምቤሰ ጸራ ጋካናሰ ቢታ ዶራና፤ ኢዚ ባ ጎንዳሌዛካ ኔ ቦላ ዴንፋና።

9 ገምቤዛ ላሊዛ ሚሻን ዲርሳ ላላና፤ ኦላ ማሳራን ናጌ ገምቤታካ ላላና።

10 ፓራ ዳሮቲላፌ ዴንዲዳይሳን ጉዲላይ ኔና ጎዚ ኦይካና፤ አሳይ ገምቤይ ላሌቲዳ ካታማ ማላ ኢዚ ኔ ፔንጌታራ ጌሊዛ ዋዴ፡ ፓራታ፡ ፓራ-ጋሬታኔ ጋሬታ ጨንጉርሳፌ ዴንዲዳይሳን ኔ ገምቤቲ ቃጸና።

11 ኔ ኦጌቲ ኡባይ ፓራ ቶሆን ዱሬታና፤ ኔ ዴራ ማሻን ዋዳና፤ ኔ ዋልቃማ ቱሳቲካ ሳኣን ኩንዳና።

12 ኔ አቆታ ኢስቲ ቦንቃና፤ ኔ ሻቃጩ ኢስቲ ቦንቁ ኤካና፤ ኔ ዲርሳ ኢስቲ ላላና፤ ኔ ሎኦ ኬላታካ ኡባ ዳይሳና፤ ኔ ሹቻኔ ኔ ሚላ፤ ኔ ዲርሳ ላሌላ ዲጌ አባን ዬጋና።

13 ኔ ዬላ ታኒ ሲርጺ ሂስታና፤ ሃይሳፌ ጉዬ ኔ ዲላ ጌሪሲ ሴቴቴና።

14 ታ ኔና ካሎ ዲዛ ሎቻ ዛላ አላና፤ ኔኒ ሞሌ ጌቱ ሚጪዛሶ ጌዳና፤ ናምኣንሶ ሲማ ኦሴታካ፤ ሃይሲ ሃናናይ ታኒ ጎዳይ ዮቲዳ ጌሻሳ፤ ጌሰ።

15 «ኡባ ሃሪዛ ጎዳይ ጸርሲሰ፡ «ማዲንጺዳይቲ ቶቂሺን፡ ኔ ጌዶን ሹምፖ ዋዲሺን፡ ኔ ኩንዴላ ጌሪሳፌ ዴንዲዳይሳን ሃሩርቲ ቃጼቴኔ?

16 አባ ጋጸን ዲዛ ሃላቃቲ ኡባይ ባንታ ካዎቴላ አራታፔ ዋቆና። ባንታ ሴሎ ማይኦ ዬጋና፤ ባንታ ጸባቤ ማይኦ ቃሪ ዬጋና። ባቦን ኩሚዲ ቢታ ቦላ ኡቲ ኮኮሪሼ ኔ ቦላ ጋኪዳ ሃኖዛ ጋሶን ኢስቲ ሺርታና፤ ጌሰ።

17 ኔ ጌሻሰ ዚላሊሼ፡

« ሳኔ አሳይ አባ ጌዶን ዲዛሬ፡
ኤሬቲዳ ካታማዬ
ኔ ዋና ዳያዲ!

ኔናን ዲዛ አሳራ
ኔ አባ ጌዶን
ዋልቃማኮሺን፡
ሄን ዲዛ አሳ አቻን
ኔ ያሺሲዳርኮሺን።

18 ሃኢ ኔ ኩንዴላ ጋላስ
አባ ጋጸን ዲዛ ዳሬቲ ሂርጌዳ፤
ኔ ላሌቲዳ ጋሶን
ሃሩርቲካ ቃጸዳ፤ ጌሰ።

19 «ኡባ ሃሪዛ ጎዳይ፡ ሓስታን አሲ ባይንዳ ካታማታ ማላ ታኒ ኔና ካይዚሲሺን፡ ዋጋ ጌታ አባን ታኒ ኔና ዬጋዳ ካሚሺን፡

20 ቤኒ ዋዴ አሳቲ ጌሊዳ ኦላን ዋዲዛይታራ ታ ኔና ዲጌ ዋላና፤ ዲጌ ኦላን ጌሊዛይታራ ታ ኔና ኢሲፌ ቤኒ ላሌቲዲ ዲዛ ቢታ ጋርሳን ታ ኔና ዋላና፤ ሄሳፌ ጉዬ ኔኒ ቢታ ቦላ ሹምፖራ ፓጸ ዲዛይታ ጋርሳን ኔሰ ዴኦሶ ዴማካ፤

21 ታኒ ኔ ወርሴላ ሚቺዛዝ ኦላና፤ ሄሳፌ ጉዬ ኔ ዳኣካ፤ ኔ ኮዬታናሺን ቤታካ፤ ጊዶ ኣቲን ኔኒ ናምኣንሶ ሙሉካ ቤታካን ጌሰ» ጊዳሰ።

27

ጸርሲስ ዚላሌቲዳ ዚላሰ

- 1 ጎዳ ቃላይ ታኮ ዩዲ፤
- 2 «ሃይሶ ኣሳ ናዉ! ጸርሲ ጊሻሰ ዚላላ።
- 3 ኣባን ጌሊዛሶ ፔንፔን ዲዛሪሰኔ ዳሮ ኣባ ጋጻታን ዲዛ ደሬታራ ዛልኢዛ ጸርሲስ፤ ኡባ ሃሪዛ ጎዳይ፤
«ሃኔ ጸርሴ!
ኔኒ ኔና ኬሂፔ
ሎኦ ጋዳሳ፤
- 4 ኔ ዛዋይ ኣባ ጊዶን ዳሰ፤
ኔና ኦሊዳይቲ ኬሂ
ሎኤሊ ኦሊዳ።
- 5 ኔ ሳንቃታ ኡባ፤
ሳኒሬፔ ዩዳ
ጸዳን ኦሊዳ፤
ማርካቤ ቱሳቲ
ሊባኖሴፔ ዩዳ
ዚጋፔ ጊጊዳ።
- 6 ባሳኔፔ ዩዳ ዋላፔ
ማርካቤ ላጊዛ ሚሽ ኦሊዳ፤
ቆጶርሴ ዛዋፔ ዩዳ
ዚጋ ሚላ፤
ዳንጋርሳ ዛሌን ኣሌቆሲዲ
ኔ ወይጌዛ ኦሊዳ።
- 7 ኔ ማርካቤዛ ጸባቤይ
ጊብጼ ቢታ ላይኖፔ ኦሴቲዳሰ፤
ሄሲ ኔና ባንዲራ ማላ ጎኢዳሰ።
ሳሎ ሚሳቲዛኔ ኦቻ
ቴራ ሚሳቲዛ
ኔ ሻራቲ ቆጶርሴፔ ዩዳ።
- 8 ማርካቤ ሶሎሊሲዛይቲ
ሲዶናፔኔ
ኣርዋዴፔ ዩዳይታ፤

ሃኔ ጸረሴ፥
ኔ ማርካቤ ላጊዛይቲ
ሎሂዳ ኔ አሳታ።

- 9 ጌባሌ፤ ሎሂዳ ዳናቲኔ
ሂላንቻቲ
ኔ ማርካቤታ ኮላናስ
ኔ ጊዶን ዴቲስ፤
አባ ቦላራ ቢዛ ማርካቤቲኔ
ማርካቤ ላጊዛይቲ ኡባይ
ሄሬጌቲዲ ኔናራ ዛልኤታናስ
ኔኮ ዬቲስ።

- 10 «ፓሪሴ፥ ሉዴኔ ፑጾ አሳቲ
ዋታዳራ ጊዲዲ
ኔ ኦላንቻታ ጊዶን
ኔና ሃጋዜቲስ፤
ኔስ ቱማ ጊዳና ማላ
ባንታ ጎንዳሌኔ
ባንታ ቢራታ ቆቤ
ኔ ጎዳ ቦላ ካቂዳ።

- 11 አርዋዴኔ ሄሌኬ አሳቲ
ኔ ጊምቤታ ኡባሶራ
ናጌቲስ፤
ጋማዴ፤ ዪዳ አሳቲ
ኔ ጊምቤ ጊዶን ዴቲስ፤
ኢስቲ ባንታ ጎንዳሌ
ኔ ጊምቤዛ ዩሾን ካቂዳ፤
ኔ ፑላቴላ
ኩሜስ ኦሊዳ።

- 12 «ኬሂ ዳር ጊዲዳ ኔ ዱሬቲላ ጋሶን ታርሴሴይ ኔናራ
ዛልኤን ጋይታዱስ፤ ኢዛ ቢራኔ ቢራታ፥ ቆርቆሮኔ ኢርሳሴ ኤሃዳ
ኔ ሻቃጨታ ላሜ ኤካዉስ።

- 13 «ያዋኔይ፥ ቱባሌይኔ ሜሼኬይ ኔናራ ኢሲፌ ዛልኤቲስ፤
ኣይሌታኔ ጸርቂማላ፤ ኦሴቲዳ ሚሻታ ሻቃጨራ ላሜቲስ።

- 14 «ቤቲ-ቶጋርማ አሳቲ ጫና ፓራታ፥ ኦላ ፓራታኔ ባቂሎታ
ሻቃጨን ላሜቲስ።

15 «ኤርዶሴ* አሳቲ ዛልኤን ነናራ ጋይቲዳ፤ ዳር ሃሩር ዳሬቲ ኔ ሻቃጩታ ዳንጋርሳ ዛሌኒኔ ዞጼ ጌቲቲዛ ሚላን ላሜቲስ።

16 «ከሂ ዳር ጊዲዳ ኔ አቆታ ጋሶን አራሜይ ነናራ ዛልኤን ጋይታዱስ፤ ኔ ሻቃጩካ ቤሉሬን፤ ኦቻ ቲራ ሚሳቲዛ ጫርቃን፤ ጸባቤን፤ ሎኦ ላይኖን፤ ሄሌሎኒኔ ዞኦ ኢንቁን ላሜቲስ።

17 «የሁዳይኔ ኢስራኤሌይካ አቶንታ ነናራ ዛልኤን ጋይቲዳ፤ ኢስቲ ሚኒቲፔ ዪዳ ጊስቲ፤ ማሊዶ፤ ኤስ፤ ዛይቲኔ ባላሳኔ ጌቲቲዛ ቆሊዛ ዛይቲ ኔ ሻቃጩዛራ ላሜቲስ።

18 «ኔ ዳር ዱሬቴላኔ ኢሻሎ ዱሳ ጋሶን ዳማሰቆ አሳቲ ሄልቦኔ ዋይኔ ኡሺኔ ዛሃሬ ዳሬ ዶርሳ ኢስኬ ሺሺዲ ነናራ ዛልኤቲዳ።

19 «ኦዜሌን ዲዛ ዳኔይኔ ጊርኬ አሳይ ኔ ዱማ ዱማ ሚሻ ሻሚዳ፤ ኢስቲ ኔ ሚሻራ ላማናሰ አሌቄቲዳ ቢራታ፤ ዱማ ዱማ ሳዋታኔ ቃራፋ ኤሂዳ።

20 «ዳዳኔይ ኔ ሻቃጩ ገላሴራ ላማዉስ።

21 «አራቢያ ሃላቃቲኔ ቁዳሬ ሃላቃቲ ኡባይ ኔ ላጌታ፤ ኢስቲ ላቃ፤ ቆርሾኔ ዳይሼ ኤሂዲ ነናራ ዛልኤቲስ።

22 «ሳባ ዛልኣንቻቲኔ ኤራአሜ ዛልኣንቻቲ ነናራ ዛልኤቲቲስ፤ ዶሬቲዳ ቀማሜ ኡባ፤ አልኦ ሹቺኔ ዋርቃ ሺሺዲ ሻቃጩን ነናራ ዛልኤቲቲስ።

23 «ካራኔ፤ ካኔ፤ ኤዳኔ፤ ሳባ፤ አሶሬኔ ኪልማዳ ዛልኣንቻቲ ነናራ ዛልኤቲቲስ።

24 ሄይቲካ ኔ ጊያ ጊዶን ሎኦ ማይኦ፤ ሳሎ ሚሳቲዛ ካባ፤ ጸባቤ፤ ሄሳቶካ ቢራታ ቃላሜን ጸሊዛኔ ሚኒ ዳዳቲዳ ሲጋጃ ኤሂዲ ነናራ ዛልኤቲቲስ።

25 «ታርሴሴ ማርካቤቲ

ኔ ሻቃጩ ጫኒ ጫኒ ኤፊዳ፤

ኔኒ አባ ጊዶን ዳጸ ጫና

ጫኔታዳ ዳሳ።

26 ማርካቤ ሶሎሊሲዛይቲ ጨማ

አባ ጊዶን ኔና ኤፊዳ፤

ጊዶ አቲን አርሼይ

ሞኪዛ ባጋ ጫርኮይ

አባ ጊዶን

ኔና ሚንፊሬፊዳስ።

27 ማርካቤ ዳፋይ

* 27:15 ኤርዶሴ ገዛይሳ ሃራ ሃራ ቢርሼላቲ ዳዳኔ ጌቲስ።

27:25 አጃ

- ኔ ቦላ ጋኪዛ ጋላስ
 ኔ አቆታይ፥ ኔ ሻቃጩይኔ
 ኔ ዛልኤ ሚሻይ፥
 ኔ ማርካቤዛ ሶሎሊሲዛይቲ፥
 ማርካቤዛን ቢዛይቲኔ
 ማርካቤ ኦሳንቻቲ፥
 ኔ ዛልኦንቻቲኔ
 ኔ ዋታዳራቲ ኡባይ፥
 ማርካቤዛን ዲዛይቲ ኡባይ፥
 ዱጌ ጨማ አባን ሚቲታና።
- 28 ኔ ማርካቤ ሶሎሊሲዛይቲ
 ዋሲሸን፥
 አባ ጋጸን ዲዛይቲ
 ያርኪያርኬቲስ።
- 29 ማርካቤ ሶሎሊሲዛይቲ ኡባይ
 ባንታ ማርካቤታ ኦሊ ባና፤
 ማርካቤ ሶሎሊሲዛይቲኔ
 ማርካቤን ዲዛይቲ ኡባይ
 ዋጲዲ አባ ጋጸን ኤቃና።
- 30 ባንታ ቃላ ቶቄ ሂስቲዲ
 ጫሞ ዩሆ ኔስ ዩካና፤
 ባንታ ሁኤን ጉዲላ ቆሊዲ
 ቢዲንፋ ቦላ ቡሉሌታና።
- 31 ኔ ጊሻስ ካዮቲዲ
 ባንታ ሁኤ ቡሉሳና፤
 ማቃካ ማይኣና፤
 ዋዚናፔ ጨጨዲ
 ጫሞ ዩሆ ኔስ ዩካና።
- 32 ኔ ጊሻስ ኢስቲ ዋሲሸ
 ዩካና፤
 ኢስቲ ኔስ ዚላሊሼ፥
 ኦሳባን ሚቲቲ ጮኡ ጊዳይ፥
 ጸርሴ ማላይ ኦኔ?፤ ጋና።
- 33 ኔ ሻቃጩይ
 አባፌ ፒኒ ኬዚዳ ዋዴ፥
 ዳር ዳሬታ ካልሳሳ፤
 ኔኒ ኔ ጊታ አቆታኒኔ
 ኔ ሻቃጩዛን ቢታን ዲዛ

- ካዎቴላታ ዱሬሳዳሳ።
- 34 ሃኢ ጊዲኮ ጨማ ሃላን
 ኣባ ጊደን ሜቄሬታ
 ኩንዳዳሳ፤
 ኔ ጫናይኔ ጫኔቲዳ
 ኣሳይ ኡባይ
 ኔናራ ኣባን ሚቴቲዳ።
- 35 ኣባ ጋጸን ዴኢዛ ኣሳይ ኡባይ
 ኔ ቦላ ጋኪዳይሳ ቤኢዲ
 ዳጋሚዳ።
 ኢስታ ካዎቴካ ሂርጋን ኮኮሪዳ፤
 ኢስታ ኣይፌሶይ ላሚቲዴስ።
- 36 ሃራ ካዎቴላታ ጊደን ዲዛ
 ዛልኣንቻቲ
 ኔ ቦላ ኣይ ኬና ዋይቂዶ!
 ኔ ወርሴሳይ
 ዳጋንሲዛዝ ጊዲዴስ፤
 ኔ ሚርናስ ቤታካ» ጊዴስ።

28

ጲሮሴ ሃላቃ ቦላ ዮቴቲዳ ቲንቢቲ

- 1 ጎዳ ቃላይ ታኮ ዩዲ፥
 2 «ሃይሶ ኣሳ ናዉ! ጲሮሴ ሃላቃስ ኡባ ሃሪዛ ጎዳይ፡
 «ኔ ዋዚናይ ኦቶሮን ኩሚዲ፥
 ሓቲ ጸሳ፤
 ጸሳ ኣራታን ኣባስ
 ጊዶ ኣዳን ኡታዲስ፡ ጊዴስ።
 ኣይኮስካ ኔኒ ታኒ ጸሳ ማላ
 ኣቶ ኤራንቻ ቆፒኮካ
 ኔኒ ኣሳ ኣቲን ጸስ ዳካ።
- 3 ኔኒ ዳኔላፔ ቦላራ
 ኣቶ ኤራንቻ?
 ኔፔ ጌሚዳ
 ጹራ ዮኦይ ዳኔ?
- 4 ኔ ኣቶ ኤራቴላኒኔ
 ኔ ኣኬካን
 ኔ ኣቆታ ዳጋሳዳሳ፤
 ዋርቃኔ ቢራ

- ኔ ሚንጃ ኬላን
ሺሻዳሳ።
- 5 ኔ ዛልኤ ኦሶ ኤራቴላን
ኬሃ ቢዳ ጊሻሰ፤
አቆታ ቦላ አቆታ ዳጋሳዳሳ፤
ኔ አቆታ ዳሮቴላፌ
ዴንዲዳይሳን
ኔ ዎዚናይ ኦቶሮን
ኩሚዴሰ ጋዳ ዮታ።
- 6 «ሄሳ ጊሻሰ
ኡባ ሃሪዛ ጎዳይ፤
ኛቲ ዶሳ ማላ
አጽ ኤራንቻ፤
ጋዳ ኔኒ ቆፒዛ ጊሻሰ፤
- 7 ካዎቴላታ ጊደን
ኬሂ ሚንጆ ኢታ ጊዲዳ አላጋታ
ታ ኔ ቦላ ኤሃና።
ኢሰቲ ኔ አጽ ኤራቴላ
ፑላቴላ ቦላ
ባንታ ማሻ ሾዳና፤
ጊታ ኔ ቦንቸዛካ ቱኒሳና።
- 8 ኔና ዲጌ አላን ዩጋና፤
ጨማ ሃላን አባ ጊደን
ኢታ ሃይቆ ኔ ሃይቃና።
- 9 ሂሰቲን ኔኒ ኔና ዎጂዛይታ
ሲንላን፤
ኛቲ ዶሳ፤ ጋንዲ?
ኔና ዎጂዛይታ ኩሼን
ኔ ጌላሼ
ኔኒ አሳ አቲን ጸሰ ዳካ።
- 10 ኔኒ አላጋታ ኩሼን
አማሮንታ አሳታ
ሃይቆ ማላ ሃይቃና፤
ኡባ ሃሪዛ ጎዳይ፤
ኛቲ ሃይሳ ዮታዲሰ፤
ጌሰ» ጊዴሰ።

ጸረሴ ካዎ ኩንዴል

11 ቃሴካ ጎዳ ቃላይ ታኮ ዪዲ፥

12 «ሃይሶ አሳ ናዉ! ጸረሴ ካዎ ጊሻሰ ዚላላሼ ኡባ ሃሪዛ ጎዳይ ኔና፥

« ላይኦ ኤራቴላን ኩማዳ፥

ኩማላ ፑላቴስ ማይኣዳ

ኔኒ አሳሰ ቱሙ ሌሚሶ ጊዳዳሳ።

13 ኔኒ ኤዴኔን፥

ጸሳ እታኪልቴ ጊዶን ዴኣዳሳ፤

ቦንቾ ሹቻዚ ኢሶይ ኢሶይ

ኔና አሌቁሲዴሰ፤

ኢሰቲካ ሳርዲዮኔ፥

ቶጳዚዮኔኔ ኣልማዜ፥

ማርጊዴ፥ ኢያሰጺዴኔ ሲምፔሬ፥

ቤሉሬ፥ ቢሪሌኔ ኣልኦ ኢንቁ፤

ኔ ማይኦቲካ ጸልቂዛ

ኢንቁኔ ዎርቃ፤

ሃይቲ ኔኒ ሜዴቲዳ

ጋላሰ ኦሴቲዳ።

14 ኔኒ ናጊዛ

ኪሩቤ ጊዳዳ ቲዬታዳሳ፤

ሄሳሰ ታ ኔና ሹማዲሰ፤

ኔኒ ካሴ ጌሻ ዙማን

ጸሳይሳን ዴኣዳሳ፤

ታማ ማላ ሹቻታ ጊዶን

ሲሜሬታዳሳ።

15 ኔኒ ሜዴቲዳ ጋላሳፌ ዶሚን፥

ኢታቴሊ ኔ ቦላ

ቤቲዳ ጋላሰ ጋካናሰ፥

ኔኒ ኦጌ ኡባን

ቦሬይ ባይንዳ ዴኣዳሳ።

16 ኔ ዛልኤይ ሚኒዳ ጊሻሰ፥

ማካላቴላን ኩማዳሳ፤

ናጋራካ ኦላዳሳ።

ሄሳ ጊሻሰ ታ ኔና

ጸሳ ዙማ ቦላፌ

ካዉሻዳ ዬዴላዲሰ፤

ሃይሶ ናጊዛ ኪሩቤ!

- ታ ኔና ታማ መሳቲዛ
 ሹቻታ ጊደፌ ኬሳዲሰ።
- 17 ኔ ፑላቴላ ጋሶን፤
 ኔ ዋዚናይ ኦቶሬቲዴሰ፤
 ኔ ቦንቾ ጊታቴላፌ
 ዴንዲዳይሳን፤
 ኔ ኣቶ ኤራቴላ ቱኒሳዳሳ፤
 ሄሳ ጊሻሰ ታኒ ኔና
 ዲጌ ቢታን ኦላዲሰ፤
 ሃራ ካዎታ ሴራናሰ
 ማለታ ኦላዲሰ።
- 18 ኔ ናጋራኒኔ ኔ ጨዋ ዛልኤ
 ዳሮፔ ዴንዲዳይሳን፤
 ኔ ጎይኒዛ ኬላታ
 ቱኒሳዳሳ።
 ሄሳ ጊሻሰ
 ታኒ ታማይ ኔ ጊደፌ
 ኬዛና ማለ ኦላዲሰ፤
 ኢዚካ ኔና መዴሰ።
 ኔና ቤኢዛ ኡባ ሰንላን፤
 ቢታ ቦላ ኔና ቢዲንሐ ኬሳዲሰ።
- 19 ኔና ኤሪዛ ካዎቴላቲ ኡባይ፤
 ኔ ቦላ ጋኪዳይሳን ዳጋሚዳ።
 ኔ ወርሴሐ
 ጩጩሲዛዝ ጊዲዴሰ፤
 ሃይሳፌ ጉዬ ኔሰ
 ዴኦይ ዴና ጌሰ» ጊዴሰ።

ሲዶና ቦላ ዮቴቲዳ ቲንቢቲ

- 20 ጎዳ ቃላይ ታኮ ዪዲ፤
- 21 «ሃይሶ ኣሳ ናዉ! ኔ ኣይፌሶ ሲዶና ባጋ ዛራዳ ቲንቢቲ
 ኢዚ ቦላ ዮታ።
- 22 ኔኒ ዴራሰ ኡባ ሃሪዛ ጎዳይ ኔና፤
 ሳህ ሲዶና ታኒ ኔ ቦላ ዴንዲዳይሰ፤
 ኔ ጊዶን ታኒ ቦንቹታና፤
 ቂጻቴ ታኒ ኢዚ ቦላ ኤሂሺን፤
 ታ ጌሻቴላካ

ታ ኢዚ ጊደን ቆንጨሲሺን፤
 ታኒ ጎዳ ጊዲዳይሳ ኢስቲ ኤራና።
 23 ታኒ ኢዚ ቦላ ኢታ ሃርጌ ኤሃና፤
 ኢዚ ኦጌታን ሱላ ጉካና ማላ
 ታ ኦላና፤
 ኡባ ባጋራ ዪዛ
 ማሻን ሲፊቲዳይቲ፤
 ኢዚ ጊደን ኩንዳና፤
 ሄሳፌ ጉዬ
 ታኒ ጎዳ ጊዲዳይሳ
 ኢስቲ ኤራና።

24 « ሃይሳፌ ጉዬ ኢሰራኤል ኣሳ ኡንኤሊዛ ኪንዲቾይኔ
 ጫዲዛ ኣጉንሐ ጊዲዳ ሾርቲ ኢስታ ዩሾን ዴቲና፤ ሄሳን ታኒ ኡባ
 ሃሪዛ ጎዳ ጊዲዳይሳ ኢስቲ ኤራና፤ ጌሰ» ጊዴሰ።

ኢሰራኤል ኣሳ ኣንጃቲላ

25 ኡባ ሃሪዛ ጎዳይ፡ «ታ ኢሰራኤል ዴራ ኢስቲ ላሌቲዳ
 ካዎቲላታ ቢታፌ ሺሺዛ ዎዴ፡ ካዎቲላቲ ጸሊሺን ታ ጌሻቲላ
 ታኒ ኢስታ ጊደን ቆንጨሳና፤ ሄሳፌ ጉዬ ኢስቲ ታኒ ታ ኣይሌ
 ያቆቤስ ከሚዳ ባንታ ቢታን ዴኣና።

26 ሄን ኢስቲ ሳርን ዳና፤ ኬላታ ኬጻና፤ ዎይኔ ቱራ ቶኪዛሶሆታ
 ጊጊሳና፤ ኢስቲ ካፂዳ ሾርታ ታ ቃጸዪዛ ዎዴ ኢስቲ ሳርን ዳና፤
 ሄሳፌ ጉዬ ታኒ ጎዳይ ኢስታ ጸሰ ጊዲዳይሳ ኢስቲ ኤራና» ጌሰ።

29

ጊብጼ ቦላ ዮቲቲዳ ቲንቢቲ

1 ኑኒ ዲኤቲዳ ታማንላ ላይላን፡ ታማንላ ኣጊናን፡ ታማኔ
 ናምኣንላ ጋላሳን ጎዳ ቃላይ ታኮ ዪዲ፤

2 «ሃይሶ ኣሳ ናዉ! ኔ ኣይፌሶ ጊብጼ ካዎ ፓሮኔኮ ዛራዳ
 ኢዛ ቦላኔ ጊብጼ ቢታ ኡባ ቦላ ቲንቢቲ ዮታ።

3 ኔኒ ኢዛሰ ኡባ ሃሪዛ ጎዳይ፤

«ሻፋ ሃላ ጊደን ኢቺዳ
 ሃይሶ ጊታ ዶኣዘ!
 ጊብጼ ካዎ ፓሮኔ!
 ታ ኔ ቦላ ዴንዳዲስ፤

- ላባዬ ሻፋይ ታይሳ፤
 ታኒ ታሰ ሜቆዲስ፡ ጋሳ። *
- 4 ጊደ አቲን ኔ ሲጄን
 ታ ዳፎ አላና፤
 ኔ ሻፋታን ዲዛ ሞሌታ
 ኔ ጎጋራ ኦይሴላና።
 ኔስ ጎጋን ሻቢዳ
 ሞሌታ ኡባራ
 ታ ኔና ኔ ሻፋታፔ
 ጎቻ ኬሳና።
- 5 ኔና ኔ ሻፋታን ዲዛ
 ሞሌታ ኡባ፤
 ታ ባዞ ቢታን ዩጋ ኣጋና፤
 ኣይኮይ ባይንዳ ዴሞባን
 ኔ ኩንዳና፤
 ኔና ሺሻናይኔ
 ዴንፋናይ ዴና፤
 ዋራ ዶኣታሲ ካሎ ካፎታስ፤
 ኔኒ ቁማ ጊዳና ማላ
 ታ አላ ኢማና።
- 6 «ሄሳፌ ጉዬ ጊብጾን ዲዛ ኡባይ ታኒ ጎዳ ጊዲዳይሳ ኤራና።
 «ኢሰራኤል ከላን ኔኒ አሳሰ ማቃ ጉፌ ጊዳዳሳ።
- 7 ኢሰቲ ኔና ኦይኪዳ ዋዴ ሜቃዳ ኢስታ ሾጶዛ ጫዳዳሳ፤
 ኢሰቲ ኔናን ዜምፒዳ ዋዴ ሜቃዳ ኢስታ ዘኮ ዲላዳሳ።
- 8 ሄሳ ጊሻሰ ኡባ ሃሪዛ ጎዳይ ታኒ ማሻ ኔ ቦላ ኤሃና፤ ኔ
 አሳታኔ ኢስታ ሜሄታ ዋቆና።
- 9 ጊብጾይ ላሌቲዳ ቡላ ቢታ ጊዳና። ሄሳፌ ጉዬ ታኒ ጎዳ
 ጊዲዳይሳ ኢሰቲ ኤራና።
 « ላባዬ ሻፋይ ታይሳ፤ ታኒ ኢዛ ሜቆዲስ፡ ጋዳሳ።
- 10 ሄሳ ጊሻሰ ታኒ ኔ ቦላኔ ኔ ሻፋታ ቦላ ዴንዳዲስ፤ ጊብጾ
 ቢታ ሚጊደሌፔ ቢዲ ኣሲዋ ጋካናስ፡ ሄፔካ ቢዲ ቶጵያ ዛዋ
 ጋካናስ ላላዳ ታኒ ቡላሳና።
- 11 አሰ ጊዲን ሜሄ ጊዲን ሄራ ኣቂቤና፤ ኦይዱ ታሙ ላይሰ
 ጋካናስ ኦኒካ ኢዚን ዴና።

* 29:3 አባዬ ሻፋዛ ኢሲ ኢሲ ጌሻ ማጻፋቲ ናይሌ ሻፋ ጊ ጎኤቴሰ 29:6
 ኢሳ 36:6

12 ታኒ ጊብጼ ቢታ ዳይዳ ቢታታፔ ኢሲኔይ ማላ ቡላሳና፤ ኢዚ ካታማቲካ ላሌቲዳ ካታማታ ጊደን ኦይዱ ታሙ ላይሰ ጋካናስ ካይስ ጊዳና፤ ጊብጼታካ ታኒ ካዋቲላታ ጊደን ላላና፤ ዴሬታ ጊደን ታ ኢስታ ዜራና።

13 «ኡባ ሃሪዛ ጎዳይ፥ ሐይዱ ታሙ ላይሰፊ ጉዬ ታኒ ጊብጼታ ኢስቲ ላሌቲ ዲዛ ካዋቲላታ ጊደፊ ሸሻና።

14 ታኒ ኢስታስ ዛራ ኢሻሎ ዴኦ ኢማና፤ ካሴ ኢስታ ኣዋታ ቢታ ጳጺሮሴ ታ ኢስታ ዛራና፤ ኢዛካ ካዋቲላታ ኡባፊ ላፋ ጊዳና።

15 ሃራ ካዋቲላታፔ ቦላራ ኢዛ ባና ጵቁ ሂስታና ዳንዳዩኩ፤ ታኒ ኢዛ ኬሃ ላፋ ሂስታና፤ ሄሳ ጊሻስ ኢዛ ሃራ ካዋቲላታ ዛራ ሃራና ዳንዳዩኩ።

16 ጊብጼይ ሃይሳፊ ጉዬ ኢስራኤሌይ ኢዚን ዜምፒዛ ዴሬ ጊዳኩ፤ ማዶ ዴማናስ ኢዚኮ ኢስቲ ሲሚዳ ዋዴ ኢስቲ ኦሒዳ ናጋራ ኢስቲ ቆፍሲዛ ዴሬ ጊዳና፤ ሄሳፊ ጉዬ ታኒ ኡባ ሃሪዛ ጎዳ ጊዲዳይሳ ኢስቲ ኤራና፤ ጌስ» ጊዴስ።

ጊብጼ ጸኔቲሳ

17 ኮኒ ዲኤቲዳ ናምኡ ታማኔ ላፑንላ ላይላን፥ ኮይሮ ኣገናን፥ ኮይሮ ጋላሳን ጎዳ ቃላይ ታኮ ዩዲ፥

18 «ሃይሶ ኣሳ ናዉ! ባቢሎኔ ካዋ ናቡካዳናጾሬይ ዋልቃማ ኦላ ጳጺሮ ቦላ ዴንሒዳዴስ፤ ኡባ ሁኤይ ቦኣቲዴስ፤ ኡባ ሃሼይካ ጋሬቲዴስ፤ ጊዲኮካ ኢዚኔ ኢዛ ኦላንቻቲ ጳጺሮ ቦላ ኢስቲ ዋራጂዲ ዴሚዳ ዋዴይ ዴና።

19 ሄሳ ጊሻስ ኡባ ሃሪዛ ጎዳይ፥ ታኒ ጊብጼ ቢታ ባቢሎኔ ካዋ ናቡካዳናጾሬስ ኣላ ኢማና፤ ኢዚስ ዲዛ ኣቆታ ኡባ ኢዚ ባስ ሚያና፤ ኢዛ ኦላንቻታስ ዳሞዛ ጊዳና ማላ ቢታይን ዲዛ ሚሽ ኡባ ቦንቃናኔ ፒቲ ኤፋና።

20 ኢዚኔ ኢዛ ኦላንቻቲ ታስ ዳቡርዳ ጊሻስ ኢዛስ ዳቡራ ጋቲ ጊዳና ማላ ጊብጼ ታ ኢዛስ ኢማዲስ» ጌስ።

21 «ሄ ጋላስ ታኒ ኢስራኤሌ ኬላስ ካጩ ሞይዛና፤ ኢስታ ጊደን ታ ኔ ዶና ዶያና፤ ሄሳን ታኒ ጎዳ ጊዲዳይሳ ኢስቲ ኤራና» ጊዴስ።

30

ጊብጼ ቦላ ያና ቂጸቲ

1 ጎዳ ቃላይ ታኮ ዩዲ፥

2 «ሃይሶ ኣሳ ናዉ! ሃይሳ ማላ ጋዳ ቲንቢቲ ዮታ፥ ኡባ ሃሪዛ ጎዳይ፥

- « (ወ! ወይ) ጋ ዋሳ፤
 «ሄ ጋላሳይስ ኣዬ ኣና!» ጋ።
- 3 ጋላሳይ ማቲዴስ!
 ጎዳ ጋላሳይ ጋኪዴስ!
 ሄ ጋላሳይ ሻራ ጋላሳ፤
 ካዎቴላታ ኡባስ
 ባሻ ጋላሳ።
- 4 ጊብጼ ቦላ ኦላይ ያና፤
 ቶጵያ ቦላካ ቱጋይ ያና።
 ዳሮቲ ጊብጼን ሹኬቲ ኩንዳና፤
 ኢዚ ኣቆታይ ቦንቄታና፤
 ኢዚ ዮቻቲካ ላሌታና።
- 5 «ቶጵያይኔ ፑዴይ፥ ሉዴይኔ ኣራቤይ፥ ሊቢያይኔ ጫቆ ቃላ
 ቢታ ኣሳይ ጊብጼራ ኢሲፌ ማሻን ዉራና።
- 6 «ኡባ ሃሪዛ ጎዳይ፥
 ሪብጼራ ዙፔቲዛይቲ ኩንዳና፤
 ኢዛ ኦቶሬቲዛ ሚኖቴላይ ጳያና፤
 ሚጊዶሌፔ ቢዲ
 ኣሲዋ ጋካናስ፥
 ኢስቲ ማሻን ሃይቃና ጌስ።
- 7 ቡላ ቢታታ ጊዶን
 ኢስቲ ኣጲ ቡላ ጊዳና፤
 ኢስታ ካታማቲካ
 ላሌቲዳ ካታማታ ጊዶፌ
 ኢሳ ጊዳና።
- 8 ታኒ ጊብጼን ታማ ኦይሊዛ ዋዴ፥
 ኢዞ ማዲዛይቲ ኡባይ
 ኩንዲዛ ዋዴ፥
 ታኒ ጎዳ ጊዲዳይሳ
 ኢስቲ ሄ ዋዴ ኤራና።
- 9 «ሄ ጋላስ ታ ቃስታኔቲ ማርካቤን ቢዲ ባጲ ጋ ኡቲዳሶሆፔ
 ኬሳናስ ቶጵያ ዳጋንፋና፤ ጊብጼይ ጳማን ሚቴቲዛ ዋዴ ኢስታ
 ጩጩይ ኦይካና፤ ቱማፔ ሄ ጋላሳይ ያና።።
- 10 ኡባ ሃሪዛ ጎዳይ፥
 «ባቢሎኔ ካዎ ናቡካዳናጸሬ ኩሼን
 ቆዳይ ባይንዳ ጊብጼ ዴሬ ኣሳ
 ታ ጳይሳና።
- 11 ካዎቴላታ ኡባፌ

ሜንጾ ኢታ ጊዲዳ
 ኢዚኔ ኢዛ ኦሳንቻቲ
 ቢታዮ ቆይሳናስ
 ያና ማላ ኦላና፤
 ባንታ ማሻ
 ጊብጾ ቦላ ሾዲዲ
 ቢታዮ ኣሃ ጸላ ሂስታና።

- 12 ኣባዬ ሻፋ ታኒ ሜሊሳና፤
 ቢታዮካ ኢታ ኣሳታስ ባይዛና፤
 ኣላጋታ ኩሼን ቢታዮኔ
 ኢዚን ዲዛ ኡባ ታ ቡላ ሂስታና፤
 ታኒ ጎዳይ ሃይሳ ዮታዲስ።

- 13 «ኤቃ ጸሳታ
 ታ ቆይሳና፤
 ሜሞፒሳን ዲዛ ሚስሌታ
 ታ ዲፒ ሂስታና፤
 ሃይሳፌ ጉዬ ጊብጾን
 ሃላቃታናይ ዴና፤
 ቢታይ ቦላ
 ታ ያሻቴል ከታና።

- 14 ታኒ ጳጲርሴ ቢታ
 ቡላ ሂስታና፤
 ጸኖሴ ቦላ ታማ ዬዳና፤
 ቴቤሴ ቦላ ቂጻቴ ዬጋና።

- 15 ጊብጾስ ሚጸ ጊዲዳ
 ሰና ቦላ ታ ባሻ ጉሳና፤
 ቆዳይ ባይንዳ ቴቤሴ ኣሳ
 ታ ቆይሳና።

- 16 ታኒ ጊብጾ ቦላ ታማ ኤላና፤
 ሰኔይ ጨጮን ቡልኣኬታና፤
 ቴቤሴይ ዳሞባላን ሚቴታና፤
 ሜሞፒሳይ ዱጸንታ
 ጨጮ ጊደ ጌላና።

- 17 ሄሊዮቴኔ
 ቡባሰቴ ናቴላቲ
 ማሻን ሲፌታና፤
 ሄ ካታማቲካ ዲኤታና።

- 18 ታኒ ጊብጼ ቃምባራ ሚንፊዛ ዋዴ
 ጸፊናሴን ጋላሳይ ቃማና፤
 ሄሳፌ ጉዬ ኢዛ ኦቶሬቲዳ
 ኢዚ ሚኖቴላይ ኩንዳና፤
 ኢዛ ሻራን ካሚታና፤
 ኢዚ ጉታቲካ ዲኤታና።
- 19 ሄሳ ጊሻሰ ታ ጊብጼ ቦላ
 ታ ቁጸቴ ኤሃና፤
 ኢሰቲካ ታኒ ጎዳ ጊዲዳይሳ
 ሄ ዋዴ ኤራና» ጊዴሰ።

ጊብጼ ካዋ ኩንዴል

- 20 ኑኒ ዲኤቲዳ ታማኔ ኢሲንላ ላይላን፥ ኮይሮ ኣገናን፥ ላፑንላ
 ጋላሳን ጎዳ ቃላይ ታኮ ዪዲ፥
- 21 «ሃይሶ ኣሳ ናዉ! ታኒ ጊብጼ ካዋ ቄሴ ሚንላዲሰ፤ ኢዚ
 ፓጻና ማላ ኢዛ ቄሴይ ኮሌቲቤና፤ ዋይኮ ኢዚ ማሻ ኦይኪ
 ዳንዳያና ማላ ኢዛ ኩሼይ ማቃን ኮሌቲቤና።
- 22 ሄሳ ጊሻሰ ኡባ ሃሪዛ ጎዳይ፥ ታኒ ጊብጼ ካዋ ፓሮኔ
 ቦላ ዴንዳዲሰ፤ ኢዛሰ ፓጻ ቄሴዛራኔ ሜቆ ቄሴዛራ ናምኣ ጋላ
 ሚንላና፤ ኢዛ ማሻይ ኢዛ ኩሼፔ ኬሲ ኤኪ ዋቆና ማላ ታ ኦላና።
- 23 ታኒ ጊብጼ ኣሳ ካዋቴላታ ጊዶን ላላና፤ ሃራ ዴሬታ ጊዶንካ
 ዜራና።
- 24 ታኒ ባቢሎኔ ካዋ ቄሴ ሚንላዳ ታ ማሻካ ኢዛ ኦይላና።
 ጊዶ ኣቲን ፓሮኔ ቄሴዛ ታ ሚንላና፤ ኢዚካ ባ ሞርኬዛ ሲንላን
 ኢታ ማዲንጺዳ ኣሳ ማላ ቶቃና።
- 25 ባቢሎኔ ካዋ ቄሴ ታ ሚንላና፤ ጊዶ ኣቲን ፓሮኔ ቄሴይ
 ዳቡራና፤ ታኒ ታ ማሻ ባቢሎኔ ካዋ ኩሼን ኦይሊን ኢዚካ ቃሊሺን
 ታኒ ጎዳ ጊዲዳይሳ ኢሰቲ ኤራና።
- 26 ታ ጊብጼታ ካዋቴላታ ጊዶን ላላና፤ ዴሬታ ጊዶንካ ዜራና፤
 ሄሳፌ ጉዬ ታኒ ጎዳ ጊዲዳይሳ ኢሰቲ ሄ ዋዴ ኤራና ጌሰ»
 ጊዴሰ።

31

ሊባኖሴ ዚጋ ለሚሶ

- 1 ኑኒ ዲኤቲዳ ታማኔ ኢሲንላ ላይላን፥ ሄቫንላ ኣገናን፥ ኮይሮ
 ጋላሳን ጎዳ ቃላይ ታኮ ዪዲ፥
- 2 «ሃይሶ ኣሳ ናዉ! ጊብጼ ካዋ ፓሮኔሲኔ ቆዳይ ባይንዳ ኢዛ
 ዴራሰ፥

- « ሪታቱላን ኔናራ
ገናታናይ ኦኔ?
- 3 ኢዛ ሃጋይ ዋራስ ኩዋ ገዲዲ
ዳሮ ሉሌ ገዲዲ ኢዛ ጸራይ
ሳሎ ጋኪ ዲቺዛ
ለባኖሴ ዚጋ
ሚሳቲዛ አሶሬ ጸሊቱ።
- 4 ሃላቲ ኢዛ ጫሪሲዳ፤
ጨማ ፑልቶቲካ ኢዛ ዲቺዳ፤
ኢስታ ካንቼ
ሃላቲ ሳጊዳ፤
ኢስታ ጸጸይ ዲዛሶ
ኡባ ኢርጸሲዳ፤
ዴምባን ዲዛ ሚላታ ኡባኮ
ዛራ ሃላ ዬዲዳ።
- 5 ሃላ ካሊዳ ገሻሰ
ዋራ ገደን ዲዛ ሚላ ኡባፌ፤
ኬሂ አድቂዴሰ፤
ኢዛ ሃጋቲ ዳዪዳ፤
ኡንቁሎቲ አድቂዳ።
- 6 ሳሎ ካፎቲ ኡባይ ኢዛ ሃጋታ ቦላ
ባንታ ኬላ ኬጸዳ፤
ዋራ ደኣቲ ኡባይ
ኢዛ ሃጋታ ጋርሳን
ማራታ ዬሊዳ፤
ገታ ካዋቱላቲ
ኡባይ ኢዛ ኩዋ
ጋርሳን ዴኢዳ።
- 7 ዳዪዳ ኢዛ ሃጋታራ
ኢዛሰ ፑላዚ ኬሂ ሎኦ፤
ኢዛ ጸጸቲ ሃላ
ዳሪ ዲዛሶ ቢዳ።
- 8 ጸሳ ጋናቲን ዲዛ ዚጋቲካ
ኢዛራ ገናታና ዳንዳይቤቱና፤
ጸዳቲካ ኢዛ ሃጋታራ
ገናቱቱና፤
ዋላቲካ ኢዛ ሃጋራ
ገናቱቱና፤
ጸሳ ጋናቲን ዲዛ

አይ ሚሊካ
 ሎኤቴላን ኢዛ ጋኬና።
 9 ታኒ ኢዛ ዳሮ ሃጋታራ ጋላ
 ፑላሳ ሜዳዲስ፤
 ጸሳ ጋናቴን ዲዛ
 ሚላቲ ኡባይ
 ኢዛ አዋታና ማላ
 ኦላዲስ፤ ጌስ ጋ።

10 «ሄሳ ገሻስ ኡባ ሃሪዛ ጎዳይ፥ ርጩፑ ጊዳ ቦንጮታ ቦላ
 ጸራ ቶቄ ሂስቲዲ ባና ዛራዲሲዳ ገሻስ፥ ባ አዲሳቴላን ኢዚ
 ኦቶሪቲዳ ገሻስ።

11 ታኒ ኢዛ ኢታቴላ ኬና ኢዛ ኦሶ ጋቴ አማና ማላ ካዋቴላታ
 ሃሪዛይሳስ ታ ኢዛ አላ አማዲስ። ታ ኢዛ ኬሳ ዋራ ኦላዲስ።

12 ካዋቴላታ ጋርሳን ኬሂ ሜንጾ ኢታ አላጋቲ ኢዛ ቃንጾሬሊ
 ዬጊዳ፤ ኢዛ ኡንቁሎቲ ዙማታኒኔ ዙሌታን ኩንዲዳ፤ ኢዛ ሃጋቲካ
 ሜቄሪቲ ሃላ ዛራታን ዋዲዳ፤ ቢታን ዲዛ ካዋቴላቲ ኡባይ ኢዛ
 ኩዋ ጋርሳፊ ኬዚዲ ዬጊ ቢዳ።

13 ሳሎ ካሮቲ ዬዲ ኩንዲዳ ሚላ ቦላ ኡቲዳ፤ ዋራ ዶአቲካ
 ኡባይ ኩንዲዳ ሚላ ሃጋታ ቦላ ኡቲዳ።

14 ሄሳ ገሻስ ሃላ ላንቁን ዲዛ አይ ሚሊካ ባ ጸራ ጩፑ
 ጊዳ ቦንጮታ፤ ቦላራ ቶቄ ሂስቲዲ ሃይሳፊ ጉዬ ባና ኦቶሮን
 ዛራዲሲና፤ ቃሴካ አይ ሚሊካ ሎኤሊዲ ሃይሳሶ አዲቄና፤
 ኡባይካ ሃይቂዲ ዱጌ ዱፎን ጌሊዛይታራ ኢሲፊ ሃይቃና ማላ
 ፒርዴቲዳስ፤ ጌስ።

15 «ኡባ ሃሪዛ ጎዳይ፥ ኢዚ ዱጌ ዱፎን ጌሊዳ ጋላስ ጨማ
 ፑልቶታ ኢዛ ገሻስ ካዮን ካማዲስ፤ ሻፋታ ቲቃዲስ፤ ጎጊዛ
 ሃላቲካ ኤቄዳ፤ ታ ኢዛ ጋሶን ሊባኖሴ ቆማ ማይዛዲስ፤ ዋራ
 ሚላቲ ኡባይ ሜሊዳ።

16 ዱጌ ዱፎን ጌሊዛይታራ ታ ኢዛ ጌልሊዛ ዋዳ ኢዚ
 ኩንዲሺን ሲዬቲዳ ገሪሳይ ካዋቴላታ ዳጋንሊዳስ፤ ሄሳፊ ጉዬ
 ኤዴኔ ሚላቲ፥ ዱማኔ ዶሪቲዳ ሊባኖሴ ሚላቲ፥ ሃል ካሊዳ ሚላቲ
 ኡባይ ቢታ ጋርሳን ዲሼ ሚኔቲዳ።

17 ካዋቴላታ ጊዶፊ ኢዛራ ዙፔቲዳይቲ፥ ኢዛ ኩዋ ጋርሳን
 ዴኢዳይቲ፥ ማሻን ሲፊቲዳይታራ ጋይታናስ ዱጌ ዱፎን ዋዲዳ።

18 «ኤዴኔን ሚላታ፤ ፑላቴላኒኔ አዲሳቴላን ኔናራ ገናታናይ
 ኦኔ? ጊዶ አቲን ኔኒካ ሄሳሶ ኤዴኔ ሚላታራ ኢሲፊ ቢታ ጋርስ
 ጌላና፤ ማሻን ሃይቂዳይታራኔ አማኖንታይታራ ኢሲ ቦላ ኢቻና።

«ፓርኔኔ ቆዳይ ባይንዳ ኢዛ ዴራ ጋካናይሲ ሃይሳ፤ ታኒ ኡባ ሃሪዛ ጎዳይ ሃይሳ ዮታዲሰ» ጊዴሰ።

32

ፓርኔኔ ጊሻሰ ዚላሌቲዳ ዚላሰ

¹ ኑኒ ዲኤቲዳ ታማኔ ናምኣንሶ ላይላን፥ ታማኔ ናምኣንሶ ኣጊናን፥ ኮይሮ ጋላሳን ጎዳ ቃላይ ታኮ ዪዲ፥

² «ሃይሶ ኣሳ ናወ! ጊብጼ ካዎ ፓርኔሰ ዚላላሼ፥
« ሳኔኒ ካዎቴላ ጊዶን

ጋሞ ማላ፤

ኣባ ጊዶንካ ሚሚንቴ ማላ፤

ኔኒ ሻፋታን ቦቦልጬ፤ ጋሳ፤

ሃላታ ኔ ቶሆን ዋዳሳ፤

ፑልቶታ ኡሎሳሳ።

³ « ኡባ ሃሪዛ ጎዳይ፡

ዳሮ ዳሪ ሸሻዳ፥

ታ ጊቴዛ ኔ ቦላ ዬጋና፤

ኢሰቲ ኔና ታ ጊቴዛራ

ጎቺ ኬሳና።

⁴ ታ ኔና ቢታ ቦላ ዬጋና፤

ዴምባ ቦላካ ሚጫና፤

ሳሎ ካፎቲ ኡባይ

ኔ ቦላ ኡታና ማላ

ታ ኦላና፤

ዎራ ዶኣቲ ኡባይ

ኔና ዪቄቲ ሚ ካላና።

⁵ ታኒ ኔ ኣሾ ዙማታ ቦላ ላላና፤

ዙሌታካ ኔ ኣሃን ኩንላና።

⁶ ቢታ ኔ ሱላን ታ ጫጺሳና፤

ኔፔ ጎጊዛይሲ ዙሌታ ኩሚዲ

ዙማታ ጋካናሰ ዲዛ

ኦጌ ኡባ ካማና።

⁷ ታ ኔና ዳይሲዛ ዎዴ

ሳሎታ ጎዛና፤

ኢሰታ ጸሊንቴታካ ዱሚሳና፤

ኣዋካ ሻራን ካማና፤

አገናይካ ባ ፖኦ ዲጋና።
 8 ሳሎን ፖኢሲዛ ፖኦታ ኡባ፥
 ኔ ቦላ ታ ቋሚሳና፤
 ኔ ቢታ ቦላ
 ታ ቋማ ኤሃና፡ ጌሰ።

9 «ኔ ቦላ ዪዳ ባሻ
 ታ ሲሲዛ ዎዴ
 ኔ ኤሮንታ ቢታን
 ካዎቲላታ ጊደን፥
 ዳሮ አሳታ ዎዚና ጩጩሳና።
 10 ዳሮ አሳይ ኔ ቦላ ጋኪዳ ሜቶን
 ዳጋማና ማላ ታ ኦላና፤
 ታኒ ታ ማሻ ኢሰታ ሲንፋን
 ሾዳ ሴሲሽን
 ኔ ቦላ ጋኪዳ ሃኖዛ ጋሶን
 ኢሰታ ካዎቲ ዳጋማን
 ኖዡ ጋና፤
 ኔኒ ኩንዲዛ ጋላሰ ኢሶይ ኢሶይ
 ባ ሸምፖሰ
 ያሻን አይፌ ቂጾን ኮኮራና።

11 «ኡባ ሃሪዛ ጎዳይ
 ጌብጼ ካዎሰ፥
 ጳቢሎኔ ካዎ ማሻይ
 ኔ ቦላ ያና።
 12 ካዎቲላታ ኡባፌ
 ኬሂ ሜንጾ ኢታ ጊዲዳ፥
 ዎልቃማ አሳታ ማሻን
 ኔ ሺሺዳ ኦላንቻቲ
 ኩንዳና ማላ ታ ኦላና፤
 ጌብጼ ኦቶሬቲላ
 ኢሰቲ ኩንዲሳና፤
 ኢዚሰ ጮራ ኦላንቻታካ
 ቋይሳና።
 13 ዳሮ ሃላ ማታን ዲዛ

32:7 ኢሳ 13:10፤ ማቶ 24:29፤ ማር 13:24-25፤ ሉቃ 21:25፤ ኣጁ 6:12-13፤
 8:12

ኢዚ ወዴታ ታ ዳይሳና፤
ሄሳፌ ጉዬ አሳ ቶሆን
ዬዴቲቲና፤
ማሄ ቶሆይ ኡሎሴና።

14 ሂሰታዳ ታ ኢዚ ሃሳታ ጸሊሳና፤
ኢዚ ሻፋታ ዛይቲ ማላ
ታ ጎሊሳና።

15 ታ ጊብጼ ቡላሲሺን
ቢታይን ዲዛይ ኡባይ ዳይሺን፤
ሄን ዲዛ ኡባ ታኒ ሾጪሺን፤
ታኒ ጎዳ ጊዲዲይሳ ኢሰቲ
ሄ ዋዴ ኤራና ጌስ» ጊዴስ።

16 ኡባ ሃሪዛ ጎዳይ፡ «ሄሲ ኡባይ ኢዚ ጊሻስ ዚላሌቲዛ
ዚላሳ፤ ካዋቲሳታ ማጫ ናይቲ ዚላላና፤ ጊብጼሲኔ ኢዚ ጮራ
ኦላንቻታ ጊሻስ ዚላሊሼ ኮይዛና» ጌስ።

ጊብጼስ ወርሴላ ካዮ

17 ኑኒ ዲኤቲዳ ታማኔ ናምኣንሉ ላይላን፤ ሄ አገናን፤ ታማኔ
ኢቻሻንሉ ጋላሳን ጎዳ ቃላይ ታኮ ዪዲ፤

18 «ሃይሶ አሳ ናዉ! ጊብጼ ኦላንቻ ጮራታ ጊሻስ ዬካ!
ኢዞኔ ዋልቃማ ካዋቲሳታ ማጫ ናይታ ዲጌ ዲፎን ጌሊዛይታራ
ኢሲፌ ዲጌ ቢታ ጋርሰ ጌልላ።

19 ኔኒ ኢሰታስ፡ «ኣንቲ ሃራታፔ አዲዲ ሎኤቲ? ዲጌ ዋዳዳ
ኣማኖንታይታራ ኢሲፌ ኢቻ» ጋ ዮታ።

20 ኢሰቲ ማሻን ሲፌቲዳይታ ጊዶን ኩንዳና፤ ማሻይ
ሾዴቲዴስ፤ ኢዛ ባ ዳሮ ኦላንቻታራ ኢሲፌ ጎሼቲ።

21 ዲፎ ጊዶን ዋልቃማ ሃላቃቲ ጊብጼ ጊሻሲኔ ኢዚራ
ዙፔቲዛይታ ጊሻስ ኢሰቲ ዲጌ ዋዳዳ፤ «ማሻን ሃይቂዳይታራኔ
ኣማኖንታይታራ ኢሲ ቦላ ኢቺዳ» ጋና።

22 «አሶሬይ ባ ኩሜላ ኦላንቻታራ ዳወስ፤ ኢዚፔ ማሻን
ኩንዲዳይታኔ ሲፌቲዳይታ ዲፎን ዶዴታ ኡታዱስ።

23 ኢሰታ ዲፎይ ጨማ ኦላ ጊዶን ዴስ፤ ኢዚ ኦላንቻቲ ኢዚ
ዲፎ ዩሾን ኮሬቲዳ፤ ፓጻ ዲዛይታ ቢታን ሺሮ ዴንሉዳይቲ ኡባይ
ሹኬቲዳ፤ ማሻንካ ወሪዳ።

24 «ኤላማ ሄን ዳወስ፤ ኢዚ ኦላንቻቲ ኡባይ ኢዚ ዲፎ ዩዪ
አዲ ዴቴስ፤ ኡባቲካ ሹኬቲዳ፤ ማሻንካ ሃይቂዳ፤ ፓጻ ዲዛይታ

ቢታን ሺሮ ዴንፊዳ ኡባቲ አማኖንታ ቢታ ጋርስ ጌሊዳ፤ ዴጌ ቢታ ጋርስ ጌሊዳይታራ ኢሲፌ ዬላ ማይኢ ጌሊዳ።

25 ኢዚ ዳፎ ዩሾን ዲዛ ኩሜላ ኦላንቻታራ ሹኬቲዳይታ ጊዶን ሂጻይ ኢዚስ ጊጌቲዳስ። ኢስቲ ኡባይ አማኖንታይታኔ ማሻን ሲፌቲዳይታ፤ ኢስታ ሺሮይ ሸምፖራ ፓጻ ዲዛይታ ቢታን ዋሬኬቲዳ ጊሻስ ዴጌ ዳፎን ጌሊዳይታራ ኢሲ ቦላ ዬላ ማይኢና፤ ሹኬቲዳይታ ጊዶን ኢስቲ ኢቻና።

26 «ሜሽኬይኔ ቱባሌ ዳፎይ ባንታ ኦላንቻታ ዳፎን ዶዴቲ ኡታና፤ ኢስቲ ኡባይካ አማኖንታይታ ጊዲ ኡቲዲ ሸምፖራ ፓጻ ዲዛይታ ቢታን ባ ሺሮ ዴንፊዳዊ ጊሻስ ማሻን ሃይቂዳ።

27 ዳሮ ላይላፌ ካሴ ሃይቂዳ ኦላ ቃራቲ ባንታ ማሻ ቦርኮቲዲ፥ ባንታ ጎንዳሌ ባንታ ቲራ ቦላ ኦይኪዲ፥ ባንታ ኩሜላ ኦላ ሚሽ ኡባራ ዳፎን ጌሊዳይታ ማላ ቦንቾን ሞጌቲቤቴና። ሃ ኦላንቻቲ ሸምፖራ ፓጻ ዲዛይታ ቢታን ዲዛ ዋልቃማ አሳታ ቦላ ሺሮ ዴንፊዳ ጊሻስ ኢስታ ናጋራ ቂጻቲይ ኢስታ ሜቁላ ቦላ ሸምፓና።

28 «ፓሮኔ! ኔኒካ ሄሳዶ ሜቃና፤ ማሻን ሲፌቲዳይታራኔ አማኖንታይታራ ኔ ኢሲ ቦላ ኢቻና።

29 «ኤዶማ ሄን ዴኣወስ፤ ኢዚ ካዎቲኔ ኢዞ ሃሪዛይቲ ኡባይ ሄን ዴቴስ፤ ኢስቲ ዋልቃራ ዲዛይታ ጊዲኮካ ማሻን ሲፌቲዳይታራ፥ ዴጌ ዳፎን ጌሊዳይታራኔ አማኖንታይታራ ኢሲ ቦላ ኢቺዳ።

30 «ፑዴሃ ባጋ ሃሪዛይቲኔ ሲዶናቲ ኡባይ ሄን ዴቴስ፤ ሃይሳፌ ካሴ ኢስቲ ባ ዋልቃን አማኔቲዲ ሺሮ ዴንፊዳይታ ጊዲኮካ ሹኬቲዳይታራ ኢሲፌ ዬላን ኩንዲዳ፤ ማሻን ሲፌቲዳይታ አማኖንታይታራኔ ዴጌ ዳፎን ዋጲዳይታራ ኢሲፌ ዬላ ማይኢ ኢቻና።

31 «ፓሮኔይኔ ኢዛ ኦላንቻቲ ኡባይ ኢስታ ቤኣና፤ ማሻን ሲፌቲዳ ባ ኦላንቻታ ኡባ ካዮፔ ኢዚ ሚኔታና።

32 ታኒ ሃይሳፌ ካሴ ካዎቴላቲ ኡባይ ጊብጼ ካዎስ ያያና ማላ ሸምፖራ ፓጻ ዲዛይታ ቢታን ሺሮይ ኣካና ማላ ኮይኮካ ፓሮኔይኔ ኢዛ ኦላንቻቲ ኡባይ ማሻን ሲፌቲዳይታራኔ አማኖንታይታራ ኢሲፌ ኢቻና፤ ታኒ ኡባ ሃሪዛ ጎዳይ ሃይሳ ዮታዲስ» ጊዴስ።

33

ዎሼስ ሂዘቁላ ሹማቴስ

¹ ጎዳ ቃላይ ታኮ ዪዲ፥

² «ሃይሶ አሳ ናዉ! ኔ ዳሬ አሳስ የታ፤ ኔኒ ኢስታስ፥ ታኒ ቢታ ቦላ ማሻ ኤሂሺን ሄ ዳሬ አሳይ አሳ ጊደፌ ዎሼ አስ ዶሪዲ ዎሊኮ፥

³ ኢዚካ ቢታይ ቦላ ማሻይ ዪሺን ቤኢዲ ዳራ ሚንሳ ኤሪሳናስ ዛዬ ፑኒኮ፥

⁴ ሄሳፌ ጉዬ ኦኒካ ዛዬዛ ሲዪዲ ናጌቶንታ አገኮ፥ ማሻዚ ዪዲ ኢዛ ሽምፖ ጳይሲኮ፥ ሱላ አጮይ ኢዛ ቦላ ዳኤስ።

⁵ ዛዬዛ ሲዪዲ ናጌቶንታ አገኮ ኢዛ ሱላይ ኢዛ ቦላ ጊዳና፤ ኢዚ ናጌቲዳኮ ባና አሻና

⁶ ጊዶ አቲን ዎሼ አዳዚ ማሻይ ዪዛይሳ ቤኢዲ ዳራ ኤሪሳናስ ዛዬ ፑኖንታ አገኮ ኢስታ ጊደፌ ኢሲ አሳ ሽምፖ ማሻይ ዎጲኮ ኢዛዳይ ባ ናጋራ ጊሻስ ሃይቃና፤ ጊዶ አቲን ኢዛ ሱላ ጊሻስ ዎሼ አዳዚ ኦይሼታና ማላ ታኒ ኦላና) ጋ የታ።

⁷ «ሃይሶ አሳ ናዉ! ታኒ ኔና ኢስራኤሌ ኬላስ ዎሼ አስ ሂስታ ዶሪዲስ፤ ሄሳ ጊሻስ ታ ኔስ የቲዛ ቃላ ሲያ፤ ታ ሴራካ ኢስታ ኤሪሳ።

⁸ ታኒ ኢታዛ፥ «ሃይሶ ኢታዞ፥ ኔኒ ቱማፔ ሃይቃና) ታኒ ጊዳ ዎዴ፥ ኢዚ ባ ኦጌፔ ሲማና ማላ ኔ ኦላንታ አገኮ ሄ ኢታ አዳዚ ባ ናጋራን ሃይቃና፤ ኔኒ ጊዲኮ ኢዛ ሱላ ጊሻስ ኦይሼታና።

⁹ ጊዶ አቲን ኢታ አሲ ባ ኦጌፔ ሲማና ማላ ኔ የቲን ኢጲኮ ኢዚ ባ ናጋራን ሃይቃና፤ ኔኒ ጊዲኮ ኔ ሽምፖ አሻና።

ጎዳ ሱሬ ፒርዳ

¹⁰ «ሃይሶ አሳ ናዉ! ኢስራኤሌ አሳስ ኢንቲ፥ ሱ ናጋራይኔ ኑ ቆሆይ ኑና ዳጲዳስ፤ ሄሳፌ ዳንዲዳይሳን ኑኒ ጳያና ጎስ፤ ሂስቲን ኑኒ ዋኒ ዳና ዳንዲዳይዚ?) ጌታ።

¹¹ ኔኒ ኢስታስ ኡባ ሃሪዛ ጎዳይ፥ ታኒ ታ ዳኦን ጫቃይስ፤ ኢስቲ ባ ኦጌፔ ሲሚዲ ሽምፖራ ፓጳ ዳና ማላ አቲን ኢታ አሳታ ሃይቆን ታ ኡፋዬቲኬ፤ ሲሚቲ! ኢንቲ ኢታ ኦጌፔ ሲሚቲ! ኢስራኤሌ ኬላ አሳቶ አይስ ሃይቁቲ?) ጋዳ የታ።

¹² «ሃይሶ አሳ ናዉ! ሃኢካ ኔ ዳሬ አሳታስ፥ (ጲሎ አሲ አዛዛ ሚንሳዛ ዎዴ ኢዛስ ካሴ ጲሎቲላይ ኢዛ አሸና፤ ናጋራንቻይ ባ ናጋራፔ ሲሚኮ ኢዚ ካሴ ናጋራፔ ዳንዲዳይሳን ጳዬና። ጲሎ

እሲ ናጋራ ኦሊኮ ኢዚ ካሴ ጸሎቴላፌ ዴንዲዳይሳን ሽምጉራ ፓጻ ዳና ጋ ዮታ።

13 ጸሎ እሰ ቱማፔ ኔኒ ሽምጉራ ፓጻ ዳና ጊን ኢዚካ ባ ጸሎቴላን ኣማኔቲዲ ኢታ ኦሊኮ ኢዚ ጸሎ ኦሶታፔ ኢሶይካ ቆፌቲና፤ ኢዚካ ባ ናጋራ ጋሶን ሃይቃና።

14 ቃሴ ኢታ እሰ ኔ ቱማፔ ሃይቃና ጊኮ፥ ኢዚ ባ ናጋራፔ ሲሚዲ ሱሬኔ ሊኬ ጊዲዳ ሚሽ ኦሊኮ፥

15 ኢዚ ታልኢዳይሳስ ኦይሶ ኤኪዳይሳ ዛሪኮ፥ ባ ካይሲዳይሳ ዛሪ ኢሚኮ፥ ዴኦ ኢሚዛ ኣዛዘታ ኢዚ ካሊኮ፥ ኢታ ሚሽካ ኢዚ ኦሶንታ ኣጊኮ ቱማፔ ኢዚ ዴኦን ዳና ኣቲን ሃይቆና።

16 ኢዚ ኦሊዳ ናጋራፔ ኢሶይካ ቆፌቲና፤ ኢዚ ሱሬኔ ሊኬ ጊዲዳ ሚሽ ኦሊዳ ጊሻሰ ቱማፔ ሽምጉራ ፓጻ ዳና።

17 «ሂሳላ ሃንኮካ ኔ ዴሬ ኣሳይ፥ ሳዳ ኦጌይ ሱሬ ዴና ጌሰ፤ ጊዶ ኣቲን ሱሬ ጊዶንታይ ኢሰታ ኦጌ።

18 ጸሎ እሲ ባ ጸሎቴላ ኦሶ ኣጊዲ ኢታ ሚሽ ኦሊኮ ኢዚ ባ ናጋራን ሃይቃና።

19 ጊዶ ኣቲን ኢታ እሲ ባ ኢታቴላ ኦሶፔ ሲሚዲ ሱሬኔ ሊኬ ሚሽ ኢዚ ኦሊኮ፥ ኢዚ ሂሳ ኦሊዳ ጊሻሰ ሽምጉራ ፓጻ ዳና።

20 ኢንቴኖ ኢሰራኤሌ ኬላ ኣሳቶ ኢንቴ፥ ሳዳ ኦጌይ ሊኬ ዴና ጌታ፤ ጊዶ ኣቲን ኢሳ ኢሳ ቦላ ኢንቴ ኦጌ ማላ ታ ፒርዳና» ጊዴሰ።

ዩሩሳላሜ ኩንዴላ

21 ኮኒ ዲኤቲዳ ታማኔ ናምኣንሶ ላይላን፥ ታማንሶ ኣጊናን፥ ኢቻሻንሶ ጋላሳን፥ ዩሩሳላሜፔ ኬሲ ኤኪ ዩዳ ኢሲ ኣሲ ካታማይ ኩንዲዳይሳ ታሰ ዮቲዴሰ።

22 ሄ ቢታኔይ ያናፔ ሲንላ ጋላሳ ኦማርሳ ዋዴ ጎዳ ኩሼይ ታ ቦላ ሽምፒዲ ታ ዶና ዶይዴሰ፤ ዋንቴላ ጋላሰ ማላዶ ኣዴዚ ታኮ ጋኪዳ ማላ ታ ሃሳያና ዳንዲያዲሰ፤ ሂሳፌ ጉዬ ጮኡ ጋቤኬ።

23 ሂሳፌ ጉዬ ጎዳ ቃላይ ታኮ ዩዲ፥

24 «ሃይሶ ኣሳ ናዉ! ኢሰራኤሌ ቢታን ላሌቲ ዲዛ ኣሳቲ፥ ሓብራሃማይ ባርካ ዲዛ ኢሲ ኣሰ ጊዲኮካ ቢታዮ ላቲዴሰ፤ ኮኒ ጊዲኮ ጮራ፤ ቱማፔ ቢታያ ኮሰ ጸንጾ ጊዳ ኢሜታዲሰ» ጌቴሰ።

25 ሂሳ ጊሻሰ ኔኒ ኢሰታሰ ኡባ ሃሪዛ ጎዳይ፥ ሓሾዛ ሱላራ ጋሊ ሜታ፤ ኢንቴ ኣይፌታካ ኢንቴ ኤቃ ጸሳታኮ ዴንፊታ፤ ሽምጉ ዋዴታ። ሂሰቲን ሂሳ ማላ ሃኖን ቢታዮ ላታና ቆፔቲ?

26 አንቲ አንቲ ማሻን አማኔታ፤ አንቲ ሃራሲዛ ሚሻታ ኦፊታ፤ አንቲ አሶይ አሶይ አንቲ ላጌታ ማቼታ ቱኒሴታ። ሂሰቲን አንቲ ሃይሳ ማላ ሃኖን ቢታዮ ላታና ቤሲዜ? ጌስ።

27 «ኔ አስታስ ኡባ ሃሪዛ ጎዳይ፥ ታኒ ዴኦ ጸሰ ጊዲዳይሳን ጫቃይስ፤ ላሌቲሼ ኣቲዳይቲ ማሻን ወራና፤ ጋጾን ዲዛይታ ፑዜሪሊ ማና ማላ ታኒ ዋራ ዶኣታስ ኣላ ኢማና፤ ሚኖ ሚጸኒኔ ጎንጎሎ ጊዶን ዲዛይቲ ኢታ ሃርጌን ሃይቃና።

28 ታኒ ቢታዮ ቡላኔ ኣሲ ባይንዳ ካይስ ኬሳና፤ ኢዛ ጨቁቲዛ ዋልቃይ ኢዚፔ ወራና፤ ኢስራኤል ዙማቲ ኦኒካ ኢዛራ ካንላ ቦንታ ማላ ቡላ ጊዳና።

29 ኢስቲ ኦፊዳ ሃራሲዛ ኦሶፔ ዴንዲዳይሳን ታኒ ቢታዮ ቡላኔ ኣሲ ባይንዳ ካይስ ሂሰቲሺን ታኒ ጎዳ ጊዲዳይሳ ኢስቲ ሄ ዋዴ ኤራና? ጌስ።

30 «ሃይሶ ኣሳ ናወ! ኔ ጊሻስ ኔ ዴሬ ኣሳይ ኬላ ፔንጌን ፔንጌኒኔ ጎዳ ጸጸን አሶይ አሳራ ሃሳዬታና፤ አሶይ አሳራ ሃሳዬቲሹ፥ ሓኔ ሃ ዩቲ፤ ጎዳፔ ዩዳ ኪታ ሲዮስ? ጌቲስ።

31 ኡባ ጋላስ ኢስቲ ኦፊዛ ማላ ታ ዴሬይ ኔኮ ያና፤ ኔ ቃላ ሲያናስ ኢስቲ ኔ ሲንሳን ኡታና፤ ጊዶ ኣቲን ሲዩዳይሳ ፖሌቲና። ባንታ ሜቲርሻን ዳሮ ሲቆ ቆንጨሴቲስ፤ ጊዶ ኣቲን ኢስታ ዋዚናይ ቤሶንታ ጎኣን ሽምፔዴስ።

32 ኢስቲ ኔ ቃላ ሲዩዲ ኦሶን ፔይሻንታይታ ጊዲዳ ጊሻስ፥ ኔኒ ኢስታስ ሎኦ ቃናን ሲቆ ማዛሙሬ ዩጸዛኔ ዩላ ማሳራን ሎኤሊ ካኢዛ ዩላንቻ ጊዳዳሳ።

33 «ሃይሲ ኡባይ ቱማፔ ፖሌታና፤ ኢስታ ጊዶን ናቤይ ዲዛይሳ ኢስቲ ሄ ዋዴ ኤራና» ጊዴስ።

34

ኢስራኤል ሄንሳንቻታ

1 ጎዳ ቃላይ ታኮ ዩዲ፥

2 «ሃይሶ ኣሳ ናወ! ኢስራኤል ሄንሳንቻታ ቦላ ቲንቢቲ ዮታ፤ ቲንቢቲ ዮታሹ፥ ሓባ ሃሪዛ ጎዳይ፥ ባና ጸላ ጸሊዛ ኢስራኤል ሄንሳንቻታስ ኣዬ ኣና! ሄንሳንቻቲ ወዴዛ ሄማናስ ቤሴኔ?

3 አንቲ ማላ ኡዬታ፤ ኢዛ ኢስኬፌ ዳዴቲዳ ሱፌዛ ማይኤታ፤ ዋዲዳይታ ሹኪ ሜታ ሺን ወዴዛ ጸሊኬታ።

4 ደቡርዳይታ ሚንሌሊቤኬታ፤ ሃርጊዳይታ ዳሊቤኬታ፤ ሜቂዳይታ ኮሊቤኬታ፤ ቶይላቲዳይታ ዛሪቤኬታ፤ ዳይዳይታ ኮዩቤኬታ። አንቲ ኢስታ ጌኔኒኔ ሜንጾ ኢታቲላን ሃሪዴታ።

5 ወዴቲ ሄንላንቻይ ባይንዳ ገሻስ ላሌቲዳ፤ ላሌቲዳይቲ ዎራ ደኣታስ ቁማ ጊዲዳ።

6 ታ ወዴቲ ዙማታ ቦላኔ ዙምቡላታ ኡባ ቦላ ቶይላቲዳ። ቢታ ጋዴ ጋካናስ ላሌቲዳ፤ ጊዶ ኣቲን ኢስታ ጾሞሲዳይ ዎይኮ ኮዪዳይ ዴና። ጋ።

7 «ሄሳ ገሻስ ኢንቴኖ፡ ሄንላንቻቶ፡ ጎዳ ቃላ ሲዪቴ!

8 ኡባ ሃሪዛ ጎዳይ፡ ታኒ ዴኦ ጸስ ገዲዳይሳን ጫቃይስ!» ጌስ፤ ታ ሄንላንቻቲ ታ ወዴዛ ኮኖንታ ገሻስኔ ታ ወዴዛፔ ኣሊዲ ባንታና ጸሊዛ ገሻስ ታ ወዴይ ሄንላንቻይ ጳዪን ቦንቄቲዴስኔ ደኣ ኡባስ ቁማ ጊዲዳ።

9 ሄሳ ገሻስ ሄንላንቻቶ፡ ጎዳ ቃላ ሲዪቴ!

10 ኡባ ሃሪዛ ጎዳይ፡ ታኒ ታ ሄንላንቻታ ቦላ ዴንዳዲስ፤ ታ ወዴታ ገሻስ ታ ኢስታ ኦይቻና፤ ሃይሳፌ ጉዬ ሄንላንቻቲ ባንታና ጸሎንታ ማላኔ ታ ወዴዛ ሄሞንታ ማላ ኦላና፤ ኢስታ ዶናፔ ታኒ ታ ወዴዛ ዩጊሳና። ሃይሳፌ ጉዬ ኢስታስ ቁማ ጊዴቴና። ጌስ።

ሎኦ ሄንላንቻ

11 «ኡባ ሃሪዛ ጎዳይ፡ ታኒ ታርካ ታ ወዴታ ኮያና፤ ታ ኢስታ ናጋና።

12 ሄንላንቻይ ባ ወዴታራ ዲሼ ላሌቲዳ ወዴታ ኮይዛ ማላ ታኒካ ታ ወዴታ ኮያና፤ ሻራ ጋላስኔ ጴማ ጋላስ ኢስቲ ላሌቲዳሶ ኡባፌ ታ ኢስታ ሺሻና።

13 ካዎቴላታ ጊዶፌ ታ ኢስታ ኬሳና፤ ዴሬይ ዲዛሶፔ ታ ኢስታ ሺሻና፤ ታ ኢስታ ኢስታ ቢታ ዛራ ኤሃና፤ ኢስራኤሌ ዙማታ ቦላ፡ ሻፋታ ላንቄኒኔ ቢታይ ቦላ ዲሳሶ ኡባን ታ ኢስታ ሄማና።

14 ታኒ ኢስታ ሎኦ ቆርን ሄማና፤ ጶቃ ኢስራኤሌ ዙማቲ ኢስቲ ሄማቲዛሶሆ ጊዳና፤ ሎኦ ቆርይ ዲዛ ማታን ኢስቲ ኢቻና፤ ሄን ኢስራኤሌ ዙማታ ቦላ ጨለላሶን ኢስቲ ሄማታና።

15 ታኒ ታርካ ታ ወዴታ ሄማናኔ ሸምፒሳና።

16 ታኒ ጳይዳይሳ ኮያና፤ ቶይላቲዳይሳካ ዛራና፤ ማቂዳይሳ ኮላና፤ ዳቡርዳይሳካ ሚንፊላና። ጊዶ ኣቲን ታኒ ሞጲዳይታኔ ሚኒዳይታ ጳይሳና፤ ወዴዛ ዎጋራ ሄማና።

17 « ኡባ ሃሪዛ ጎዳይ፡ ኢንቴ ኢዛ ወዴ ገዲዳ ገሻስ፡ ኢዚ ኢንቴ ገሻስ ኢታ ጊዶኒኔ ሎኦ ጊዶን፡ ጳርሾ ጊዶኒኔ ኦርጌ ጊዶን ታ ፒርዳና።

18 ጨለላ ቆሮን አንቴ ሄማቲዛይሲ አንቴስ ጊዴኔ? ሚሺን አቲዳ ማታ አንቴ ዩጴታና ቤሲዜ? አንቴ ጸሎ ሃል ኡዩዛይሲ አንቴስ ጊዴኔ? አቲዳይሳ አንቴ አንቴ ቶሆን ቡልቆሳናስ ቤሲዜ?

19 ታ ወዴቲ አንቴ አንቴ ቶሆን ዩጴቲዳ ማታ ማናሲኔ አንቴ አንቴ ቶሆን ቡልቆሲዳ ሃላ ኡያናስ ቤሲዜ?» ጌሰ።

20 «ሄሳ ጊሻስ ኡባ ሃሪዛ ጎዳይ ኢስታስ፥ <ቤኢቲ፥ ታኒ ታርካ ሞጶ ማሄታሲኔ ጌልቃ ማሄታስ ጊዶን ፒርዳና።

21 ላፋታ አንቴ አንቴ ሃሼኒኔ አንቴ ቡንቃሼን ሱጊዛ ጊሻስ፥ ኢስቲ ጎዴቲ ባና ጋካናስ አንቴ አንቴ ካጨን ኢጨዛ ጊሻስ፥

22 ታኒ ታ ወዴዛ አሻና፤ ሃይሳፌ ጉዬ ኢስታ ቦንቄቴቴና፤ ሎኦ ማሄታ ጊዶኒኔ ኢታ ማሄታ ጊዶን ታ ፒርዳና።

23 ታ ኢስታ ቦላን ኢሲ ሄንፋንቻ ታ አይሌ ዳዊቴ ዋላና፤ ኢዚ ኢስታ ሄማናኔ ኢስታስ ሄንፋንቻ ጊዳና።

24 ታኒ ጎዳይ ኢስታ ጸስ ጊዳና፤ ታ አይሌ ዳዊቴ ኢስታ ጊዶን ሃሪዛይ ጊዳና፤ ታኒ ጎዳይ ሃይሳ ዮታዲስ።

25 « <ታኒ ኢስታራ ሳርቴላ ጫቆ ቃላ ጌላና፤ ሄሳፌ ጉዬ ታኒ ኢስታ ዋራ ዶኦታፔ ሽምፒሳና፤ ኢስቲካ ባዞ ቢታን ሳሮን ዴኦና፤ ዋራ ጊዶንካ ዋፓን ኢቻና።

26 ኢስታ ዩሽኒኔ ታ ዙምቡላታ ዩሾን ዲዛሶሆታ ታ ኣንጃና። ዋዴን ዋዴን ታ ኢስታስ ኢራ ኢማና፤ ኢዚካ ኢስታስ ኣንጃ ኢራ ጊዳና።

27 ጋዴን ዲዛ ሚላቲ አይፌ ኢማና፤ ቢታይካ ካል ሞይዛና፤ አስ ኡባይ ባ ቢታ ቦላ ሳሮን ዳና። ታ ኢስታ ቃምባራ ማንፋዳ ኢስታ አይሌቴላን ሃሪዳይታ ኩሼፔ ዋዚዛ ዋዴ ታኒ ጎዳ ጊዲዳይሳ ኢስቲ ኤራና።

28 ሄሳፌ ጉዬ ሃራ ካዋቴላቲ ኢስታ ቦንቄቴና፤ ዋራ ዶኦቲካ ኢስታ ፑዜቴና፤ ኢስቲ ሳሮን ዳና፤ ኢስታ ባቢሳና ሚሺ ዴና

29 ሄሳፌ ጉዬ ኢስቲ ኮሻቶንታ ማላ፥ ካዋቴላታ ጫሼ ቶኮንታ ማላ አይፌ ኢምን ኤሬቲዳ አራዳ ቢታ ታ ኢስታስ ኢማና።

30 ታኒ ጎዳይ ኢስታ ጸሳይ ኢስታራ ዲዛይሳኔ ኢስራኤሌ ኩል ታ ዴሬ ጊዲዳይሳ ሄ ዋዴ ኢስቲ ኤራና።

31 አንቴ ታ ወዴቲ ታ ሄሚዛ ታ ወዴታ፤ አንቴ ታ አሳ፤ ታኒካ አንቴ ጸሳ፤ ታኒ ኡባ ሃሪዛ ጎዳይ ሃይሳ ዮታዲስ» ጌሰ።

35

ኤዶሜ ቦላ ዮቴቲዳ ቲንቢቲ

1 ጎዳ ቃላይ ታኮ ዩዲ፥

2 «ሃይሶ አሳ ናዉ! ኔ ሲንሐ ሃንቁታሽ ሴይሬ ዙማኮ ዛራ፤
ኢዛሰ ቲንቢቲ ዮታ።

3 ኔኒ ኢዛሰ ኡባ ሃሪዛ ጎዳይ፥ ሳይሶ ሴይሬ ዙማዞ! ታ ኔ
ቦላ ዴንዳዲሰ፤ ታኒ ታ ኩሼ ኔ ቦላ ዴንሳና፤ ኔና ቡላኔ አሲ
ባይንዳሶ ኬሳና።

4 ኔ ካታማታ ታኒ ላላና፤ ኔ ቡላታና። ሄሳፌ ጉዬ ታኒ ጎዳ
ጊዲዳይሳ ኔኒ ኤራና።

5 « ሲሰራኤሌታ ቦላ ጋኪዛ ቂጻቲይ ከሂ ጫሚን ኢሰቲ
ባንታና ጋኪዛ ሜቶዛ ኤኪዛ ዋዴ ኔኒ ቤኒ ላንጨዮ ኦይካ
ኡታዳ ኔ ኢሰታ ማሻሰ ጋላዳሳ።

6 ኡባ ሃሪዛ ጎዳይ ታኒ ዴኦ ጸሰ ጊዲዳይሳን ጫቃይሰ፤ ኔ
ሱሉ ጉካና ማላ ታ ኔና ኢዛሰ አሳ አማና፤ ኢዚካ ኔና ዬዴላና፤
ሱሉ ጉሲዛይሳ ኔ ኢጸንታ ጊሻሰ ሱሉ ጉሲዛይቲ ኔና ዬዴላና።

7 ታኒ ሴይሬ ዙማ ቡላኔ አሲ ባይንዳሶ ኬሳና፤ ኢዚ ቦላ
ፑዴ ኬዚዛይታኔ ዲጌ ዋጲዛይታ ታ ዲጋና።

8 ኔ ዙማታ ታ አሃን ኩንሳና፤ ማሻን ሲፌቲዳይቲ ኡባይ ኔ
ዙማታን፥ ኔ ዙሉታኒኔ ኔ ሃሉ ጎጊዛሶ ኡባን ኩንዳና።

9 ታ ኔና ሜርናሰ ቡላ ሂሰታና፤ ኔ ካታማቲ ዲሳሶ ጊዴቲና፤
ሄሳፌ ጉዬ ታኒ ጎዳ ጊዲዳይሳ ኢንቲ ኤራና፤ ጌሰ ጋ።

10 «ታኒ ጎዳይ ሄን ዲሺን ኢንቲ፥ ሳይቲ ናምኡ ካዋቲላቲኔ
ናምኡ ዴሬቲ ኑሰ ጊዳና፤ ኑኒካ ኢሰታ ላታና፤ ጊዴታ።

11 ሄሳ ጊሻሰ ኡባ ሃሪዛ ጎዳይ ታኒ ዴኦ ጸሰ ጊዲዳይሳን
ጫቃይሰ፤ ኢንቲ ኢሰታ ኢጸዛ ጋሶን፥ ኢንቲ ኢሰታ ቦላ ቆንጨሲዳ
ሃንቆኔ ቃናቲ ከና ታ ኢንቲ ቦላ ፒርዳና፤ ታ ኢንቲ ቦላ ፒርዲዛ
ዋዴ ታናቲላይ ኢሰታ ጊዶን ኤሬታና ማላ ታ ኦላና።

12 ሄሳፌ ጉዬ ኢሰራኤሌ ዙማታ ጊሻሰ ኔኒ፥ ሲሰቲ አሲ
ባይንዳሶ ጊዲዳ፤ ኑ ኢሰታ ማና ማላ ኑሰ አማቲዳ፤ ጋዳ ኔ
ካጴን ዮቲዳይሳ ታኒ ጎዳይ ሲዩዳይሳ ኔኒ ሄ ዋዴ ኤራና።

13 ኔኒ ታ ቦላ ኦቶሬታዳሳኔ ጸላቲላን ሃሳያዳሳ፤ ታኒካ ሄሳ
ሲያዲሰ።

14 «ኡባ ሃሪዛ ጎዳይ፥ ሳሙዳ ቢታይ ኡፋዬቲዛ ዋዴ ታ ኔና
ቡላሳና።

15 ኢሰራኤሌ ከላ ጸንጾይ ቡላ ጊዲዳ ዋዴ ኔ ኡፋዬቲዳ
ጊሻሰ ታኒካ ኔ ቦላ ሄሳሎ ኦላና፤ ሃይሶ ሴይሬ ዙማዞ! ኔኒኔ
ኩማላ ኤዴሜይ ቡላታና፤ ሄሳፌ ጉዬ ታኒ ጎዳ ጊዲዳይሳ ኢሰቲ
ኤራና፤ ጌሰ» ጊዴሰ።

36

ኢስራኤል ዙማታ አንጃቴል

¹ ጎዳይ፥ «ሃይሶ አሳ ናዉ! ኢስራኤል ዙማታስ ቲንቢቲ ዮታ፤ ኢስታስ ኔኒ፥ ኢስራኤል ዙማቶ! ጎዳ ቃላ ሲዪቴ!

² ኡባ ሃሪዛ ጎዳይ፥ ኔ ጊሻስ ሞርኬቲ ቤኢቴ! ሃይቲ ቤኒ ዙማቲ ኩስ ጸንጾ ጊዲዳ፥ ጊዳ፤

³ ሄሳ ጊሻስ ኔኒ ቲንቢቲ ዮታ፤ ኡባ ሃሪዛ ጎዳይ፥ ኡባ ባጋራ ዶዲዲ ኦሊሼ አንቴና ቆሂዳ ጊሻስ ሃንኮ አቲዳ ካዎቴላታስ አንቴ ጸንጾ ጊዲዳታ፤ ዳሬታሲካ ሚቻሲኔ ቂዴሰ ጊዲዳታ፥ ጌስ ጋ።

⁴ ሄሳ ጊሻስ ኢስራኤል ዙማቶ! ኡባ ሃሪዛ ጎዳ ቃላ ሲዪቴ! ኡባ ሃሪዛ ጎዳይ ዙማታሲኔ ዙምቡላታስ፥ ዙሌታሲኔ ሃላ ዛራታስ፥ ላሌቲዲ ቡላቲዳሶታሲኔ አንቴ ዩሾን ዲዛ ሃራ ካዎቴላታን ቦንቄቲዲኔ ቂዴቲዲ ሜላ አቲዳ ካታማታስ፥

⁵ ኡባ ሃሪዛ ጎዳይ፥ ተቴማፔ ኤጲዛ ታ ቃናቴቴላን አቲዳ ዳሬታ ኡባ ቦላኔ ኤዶሜ ኡባ ቦላ ሃሳያዲስ። ኢስቲ ዎዚናፔ ኡፋዬቲሼኔ ካዴን ኩሚዲ ታ ሄሚዛ ቢታ ኦይኪዲ ቦንቄ ኤካናስ ባስ ጸንጾ ኦሊዳ፥ ጌስ።

⁶ ሄሳ ጊሻስ ኢስራኤል ቢታ ጊሻስ ኔኒ ቲንቢቲ ዮታ። ዙማታስ፥ ዙምቡላታስ፥ ዙሌታሲኔ ሃላ ዛራታስ ኡባ ሃሪዛ ጎዳይ፥ ኢንቴ ካዎቴላታ ቂዴን አንቴ ኩሚዳ ጊሻስ፥ ሃንቆን ኩሚዳ ታ ቃናቴን ዮታይስ፥ ጌስ።

⁷ ሄሳ ጊሻስ ኡባ ሃሪዛ ጎዳይ፥ ተኒ ታ ኩሼ ዳንላዳ ጫቃይስ፤ አንቴ ዩሾን ዲዛ ካዎቴላታ ቦላ ናቻ ቃላይ ያና፥ ጌስ።

⁸ «ኢስራኤል ዙማቶ፥ አንቴ ጊዲኮ ታ ዳሬ ኢስራኤሌስ ሃጋ ኬሳና፤ ኢስቲ ማታ ዎዳ ባንታ ዳሬ ሲሚዛ ጊሻስ አይፊካ ኢስታስ አይፋና።

⁹ አንቴ ጊሻስ ታስ ሲዬቴስ፤ ታ አንቴና ሎኦ አይፊን ጸላና፤ አንቴካ ጎዬታና፤ ዜሬሊካ አንቴ ቦላ ዜሬታና።

¹⁰ ኢስራኤል ኬል ኩሚል አቶንታ ታ አንቴ አሳ ቆዳ ዳርሳና፤ ካታማቲ አሳ ዱሳሶ ጊዳና፤ ላሌቲዳሶቲ ሲሚ ገምቤታና።

¹¹ ታኒ አንቴ ቦላ አሳ ቆዳኔ ሜሄታ ቆዳ ጉጃና፤ ኢስቲ ዩሌታናኔ ፎራታና፤ ቤኒሳ ማላካ አንቴ ቦላ አሳይ ዳና ማላ ታኒ ኦላና፤ ታኒ አንቴና ካሴፔ አላ ዱሬሳና፤ ሃሳፌ ጉዬ ታኒ ጎዳ ጊዲዳይሳ አንቴ ኤራና።

12 ታ ዴሬ ኢሰራኤል አሳይ አንቴናን ሲሜሬታና ማላ ታ ኦላና፤ ኢስቲ አንቴና ላታና፤ አንቴካ ኢስታስ ጸንጾ ጊዳና፤ ሃይሳፌ ጉዬ አንቴ ኢስታ ዩሎይ ባይንዳይታ ኦፊኬታ።

13 «ኡባ ሃሪዛ ጎዳይ፡ ዴሬዚ አንቴና፤ ሳቢታያ ኣስ ፑዜሬላ ማና፤ ካዎቴላካ ናይ ባይንዳዝ ሂስታና» ጊዳ።

14 ሄሳ ጊሻስ ሃይሳፌ ጉዬ ቢታያ ኣስ ሙኩ፤ ካዎቴላካ ናይ ባይንዳዝ ሂስቲኬ።

15 ሃይሳፌ ጉዬ ታ ኔና ካዎቴላታ ናቕ ሲሲኬ፤ ኔ አሳ ጫሻን ሜቶታካ፤ ኔኒ ካዎቴላታስካ ቆጶ ጊዳካ ጌስ» ጊዴስ።

16 ቃሴካ ጎዳ ቃላይ ታኮ ዩዲ፤

17 «ሃይሶ አሳ ናዉ! ኢሰራኤል አሳይ ባንታ ቢታን ዲዛ ዎዴ ባንታ ኦሶኒኔ ባንታ ዱሳን ቢታዮ ቱኒሲዳ፤ ማጫሳይ አገና ዎጋይ ዩዛ ዎዴ ቱኒዛ ማላ ኢስታ ካንዶይ ታ ሲንላን ቱና።

18 ኢስቲ ቢታይ ቦላ ሱላ ጉሲዳ ጊሻሴ ባንታ ኤቃ ጸሳታን ቢታ ቱኒሲዳ ጊሻስ ታ ሃንቆ ኢስታ ቦላ ጉሳዲስ።

19 ታኒ ኢስታ ካዎቴላታ ጊዶን ላላዲስ፤ ኢስቲካ ዴሬ ኡባን ላሌቲዳ፤ ታኒ ኢስታ ቦላ ኢስታ ካንዶ ማላኔ ኢስታ ኦሶ ማላ ፒርዳዲስ።

20 ኢስቲ ባ ቢዳ ካዎቴላታ ኡባ ጊዶን ታ ጌሻ ሱንላ ቱኒሲዳ፤ ኢስታ ጊሻስ፡ ሃይቲ ጎዳ ዴሬታ፤ ጊዶ ኣቲን ኢስቲ ኢዛ ዴራ ዩጊ ቢዳ» ጌቲቲዴስ።

21 ኢሰራኤል ኬላይ ባ ቢዳ ካዎቴላታ ኡባ ጊዶን ቱኒሲዳ ታ ጌሻ ሱንላ ጊሻስ ታስ ሴቴቴስ።

22 «ሄሳ ጊሻስ ኢሰራኤል ኬላስ ኡባ ሃሪዛ ጎዳይ፡ ሳንቴኖ ኢሰራኤል ኬላ አሳቶ! ታኒ ሃይሳ ኡባ ኦፊዛይ አንቴ ቢዳ ካዎቴላታ ኡባ ጊዶን ቱኒሲዳ ታ ጌሻ ሱንላ ጊሻሳፌ ኣቲን አንቴ ጊሻስ ጊዴና።

23 አንቴ ኢስታ ማታን ቱኒሲን ካዎቴላታ ጊዶን ቱኒዳ ጊታ ታ ሱንላ ጌሻቴላ ታኒ ቤሳና። ኢስቲ ጴሊሺን አንቴ ባጋራ ታኒ ታ ጌሻቴላ ቆንጪሲዛ ዎዴ ካዎቴላቲ ታኒ ጎዳ ጊዲዳይሳ ኢስቲ ሄ ዎዴ ኤራና። ታኒ ኡባ ሃሪዛ ጎዳይ ሃይሳ ዮታይስ።

24 « ሳንኒ አንቴና ካዎቴላታ ጊዶፌ ኬሳና፤ ዴሬ ኡባፌ ታ ሺሻና። ሂስታዳ አንቴና አንቴ ቢታ ዛራ ኤሃና።

25 ታኒ አንቴና ጸሎ ሃላን ኣራጫና፤ አንቴካ ጌያና፤ ሂስታዳ ታ አንቴና አንቴ ኤቃ ጸሳታ ኡባፌኔ አንቴ ቱናቴላ ኡባፌ ጌሻና።

26 ታኒ ኢንቴስ ኦራፋ ወዚና ኢማና፤ ኦራፋ ኣያናካ ኢንቴ ጊደን ታ ኣይሳና፤ ቃሴ ሹቻ ወዚና ኢንቴ ጊደፌ ኬሳዳ ኣሾ ወዚና ኢማና።

27 ታኒ ታ ኣያና ኢንቴ ጊደን ኣይሳና፤ ኢንቴ ታ ማራ ካላና ማላኔ ታ ዋጋ ሚንሒ ናጋና ማላ ኦላና።

28 ታኒ ካሴ ኢንቴ ኣዋታሰ ኢሚዳ ቢታን ኢንቴ ዳና፤ ኢንቴ ታ ዴሬ ጊዳና፤ ታኒካ ኢንቴ ጸሳ ጊዳና።

29 ኢንቴ ቱናቴፋፌ ታ ኢንቴና ጌሻና፤ ካፋ ታ ሙሩቲሳናኔ ዳርሳና፤ ኮሻካ ኢንቴ ቦላ ኤሂኬ።

30 ኮሻ ጋሶን ኢንቴ ካዎቴፋታ ጊደን ኢንቴ ካወደዲ ዬላቶንታ ማላ ሚፋ ኣይፌኔ ካል ታ ኢንቴስ ዳርሳና።

31 ሄ ዎዴ ኢንቴ ኢንቴ ኢታ ኦጌኔ ቱኒዳ ኢንቴ ኦሶታ ኢንቴ ኣኬካና፤ ኢንቴ ናጋራ ጌሻሲኔ ሃራሲዛ ኢንቴ ኦሶታ ጌሻሰ ኢንቴርካ ኢንቴ ኢንቴና ባሻሼታና።

32 ታኒ ሃይሳ ኦሒዛይ ኢንቴ ጌሻሰ ጊደንታይሳ ኤሪቴ፤ ኢንቴኖ ኢሰራኤሌ ኣሳቶ! ኢንቴ ኢንቴ ኦሶን ዬላቲቴኔ ባሻሼቲቴ፤ ታኒ ኡባ ሃሪዛ ጎዳይ ሃይሳ ዮታይሰን ጌሰ።

33 «ኡባ ሃሪዛ ጎዳይ፡ ታኒ ኢንቴና ኢንቴ ናጋራ ኡባፌ ጌሺዛ ጋላሰ ኢንቴ ካታማቲ ሲሚዲ ኣሳ ዱሳሶ ጊዳና፤ ቡጼቲዳይቲ ሲሚዲ ገምቤታና።

34 ቢዛኔ ዪዛ ኣሳ ኣይፌን ኣሲ ባይንዳሶ ጊዲ ቤቲዛ ቡላ ቢታይ ጎዬታና።

35 ኢሰቲ ሃይሲ ኣሲ ባይንዳሶዚ ኤዴኔ ጋናቲ ሚሳቲዴሰ፤ ጳይዳ፡ ላሌቲዳኔ ቡላቲዳ ካታማቲ ኣሳ ዱሳሶኔ ገምቤቲዳሶ ጊዲዳ ጋና።

36 ሄሳፌ ጉዬ ካሴ ኢንቴ ዩሾን ኣቲዳ ካዎቴፋቲ ካሴ ቡጼቲዳ ካታማታ ዛራ ኬዲዳይ፡ ኣሲ ባይንዳሶታ ጨሊሊሲዳይ ታና ጎዳ ጊዲዳይሳ ኢሰቲ ሄ ዎዴ ኤራና። ታኒ ጎዳይ ሃይሳ ዮታይሰ፤ ታኒ ዮቲዳይሳካ ታ ፖላና፤ ጌሰ።

37 «ኡባ ሃሪዛ ጎዳይ፡ ቃሴካ ኢሰራኤሌ ኣሳ ዎሳ ታ ኤሮ ጋ ሲያና፤ ኢዛካ ታ ኢሰታሰ ፖላና፤ ሂሰታዳ ኢሰታ ቆዳ ዉዴ ማላ ጮራሳና።

38 ዬሩሳላሜን ባኣሌ ጋላሰ ያርሼታና ሸቂዛ ሜሄ ማላ ታ ዳርሳና፤ ቤኢቲ ካሴ ላሌቲዳ ካታማቲ ዳሮ ኣሳሰ ዱሳሶ ጊዳና፤ ሄሳፌ ጉዬ ታኒ ጎዳ ጊዲዳይሳ ኢሰቲ ሄ ዎዴ ኤራና፤ ጌሰ» ጊዴሰ።

37

ሚላ ሜቄላቲ ዲዛ ሾባ

1 ጎዳ ኩሼይ ታ ቦላ ዴስ፤ ኢዚካ ታና ጎዳ ኢያናን ኬሲዴስ፤ ሚቄላቲ ኩሚ ኡቲዳ ሾባን ታና ዋሊዴስ።

2 ኢዚ ታና ሄን ዩሺ ቤሲዴስ፤ ታኒካ ኬሂ ሺኝ ጊ ሚሊዳ ዳሮ ሚቄላቲ ኩሚዳይታ ሾባ ጊዶን ቤኣዲስ።

3 ኢዚ ታና፡ «ሃይሶ ኣሳ ናዉ! ሃ ሚቄላቲ ሲሚዲ ሸምፖራ ፓጻ ዳናስ ዳንዳይዞ?» ጊዴስ። ታኒካ፡ «ኡባ ሃሪዛ ጎዳዉ፡ ሄሳ ኔ ጸላ ኤራሳ» ጋዲስ።

4 ሂስቲን ኢዚ ታና፡ «ሃይታ ሃ ሚቄላታስ ቲንቢቲ ዮታ፤ ለንቴኖ ሚላ ሚቄላቶ፡ ጎዳ ቃላ ሲዩቴ!

5 ኡባ ሃሪዛ ጎዳይ ሃይታ ሃ ሚቄላታስ ፔኖ ታ ኢማና፤ ኢንቴኒካ ሸምፖራ ፓጻ ዳና።

6 ታ ኢንቴ ቦላ ሻያታ ዋላዳ፡ ኣሾይካ ኢንቴ ቦላ ሲማና ማላ ኦላዳ፡ ኢንቴስ ሻያ ኢማና፤ ታ ኢንቴና ኣሾ ማይዛና፤ ቦላራካ ጋልባን ካማና፤ ኢንቴ ጊዶ ፔኖ ጌልላና፤ ኢንቴካ ሸምፖራ ፓጻ ዳና፤ ሄሳፌ ጉዬ ታኒ ጎዳ ጊዲዳይሳ ኢንቴ ኤራናን ጋ» ጊዴስ።

7 ሄሳ ጊሻስ ታኒ ኣዛዜቲዳ ማላ ቲንቢቲ ዮታዲስ፤ ታኒ ቲንቢቲ ዮቲሺን ሳሱኬቴላ ጊሪሲ ሴቴቲዴስ፤ ሚቄላቲ ኢሳይ ኢሳራ ኦይኬቲዳ።

8 ታ ጴሊሺን ኢስታ ቦላን ሻያይ ዴስ፤ ሻያ ቦላ ኣሾይ ዴስ፤ ኣሾዛ ቦላ ጋልባይ ካሚ ኦይኬዴስ፤ ጊዶ ኣቲን ሸምፖይ ኢስታን ባዋ።

9 ሄሳፌ ጉዬ ኢዚ ታና፡ «ሃይሶ ኣሳ ናዉ! ጫርኮስ ቲንቢቲ ዮታ፤ ኡባ ሃሪዛ ጎዳይ፡ ጫርኮዞ፡ ኦይዱ ባጋ ጫርኮታፔ ሃያ፤ ሃይቲ ሃይቂዳይቲ ሸምፖራ ፓጻ ዳና ማላ ኢስታ ቦላ ኡፋ ጋ ፑናን ጌስ» ጊዴስ።

10 ሄሳ ጊሻስ ኢዚ ታና ኣዛዚዳ ማላ ቲንቢቲ ዮታዲስ፤ ፔኖይካ ኢስታ ጊዶ ጌሊዴስ፤ ኢስቲካ ፓጺዳ፤ ኬሂፔ ዳሮ ኦላንቻታ ጊዲዲ ኤቂዳ።

11 ሄሳፌ ጉዬ ኢዚ ታስ፡ «ሃይሶ ኣሳ ናዉ! ሃይቲ ሚቄላቲ ኩሚላ ኢስራኤሌ ኣሳ ሊሚሶ፤ ኢስቲካ፡ ሓ ሚቄላቲ ሚሊዳ፤ ኑስ ሂዶታይ ባዋ፤ ኑ ዱጺ ኣቲዶስ» ጌቴስ።

12 ሄሳ ገሻሰ ኢስታሰ ኡባ ሃሪዛ ጎዳይ፥ ታኒ ዴሬዞ! ታኒ ኢንቴ ዴሬ ዶያና፤ ኢስታ ጊዶፌ ታ ኢንቴና ኬሳና፤ ኢሰራኤሌ ቢታካ ታ ኢንቴና ዛራ ኤሃና።

13 ሄሳፌ ጉዬ ታ ዴሬቶ፥ ታኒ ኢንቴ ዴሬ ዶያዳ ኢንቴና ኬሲዛ ዎዴ ኢንቴ ታኒ ጎዳ ጊዲዲይሳ ኤራና።

14 ታኒ ታ ኣያና ኢንቴ ጊዶን ዎላና፤ ኢንቴካ ሸምፖራ ፓጾ ዳና፤ ታ ኢንቴና ኢንቴ ቢታን ዎላና፤ ሄሳፌ ጉዬ ታኒ ጎዳይ ዮቲዳ ማላ ኦሊዲይሳ ኢንቴ ኤራና፤ ታኒ ጎዳይ ሃይሳ ዮታይሰን ጌስ» ጊዴሰ።

ኢሲ ካዎቴሉኔ ኢሲ ካዎ

15 ጎዳ ቃላይ ታኮ ዪዲ፥

16 «ሃይሶ ኣሳ ናዉ! ኢሲ ጉፌ ኤካዳ ኢዛ ቦላ፥ «ሃይሲ ዩሁዳሲኔ ኢዚራ ዙፔቲዛ ኢሰራኤሌሳ» ጋዳ ጸፋ፤ ቃሴ ሃራ ጉፌ ኤካዳ ኢዛ ቦላ፥ «ሃይሲ ኤፍሬሜሰ፥ ዮሴፌሲኔ ኢዛራ ዙፔቲዛ ኢሰራኤሌ ኬላ ኣሳ ኡባሳ» ጋዳ ጸፋ።

17 ኢሰቲ ኢሲ ጉፌ ሚሳታና ማላ ኢስታ ኔ ኩሼን ጋጋ ኦይካ።

18 «ኔ ዴሬ ናይቲ፥ «ሃይሳ ኔ ኣይ ጋና ኮዪዳኮ ኦሰ ዮቲኪ?» ጊ ኦይቺዛ ዎዴ፥

19 ኔ ኢስታሰ፥ ኡባ ሃሪዛ ጎዳይ፥ ታኒ ኤፍሬሜ ኩሼን ዲዛ ዮሴፌ ጉፌኔ ኢዛራ ዙፔቲዛ ኢሰራኤሌ ቆሞታ ጉፌ ኤካና፤ ዩሁዳ ጉፌዛራ ጋጋዳ ታ ኢሲ ጉፌ ሂስታና፤ ኢሰቲካ ታ ኩሼን ኢሲ ጉፌ ጊዳና» ጋ።

20 ኔ ኢስታ ቦላ ጸፊዳ ጉፌታ ኢስታ ሲንላን ኦይካ።

21 ኔኒ ኢስታሰ ኡባ ሃሪዛ ጎዳይ፥ ታኒ ኢሰራኤሌ ኣሳ ኢሰቲ ቢዳ ካዎቴላታ ጊዶፌ ኬሳና፤ ታኒ ኢስታ ኡባሶፔ ሺሻዳ ኢስታ ቢታ ዛራ ኤሃና።

22 ቢታይ ቦላ ኢሰራኤሌ ዙማታን ታ ኢስታ ኢሲ ካዎቴላ ኦላና፤ ኢስታ ኡባ ቦላ ኢሲ ካዎይ ካዎታና። ሃይሳፌ ጉዬ ኢሰቲ ናሞኡ ዴሬ ጊዴቴና፤ ኢስታ ካዎቴላይ ናሞኡ ኬዚ ሻኬቴና።

23 ኢሰቲ ባንታ ኤቃ ጸሳታን፥ ሃራሲዛ ባንታ ሚስሌታን፥ ዎይኮ ባንታ ናጋራንካ ባንታናቴላ ቱኒሴቴና። ጋሶይካ ኢሰቲ ታና ኣገዲ ኦሊዳ ናጋራ ኡባፌ ታ ኢስታ ኣሻናኔ ጌሻና፤ ኢሰቲ ታ ዴሬ ጊዳና፤ ታኒካ ኢስታ ጸሰ ጊዳና።

24 « ታ ኣይሌ ዳዊቲ ኢስታ ቦላ ካዎታና፤ ኡባሲካ ኢሲ ሄንላንቻይ ዳና፤ ኢሰቲ ታ ዎጋ ካላና፤ ታ ማራካ ሚንሊ ናጋና።

25 ታኒ ታ አይሌ ያቆቤስ አሚዳኔ አንቴ አዋቲ ዴኢዳ ቢታን ኢስቲ ዳና። ሄን ኢስታስ፥ ኢስታ ናይቲኔ ኢስታ ናይታ ናይቲ ሜርናስ ዳና፤ ታ አይሌ ዳዊቲ ኢስታ ቦላ ሜርናስ ካዎ ጊዳና።

26 ታኒ ኢስታራ ሳሮቴላ ጫቆ ቃላ ጌላና፤ ሄ ጫቆ ቃላይካ ሜርናስ ጊዳና። ታኒ ኢስታ ሚንላና፤ ጮሪሳና፤ ታ ኬላካ ኢስታ ጊዳን ሜርናስ ዋላና።

27 ታ ዲሳሶይ ኢስታኮን ጊዳና፤ ታ ኢስታ ጸሳ ጊዳና፤ ኢስቲካ ታ ዴሬ ጊዳና።

28 ታ ኬላይ ሜርናስ ኢስታ ጊዳን ዲዛ ዎዴ ኢስራኤሌታ ጌሺዛይ ታና ጎዳ ጊዲዳይሳ ካዎቴላቲ ኤራና፤ ጌስ» ጊዴስ።

38

ጎጌ ቦላ የቴቲዳ ቲንቢቲ

1 ጎዳ ቃላይ ታኮ ዩዲ፤

2 «ሃይሶ አሳ ናዉ! ኔ አይፌሶ ጌዴ ማጎጌ ቢታን ዲዛ ሜሼኬስኔ ቱባሌስ ዋና ሃላቃ ጎጌ ቦላ ዛራ፤ ኢዛ ቦላ ቲንቢቲ የታ።

3 ኔኒ ኢዛስ ኡባ ሃሪዛ ጎዳይ፥ ሜሼኬስኔ ቱባሌስ ዋና ሃላቃ ጊዲዳ ሃይሶ ጎጌ ታኒ ኔ ቦላ ዴንዳዲስ።

4 ታ ኔና ጉዬ ዛራና፤ ታኒ ኔ ሲዴን ዳፎ አላዳ ኩሜል ኔ ኦላንቻታራ፥ ኔ ፓራታራ፥ ኔ ቶጋ አሳታ ኢስታ ኩሜላ ኦላ ማሳራራ፥ ዎጋ ጎንዳሌኔ ቁሪ ጎንዳሌ ኦይኪዳይታ ኡባ፥ ባንታ ጊላ ማሻ ቤሲዛይታ ኡባ ታ ኬሳና።

5 ጎንዳሌ ኦይኪዳይቲኔ ቢራታ ቆቤ ዎሒዳ ኡባቲ፥ ፓሪሴይ፥ ቶጵያይኔ ፑጾይ ኢስታራ ጊዳና።

6 ቃሴ ጎሜሬ ኢዛ ኦላንቻታራ ፑዴሃ ባጋን ሃኮን ዲዛ ቤቲ-ቶጋርማ ኢዛ ኦላንቻታራኔ ዳሮ ካዎቴላታ ታ ኔናራ ኬሳና።

7 « ሳኒኒ ኔ ዩሾን ሺቂዳ አሳይ ኡባይ ዴንዲቲ፤ ጌቲቲ፤ ኔካ ኢስታ ካሌሊዛይ ጊዳ።

8 ዳሮ ዎዴፔ ጉዬ ኔኒ ኦላስ ጾይጌታና፤ ሲንላፌ ያና ላይላታን ኦላፔ ሸዎፒዳሪ፥ ኢዚ አሳይ ዳሮ ካዎቴላታ ጊዶፌ ኬዚ ሸቂዳሪ፥ ዳሮ ዎዴስ ቡላ ጊዲዳ ኢስራኤሌ ዙማታ ቦላ ኡቲዳ ዴራ ቦላ ኔ ዎራጃና። ኢስታ ካዎቴላታ ጊዶፌ ኬዚዲ ሃኢ ሳሮን ዳና።

9 ኔኒ፥ ኔ ኦላንቻቲኔ ኔናራ ዲዛ ዳሮ ካዎቱላቲ ጎቴ ጫርኮ ማላ ዴንዳና፤ ሻራ ማላ ኢንቲ ቢታ ካማና።

10 « ሉባ ሃሪዛ ጎዳይ ሄ ዎዴ ኔ ካሃን ቆፋይ ጌሊን ኔኒ ኢታ ሚሽ ሃልቻና።

11 ኔኒ ኢስታስ፥ ዲርሳይ ባይንዳ ዴሬታ ቢታ ታ ዎራጃና፤ ኢስቲ ኡባይካ ዲርሳይ ባይንዳ፥ ፔንጌይኔ ቢራታ ኮላታይ ባይንዳ ዲሽን ሳሮኒኔ ሂርጋይ ባይንዳ ኡቲዳ ዴራ ታ ኦላና።

12 ታኒ ኢስታፌ ቦንቃናኔ ዳፋ ኤካና፤ ሄሳሶካ ካዎቱላታ ጊዶፌ ሸቂዲ ቢታስ ጊዶ ኣዳን ዳና፤ ኢስቲ ሜሃኒኔ ሻቃጩታን ዲሬቲዳ፥ ሄ ቢታይን ዲዛ ዴራ ቦላ ታ ኩሹ ዴንላና፤ ጋና።

13 ሳባ አሳይ፥ ዳዳኔ አሳይ፥ ታርሴሴ ዴሬ ዛልኣንቻቲኔ ኢዚ ጉታቲ ኡባይ ኔና፥ ሉና ቦንቃናስ ያዲ? ኔኒ ኔ ኦላንቻታ ሺሺዳይ ዳፋ ኤካናስ፥ ዎርቃኔ ቢራ ሸሻ ኤፋናስ፥ ሜሃኔ ሻቃጩ ቡራ ኤፋናስ፥ ዳሮ ሚሽ ዲኣ ኤካዳ ሲማናሴ?) ጋና።

14 «ሄሳ ጊሻስ አሳ ናፌ፥ ጎጌ ቦላ ቲንቢቲ ዮታ፤ ኢዛስ ኡባ ሃሪዛ ጎዳይ፥ ሄ ዎዴ ታ ዴሬ ኢስራኤሌይ ሳሮን ኡቲዳይሳ ኔኒ ኡራዳ ኣኬኪኪ?

15 ፑዴሃ ባጋፌ ሃሆ ቢታፌ ኔ ያና፤ ኔኒኔ ኔናራ ዲዛ ጮራ ካዎቱላቲ ፓራ ቶጊዲ ኬሂ ሚኖኔ ዎልቃማ ኦላንቻ ጊዲዲ ያና።

16 ቢታ ካሚዛ ሻራ ማላ፥ ኔኒ ታ አሳ ኢስራኤሌ ቦላ ዎራጃና። ሃይሶ ጎጌ ታ ጌሻቱላ ካዎቱላታ ሲንላን ታኒ ቆንጨሲሺን ኢስቲ ታና ኡራና ማላ ሲንላፌ ያና ዎዴታን ታ ቢታይ ቦላ ታ ኔና ኤሃና፤ ጌሰ።

17 «ኡባ ሃሪዛ ጎዳይ፥ ሳታ ቤኒ ዎዴ ታ ኣይሌ ኢስራኤሌ ናቤታ ባጋራ ኢዛ ጊሻስ ዮቲዳ ሄ ቢታኔይ ኔና ጊዲኪ? ኢስቲ ሄ ዎዴ ታኒ ኔና ኢስታ ቦላ ኤሃናይሳ ዳሮ ላይላታን ቲንቢቲ ዮቲዳ፤ ጌሰ።

ጎጌ ቦላ ያና ፒርዳ

18 «ሄ ዎዴ ኡባ ሃሪዛ ጎዳይ፥ ሳጌይ ኢስራኤሌ ቢታ ኦሊዛ ዎዴ ሚኖ ታ ሃንቆይ ሱላና።

19 ሄ ዎዴ ታኒ ታ ቃናቲኒኔ ባቢሲዛ ታ ሃንቆን ኢስራኤሌን ቢታይ ኬሂ ቃጸና ጋ ዮታዲሰ።

20 አባ ዋሌቲ፥ ሳሎ ካፎቲ፥ ዎራ ዶኣቲ፥ ቢታ ቦላ ቲራን ጎሽቲዛ ኣይ ሜዴቱላቲካ፥ ሄሳሶ ቢታ ቦላ ዲዛ ኣስ ኡባይ ታ ሲንላን ኮኮራና፤ ዙማቲ ሺሬቲ ሺሬቲ ዎዳና፤ ኣፎቲ ዎዳና፤ ዲርሳ ጊሞቤይ ኡባይ ላሌታና።

21 ታኒ ታ ዙማታ ኡባን ጎጌ ቦላ ማሻ ጸይጋና፤ ኢሳ ኢሳ ማሻይ ኢዛዴ ኢሻ ቦላ ሸምፓና፤ ታኒ ኡባ ሃሪዛ ጎዳይ ሃይሳ ዮታይሰ።

22 ታኒ ኢታ ሃርጌኒኔ ሸምፖ ዋጵን ኢዛ ቦላ ፒርዳና፤ ዋልቃማ ኢራ፥ ዋልቃማ ሻቶ፥ ጸጊዛ ዲኔ ታማ ኢዛ ቦላ፥ ኢዛ ኦላንቻታ ቦላኔ ኢዛራ ዲዛ ጮራ ካዎቴላታ ቦላ ታ ቡኪሳና።

23 ታኒ ታ ጌታቴላኔ ታ ጌሻቴላ ሄሳን ቤሳና። ቃሴ ዳሮ ካዎቴላታ ሲንላን ታኒ ታናቴላ ኤሪሳና። ሄሳፌ ጉዬ ታኒ ጎዳ ጌዲዳይሳ ኢሰቲ ኤራና፤ ጌሰ።

39

ጎጌ ጸኔቴላ

1 «ኡባ ሃሪዛ ጎዳይ፥ ሳይሶ አሳ ናዉ! ጎጌ ቦላ ቲንቢቲ ዮታ። ሜሼኬሴኔ ቴባሌሰ ዋና ሃላቃ ጌዲዳ ሃይሶ ጎጌ ታ ኔ ቦላ ዴንዳዲሰ።

2 ታኒ ኔና ጉዬ ዛራናኔ ጎቻና፤ ታ ኔና ፑዴሃ ባጋፌ ሃኮሶፔ ኤሃዳ ኢሰራኤሌ ዙማታ ቦላ ዬዳና።

3 ኔሰ ሃዲርሳ ኩሼን ዲዛ ኔ ዋንዳፌዛ ታ ሾጫና፤ ኔኒ ኡሻቻ ኩሼን ኦይኪዳ ዪሻዛ ታ ቆቆፍሳና።

4 ኔኒ፥ ኔ ኦላንቻቲኔ ኔናራ ዲዛ ካዎቴላቲ ኡባይ ኢሰራኤሌ ዙማታ ቦላ ኩንዳና፤ ታኒ ኢንቴ አሾዛ ፑዚ ሚዛ አንኮታሲኔ ዋራ ዶኢታሰ ማና ማላ አላ ኢማና።

5 ታኒ ኡባ ሃሪዛ ጎዳይ ዮቲዳ ጌሻሰ ኢንቴ ሚሊጺ ጌዳ ዴምባን ኩንዳና።

6 ማጎጌ ቢታኒኔ አባ ዶናን ሂርጋይ ባይንዳ ባጴ ጌ ዲዛይታ ቦላ ታኒ ታማ ዬዳና። ታኒ ጎዳ ጌዲዳይሳ ኢሰቲ ሄሳን ኤራና።

7 « ሳታ ጌሻ ሱንላይ ታ ዴራ ኢሰራኤሌን ኤሬታና ማላ ታ ኦላና፤ ሃይሳፌ ጉዬን ታ ጌሻ ሱንላይ ካፌታና ማላኔ ካዉያና ማላ ታ ኮይኬ፤ ሄሳን ካዎቴላቲ ታኒ ጎዳይ ኢሰራኤሌ ጌሻ ጌዲዳይሳ ኤራና።

8 ኡባ ሃሪዛ ጎዳይ ቤኢቲ፥ ሄ ጋላሳይ ያና አቴና ጋዳ ታኒ ዮቲዳ ጋላሳይ ሃይሳ።

9 « ሳሃፌ ጉዬ ኢሰራኤሌ ካታማታን ዲዛ አሳይ ኡባይ ኬዚዲ፥ ኦላ ሚሻታ፥ ዋጋ ጎንዳሌታኔ ቄሪ ጎንዳሌታ፥ ዋንዳፌታ፥ ዪሻታ፥ ኦላንቻታ ጸምኢታኔ ቶራታ ሺሺዲ ታማን ኤላና። ሄሳ ላፑን ላይሰ ኩሜሰ ኢሰቲ ኤሶሰ ጎኤታና።

10 ኢስቲ ሺሺዳ ኦላ ሚሻታ ኤሶስ ጎኤታና ጊሻስ ኢስታስ ካሬፔ ሚላ ሚጸኔ ዋራፔ ሚላ ቃንጾ ኮሼና። ኢስታፌ ቦንቂ ኤኪዳይታፔ ኢስቲካ ቦንቂ ኤካና፤ ኢስታፌ ዳፊ ኤኪዳይታፔ ኢስቲ ዳፊ ኤካና፤ ታኒ ኡባ ሃሪዛ ጎዳይ ሃይሳ የታይሰ።

11 « ሳሃ ዋዴ አሳይ አርሼይ ሞኪዛ ባጋራ ዲጌ አባን ቢዛሶ ዙሌን ኢስራኤሌ ቢታን ታ ጎጌስ ዲፎ ኢማና፤ ጎጌይኔ ኢዛ ኦላንቻቲ ሄን ሞጌታና ጊሻስ ማንዳሪዛ አሳታ ኦጌይ ጎርዴታና፤ ሄሳ ጊሻስ ሄ ሶሆይ ሃሞን ጎጌ ሾባ ጌቲታና።

12 « ሲታዮ ጌሻናስ ኢስራኤሌ አሳይ ላፑን አገና ኩሜላ ኢስታ ሞጊሼ ታካና።

13 ሄ ቢታ አሳይ ኡባይ ኢስታ ሞጋና፤ ታኒ ታ ቦንቾ ቤሲዛ ዋዴ ኢስታስ ቦንቾ ጊዳና፤ ታኒ ኡባ ሃሪዛ ጎዳይ ሃይሳ የታይሰ።

14 « ላፑን አገናፔ ጉዬ አቲዳ አሃይ ዲኮ፥ ቢታይ ጌያና ማላ፥ ዩዩ ዩዩዲ አቲዳ አሃ ሞጋና አሳቲ ደሬታና።

15 ኢስቲ ቢታይ ቦላ ዩዩሺን፥ ኢስታፌ ኢሶይ አሳ ሜቄላ ዴሚዲ ዲፎ ቦኪዛይቲ ሃሞን ጎጌ ዙሌን ሞጋናሼ ጋካናስ ሜቄላይ ዲዛሶን ማላታ ዋላና።

16 ሄን ኦላንቻታ ካታማያ ዲዛ ጊሻስ ቢታዮ ኢስቲ ጌሻና፥ ጌሰ።

17 «ኡባ ሃሪዛ ጎዳይ፥ ሳሃይሶ አሳ ናወ! ዴማ ዴማ ቆሞ ካፎታኔ ዋራ ዶኦታ፥ ኢንቲ ዲዛሶ ኡባፌ ሽቄቲዲ ታኒ ኢንቲስ ጊግሲዳ ያርሾኮ ሃ ዪቴ፤ ሄሲካ ኢስራኤሌ ዙማታ ቦላ ሃናና ጊታ ያርሾ፤ ኢንቲ ሄን አሾ ማናኔ ሱላ ኡያና።

18 ኢንቲ ቋርሾ አሾኔ ላቃ አሾ ሚዛ ማላ፥ ዴይሻ አሾኔ ዋፋኖ አሾ ሚዛ ማላ ዋልቃማ አሳታ አሾ ማና፤ ቢታ ቦላ ሃላቃታ ሱላካ ኢንቲ ኡያና፤ ሃይቲ ኡባይ ሞጲዳ ባሳኔ ሜሄታ።

19 ታኒ ኢንቲስ ጊግሲዛ ያርሾዛ ኢንቲ ካላናሼ ጋካናዉ ማና፤ ቃሴ ማሶታናሼ ጋካናስ ኢንቲ ሱላ ኡያና።

20 ታ ማዳን ፓራታ፥ ቶጋንቻታ፥ ዋልቃማ አሳታኔ ዴማ ዴማ ቆሞፌ ሽቄዳ ሃራ ዋታዳራታ አሾ ካላናሼ ጋካናስ ኢንቲ ማና፥ ጌሰ።

21 «ካዋቴላታ ጊዶን ታኒ ታ ቦንቾ ቆንጨሳና፤ ካዋቴላቲ ኡባይ ታኒ ኢስታ ቦላ ኤሂዳ ቁጾቴኔ ታ ኢስታ ቦላ ዴጾሊዳ ኩሼ ቤኦና።

22 ሄ ጋላሳፌ ደሚዲ ኢስራኤሌ አሳይ ታኒ ጎዳይ ኢስታ ጾስ ጊዲዳይሳ ኤራና።

23 ኢስራኤል አሳይ ታስ አማኔቶንታ ኢዲዲ ናጋራ ኦሊዳ ጋሶን ኢስቲ ጎዴቲዳይሳ ካዎቴፋቲ ኤራና። ሄሳ ጊሻስ ታኒ ታ አይፌሶ ኢስታፌ ጌንፋዲሰ፤ ታኒ ኢስታ ኢስታ ሞርኬታስ አሳ ኢማዲሰ፤ ኢስቲ ኡባይ ማሻን ወሪዳ።

24 ኢስታ ቴናቴላ ማላኔ ኢስታ ቆሆዛ ማላ ታ ኢስታ ቦላ ፒርዳዲሰ፤ ታ አይፌሶካ ታ ኢስታፌ ጌንፋዲሰ።

25 «ሄሳ ጊሻስ ኡባ ሃሪዛ ጎዳይ፥ ሃኢ ያቆቤይ ጎዴቲዳሶ፤ ታኒ ኢዛ ዛራዳ አሻልሳና፤ ኢስራኤል አሳ ኡባስ ታ ቃዴታና፤ ታ ጌሻ ሱንፋ ጊሻስ ታኒ ሚሼታና።

26 ኢስታ ባቢሲዛ ኦኒካ ባይንዳ ዲሺን ኢስቲ ባንታ ቢታን ሳርን ዲዛ ዎዴ ባንታ ካወሻቴፋኔ ካሴ ታስ አማኔቶንታ ኢስቲ ዴኢዳ ዎዴታ ዶጋና።

27 ታኒ ካዎቴፋታ ኡባ ጊዶፌ ኢስታ ዛራ ኤሂዛ ዎዴ፥ ኢስታ ሞርኬታ ቢታፌ ታ ኢስታ ሺሺዛ ዎዴ፥ ታ ጌሻቴፋ ታኒ ኢስታ ባጋራ ዳር ካዎቴፋታ ሲንፋን ቤሳና።

28 ታኒ ኢስታ ካዎቴፋ ጊዶን ላሌታና ማላ ኦሊዳ ጊዲኮካ ኢሳካ አሾንታ ኢስታ ኢስታ ዴሬ ታ ዛራና፤ ሄሳፌ ጉዬ ታኒ ጎዳይ ኢስታ ጸስ ጊዲዳይሳ ኢስቲ ኤራና፤ ታኒ ኢስታፌ ኢሳኔ ካዎቴፋ ጊዶን አጊኬ።

29 ታኒ አያና ኢስራኤል አሳ ቦላ ጉሳና ጊሻስ ሃይሳፌ ጉዬ ታኒ ታ አይፌሶ ኢስታፌ ጌንፋኬ። ታኒ ኡባ ሃሪዛ ጎዳይ ሃይሳ ዮታይሱ ጌስ» ጊዴሰ።

ሲንፋፌ ኬጾታና ጸሳ ኬል

40

(40:1—48:35)

ሂዘቁሊ አጂታን ዩሩሳላሜ ቡስ

1 ኦኒ ዲኤቲዳ ናሞኡ ታማኔ ኢቻሻንፋ ላይፋን፥ ኮይር አጊናን ታማንፋ ጋላሳን፥ ዩሩሳላሜይ ኩንዲዳ ታማኔ ኦይዳንፋ ላይፋን ሄ ጋላስ ጎዳ ኩሼይ ታ ቦላ ዴሰ፤ ኢዚካ ታና ዩሩሳላሜ ኤፊዴሰ።

2 ጸሳ አጂታን ኢዚ ታና ኢስራኤል ቢታ ኤፊዲ ቃቃ ዙማ ቦላ ዎሊዴሰ፤ ሄ ዙማፔ ዲጌሃ ባጋራ ካታማ ሚሳቲዛ ጊምቤ ኬፋታ ቤኣዲሰ።

3 እዚ ታና ሄ ኤፌዴስ፤ ሂስቲን ታኒ ጸርቁማላ ሚሳቲዛ ኢሲ አስ ቤአዲስ፤ እዚ ላይኖፔ ኦሴቲዳ ዋዶሮኔ ዋቋ ሚላ ባ ኩሼን ኦይኪዲ ጌሊዛ ፔንጌ ቦላ ኤቂዴስ።

4 እዴዚ ታና፡ «ሃይሶ አሳ ናዉ! ኔ አይፌን ጸላ፤ ኔ ሃይላን ሲያ፤ ታ ኔና ቤሲዛይሳ ኡባ ዋዚናን ዋላዳ ኤዘጋ። ኔ ሃ ዪዲይ ሃይሳስ ጌዲዳ ጊሻሰ ኔ ቤኢዳ ኡባ ኢስራኤሌ ኬላስ ዮታ» ጌዴስ።

ኣርሼ ኬሳ ባጋ ፔንጌ

5 ታኒ ጸሳ ኬላ ሙሌራ ዩዪ አቋዳ ዲርሳ ጊምቤ ቤአዲስ። እዴዛ ኩሼን ኡሱፑን ዋቋ ጌዲዛ ዛንጌ ቤአዲስ፤ ኢሲ ኢሲ ዋቋ ሚሻይ ዋቋ ኃቋኮ ጌዴስ፤ እዚ ጊምቤዛ ዋቋዴስ፤ አኮቴላይ ኢሲ ዋቋ፡ ጌሳይካ ኢሲ ዋቋ ጌዲዴስ።

6 ሄሳፌ ጉዬ ኣርሼ ኬሳ ባጋራ ዲዛ ዲርሳ ፔንጌኮ ቢዴስ። ኬታታ ኬዚዲ ጌሊዛ ፔንጌዛ ማዲራኬ ዋቋዴስ፤ ኢዛስ ጌሳይ ኡሱፑን ዋቋ ጌዲዴስ።

7 ዛቤታ ኬላስ ጌሳይኔ ጎምፓይ ኡሱፑን ኡሱፑን ዋቋ፡ ኬላታ ጌዶን ዲዛ ጊምቤ ኦርዴቴላይ ኢቻሽ ዋቋ ጌዲዴስ፤ ጸሳ ኬላፌ ሲንላ ባጋራ አቋ ቢዛሶን ዲዛ ዳራንቻን ጌዶ ባጋራ ዲዛ ማዲራኬዛስ ዉይጌዛ ዋቋይ ኡሱፑን ጌዲዴስ።

8 ሄሳፌ ጉዬ ጌሊዛሶራ ካንሊ ቢዛ ዳራንቻ ዋቋዴስ።

9 ኢዛስ ኣዲሳቴላይ 8 ዋቋ፡ ቱቂታ ኦርዴቴላይ 2 ዋቋ ጌዴስ፤ ጌሊዛሶ ፔንጌን ዲዛ ዳራንቻይ ጸሳ ኬላ ጌናን ዴስ።

10 ኣርሼይ ሞኪዛ ባጋ ፔንጌዛስ ሃዲርሳ ባጋራኔ ኡሻቻ ባጋራ ኢሲ ጌና ጌዲዳ ሄሹ ሄሹ ዛቤ ኬላቲ ዴቴስ፤ ኢስታ ጌዶን ሻኪዛ ጊምቤታ ኦርዴቴላይ ኢሲ ጌናኔ ኢሲ ማላ።

11 ሄሳፌ ጉዬ ፔንጌዛ ጎምፓ ዋቋዴስ፤ ኢዛ ጎምፓይ ታሙ ዋቋ፡ ኣዲሳቴላይ ታማኔ ሄሹ ዋቋ ጌዲዴስ።

12 ዛቤ ኬላታስ ኢሳስ ኢሳስ ሲንላ ባጋራ ኣዲሳቴላይ ኢሲ ዋቋ ጊምቤ ጌዲዳ ዲርሳይ ዴስ፤ ዛቤታ ኬላ ጎምፓይ ኢሲ ጌና ጌዲዳ ኡሱፑን ኡሱፑን ዋቋ።

13 ዛቤ ኬላስ ጉዬ ባጋ ጎዳፔ ዶሚዲ ሃራይሳ ጸራ ጋካናስ ዲዛ ጌሎሶ ፔንጌ ዋቋዴስ፤ ኢሲ ጎዳፔ ቢዲ ሃንኮ ጎዳ ጋካናስ 25 ዋቋ ጌዲዴስ።

14 ጌሊዛሶ ፔንጌ ዩሾን ዲዛ ኬኢ ኬኢ ኡቲዳ ገምቤታ ኡባ ሲንላን ዲዛሶዛ ዋጂን 20 ዋጃ ገዲዴሰ፤ ዋጂቲዳይካ ዛጎዛፔ ሲንላ ባጋራ ዲዛ ሲሜሬቲዛሶ ዳራንቻ ጋካናሳ።

15 ጌሊዛ ፔንጌፌ ቢዲ ሲሜሬቲዛሶዛ ዳራንቻ ጋካናሰ ዲዛ ኣዱሳቲላይ 15 ዋጃ ገዲዴሰ።

16 ኪፊሌቲ ሲሜሬቲዛሶን ዲዛ ዳራንቻታ ማላ ሃዲርሳ ባጋራኔ ኡሻቻ ባጋራ ኢሰታሰ ጉላ ማሰኮቲቲ ዳቲሰ። ዩዪ ኣጃናሰ ዲዛ ማሰኮቲቲ ጌሊዛ ፔንጌዛፔ ሲንላ ባጋራ ዲዛይታ ገዲሺን ኢሲ ኢሲ ኪፊሌሰ ሃዲርሳ ባጋራኔ ኡሻቻ ባጋራ ጎዳ ቦላ ዛምባ ሚላ ሚሰሌይ ገጌቲ ኡቲዳሰ።

ካሬ ባጋ ዛጎ

17 ሄሳፌ ጉዬ ኣዳዚ ካሬ ባጋ ዛጎ ታና ኤፊዴሰ፤ ሄን ዛጎዛ ዩሾን ዮቻ ሹቹ ዩጌቲ ኡቲዳ ሲሜሬቲዛሶሆታ ቤኣዲሰ፤ ኢሰታ ዩሾንካ 30 ኪፊሌቲ ዳቲሰ።

18 ሹቹ ዩጌቲ ኦሴቲዳ ዛጎዚ ገምባሰ ኡባ ዩሾ ጋኬሰ፤ ካሬ ዛጎዚ ገዶ ዛጎፔ ዚቄሰ።

19 ሄፔ ዱጌ ባጋራ ጌሊዛ ፔንጌ ሲንላፌ ዶሚዲ ገዶ ዛጎዛ ፔንጌ ጋካናሰ ዲዛሶዛ ዋጂዴሰ፤ ኣርሼይ ሞኪዛ ባጋራ ገዲን ፑዴሃ ባጋራ ዲዛ ኣዱሳቲላይ 100 ዋጃ ገዲዴሰ።

ፑዴሃ ባጋ ፔንጌ

20 ሄሳፌ ጉዬ ፑዴሃ ባጋ ገናራ ዲዛ ጌዴ ካሬ ዛጎ ኬሲዛ ፔንጌዛ ኣዱሳቲላኔ ኣኮቲላ ዋጂዴሰ።

21 ኮይሮ ፔንጌዛ ማላ ሃይሲካ ሚሊ ባጋራ ዲዛ ሄቹ ሄቹ ዛቤ ኬላታሰ፤ ኢሰታ ገዶን ኬኢ ኬኢ ቤቲዛ ገምቤታሲኔ ሲሜሬቲዛሶ ዳራንቻታሰ ዋጃይ ኢሲ ገና፤ ኣዱሳቲላይ 50 ዋጃ፣ ጎምፓይ 25 ዋጃ ገዲዴሰ።

22 ማሰኮቲቲ፣ ሲሜሬቲዛሶ ዳራንቻቲኔ ዛምባ ሚላታ ሚሰሌቲ ኣርሼይ ሞኪዛ ባጋራ ዲዛይታራ ኢሲ ማላ፤ ሄ ኤፊዛ ላፑን ኬቻቲ ዳቲሰ፤ ሲሜሬቲዛሶን ዲዛ ዳራንቻቲ ኢሰታ ገናን ዳቲሰ።

23 ኣርሼይ ሞኪዛ ባጋራ ዲዛይሳሉ ፑዴሃ ባጋራ ዲዛ ፔንጌ ገና ጌዴ ገዶ ዛጎ ጌልሊዛ ፔንጌይ ዴሰ፤ ኢሲ ፔንጌዛፔ ቢዲ ሃራ ፔንጌ ጋካናሰ ዲዛይሳ ዋጂዴሰ፤ ሄሲካ 100 ዋጃ ገዲዴሰ።

ዱጌሃ ባጋ ፔንጌ

24 ሄሳፌ ሲሚዲ ሄ ቢታኔይ ታና ዱጌሃ ባጋ ዲርሳ ፔንጌ ካሌሊዴሰ፤ ካሌሊን ባዳ፣ ሄሳን ሃራ ዲርሳ ፔንጌ ቤያዲሰ። ኢዚ ቱቄታኔ ገዶ ኪፊሌታ ሊኪዛ ዋዴ ሃራታራ ኢሲ ገና ገዲዴሰ።

25 ሊኬ ሃራታ ማላ፥ ሃ ዲርሳ ፔንጌ ማታን ዲዛ ከፊሌታስ ኡባስ ማስኮቴቲ ዴቴስ። ዲርሳ ፔንጌዛ ዞኖይ 50 ዋቋ፤ አሆቴላይካ 25 ዋቋ።

26 ሄ ጋሊዛ ላፑን ጴካቲ ዴቴስ። ዳራንቻይ ዳባባ ሲንላን ዉርሴላ ባጋራ ዴስ። ፔንጌዛ ቦላ ሄ ባጋራኔ ሃ ባጋራ ዛምባ ሚስሌይ ሜጴቲ ኡቲዴስ።

27 ጊዶ ዳባባስካ ሃራ ፔንጌይ ዴስ። ሄ ቢታኔይ ሃ ናምኡ ዲርሳ ፔንጌታፔ ጊዶን ዲዛሶሆ ሚዛኒን 100 ዋቋ ጊዲዴስ።

ጊዶ ዳባባስ ዲጌሃ ባጋ ፔንጌ

28 ሄ ቢታኔይ ታና ዲጌሃ ዲርሳ ፔንጌ ባጋራ ሄኒ ጊዶ ዳባባኮ ኤፊዴስ። እዚ ዲርሳ ፔንጌ ሜዛኒን ሃራ ፔንጌታራ ሊኬ ጊዲዴስ።

29 ሄሳስ ናጊዛይታ ከፊሌቲ፥ ጎዳቲኔ ዳራንቻቲ ኡባይ ሃራ ዲርሳ ፔንጌታራ አሲ ማላ። ሄ ዲርሳ ፔንጌ ዩሾን ዲዛ ከፊሌታ ኡባስ ማስኮቴቲ ዴቴስ። ሃ ጊዶ ፔንጌ ዞኖይ 50 ዋቋ፤ አሆቴላይካ 25 ዋቋ።

30 ኢዛ ዩሾን ዳራንቻቲ ዴቴስ፤ አሰታ ዞኖይ 25 ዋቋ፤ አሆቴላይካ 5 ዋቋ።

31 ሄ ዳራንቻቲ ካሬ ባጋ ዳባባ ጸሌቴስ። ፔንጌ ቦላ ሄ ባጋራኔ ሃ ባጋራ ዛምባ ሚስሌይ ሜጴቲ ኡቲዴስ። ሄ ጋሊዛ 8 ጴካቲ ዴቴስ።

ጊዶ ዳባባስ ኦርሼ ኬሳ ባጋ ፔንጌ

32 ሄ ቢታኔይ ታና ኦርሼ ኬሳ ባጋ ዲርሳ ፔንጌራ ሄኒ ጊዶ ዳባባኮ ኤፊዴስ። እዚ ሄ ዲርሳ ፔንጌ ሜዛኒን ሃራ ፔንጌታራ አሲ ጊና ጊዲዴስ።

33 ናጊዛይታ ከፊሌቲ፥ ጎዳቲኔ ዳራንቻይ ኡባይ ሃራ ዲርሳ ፔንጌታራ አሲ ማላ። ሄ ዲርሳ ፔንጌ ዩሾን ዲዛ ከፊሌታ ኡባስ ማስኮቴቲ ዴቴስ። ሄ ፔንጌ ዞኖይ 50 ዋቋ፤ አሆቴላይካ ናምኡ ታማኔ ኢቻሽ ዋቋ።

34 ዳራንቻይ ካሬ ባጋ ዳባባ ጸሌቴስ። ፔንጌ ቦላ ሄ ባጋራኔ ሃ ባጋራ ዛምባ ሚስሌይ ሜጴቲ ኡቲዴስ። ሄ ጋሊዛ 8 ጴካቲ ዴቴስ።

ጊዶ ዳባባስ ፑዴሃ ባጋ ፔንጌ

35 ሄ ቢታኔይ ታና ፑዴሃ ባጋ ዲርሳ ፔንጌኮ ኤፊዴስ። እዚ ሄ ዲርሳ ፔንጌ ሜዛኒን፥ እዚካ ሃራ ፔንጌታራ አሲ ጊና ጊዲዴስ።

36 ናጊዛይታ ኪፊሌቲ፥ ጎዳቲኔ ዳራንቻይ ኡባይ ሃራ ዲርሳ ፔንጌታራ ኢሲ ገና። ሄ ዲርሳ ፔንጌዛ ዩሾን ማሰኮቲቲ ዴቲስ። ሄ ፔንጌዛ ዞኖይ 50 ዋቋ፤ ኢሆቴላይካ 25 ዋቋ።

37 ዳራንቻይ ካሬ ባጋ ዳባባ ጸሌስ። ፔንጌ ቦላ ሄ ባጋራኔ ሃ ባጋራ ዛምባ ሚሰሌይ ሜዴቲ ኡቲዴስ። ሄ ጋሊዛ ኦሰቸን ዴካቲ ዴቲስ።

ያርሾይ ሺቂዛ ኪፊሌታ

38 ካሬ ዳባባስ ፑዴሃ ባጋራ፥ ጊዶ ዲርሳ ፔንጌ ዳራንቻራ ኦይኬቲዳ ሃራ ኪፊሌይካ ዴስ። ጸጌቲዛ ያርሾስ ኤሂዛ ሜሄ ኦሾይ ሜጩቲዛይ ሄ ኪፊሌና።

39 ሄ ዳራንቻን ሃ ባጋራ ናምኡ ጸራጴዛቲ፥ ሄ ባጋራካ ናምኡ ጸራጴዛቲ ዴቲስ፤ ጸጌቲዛ ያርሾስ፥ ናጋራ ያርሾሲኔ ቆሆ ያርሾስ ሹኪዛ ሜሄ ኡባይ ሹኬቲዛይ ሄ ጸራጴዛታ ቦላና።

40 ዳራንቻፌ ካሬ ባጋራ ፑዴሃ ዲርሳ ፔንጌ ማታን ናምኡ ጸራጴዛቲ ሃ ባጋራ፥ ናምኡ ጸራጴዛቲ ሄ ባጋራ ዴቲስ።

41 ሄሳ ጊሻስ ያርሾስ ሺቂዳ ሜሄይ ኢስታ ቦላ ሹኬቲዛ ሙሌራ ኦሰቸን ጸራጴዛቲ ዴቲስ፤ ኢስታፌ ኦይዳቲ ዳራንቻን ዴቲስ፤ ኦይዳቲ ቃሴ ካሬ ዳባባን ዴቲስ።

42 ቃሴ ጸጌቲዛ ያርሾ ዋላናስ ጊግሲዳ፥ ሹቻፌ ማሴቲዲ ኦሴቲዳ ኦይዲ ጸራጴዛቲ ዴቲስ። ኢስታስ ቶቃቴላይ ኢሲ ዋቋ፤ ኦዲሳቴላይ ኢሲ ዋቋ፤ ታቋኮ፤ ቃሴ ኢሆቴላይካ ኢሲ ዋቋ፤ ታቋኮ። ጸጌቲዛ ያርሾኔ ሃራ ያርሾታ ኡባ ሹኪዛ ሚሻቲ ሄ ጸራጴዛታ ቦላን ኡቲቲስ።

43 ኦይዲ ቢራዴ ኦዲቂዛ ካቆ ሆኮቲ ጎዳዛ ቦላ ዩዩ ኦዲዲ ዲሽኬቲ ኡቲዳ። ያርሾስ ሺሺዛ ኦሾይ ኡባይ ሄ ጸራጴዛታ ቦላ ዋዴስ።

44 ሄሳፌ ጉዬ ሄ ቢታኔይ ታና ጊዶ ዳባባ ጌልሊዴስ። ሄሳን ፔንጌቲ ጊዶ ዳባባኮ ዶዬቲዛ ናምኡ ኪፊሌቲ ዴቲስ። ኢስታፌ ኢሲ ኪፊሌይ ፑዴሃ ዲርሳ ፔንጌ ማታራ ዲጌሃ ባጋ ጸሌስ፤ ናምኦንላይ ቃሴ ዲጌሃ ዲርሳ ፔንጌ ማታራ ፑዴሃ ባጋ ጸሌስ።

45 ሄ ቢታኔይ ታና፥ «ዲጌሃ ባጋ ጸሊዛ ኪፊሌይ ጸሳ ኬላን ኦሊዛ ቄሴታይሳ።

46 ፑዴሃ ባጋ ጸሊዛ ኪፊሌይ ቃሴ ያርሺዛሶን ኦሊዛ ቄሴታይሳ። ቄሴቲ ኡባይ ሳዶቄ ዛሬፔ ዩሌቲዳ ሌቂታ፤ ጎዳኮ ሺቂዲ ኦላናስ ቤሴቲስ ጌቲቲዳይ ኢስታ ጸላ» ጊዴስ።

ጊዶ ዳባባኔ ጸሳ ኬላ

47 ሄ ቢታኔይ ዳባባ ሚዛኒን አዲሳቱላይ 100 ዋቶ፥ አሆቴላይካ 100 ዋቶ ገዲዴሰ። ዳባባን ጸሳ ከላፌ ሲንላ ባጋራ ኢሲ ያርሺዘሶሆይ ዳሰ።

48 ሄሳፌ ጉዬ ኢዚ ታና ጸሳ ከላ ዳራንቻ ኤፊዴሰ። ዳራንቻ ጌሊዘሶን ዲዛ ቆሲላላ ሚዛኒን ቶቃቴላይ 5 ዋቶ፤ አሆቴላይካ 14 ዋቶ። ሃዲርሳራኔ ኡሻቻራ ዲዛ ጎዳታ ኦርዴቴላይ ሄሹ ሄሹ ዋቶ ገዲዴሰ።

49 ዳራንቻ አዲሳቱላይ 20 ዋቶ፤ አሆቴላይካ 12 ዋቶ። ሄ ጋሊዛ ታሙ ቆካቲ ዳቴሰ። ጌሊዘሶን ኡሻቻራኔ ሃዲርሳራ ኤቂዳ ናምኡ ቴቂቲ ዳቴሰ።

41

1 ሄሳፌ ሲሚዲ ሄ ቢታኔይ ታና ጸሳ ከላን ዲዛ ጌሻሶሆ ጌልሊዴሰ። ሄ ጌሻሶሆ ጎዳ ኦርዴቴላ ሚዛኒን ኡሱፑን ዋቶ ገዲዴሰ።

2 ፔንጌ አሆቴላዚ ቃሴ ታሙ ዋቶ ገዲዴሰ። ሃዲርሳራኔ ኡሻቻራ ዲዛ ጎዳታ አሆቴላይ ኢቻሽ ኢቻሽ ዋቶ። ቃሴ ኢዚ ጌሻሶሆ ዋቶን አዲሳቱላ 40 ዋቶ፥ አሆቴላይካ 20 ዋቶ ገዲዴሰ።

3 ሄሳፌ ጉዬ ቆልኦ ጌሊዴሰ። ሄ ጌሊዛ ፔንጌ ጎዳ ኦርዴቴላ ዋቶን ናምኡ ናምኡ ዋቶ ገዲዴሰ። ፔንጌዛ አሆቴላይ ኡሱፑን ዋቶ ገዲዴሰ፤ ሃዲርሳራኔ ኡሻቻራ ዲዛ ጎዳታ አሆቴላይ ላፑን ላፑን ዋቶ።

4 ቃሴ ኢዚ ቆልኦ ዋቶዴሰ፤ አዲሳቱላይ 20 ዋቶ፥ አሆቴላይካ 20 ዋቶ ገዲዴሰ። ሄሳፌ ጉዬ ኢዚ ታና፡ «ሃይሲ ኡባፌ ኦጂዛ ጌሻሶሆ» ገዴሰ።

ጸሳ ከላ የሾን ከጾቲዳ ኪፊሌታ

5 ሄ ቢታኔይ ጸሳ ከላ ጎዳ ዋቶዴሰ፤ ሂሰቲን ኦርዴቴላይ ኡሱፑን ዋቶ ገዲዴሰ። ሄ ጎዳዛራ ኦይኬቲዲ፥ ጸሳ ከላ ጊምቤ የሾን ከጾቲዳ ኦይዱ ኦይዱ ዋቶ አከዛ ዳር ኪፊሌቲ ዳቴሰ።

6 ሄ ኪፊሌቲ ኢሶይ ኢሳ ቦላ ከጾቲዳ ሄሹ ፖቄ ገዲሺን ኢሲ ኢሲ ፖቄሰ ሄሹ ታሙ ኪፊሌቲ ዳቴሰ። ዘንጋልላ ዩጊዛ ሚሊ ጌሻሶሆዛ ገዶ ጌሎንታ ማላ፥ ኮይር ጎዳራ ኦይሴሊ ዋሊዳ።

7 ሄ ከላይ ጋርሳ ወርሴላ ፖቄን ኦርዲዳ ገሻሲኔ ፑዴ ሸቂሼ ለኢዛ ገሻሰ፥ ኪፊሌቲካ ፑዴ ሸቂዛ ዋዴ፥ አኪ አኪዲ ቤቴሰ። ኮይር ወይጌፔ ገዶ ፖቄዛራ ካንሊዲ፥ ወርሴላ ፖቄዛ ጋካናሰ ኤፊዛ ቆካቲ ዳቴሰ።

8 ታሊ ጸሳ ኩላ የሾን ጾቄ ጊዳ ባሳይ ዲዛይሳ በያዲሰ።
ኢዛ የሾን ዲዛ ከፊሌቲ ሄ ባሳ ቦላን ኬጾቲዳ፤ ሄ ባሳይ ጊዳ
ዳባባ፤ ኡሱቸን ዋቋ ጾቄሰ።

9-11 ሄ ከፊሌታስ ካሬ ባጋ ጎዳ ኦርዴቲላይ ኢቻሽ ዋቋ።
ከፊሌታ ጌሊዛ ናምኡ ፔንጌቲ፣ ኢሶይ ፑዴሃ ባጋራ፣ ኢሶይ ቃሴ
ዲጌሃ ባጋራ ዴቲስ፤ ቃሴ ሄ ከፊሌታ የሾን ዲዛ ባሳዛ ኣሆቲላይ
ኢቻሽ ዋቋ። ጸሳ ኩላ ባሳፔኔ ጊዳ ዳባባን ዲዛ ከፊሌታፔ ጊዳን
ዲዛ ሜላ ሶሆይ ናምኡ ታሙ ዋቋ።

ኣርሼ ጌሎሶ ባጋራ ኬጾቲዳ ኩላ

12 ጸሳ ከላፌ ኣርሼ ጌሎሶ ባጋራ ዲዛ ሜላ ሶሆ ጊናራ
ኢሲ ኬላይ ዴሰ። ሄ ኬላሰ ኣዲሳቲላይ ኡዲፋን ታሙ ዋቋ፤
ኣሆቲላይካ ላቸን ታሙ ዋቋ። ሄ ኬላ ጎዳይ ኢቻሽ ዋቋ ኦርዴ።

ጸሳ ኬላይ ዋቋቲዴሰ

13 ሄ ቢታኔይ ጸሳ ኬላሰ ካሬ ባጋ ዋቋዴሰ፤ ሂሰቲን
ኣዲሳቲላይ ጾቱ ዋቋ። ጸሳ ኬላ ዘኮሶፔ ቢዲ፣ ሄኒ ኣርሼይ
ወሊዛ ባጋ ኬላ ዘኮሶ ጋካናሰ ዲዛሶሆ ዋቋን፣ ጾቱ ዋቋ
ጊዲዴሰ።

14 ኣርሼ ኬላ ባጋራ ዲዛ ጸሳ ኬላ ኣሆቲላይ ናምኡ ሜላ
ሶሆታ ጉጂዲ ዋቋን ጾቱ ዋቋ ኣኬሰ።

15 ናምኡ ባጋራካ ዲዛ ካንሊዛ ሶሆታ ጉጂዲ ኣርሼይ ወሊዛ
ባጋራ ዲዛ ኬላ ኣዲሳቲላ ዋቋዴሰ፤ ሂሰቲን ጾቱ ዋቋ ጊዲዴሰ።

ጸሳ ኬላሰ ጊዳ ኦሶታ

ጸሳ ኬላ ጌሻ ሶሆይ፣ ኢዛ ቆልኣይኔ ኢዛ ዳራንቻይ

16 ወይጌፔ ቢዲ ማሰኮቲታ ጋካናሰ፣ ሚላን ሊጨቲ ኡቲዴሰ፤
ማሰኮቲቲካ ሚላን ሊጨቲ ኡቲዴ።

17-18 ጸሳ ኬላሰ ሶ ባጋ ከፊሌታ ጎዳይ ፔንጌታፔ ቦላ
ኣቋና ጋካናሰ፣ ዛምባታኔ ከሩቤታ ሚሰሌታን ኣሌቄቲ ኡቲዴሰ፤
ከፊሌታን የዪ ኣቋናሰካ ዛምባ ሚሰሌኒኔ ከሩቤ ሚሰሌን ዋላካን
ሜቋቲ ኡቲዴሰ። ከሩቤታሰ ኡባሰ ናምኡ ናምኡ ኣይፊሶይ ዴሰ።

19 ኢሲ ባጋራ ኣሳ ኣይፊሶ ሚሳቲዛይ ዛምባ ሚሰሌዛኮ
ጴሌሰ፤ ቃሴ ሃራ ባጋራ ጋሞ ኣይፊሶ ሚሳቲዛይ ዛምባ
ሚሰሌዛኮ ጴሌሰ።

20 ወይጌፔ ዴንዲ ቢዲ ፔንጌታፔ ቦላ ባጋን ዲዛሶሆ ጋካናሰ፣
ጌሻሶሆ ጎዳ የሾ ኡባይ ሄሳ ማላን ኣሌቄቲዴሰ።

21 ጸሳ ኬላ ፔንጌ ቆሲላላቲ ኡባይ ኦይዱ ዘዜ ጊዲዲ
ማሴቲዳይታ፤ ኢሰቲ ኡባይካ ኢሲ ጊና።

ሚላፌ ኦሴቲዳ ያርሾ ያርሺዛሶ

22 ኡባፌ አጁዳ ጌሻሶሆ ጌሊዛሶ ሲንላን ሚላፌ ኦሴቲዳ ያርሾ ያርሺዛሶ ሚሳቲዛይ ቤቴስ። ኢዚካ ኦይዱ ዘዜ ጌዲዲ ጌሳይ ሄሹ ዋቋ፣ አሆቴላይ ናምኡ ዋቋ፣ አዲሳቴላይ ናምኡ ዋቋ፤ ጉላቲ፣ ዮቻቲኔ ዘዜቲ ሚላፌ ኦሴቲዳ፤ ሄ ቢታኔይ ታና፣ «ሃይሲ ጎዳ ሲንላን ዲዛ ጸራጴዛ» ጌዴስ።

ጸሳ ኬላ ፔንጌታ

23 ጌሻ ሶሆዛስ ኢሲ ፔንጌይ ዴስ፤ ቃሴ ኡባፌ አጁዳ ጌሻ ሶሆዛስ ኢሲ ፔንጌይ ዴስ።

24 ኢሲ ኢሲ ፔንጌስ ጌዶን ዳኮቲዲ ዶዬቲዛ ናምኡ ሳንቃቲ ዴቴስ።

25 ጌሻሶሆ ጎዳታ ቦላ ኦሴቲዳ ማላ፣ ፔንጌታ ሳንቃታ ቦላካ ከሩቤታኔ ዛምባታ ሚሰሌይ ኦሴቲ ኡቲዴስ። ዳራንቻፔ ቦላ ባጋራ ሲንላራ ዲዛ ሳንቃይ ሚላፌ ኦሴቲዳይሳ።

26 ሄ ዳራንቻ ጎዳታ ሚሌን ማስኮቲቲ ዴቴስ። ናምኡ ባጋ ጎዳቲካ ዛምባ ሚሰሌን አሌቄቲዳ፤ ሃዲርሳ ባጋራኔ ኡሻቻ ባጋራ ዲዛ ከፊሌታስ ጴካ ባጋራ ካሚዛ ካራይ ዴስ።

42

ጸሳ ኬላ ማታን ኬጴቲዳ ናምኡ ኬላታ

1 ሄሳፌ ጉዬ ሄ ቢታኔይ ታና ፑዴሃ ባጋ ፔንጌራ ካሬ ዳባባ ካሌሊዴስ፤ ሂሰቲዲ ጸሳ ኬላ ጌዶ ዳባባ ጊምቤራ ኦይኬቲዳ ኬላኮ ታና ኤሂዴስ።

2 ሃ ኬላ ፔንጌይ ፑዴሃ ባጋ ሲሚዲ ጴቱ ዋቋ አዲሲኔ ኢቻሽ ታሙ ዋቋ አሆ።

3 ጌዶ ዛጎፔ ናምኡ ታሙ ዋቋ ሃኪዲ ቃሴ ሲንላ ባጋራ ካሬ ዛጎዛን ዲዛ ሂጴቲዳ ሹቻፌ ሲንላ ባጋራ ኢሶይ ኢሳኮ ጴሊዛ ሄሹ ዴሊ ዲዛ ፖቄይ ዴስ።

4 ሄ ከፊሌታ ፔንጌቲ ፑዴሃ ባጋ ጴሌቴስ፤ ኢስታፌ ሲንላ ባጋራ ታሙ ዋቋ አሆኔ ጴቱ ዋቋ አዴስ ጌዲዳ ጌዶራ ኣሊዛ ኦጌይ ዴስ።

5 ሄ ኬላስ ቦላ ሄሻንሉ ፖቄይ ናምኣንሎዛፔ ጴሜስ፤ ናምኣንላይ ቃሴ ኮይሮይሳፌ ጴሜስ። ጋሶይካ ኢስቲ ኢሶይ ኢሳፌ ጉዬ ሸቂ ሸቂዲ ጊምቤቲዳ ጌሻሳ።

6 ቃሴ ኢስቲ ሄቩ ፖቄ ጊዲዳ ገሻሳኔ ካሬ ዳባባን ዲዛ ሃራ ኬላታ ማላ ኢስታስ ቱሳይ ባይንዳ ገሻሳ፤ ሄሳ ገሻስ ቦላራ ዲዛ ፖቄ ከፊሌቲ ጋርሳ ባጋን ዲዛ ፖቄ ከፊሌታፔ ጸሜቱስ።

7 ሄ ከፊሌታፔ ሲንላ ባጋራ፥ ካሬ ዳባባ ጊደን ኢቻሽ ታሙ ዋቋ ኣዲቂዛ ዲርሳ ገምቤይ ዴስ።

8 ካሬ ዳባባ ባጋራ ዲዛ ከፊሌታ ኣዲሳቱላይ ኢቻሽ ታሙ ዋቋ ገዲሸን ጸሳ ኬላ ሲንላን ዲዛ ከፊሌታ ኣዲሳቱላይ ጸቱ ዋቋ ገዴስ።

9 ካሬ ዳባባፔ ጋሐ ጌሊዛ ዋዴ ኣርሼ ኬሳ ባጋራ ጋርሳ ከፊሌታ ጌሊዛ ፔንጌይ ዴስ።

10 ጸሳ ኬላፊ ዲጌሃ ባጋራ ካሬ ባጋን ዲዛ ገምቤራ ኦይኬቲ ኬጾቲዳ ካሬ ዳባባኮ ሲሚዳ ከፊሌቲ ዴቱስ።

11 ሄ ኬላ ከፊሌታ ሲንላን ኣሳይ ሄሚቲዛ ኦጌይ ዴስ። ሄ ኬላይ ፑዴሃ ባጋን ዲዛ ኬላራ ኢሲ ማላ፤ ኣዲሳቱላይ፥ ኣሆቱላይ፥ ከፊሌቲኔ ፔንጌቲ ኡባይ ኢሲ ጊና።

12 ዲርሳ ገምቤይ ወሪዛሶን ኣርሼ ኬሳ ባጋን ዲዛ ገምቤዛስ ዲጌሃ ባጋራ ዲዛ ከፊሌታ ጌሊዛሶ ፔንጌይ ዴስ።

13 ሄሳፊ ጉዬ ሄ ቢታኔይ ታና፥ «ሃይቲ ከፊሌቲ፥ ፑዴሃ ባጋራኔ ዲጌሃ ባጋራ ጸሳ ኬላ ካሬ ዳባባኮ ጸሊዛይቲ ቄሴታ ከፊሌታ። ኢስታ ጊደን ጎዳ ሲንላን ኦሊዛ ቄሴቲ ኡባፊ ኣጂዳ ጌሻ ቁማ ማና። ሄ ከፊሌቲ ጌሽ ጊዲዳ ገሻስ፥ ኡባፊ ኣጂዳ ጌሻ ኢሞታ፥ ሄይቲካ ካላ ያርሹ፥ ናጋራ ያርሹኔ ቆሆ ያርሹ ኡባ ኢስቲ ሄሳን ዋላና።

14 ጸሳ ኬላ ጌሊዳ ቄሴቲ ካሬ ዳባባ ኬዚዛ ዋዴ፥ ጎዳስ ኦሊዛ ዋዴ ማይኢዳ ጌሻ ማይኦ ኬሲዲ፥ ሄ ከፊሌታን ዋሶንታ ኬዜቲና። ጋሶይካ ማይኦቲ ጌሻ። ኢስቲ ካሬ ኣሳኮ ኬዚሼ ካሴ ማይኢዛ ሃራ ማይኦታ ማይኢዲ ኬሳናስ ኮሼስ» ገዴስ።

ጸሳ ኬላ ካሬ ባጋ ዩሾ

15 ሄ ቢታኔይ ጸሳ ኬላ ጊደ ዳባባን ዲዛ ኬላታ ዋቋ ወርሲዲ፥ ኣርሼ ኬሳ ባጋ ጸሊዛ ዲርሳ ፔንጌራ ታና ካሬ ኬሲዴስ። ሂስቲዲ ጸሳ ኬላ ሄራ ዩሼ ኣሊዲ ዋቋዴስ።

16 ዋቋዲዛ ጉፊ ኤኪዲ፥ ኣርሼ ኬሳ ባጋ ዋቋን፥ ኣዲሳቱላይ 500 ዋቋ ገዲዴስ።

17 ሲሚዲ ፑዴሃ ባጋ ሄ ጉፊዛን ዋቋዴስ፤ ሂስቲን 500 ዋቋ ገዲዴስ።

18 ሲሚዲ ዲጌሃ ባጋ ዋቋዴስ፤ ሂስቲን 500 ዋቋ ገዲዴስ።

19 ሲሚዲካ ኣርሼ ኬሳ ባጋ ዋዲዳስ፤ ኢዚካ 500 ዋዳ ጊዲዳስ።

20 ሄሳ ማላ ኦሲዲ ኢዚ ኦይዲ ባጋታካ ሚዛኒዳስ። ኢዛ ዩሾን 500 ዋዳ ኣዲቂዲ፥ 500 ዋዳ ኣኪዛ ዲርሳ ጊምቤይ ዳስ። ሄ ጊምቤይ ጌሻሶሆ ሃንኮ ጮ ሶሆፔ ሻካናሳ።

43

ጸሳ ኬል ሲሚዳ ጎዳ ቦንቾ

1 ሄሳፌ ጉዬ ሄ ቢታኔይ ታና ኣርሼ ኬሳ ባጋ ጸሊዛ ፔንጌኮ ኤሂዳስ።

2 ታኒ ኢስራኤሌ ጸሳ ቦንቾይ ኣርሼ ኬሳ ባጋፌ ዪዛይሳ ቤያዲስ። ኢዛ ዩሳ ጨንጉርሳይ ዳር ኪጸ ሃላ ጉንላ ማላ፤ ቃሴ ቢታይካ ኢዛ ቦንቾን ፖኢዳስ።

3 ታኒ ቤኢዳ ኣጂታይ ካሴ ጎዳይ ዬሩሳላሚ ካታማ ዳይሳናስ ዪዳ ዋዴ ቤኢዳ ኣጂታ ሚሳቲስ፤ ቃሴ ኮሪሬ ሻፋ ማታን ታኒ ቤኢዳ ኣጂታካ ሚሳቲስ። ሄሳ ቤያዳ ታኒ ሲንላ ጉል ጉፋናዲስ።

4 ጎዳ ቦንቾይ ኣርሼ ኬሳ ጸሊዛ ፔንጌራ ጸሳ ኬል ጊዶ ጌሊዳስ።

5 ሄ ዋዴ ጎዳ ኣያናይ ታና ፑዴ ዴንሊዲ ጊዶ ዳባባ ጌልሊዳስ፤ ሄኮ ጎዳ ቦንቾይ ጸሳ ኬል ኩሚዳስ።

6 ሄሳን ሄ ቢታኔይ ታ ሚሊን ኤቂ ዲሺን ኢሶይ ጸሳ ኬል ጊዶፌ ታስ ሃሳይሺን ታ ሲያዲስ።

7 ኢዚ «ሃይሶ ኣሳ ናዉ፥ ሃይሲ ታ ኣልጋ ሶሆኔ ታ ቶሆይ ዬዲዛ ሶሆ። ታኒ ኢስራኤሌ ኣሳ ጊዶን ሜርናስ ዳና። ሃይሳፌ ጉዬ ኢስራኤሌ ኣስ ጊዲን፥ ኢስታ ካዎቲላ ጊዲን፥ ሃራ ጸሳታስ ጎይኒዲ ዋይኮ ሹምፖይ ባይንዳ ባንታ ካዎታ ሃዉልቲ ጎይኖን ታ ጌሻ ሱንላ ቱኒሴቲና።

8 ዋኒዲ ጊኮ፥ ኢሲ ጎዳ ጸላላይ ታናኔ ኢስታኔ ሻኪን፥ ባንታ ፔንጌ ታይሳ ሚሊን፥ ባንታ ፔንጌ ሚላካ ታይሳ ሚሊን ዋሊዳ። ሂስቲዲ ባንታ ሹኒሲዛ ኦሶን ታ ጌሻ ሱንላ ቱኒሲዳ። ሄሳ ጊሻስ ታኒ ታ ሃንቆን ኢስታ ዳይሳዲስ።

9 ሃኢ ሲሚ ሃራ ጸሳታስ ጎይኒዛይሳ ኣጌቶ፤ ባንታ ካዎታ ሃዉልቲካ ታ ኣቻፌ ዲጌቶ። ሂስቲኮ ታኒ ኢስታ ጊዶን ሜርናስ ዳና።»

10 «ሃይሶ አሳ ናወ፥ ታኒ ኔና ቤሲዳ ጸሳ ኬላ ኢሰራኤል አሳሰ
ዮታ፤ ኢስቲ ባንቲ ኦሊዳ ናጋራን ዬላታና ማላ፥ ኢዛ ሜዳዛኔ ኢዚ
ኬዴቲዳ ማራ ኢስታሰ ዮታ።

11 ኢስቲ ባንቲ ኦሊዳይሳን ዬላቲዛይታ ገዲኮ፥ ጸሳ ኬላ
ሜዳ፥ ኢዚ ኬዴቲዳ ማራ፥ ኬዚዛ ሶሆታ፥ ጌሊዛ ሶሆታኔ ኢዛ
ኩሚላ ሚሰሊ ኢስታሰ ቆንጨሳ። ሄሳንካ ቃሴ ኢዛ ዋጋ ኡባኔ
ኢዛ ማራ ኡባ ኢስታ ኤሪሳ። ቃሴ ሄ ኬላይ ዋኒ ኬዴቲዳኮ፥
ኢስቲ ዋጋ ኡባ ናጋናሲኔ ፖላናሰ ዳንዳያና ማላ ኔኒ ኢስቲ
ዴሊሺን ጻፋ።

12 ጸሳ ኬላ ዋጋይ ሃይሳ፥ ጸሳ ኬላይ ኬዴቲዳ ዴሬ ሁኤይኔ
ኢዛ ዩሾን ዲዛ ሄራይ ኡባይ ኡባፌ አዲዳ ጌሻ ገዳና። ኤ፥ ጸሳ
ኬላ ዋጋይ ሃይሳ።

ያርሺዛሶ

13 «ያርሺዛሶይ ካሴ ጸሳ ኬላ ዋዲዛይሳንካ፥ ኢሲ ዋዳ ቦላ
ኦይዱ ቢራዴታ ጉጂዳ፥ አዱሳ ዋዳን ዋዴቲዳስ። ያርሺዛሶዛ
ባሳ ዩሾን ኢሲ ዋዳ ዚቁዛይሳኔ ኢሲ ዋዳ አከዛ ኦላይ ዴሰ፤
ሄ ኦላሰ ካሬ ባጋ ዶና ዩሾይ ኢሲ ታዳኮ አክሰ። ያርሺዛሶዛ
ዶቃቲላይ ሃይሳ ማላ።

14 ባሳፔ ቢዲ ኮይሮ ዩሾ ጋካናሰ ናምኡ ዋዳ፤ ናምአንሶ ዩሾይ
ኢሲ ዋዳ ሶኮ ሽቂ ዶሚዲ ኦይዱ ዋዳ ዶቁስ፤ ቃሴካ ኢሲ ዋዳ
ገዶ ሽቂዲ።

15 ያርሾይ ጸጌቲዛ ጮጮይ ዲዛ ሄሻንሶ ዩሾይ ኦይዱ ዋዳ
ዶቁስ። ኢዚ ኦይዱ ዘዜ ገዲዲ፥ ኦይዱ ጉላንካ ኢሲ ኢሲ
ካጮይ ዴስ።

16 ያርሾ ጸጌዛ ጮጮይ ኦይዱ ዘዜ ገዲዲ፥ አዱሳቲላይ
ታማኔ ናምኡ ዋዳ፥ አሆቴላይካ ታማኔ ናምኡ ዋዳ።

17 ሄሳሶካ ናምአንሶ ኬቻይ ኦይዱ ባጋራ ገና ገዲዲ
አዱሳቲላይ 14 ዋዳ፥ አሆቴላይካ 14 ዋዳ። ኢዛሰ ባጋ ዋዳ
ዘዜይኔ ዩዩ አዳናሰ ኢሲ ዋዳ ኦላይ ዴሰ፤ ያርሺዛሶዛ ዴካቲ
ኦርሺይ ዋኪዛሶ ባጋ ገናን ዴቲሰ» ገዴሰ።

18 ቃሴካ ኢዚ ታና፥ «ሃይሶ አሳ ናወ፥ ኡባ ሃሪዛ ጎዳይ፥
ያርሺዛሶ ዋጋይ ሃይሳ። ጸጌዛ ያርሾ ያርሻናሲኔ ሱላ አራጫናሰ፥
ያርሺዛሶ ገምቢዲ ፖሊዛ ጋላሰ።

19 ታኮ ሸቂዲ፡ ታስ አሊዛ ሳዶቄ ዛሬ፤ ዬሌቲዳ ሌዌ ዛሬ ቄሴታስ ናጋራ ያርሾ አላዳ ኢሲ ዋፋኖ ኢማ። ታኒ ኡባ ሃሪዛ ጎዳይ ሃይሳ የታይሰ።

20 ኔኒ ሄ ሱላፌ ኤካዳ፡ ኦይዱ ካጩታ፡ ናምኣንሉ ዩሾ ኦይዱ ዘዜዛኔ ሄ ዩሾስ ጋጸ ቲያ። ሄሳ ማላ አላዳ ያርሺዛሶዛ ቱናቴላፌ ጌሻ።

21 ቃሴ ናጋራ ያርሾስ ኢማቲዳ ሄ ዋፋና ኤካዳ፡ ጸሳ ኬላ ጊዲዲ፡ ጌሻ ሶሆ፤ ካሬ ባጋራ ኢዛስ ኣዛዜቲዳ ሶሆን ጸጋ።

22 « ሳንቴላ ጋላስ ቦሬይ ባይንዳ ዲዛ ኢሲ ዴይሻ ኦርጌ ኤካዳ ናጋራ ያርሾስ ያርሻ። ካሴ ዋፋኖዛ ሱላን ጌሺዳ ማላ፡ ሄ ዴይሻ ኦርጌዛ ሱላን ያርሺዛሶ ጌሻ።

23 ሂሰታዳ ቦሬይ ባይንዳ ዲዛ ኢሲ ዋፋኖ ቦሬይ ባይንዳ ዲዛ ኢሲ ጳርሾ ኤካዳ፡

24 ናምኣካ ጎዳ ሲንሐ ሸሻ። ሂሰቲዳ፤ ጉዬ ቄሴቲ ኢሰታ ቦላ ማጸኔ ዩጊዲ ጎዳስ ጸጌቲዛ ያርሾ ሂሰቲ ያርሹቶ።

25 « ሳፑን ጋላስ ኩሜሐ፡ ሃቶ ሃቶ ኢሲ ዴይሻ ኦርጌ ናጋራ ያርሾስ፡ ቃሴ ኢዛ ቦላ ቦሬይ ባይንዳ ዋፋኖ ኢሲ ጳርሾ ሸሻ።

26 ቄሴቲ ሳፑን ጋላስ ኩሜሐ ያርሺዛሶዛ ቱናቴላፌ ጌሹቶ። ሂሰቲዲ ጎዳስ ኢዛ ዲማሴቶ።

27 ሃ ጋላሳቲ ዉሪዛ ዋዴ፡ አሰፑንላ ጋላሳፌ ዶሚዲ፡ ቄሴቲ አንቴ ጸጌቲዛ ያርሾኔ አንቴ ኢሲፌቲላ ያርሾ ያርሺዛሶ ቦላን ያርሹቶ። ሄ ዋዴ ታኒ አንቴናን ኡፋዬታና። ታኒ ኡባ ሃሪዛ ጎዳይ ሃይሳ የታይሰ፡ ጌስ» ጊዴስ።

44

ኣርሼ ኬሳ ባጋ ፔንጌ ዋጋ

1 ሃሳፌ ጉዬ ሄ ቢታኔይ ታና ጉዬ ዛሬዲ ጸሳ ኬላስ ኣርሼ ኬሳ ባጋራ ዲዛ ካሬ ባጋ ዲርሳ ፔንጌኮ ኤሂዴስ፤ ኢዚ ኤሂዛ ዋዴ ዲርሳ ፔንጌይ ጎርዴቲ ኡቲዴስ።

2 ጎዳይ፡ «ታና ሃ ፔንጌይ ጎርዳን ዴኣና፤ አቲን ናምኣንሉ ዶዬቲና። አሲካ ኢዛራ ጌሌና፤ አይስ ጊኮ ጎዳ ኢሰራኤሌ ጸሳይ ኢዛራ ጌሊዴስ። ሃሳ ጊሻስ ሄ ፔንጌይ ጎርዳን ዳና።

3 ጊዲኮካ ኢሰራኤሌ ሃላቃይ ጎዳ ሲንላን ኡኬሐ ማናስ ሃሳን ኡታና ዳንዳዬስ። ፔንጌ ዳራንቻራ ኢዚ ጌላናሲኔ ኬዛናስ ዳንዳዬስ» ጊዴስ።

ጸሓፊ ከላ ጌሎ ዋጋ

4 ሄሳፌ ጉዩ ሄሳዴይ ታና ፑዴሃ ፔንጌኮ ኤፊዛ ኦጌራ ኤፊዴ፡ ጸሓፊ ከላሰ ሲንሳ ባጋ ጋሊዴሰ። ሄሳን ታኒ ጸሊዛ ዋዴ ሄኮ፡ ጎዳ ቦንቾይ ጸሓፊ ከላ ኩሚ ኡቲዳይሳ ቤያዲሰ፤ ቤያዳ ታ ሲንሳ ጉላ ጉፋናዲሰ።

5 ሂሰቲን ጎዳይ ታና፡ «ሃይሶ አሳ ናዉ፡ ጸሓፊ ከላ ዋጋታ ኡባኔ ኢዛ ማራታ ኡባ ጸሊዛይሳን ታኒ ኔሰ ዮቲዛይሳ ኔ ሃይሳን ሚንሳዳ ሲያ፤ ኔ አይፌንካ ሚንሳዳ ጸላ። ጸሓፊ ከላ ጌላናሲኔ ከዛናሰ ቤሲዛ አሳቲኔ ቤሶንታ አሳቲ አዋይታኮ ሚንሳዳ አኬካ።

6 ማካላንቻ ኢሰራኤል አሳሰ ኡባ ሃሪዛ ጎዳይ፡ «ኢንቴኖ ኢሰራኤል አሳቶ፡ ኢንቴ ኦሊዛ ቱና ኦሶይ ኤቆ።

7 ኢንቴ ታሰ ታ ቁማ፡ ሞጶኔ ሱላ ያርሾ ኦሊዲ ሺሺዛ ዋዴ፡ ዋዚናይኔ አሾይ ቃጻሬቶንታ አላጋ አሳታ ጸሓፊ ከላ ጌልሊዲ ኢሰቲ ኢዛ ቱኒሳና ማላ ኦሊዴታ። ኢንቴ ቱናቴላ ኡባ ቦላካ ጉጂዲ ታ ጫቆዛ ላሊዴታ።

8 ቃሴ ታ ጌሻ ሚሻታ ቦላ አዋቶንታ ኢዲዲ፡ ታ ከላን አላጋታ አዋሲዴታ።

9 ሄሳ ጊሻሰ ኡባ ሃሪዛ ጎዳይ፡ ኢሰራኤል አሳ ጊዶን ዲዛ አላጋ አሲ፡ ባ ዋዚናኒኔ ባ አሾን ቃጻሬቶንታይ፡ ኦኒኔ ታ ጸሓፊ ከላ ጌሎ።

ሌዌቲ ኤኪዛ ቁጻቴ

10 « ታፔ ሃኪዳ ሌዌቲ፡ ኢሰራኤል አሳይ ታና አጊዲ ዋራ ሲሚን፡ ባንታ ኤቃታሰ ጎይናናሰ ዋራ ሲሚዳይቲ ባንታ ቁጻቴ ኤኬቶ።

11 ጊዲኮካ ኢሰቲ ጸሓፊ ከላን ኦሳንቻ ጊዴቶ፤ ጸሓፊ ከላ ዲርሳ ፔንጌታ ናጌቶ፤ ጸሓፊ ከላ ኦሶካ ኦሌቶ። ኢሰቲ ጸጊዛ ያርሾኔ አሳይ ኤሂዛ ሃራ ያርሾ ሹኬቶ፤ ቃሴ አሳሰ ኦላናሰ ኢሰቲ አሳኮ ሺቁቶ።

12 ጊዶ አቲን ኢሰቲ ካሴ ኢሰራኤል አሳ ኤቃታሰ ጎይኒሲዳ ጊሻሲኔ አሳ ናጋራን ኦንጊዛ ቆጶ ጊዲዳ ጊሻሰ፡ ኢሰቲ ባንታ ናጋራ ቁጻቴ ኤካና ማላ ታኒ ኩሼ ዴንሳዳ ጫቃዲሰ። ታኒ ኡባ ሃሪዛ ጎዳይ ሃይሳ ዮታይሰ።

13 ኢሰቲ ቂሴ ጊዲዲ ኦላናሰ ታኮ ሺቁቲና፤ ዋይኮ ታሰ ዲማቲዳ ጌሻኮኔ ኡባፌ አጲዳ ጌሻኮ ሺቁቲና። ኢሰቲ ባንታ ኦሊዳ ቱና ኦሶ ጊሻሰ ዬላ ማይኤቶ።

14 ጊዲኮካ ኢሰቲ ጸሓፊ ከላን አዋታና ማላኔ ኢዛ ጊዶን ኦላናሰ ዲዛ ኦሶ ኡባካ ኦላና ማላ፡ ታኒ ኢሰታ ሱንላና።

ቄሴታ ዎጋ

15 « ሲገደ አቲን ኢስራኤል አሳይ ታና አገዲ፥ ዋራ ሲሚዳ ዋዴ፥ ጸሳ ኩላ ዎጋ አማኔቲዲ ፖሊዳ፥ ሌዌ ዛሬ ቄሴቲ ሳዶቄ ዛሬቲ ታስ ኦላናስ ታኮ ሸቄቶ። ሞጶኔ ሱላ ሺሺሼ፥ ኢስቲ ታ ሲንላን ኦሌቶ። ታኒ ኡባ ሃሪዛ ጎዳይ ሃይሳ ዮታይስ።

16 ጸሳ ኩላ ኢስቲ ጌሌቶ፤ ታስ ኦላናስ ታ ያርሺዛሶ ኢስቲ ሸቄቶ፤ አዋቴላካ ኢስቲ ኦይኬቶ።

17 ኢስቲ ጸሳ ኩላስ ጊዶ ዳባባ ጌሊዛ ዋዴ፥ ላይኖፔ ዳዴቲዳ ማይኦ ማይኤቶ፤ ጊዶ ዳባባ ፔንጌን ዋይኮ ጸሳ ኩላ ጊዶን ኦሊዛ ዋዴ፥ ሱፊ ማይኦ ማይኦፊቶ።

18 ኢስቲ ባንታ ሁኤን ላይኖ ሻሼ ጸጾቶ፤ ባንታ ጸሳንካ ላይኖ ሱፊ ጊጾቶ። ባና ጫዋሲዛ ሚሽ ኦይኮካ ማይኦፊቶ።

19 አሳይ ዲዛ ካሬ ዳባባ ኢስቲ ኬዚዛ ዋዴ፥ ጸሳ ኩላን ኦሊሼ ማይኢዳ ማይኦ ቃሪዲ ጌሻ ኪፊሌታን ዋሌቶ። ሂስቶንታ አገኮ ኢስቲ ባንታ ጌሻ ማይኦን አሳ ጎዳስ ጌሻና።

20 « ሳቄሴቲ ባንታ ሁኤ ሜዴቶፊቶ፥ ዋይኮ ባንታ ቢናና አዲሶፊቶ፤ ባንታ ሁኤ ሊኬን ቃንጸሴቶ።

21 አይ ቄሴይካ ጊዶ ዳባባ ጌሊዛ ዋዴ ዋይኔ ኡሹ ኡዮፖ።

22 ኢስታ አዚናይ ሃይቂዳ፥ ዋይኮ አንጄታ ቢዳ ማጫስ ማሾ ኤኮፊቶ። ኢስራኤል አሳፔ ጌላኦ ኤኬቶ፤ ዋይኮ አዚናይ ቄሴ ጊዲዲ ዲሼ ሃይቂዳ ማጫሳ ኤኬቶ።

23 « ሳቄሴቲ ጎዳስ ዱማቲዳይሳፊኔ ዱማቶንታ ጮ ዲዛይሳፊ ጊዶን ዲዛ ዱማቴላ ታ አሳ ታማርሴቶ። ቃሴ ጌሻፊኔ ቱናፔ ጊዶን ዲዛ ዱማቴላ ኢስታ ቤሴቶ።

24 አይ ሞቶይ ዴንዲኮካ ቄሴቲ ታ ዎጋይ ዮቲዛይሳ ማላ ፒርዴቶ። ታ ማራኔ ታ ዎጋ ናገዲ፥ ታ ባኦሌታ ቦንቼቶ፤ ታ ሳሞባታካ ዱማሲዲ ቦንቼቶ።

25 « ሳቄሴይ ሃይቂዳ አሃኮ ሸቂዲ ባና ቱኒሶፖ። ጊዲኮካ ሃይቂዳይሲ አዋ፥ ዋይኮ አዮ፥ ዋይኮ ዬሊዳ አቱማ ና፥ ዋይኮ ማጫ ና፥ ዋይኮ ኢሻ፥ ዋይኮ አዚና ጌሎንታ ሚሾ ጊዲኮ ቦቻና ዳንዳዬስ።

26 ጌዬዳፔ ጉዬ ላፑን ጋላስ ታኮ። ሄሳፊ ጉዬ ኢዚ ጌሽ ጊዳና።

27 ሄሳፌ ሲሚዲ ጌሻሶሆን ኦላናሰ ጊዶ ዳባባ ቢዛ ጋላሰ፡
ባ ናጋራሰ ያርሾ ሺሾ። ታኒ ኡባ ሃሪዛ ጎዳይ ሃይሳ ዮታይሰ።

28 « ሳቤታሰ ላታይ ባዋ፤ ታኒ ኢሰታሰ ላታ። ኢሰራኤል
ቢታን ኢሰታሰ ኣይ ላታ ኢሞፍቴ፤ ኢሰታ ላታይ ታና።

29 ኢሰቲ ካላ ያርሾ፤ ናጋራ ያርሾኔ ቆሆ ያርሾ ሜቶ። ኢሰራኤል
ቢታን ጎዳሰ ዱማቲዳይ ኡባይ ኢሰታሳ።

30 ኮይሮ ጋኪዛ ዱማ ዱማ ካላሰ ኮይሮ ኣይፌይኔ ኢንቴ ጎዳሰ
ኢሚዛ ኢሞታ ኡባይ ቄሴታሳ። ኢንቴ ኬላን ኣንጃይ ሸምፓና ማላ፡
ኢንቴ ጳሌፌ ኮይሮ ኩሼ ኢሰታሰ ኢሚቴ።

31 ቄሴቲ ባዉቲዳይሳ ወይኮ ዶኣይ ወጲዳይሳ ካፎ ኣሾ ጊዲን፡
ሜሄ ኣሾ ጊዲን ኣይኮካ ሞፔቶ።

45

ጎዳሰ ዱማቲዛ ጌሻ

1 « ሳቤታ ኢንቴ ላታናሰ ሳማን ሻኪዛ ወዴ፡ ሄ ቢታፌ ኢሲ
ሳማ ጎዳሰ ዱማሲዲ ወሊቴ። ሄሲካ ታማኔ ናምኡ ኪሎ ሜቲሬኔ
ባጋ ኣዱቁዛኔ ታሙ ኪሎ ሜቲሬ ኣኪዛ ሶሆ ጊዶ። ሄ ሶሆይ
ሙሉካ ጌሻሶሆ ጊዶ።

2 ሄ ሶሆፔ ኣዱሳቲላይ 500 ዋቋ፡ ኣሆቴላይካ 500 ዋቋ
ጊዲዳ ኦይዱ ጉላይ ዲዛይ ጸሳ ኬላሰ ጊዶ፤ ኢዛ ዩሾን ኢቻሽ
ታሙ ዋቋ ጊዲዳ ዶያ ሶሆይ ዴዮ።

3 ሄ ጎዳሰ ዱማቲዳ ሶሆፔ ኣዱሳቲላይ ታማኔ ናምኡ ኪሎ
ሜቲሬኔ ባጋ፡ ኣሆቴላይ ቃሴ ኢቻሽ ኪሎ ሜቲሬ ጊዲዳ ሶሆ
ዋቋዳ ሻካ። ሄ ሶሆይ ኡባፌ ኣጲዳ ጌሻ ሶሆይ ጸሳ ኬላሰ ጊዶ።

4 ሄሲ ጸሳ ኬላ ጊዶን ጎዳሰ ኦላናሰ፡ ኢዛኮ ሸቂዛ ቄሴታሰ
ዱማቲዳ ጌሻሶሆ ጊዶ፤ ቃሴ ኢሰቲ ባንታ ኬላ ኬጸዛ ሶሆኔ
ጸሳ ኬላሰካ ጌሻሶሆ ጊዶ።

5 ቃሴ ኣቲዛ ታማኔ ናምኡ ኪሎ ሜቲሬ ባጋ ኣዱቁዛኔ ኢቻሽ
ኪሎ ሜቲሬ ባጋ ኣኪዛ ሶሆይ ጸሳ ኬላን ኦሊዛ ሌዌታሰ ላታ
ጊዶ፤ ኢሰቲ ባሰ ዴኢዛ ካታማታ ሄሳን ኬጾቶ።

6 « ሳቤ ጎዳሰ ዱማቲዳ ሶሆዛ ሚሊን ታማኔ ናምኡ ኪሎ
ሜቲሬኔ ባጋ ኣዱቁዛኔ ናምኡ ኪሎ ሜቲሬኔ ባጋ ኣኪዛ ሶሆይ
ካታማ ኬጸናሰ ዴኦ፤ ሄ ሶሆይ ኢሰራኤል ኣሳሰ ኡባሰ ጊዶ።

ኢሰራኤል ሃላቃሰ ኢሚቲዳ ጌሻ

7 « ሲሰራሌ ሃላቃስ አሜቲዳ ገሻይ ናምኡ ባጋራካ ጎዳስ ደማቲዳ ሶሆኒኔ ካታማ ሶሆን ዛዋቲስ። እዚ ኣርሼ ጌሎሶ ባጋራ ሜዲቲራኔ ኣባ ጋኬስ፤ ኣርሼ ኬሳ ባጋራ ቢዲ ኢሰራሌ ቢታ ዛዋ ጋኬስ፤ ኢዛስ ኣዲሳቲሳይካ ኢሲ ቆሞስ አሜቲዛ ጸንጾ ገና ገዴሰ።

8 ሄ ገሻይ ኢሰራሌ ቢታ ሃላቃስ ላታ ጋዴ ገዶ። ሃይሳፌ ሲንላን ታ ሃላቃቲ ታ ኣሳ ዋዪሶፔቶ፤ ኢሰቲ ኢሰራሌ ኣሳይ ኡባይ ባ ዛሬን ዛሬን ጋዴ ኤካና ማላ ኦሌቶ።

ሃላቃስ አሜቲዳ ዋጋ

9 « ሱባ ሃሪዛ ጎዳይ፡ አንቴኖ ኢሰራሌ ሃላቃቶ፡ አንቴስ ሃኢ ገዳና! አንቴ ሻባርሲዛይሳኔ ኣሳ ኡንኤሊዛይሳ ኣገቲ፤ ሱሪ ፒርዳኔ ጸሎቱላ ኦሊቴ። ታ ኣሳ ኢሰታ ላታ ቢታፌ ቆቃሊዲ ጎዲዛይሳ ኣገቲ። ታኒ ኡባ ሃሪዛ ጎዳይ ሃይሳ ዮታይስ።

10 አንቴ ኡባሲካ ሊኬ ጌዳራይኔ ማካ ሚሺ ዴኦ።

11 አንቴስ ማካ ሚሻስ ገዶ ገዲዛ ሆሜሬ ጌቲቲዛ ማካ ሚሽ ዴኦ፤ ኢሲ ባዶሴይ ሆሜሬስ ታማፌ ኢሲ ኩሼ ገዲሺን፡ ኢሲ ኤፌይ ሆሜሬስ ታማፌ ኢሲ ኩሼ ገዴስ። ሆሜሬይ ናምኡ ጌዳራታሲካ ኤሬቲዳ ማካ ጌዳራ ሚሽ ገዶ። *

12 ኢሲ ሳቂሌይ ናምኡ ታሙ ጌራ ገዴስ፤ ናምኡ ታሙ ሳቂሌ ቦላ ናምኡ ታማኔ ኢቻሽ ሳቂሌ ቃሴካ ታማኔ ኢቻሽ ሳቂሌ ጉጂሺን ኢሲ ሚናኔ ገዴስ። †

13 « ሱንቴ አሞታ አሚሼ ሃይሳ ማላ ሂሰቲ አሚቴ። አንቴ ቡኪ ሺሺዛ ገሰቲፌ ኡሱፑን ታማፌ ኢሲ ኩሼ፡ ባንጋፌ ኡሱፑን ታማፌ ኢሲ ኩሼ፡

14 ቃሴ ዋጋራ ዛይቲፔ ጴታፔ ኢሲ ኩሼ አሚቴ። ሃይታ ሜዛኒዛ ዋዴ፡ ኔኒ ማኪዛ ሚሻይ ባቲ ገዶ። ታሙ ባቲይ ኢሲ ሆሜሬ ዋይኮ ኢሲ ኮሬ ገዴስ።

15 ኢሰራሌ ኣሳይ ሂሚዛ ናምኡ ናምኡ ጴቲ ሜሄይ ዲዛ ኢሲ ዉዴፔ ኢሲ ኢሲ ሜሄ አሚቴ። ሄይቲ ኣሳ ናጋራ ኣቶ ገሳናስ ካላ ያርሾ፡ ጸጌቲዛ ያርሾኔ ኢሲፌቲላ ያርሾ ገዴቶ። ታኒ ኡባ ሃሪዛ ጎዳይ ሃይሳ ዮታይስ።

16 ቢታን ዲዛ ኣሳይ ኡባይ ሃይሳ ኡባ ኢሰራሌ ሃላቃስ አሞ።

* 45:11 ኢሲ ሆሜሬይ ናምኡ ጴታኔ ናምኡ ታሙ ከሎ ገራሜ ዋይኮ ናምኡ ጴታኔ ናምኡ ታሙ ሊቲሮ ገዴስ። † 45:12 ኢሲ ሳቂሌይ ታማኔ ኢሲ ገራሜኔ ባጋ ዴዴስ።

17 ሃላቃዚ ኢስራኤል አሳይ ቦንቹዛ ባኣሌታን፡ ኣገናይ ጸሪዛ ጋላሳታኒኔ ሳምባታታን ጸጊዛ ያርሾታ፡ ካላ ያርሾታኔ ኡሻ ያርሾታ ሺሺ ኢሞ። ኢስራኤል አሳ ናጋራ አቶ ጊሳናስ፡ ናጋራ ያርሾታ፡ ካላ ያርሾታ፡ ጸጌቲዛ ያርሾታኔ ኢሲፌቲላ ያርሾታ ኡባ ኢዚ ሺሺ ኢሞ።

18 « ሓባ ሃሪዛ ጎዳይ፡ ኮይሮ ኣገናን፡ ኮይሮ ጋላስ ቦሬይ ባይንዳ ዲዛ ኢሲ ዋፋኖ ጸሳ ኬላ ጌሻናስ ሺሻ።

19 ቄሴይ ሃ ናጋራ ያርሾ ሱላፌ ኤኪዲ፡ ጸሳ ኬላ ፔንጌ ቆሲላላታ፡ ያርሺዛሶ ዩሾን ዲዛ ኦይዱ ዘዜታኔ ጊዶ ዳባባ ኤፊዛ ዲርሳ ፔንጌ ቆሲላላታ ቲዮ።

20 ኦኒካ ቆፖንታ ዋይኮ ኤሮንታ ኣገዲ ኦሊዳ ናጋራ አቶ ጊሳናስ፡ ኣገናስ ላፑንላ ጋላሳን ሄሳ ማላንካ ኦላ። ሂስታዳ ጸሳ ኬላ ቱናቲላፌ ጌሻ።

21 « ሐይሮ ኣገናን፡ ታማኔ ኦይዳንሉ ጋላሳን ፓዚጋ ባኣሌ ቦንቹቲ፤ ቃሴ ላፑን ጋላስ ጋካናስ ኢርሾይ ጌሎንታ ኡኬላ ሚቲ።

22 ሄ ኮይሮ ጋላሳን ሃላቃይ ባ ጊሻሲኔ ባ አሳ ጊሻስ ናጋራ ያርሾ ኦሊዲ ኢሲ ዋፋኖ ሺሺ ኢሞ።

23 ሄ ባኣሌይ ቦንቹቲዛ ላፑን ጋላሳታን ሃኙ ሃኙ ላፑን ዋፋኖታኔ ላፑን ቆሪሾታ ኡባይካ ቦሬይ ባይንዳ ቦላራ ዲዛይታ ጸጌቲዛ ያርሾ ኦሊዲ፡ ጎዳስ ሺሾ። ሄሳራካ ኢሲፌ ናጋራ ያርሾስ ሃኙ ሃኙ ኢሲ ዴይሻ ኦርጌ ሺሺ ኢሞ።

24 ኢሲ ኢሲ ዋፋኖኔ ኢሲ ኢሲ ቆርሾ ያርሺዛ ዋዴ፡ ካላ ያርሾስ ታማኔ ላፑን ኪሎ ጊራሜ ጊስቲኔ ሄሹ ሄሹ ሊቲሮ ዛይቲ ሺሺ ኢሞ።

25 « ላፑንላ ኣገናን፡ ታማኔ ኢቻሻንላ ጋላሳን ዶሚዛ ላፑን ጋላስ ባኣሌ ዋዴን ኡባን፡ ናጋራ ያርሾ፡ ጸጌቲዛ ያርሾ፡ ካላ ያርሾኔ ዛይቲ ካሴይሳፌ ዱማሶንታ ሃላቃይ ሺሺ ኢሞ።

46

ያርሾ ዋጋ

1 « ሓባ ሃሪዛ ጎዳይ፡ ጊዶ ዳባባ ጌልሊዛ ኣርሼ ኬሳ ባጋ ዲርሳ ፔንጌይ ኦሶ ጋላስ ኡሱፑናታንካ ጎርዴቲ ጋምኦ፤ ጊዶ ኣቲን ሳምባታ ጋላሲኔ ኣገናይ ጸሪዛ ጋላስ ዶዬቶ።

2 ኢስራኤል አሳ ሃላቃይ ዲርሳስ ፔንጌ ባጋ ዳባባፔ ጌሊዛ ዳራንቻ ባጋራ ጌሊዲ፡ ዲርሳ ፔንጌ ሚላ ማታን ኤቆ። ቄሴቲ ኢዚ ኢሚዳ ጸጌቲዛ ያርሾኔ ኢሲፌቲላ ያርሾ ያርሾቶ። ኢዚ

ሄሳን ዲርሳ ፔንጌን ጎይኒ ሲሟዲ ካሬ ከዞ። ጌዶ አቲን ዲርሳ ፔንጌይ ኦማርሳና ጋካናስ ጎርዴቶ።

3 ሄ ቢታ አሳይካ ሳምባታኒኔ አገናይ ጸጋዛ ዋዴን ሄ ጌዶ ዳባባ ዲርሳ ፔንጌ ጌሊዛሶን ጎዳ ሲንላን ጎይኔቶ።

4 « ሃላቃይ ሳምባታ ጋላስ ጎዳስ ጸጌቲዛ ያርሾ ኦሊዲ፥ ኡሱፑን ዶርሳ ላቃኔ ኢሲ ጳርሾ፥ ኡባይካ ቦሬይ ባይንዳ ዲዛይታ ሺሾ።

5 ኢሲ ጳርሾራ ታማኔ ላፑን ኪሎ ጌራሜ ካላ ያርሾ ሺሾ። ዶርሳ ላቃታራ ሺቂዛ ካላ ያርሾይ ሃላቃይ ባስ ሺሻናስ ኮዪዳይሳ ከና ሺሺ ኢሞ። ቃሴ ታማኔ ላፑን ኪሎ ጌራሜ ካላራ ሄሹ ሄሹ ሊቲሮ ዛይቲ ሺሺ ኢሞ።

6 አገናይ ጸጋዛ ጋላስ ጋላስ ቃሴ ኢሲ ዋፋኖ፥ ኡሱፑን ዶርሳ ላቃኔ ኢሲ ጳርሾ፥ ቦሬይ ባይንዳ ቦላራ ዲዛይታ ኡባ ሺሺ ኢሞ።

7 ኢሲ ኢሲ ዋፋኖኔ ኢሲ ኢሲ ጳርሾ ያርሺዛ ዋዴ፥ ካላ ያርሾስ ታማኔ ላፑን ኪሎ ጌራሜ ገሰቲኔ ሄሹ ሄሹ ሊቲሮ ዛይቲ ሺሺ ኢሞ። ዶርሳ ላቃታራ ሺቂዛ ካላ ያርሾይ ሃላቃይ ባስ ሺሻናስ ኮዪዳይሳ ከና ጌዶ።

8 ሃላቃይ ጌልሊሹ፥ ዲርሳ ፔንጌ ዳራንቻራ አዲዲ ጌሎ፤ ከዚሽካ ሄሳራ ከዞ።

9 « ረጌዶ አቲን ሄ ቢታ አሳይ ባኣሌ ጋላስ ጎዳ ሲንላን ጎይናናስ ዪዛ ዋዴ፥ ጎይናስ ፑዴሃ ባጋ ፔንጌራ ጌሊዳይቲ ዲጌሃ ባጋ ፔንጌራ ከዜቶ፤ ቃሴ ዲጌሃ ባጋ ፔንጌራ ጌሊዳይቲ ፑዴሃ ባጋ ፔንጌራ ከዜቶ። አይ አሲኔ ባ ሲንላን ዲዛ ፔንጌራ ሲቲ ጌዲ ከዞ አቲን ባ ጌሊዳሶራ ከዞ።

10 ኢስቲ ጌሊዛ ዋዴ ሃላቃይ ኢስታራ ጌሎ፤ ኢስቲ ከዚዛ ዋዴካ ኢስታራ ከዞ።

11 « ሱፋይሳ ጋላሳታኒኔ ላይላ ባኣሌታን ኢሲ ኢሲ ዋፋኖራኔ ኢሲ ኢሲ ጳርሾራ ሺቂዛ ካላ ያርሾይ ታማኔ ላፑን ኪሎ ጌራሜ ገሰቲኔ ሄሹ ሄሹ ሊቲሮ ዛይቲ ጌዶ። ቃሴ ዶርሳ ላቃታራ ሺቂዛ ያርሾይ ሃላቃይ ባስ ሺሻናስ ኮዪዳይሳ ከና ጌዶ።

12 ሃላቃይ ባ ዶሳን ኢሚዛ ያርሾ፥ ጸጌቲዛ ያርሾዛ፥ ዋይኮ ኢሲፌቲላ ያርሾዛ ጎዳስ ኤሂዛ ዋዴ፥ ኣርሼይ ሞኪዛሶ ባጋ ጌዶ ዳባባ ፔንጌይ ኢዛስ ዶዬቶ። ባ ጸጌ ሺሺዛ ያርሾዛ ዋይኮ ኢሲፌቲላ ያርሾ ሳምባታ ጋላስ ኢዚ ሺሺዛ ማላ ሺሺ ኢሞ። ሂስቲዲ ኢዚ ከዚዲ ቢን ዲርሳ ፔንጌይ ጎርዴቶ።

ሃቶ ሃቶ ሺሺዛ ያርሾ

13 « ሃላቃይ ሃች ሃች ቦሬይ ባይንዳ ቦላራ ዲዛ ኢሲ ላይላ ጊዲዳ ኢሲ ደርሳ ጸጊዛ ያርሾ ኦሊዲ ጎዳሰ ሺሺ አሞ፤ ኢዚ ሄሳ ማላዶ ማላዶ ፓጩይ ባይንዳ ኤሆ።

14 ሄሳራካ ናሞኡ ከሎ ጊራሜ ጳሌይ ኢሲ ሊቲሮ ዛይቲን ሙኑቄቲዲ፥ ማላዶ ማላዶ ካላ ያርሾ ጊዲዲ ሺቆ። ሃይሲ ኢንቲ ጎዳሰ ሃች ሃች ሺሺዛ ያርሾ ዋጋ።

15 ሃይሲ ሲሚ ጳርሾይ፥ ካላይኔ ዛይቲይ ፓጩይ ባይንዳ ማላዶ ማላዶ ጸጊቲዛ ያርሾ ጊዲ ሺቃናሰ ቤሴሰ።

ሃላቃ ጋዴስ አሜቲዳ ዋጋ

16 « ሉባ ሃሪዛ ጎዳይ፥ ሃላቃይ ባ ጋዴፔ ሻኪዲ፥ ባ አቱማ ናይታፔ ኢሳስ አሚኮ፥ ሄሲ ሄ ናዛሲኔ ኢዛ ናሰ ላታ ጊዴሰ።

17 ጊዶ ኣቲን ሃላቃይ ባ ጋዴፔ ሻኪዲ ባ ኣይሌታፔ ኢሳስ አሚኮ፥ ኢቻሽ ታማንላ ላይላ ባኣሌይ ጋካናሰ ሄ ጋዴይ ኢዛይሳ። ሄሳፌ ጉዬ ሃላቃስ ሲሞ፤ ሄሲ ሃላቃስ ጊዲዳ ጊሻሰ ሜርናሰ ኢዛሲኔ ኢዛ ናይታስ ላታ ጊዴሰ።

18 ሃላቃይ ኣስ ሱጊዲ ኣሳ ላታ ጋዴ ዋልቃን ኤኮፎ። ታ ኣሳይ ባ ላታ ጋዴፔ ቆቃሌቶንታ ማላ፥ ኢዚ ባ አቱማ ናይታስ ባ ጋዴፔ አሞ ጌሰ» ጊዴሰ።

ያርሾ ዶይሲዛ ሶሆታ

19 ሄሳፌ ጉዬ ሄ ቢታኔይ ታና ፑዴሃ ጸሊዛ ጌሽ ጊዲዳ ቄሴታ ከፊሌታኮ ጌሊዞሶ ኤሂዴሰ። ሄይቲካ ጊዶ ዳባባኮ ጋሊዛ ዲጌሃ ባጋ ዲርሳ ፔንጌ ማታን ዲዛይታ። ኢሰታፌ ኣርሼ ጌሎሶ ባጋራ ኢሲ ሶሆ ኢዚ ታና ቤሲዴሰ።

20 ሄ ሶሆይ ቄሴቲ ናጋራ ያርሾኔ ቆሆ ያርሾ ዶይሲዛ ሶሆኔ ካላ ያርሾ ኡኪዛ ሶሆ፤ ሃ ሶሆን ጎኤቲዛ ጋሶይካ ሄ ጌሻ ያርሾታ ኣሳኮ ካሬ ዳባባ ኬሲን፥ ኣሳይ ጌሻ ሚሽ ቦቺዲ ጌዮንታ ማላ ናጋናሳ።

21 ሄሳፌ ጉዬ ሄ ቢታኔይ ታና ካሬ ባጋ ዛጎ ኤፊዲ ሄ ዛጎዛሰ ኦይዱ ጉላ ታና ዩሺዴሰ። ሄ ዳባባ ዘዜን ኡባንካ ቄሪ ዳባባቲ ዲዛይታ ቤያዲሰ።

22 ኢሰታስ ኡባሲካ ዛጎይ 40 ዋቋ፤ ኣሆቴላይካ 30 ዋቋ፤ ኦይዱ ጉላን ዲዛ ዳባባቲካ ኢሲ ጊና።

23 ሄ ኦይዱ ዳባባታ ዩሾንካ ሹቻ ገምቤይ ዴሰ፤ ቃሴ ገምቤዛ ላንቄዛን ኢዛኮ ሺቂዲ ኦሴቲዳ፥ ኢሰታስ ታማ ኤሊዛሶሆቲ ዴቲሰ።

24 ሄ ቢታኔይ ታና፥ «ሃይቲ ኡባይ ጸሳ ኬላን ኦሊዛይቲ ኤሂዛ ያርሾ ዶይሲዛ ሶሆታ» ጌዴስ።

47

ጸሳ ኬላ ጋርሳፌ ፑልቲዛ ሃላ

1 ሄ ቢታኔይ ዛሪዲ ታና ጸሳ ኬላ ጌሊዛሶ ኤፊዴስ። ጸሳ ኬላ ጌሊዛ ፔንጌፌ ጋርሳራ ሃላይ ፑልቲዲ፥ ጸሳ ኬላፌ ኣርሼ ኬሳ ባጋ ጎጌስ። ጋሶይካ ጸሳ ኬላ ፔንጌይ ኣርሼይ ሞኪዛሶ ሲሚ ዲዛ ጊሻሳ፤ ጸሳ ኬላስ ዱጌሃ ባጋራ ዱጌ ጎጌዲ፥ ያርሺዛሶፔ ዱጌሃ ባጋራ ካንፊስ።

2 ኢዚ ታና ፑዴሃ ፔንጌ ባጋራ ኬሲዲ፥ ኣርሼኮ ጸሊዛ ፔንጌ ዩሾራ ካሌሊዲ ኤፊዴስ። ሄ ፔንጌፌ ዱጌሃ ባጋራ ሃሊ ጎጌስ።

3 ሄ ቢታኔይ ሜዛኒዛ ሜቲሬ ባ ኩሼን ኦይኪዲ፥ ኣርሼ ኬሳ ባጋ ቢዲ ጎጌዛ ሃላ ካሊዲ 1,000 ዋታ ዋቋዴስ። ታናካ ሃላራ ካሌሊ ፔንሊዴስ፤ ሃላዚ ታስ ቂርጹ ጋኬስ።

4 ናሞኣንላካ 1,000 ዋታ ዋቋዴዲ ሃላራ ታና ካሌሊ ፔንሊዴስ። ሃላይ ታስ ጉልባቲ ጋኬዴስ። ቃሴ 1,000 ዋታ ዋቋዴዲ ታና ሃላራ ካሌሊ ፔንሊዴስ። ሄ ዋዴ ሃላዚ ታስ ጸሳ ጋኬዴስ።

5 ኢዚ ቃሴካ 1,000 ዋታ ዋቋዴዴስ። ጌዶ ኣቲን ሄ ሃላዚ ዳር ጨማ ጌዲዳ ጊሻሰ ታኒ ፒናናሰ ዳንዳያቤኬ፤ ኢዚ ኣሲ ዋቋንታ ፒናናሰ ዳንዳያንታ ሻፋ ጌዲዴስ።

6 ሄ ቢታኔይ ታና፥ «ሃይሶ ኣሳ ናዉ፥ ሃይሳ ቤያዲ?» ጌዴስ። ሄሳፌ ጉዬ ኢዚ ታና ሻፋ ጋጸኮ ጉዬ ዛሪዴስ።

7 ታኒ ሲማዳ ሄ ጋኪዛ ዋዴ፥ ሻፋዛ ዶናን ሃ ባጋራኔ ሄ ባጋራ ኬሂ ዳሮ ሚሊ ዲዛይሳ ቤያዲስ።

8 ኢዚ ታና፥ «ሃላይ ኣርሼ ኬሳ ባጋ ቢታኮ ጎጌዲ ኣራቤ ዙሊን ጌሌስ። ኢዚ ሄሳን ጎጌዲ ማጺኔ ኣባን ጌሊዛ ዋዴ ሄ ሃላዚ ኦራጺዲ ጺሎ ሃላ ኬዜስ።

9 ሃ ሻፋይ ጎጌዲ ቢዛ ሶሆን ዲዛ፥ ሾሞኡሾሞኡ ጊዛ ሜጴቲላቲ ኡባይ ፓጻ ዳና፤ ቃሴ ሄ ሻፋይ ሄ ጎጌዲ ኣባ ሃላ ኦራጺሲዲ ጺሊሲዛ ጊሻሰ፥ ቆዳን ዳር ጮራቲዳ ሞሌቲ ሄን ዳና። ሄሳፌ ዴንዲዳይሳን ሄ ሻፋይ ጎጌዛሶን ዲዛይ ኡባይ ፓጻ ዳና።

10 ሞሌ ኦይኪዛይቲ ኣባ ዶናን ኤቃና፤ ኤን-ጋዴፔ ቢዲ ኤን-ኤገላይሜ ጋካናሰ ዲዛ ሶሆይ ሞሌ ጌቲ ሚጨዛሶሆ ጌዳና።

ሜዲቴራኔ አባን ዲዛ ሞሌታ ማለ፥ ሄሳንካ ዳር ዲማ ዲማ ቆሞ ሞላቲ ደና።

11 ጊደ አቲን አባ ደናን ዲዛ ጫሬይኔ ኤሌ ሃሊ ማጸኔ ጊዲዲ አታናፔ አቲን ኦራጾና።

12 ሄ ሻፋ ደናን ሃ ባጋራኔ ሄ ባጋራ አይፌ አይፊዛ ዳር ዲማ ዲማ ቆሞ ሚላቲ ሞኬቲስ። ኢስታ ቦንጮይ ቆቆፊቲና፤ አይፊዛይሳካ አጌቲና። ጸሳ ኬላፌ ኬዚዛ ሃሊ ኢስታኮ ጎጊዛ ጊሻስ ኢስቲ አጊናን አጊናን ኦራላ አይፌ አይፋና። ኢስቲ አይፊዳ አይፊይ ቁማ ጊዳና፤ ኢስታ ሃይላቲካ ቆሌ ጊዳና» ጌስ።

ቢታ ዛዋታ

13 ኡባ ሃሪዛ ጎዳይ፥ «ኢስራኤል ዛሬታስ ታማኔ ናምኣታስ ቢታ ላታ ጋዴ ኦላዳ ኔኒ ሻካና ዛዋይ ሃይሳ። ዮሴፌ ዛሬታስ ናምኡ ጊሻይ ኢሜቶ።

14 ታኒ ካሴ ኢንቴ አዋታስ ሃ ቢታ ላቲሳናስ ታ ኩሼ ዴንላ ጫቃዲስ፤ ሃኢ ኢንቴ ኡባይካ ኢሲ ጊና ሻኬቲ ላቲቱ።

15 ቢታስ ፑዴሃ ባጋ ዛዋይ ሃይሳ፡

«ሜዲቴራኔ አባፌ ዴንዲዲ ሄቲሎኔ ካታማኔ ሃማቲ ፒንሐ ካንሊዲ ጴዳዴ ካታማ ጋኬስ።

16 ሄሳፌ ቃሴ ዳማስቆፌኔ ሃማቲፔ ጊደ ዛዋን ዲዛ ቤርታኔ ሲብራይማ ካታማታ ካንሊዲ ሃዉራኔ ዛዋን ዲዛ ቲኮና ካታማ ጋኬስ። *

17 ሄሳ ጊሻስ ኢስራኤል ዛዋይ ሃማቲ ቢታ ፑዴሃ ባጋን አጊዲ፥ ሜዲቴራኔ አባፌ አርሼ ኬሳ ባጋራ ቢዲ፥ ዳማስቆ ቢታ ዛዋን ዲዛ ሃጸሬ-ኤናኔ ካታማ ጋኬስ።

18 «አርሼ ኬሳ ባጋ ዛዋይ ሃጸሬ-ኤናናፔ ዴንዲዲ፥ ዳማስቆፌኔ ሃዉራኔፔ ጊደራ ካንሊስ። ሄሳፌ ቃሴ ኢስራኤሊፔኔ ጋላአዴፔ ጊደን ዲዛ ዮርዳኖሴ ሻፋን ዛዋቲሼ፥ ማጸኔ አባ ካንሊ ቢዲ ታማሬ ካታማ ጋኬስ።

19 «ዴጌሃ ባጋ ዛዋይ ታማሬፔ ዴንዲ ቢዲ፥ ማሪባ ቃዴሴን ዲዛ ፑልቶዛን ጋኬስ። ሄሳፌ ፑዴሃ ባጋፌ አርሼ ጌሎሶ ባጋ ኦይኪዲ ጊብጾ ሻፋ ካሊ ቢዲ ሜዲቴራኔ አባ ጋኬስ።

20 «አርሼ ጌሎሶ ባጋ ዛዋይ ሜዲቴራኔ አባ ጊዲዲ፥ ፑዴሃ ባጋራ ካንሊዲ ሃማቲ ጋኬስ።

21 «ሄሳ ጊሻስ ሃ ቢታ ኢስራኤል ዛሬታ ቆዳ ሊኬን ጊሼቲ ኤኪቲ።

22 እንቴሰኔ እንቴ ጊደን ናይታ ዩሊዲ ዲዛ ቤቴታስ ቢታ ላታ ሂስቲ ጊሺቴ። ኢስታ እንቴ እንቴ ቢታን ዩሊቲዳ ኢስራኤል አሳ ማላ ጸሊቴ። ኢስቲ እንቴናራ ኢሲፌ ኢስራኤል ዛሬታራ ጋዴ ሳማን ኤኬቶ።

23 ቤቴይ ኢስራኤልን አይ ዛሬራ ዲኮካ፣ ሄ ኢዚ ዲዛ ዛሬ ጊደን እዛስ ላታ ቢታ ኢሚቴ። ታኒ ኡባ ሃሪዛ ጎዳይ ሃይሳ ዮታይስ» ጌስ።

48

ቢታ ሻኮ

1 «ቢታ ሻካናስ ማዘጋቤቲዳ ዛሬታ ሱንላይ ሃይሳ፤ ፑዴሃ ባጋራ ኢሲ ጊሻይ ዳኔ ዜሬስ እሜቶ። ሄሲካ ሂቲሎኔፔ ሃማቴ ኤፊዛ ኦፔ ካሊዲ፣ ሂሳፌካ ዳማስቆ ዛዋን ዲዛ ሃጸሬ-ኤና ካንሊዲ ሃማቴ ማታን ዛዋቴስ። ሄሲ አርሼ ኬሳሶፔ ቢዲ አርሼ ጌሎሶ ጋካናስ ዲዛ ሶሆስ ፑዴሃ ባጋ ዛዋ ጊደና።

2 ዳኔ ዛዋራ ኦይኬቲዲ አርሼ ኬሳሶፔ አርሼ ጌሎሶ ባጋ ጋካናስ ዲዛ ኢሲ ጊሻይ አሴሬ ዛሬስ እሜቶ።

3 አሴሬ ዛዋራ ኦይኬቲዲ አርሼ ኬሳሶፔ አርሼ ጌሎሶ ባጋ ጋካናስ ዲዛ ኢሲ ጊሻይ ኒፍታሌሜ ዛሬስ እሜቶ።

4 ኒፍታሌሜ ዛዋራ ኦይኬቲዲ አርሼ ኬሳሶ ባጋፌ አርሼ ጌሎሶ ባጋ ጋካናስ ዲዛ ኢሲ ጊሻይ ሚናሴ ዛሬስ እሜቶ።

5 ሚናሴ ዛዋራ ኦይኬቲዲ አርሼ ኬሳሶ ባጋፌ አርሼ ጌሎሶ ባጋ ጋካናስ ዲዛ ኢሲ ጊሻይ ኤፍሬሜ ዛሬስ እሜቶ።

6 ኤፍሬሜ ዛዋራ ኦይኬቲዲ አርሼ ኬሳሶ ባጋፌ አርሼ ጌሎሶ ባጋ ጋካናስ ዲዛ ኢሲ ጊሻይ ኦርቤሌ ዛሬስ እሜቶ።

7 ኦርቤሌ ዛዋራ ኦይኬቲዲ አርሼ ኬሳሶ ባጋፌ አርሼ ጌሎሶ ባጋ ጋካናስ ዲዛ ኢሲ ጊሻይ ዩሁዳ ዛሬስ እሜቶ።

8 «ዩሁዳ ዛዋራ ኦይኬቲዲ፣ አርሼ ኬሳሶ ባጋፌ አርሼ ጌሎሶ ባጋ ጋካናስ ዲዛ ኢሲ ጊሻ ዲማሳ ዎላ። እዛስ አሆቴላይ 12 ኪሎ ሜቲሬኔ ባጋ ጊደስ። አርሼ ኬሳሶ ባጋፌ አርሼ ጌሎሶ ባጋ ጋካናስ ዲዛ ዛዋይ ኢሲ ዛሬ ሻኪን ጋኪዛ ጊሻ ላጌ። እዛስ ጊደ ጊናን ጸሳ ከላይ ዳስ።

9 «ሄ ጊሻፔ ኔኒ ጎዳስ ዲማሳዳ ዎሊዛ ሶሆይ 12 ኪሎ ሜቲሬኔ ባጋ አዲሲኔ 10 ኪሎ ሜቲሬ አሆ ጊደ።

10 ሄ ሶሆይ ቆሴታስ ዲማቲዳ ሶሆ ጊደ፤ ኢዚ ፑዴሃ ባጋራ 12 ኪሎ ሜቲሬኔ ባጋ አዲሳ፤ አርሼ ጌሎሶ ባጋራ ኢቻሽ ኪሎ

ሜቲሬ አሆኑ አርሼ ኬሳሶ ባጋራካ 5 ኪሎ ሜቲሬ አሆኑ ቃሴ ዱጌሃ ባጋራ 12 ኪሎ ሜቲሬኔ ባጋ አዱሳ። ጸሳ ከላይ ኢዛሰ ጊዶ ገናን ዴሰ።

11 ሃ ዱማሲ ዋሊዳ ሶሆይ ኢሰራኤሌ አሳይ ታ ኦጌፔ ዋራ ሲሚዛ ዋዴ ኢሰታራ ዋራ ሲሚዳ ሌዌታ ማላ ጊዶንታ ማላ አማኔቲዱ ታሰ ኦሊሼ ጋምኢዳ ጌሻ ቄሴታሰ ሳዶቄ ዛሬታሰ ኢሜቶ።

12 ሄሲ ጎዳሰ ዱማቲዳ ቢታፌ ኢሰታሰ ዱማ ጊሻ፤ ኢዚ ኡባፌ አዲዳ ጌሻ። ኢሰታ ጊሻይ ሌዌታ ጊሻን ዛዋቶ።

13 «ቄሴታ ዛዋራ ኦይኬቲዱ፣ ሌዌታሰካ አዱሳቱላይ 12 ኪሎ ሜቲሬ ባጋ፣ አሆቴላይካ 5 ኪሎ ሜቲሬ ጊዱዳ ኢሲ ጊሻይ ኢሜቶ።

14 ኢሰቲ ሄ ጋዴዛፔ አይኮካ ባይዞፔቶ ዋይኮ ላዋፌቶ። ሄሲ ቢታ ኡባን ዱማቲዳይሳ ጊዱዳ ጊሻሰ ሃራ አሳ ኩሼን ጌላናሰ ቤሴና፤ ጎዳሰ ኢዚ ጌሻሶሆ።

15 «አቲዳ ናምኡ ኪሎ ሜቲሬኔ ባጋ አሆኑ ታማኔ ናምኡ ኪሎ ሜቲሬኔ ባጋ አዱሳ ሶሆይ ካታማ አሳይ ኡባይ ኮላን ጎኤቲዛ ከላ ኬጺዛሶኔ ሜሄ ሄሚዛሶሆ ጊዶ፤ ካታማይ ሄ ቢታሰ ጊዶ ገናን ዴኦ።

16 ሄ ካታማይ ኦይዱ ዘዜራ ዴሰ። ፑዴሃ ባጋይ 2,250 ሜቲሬ፤ ዱጌሃ ባጋይ 2,250 ሜቲሬ፤ አርሼ ኬሳሶ ባጋይ 2,250 ሜቲሬ፤ አርሼ ጌሎሶ ባጋይካ 2,250 ሜቲሬ።

17 ካታማሰ ሄንላ ጋዴይ ዴኦ፤ ሄ ጋዴይ ፑዴሃ ባጋራ፣ ዱጌሃ ባጋራ፣ አርሼ ኬሳሶ ባጋራኔ አርሼ ጌሎሶ ባጋራ 125 ሜቲሬ አሆ ጊዶ።

18 ጌሻሶሆ ባጋራ አቲዳ ሶሆይ አርሼ ኬሳሶ ባጋ ዋዲዛ ዋዴ ዛዋይ 5 ኪሎ ሜቲሬ አዱሳ፤ አርሼ ጌሎሶ ባጋ ዋዲዛ ዋዴ፣ ዛዋይ 5 ኪሎ ሜቲሬ አሆ። ሄ ሶሆዛን ሞኪዳይሲ ኡባይ ሄ ካታማን ኦሊዛይታሰ ቁማ ጊዳና።

19 ኢሰራኤሌ ዛሬ ኡባፌ ሄ ካታማን ኦላናሰ ዪዛይቲ ሄ ቢታ ጎዬቶ።

20 ኢንቲ ዱማሲዳ ሶሆይ ሙሌራ ኦይዱ ዘዜራካ ታማኔ ናምኡ ኪሎ ሜቲሬኔ ባጋ አዱቄሰ። ሄ ሶሆይ ካታማይ ኬጾቲዳ ሶሆኔ ጌሻሶሆ ባናን ጉጃሰ።

21-22 «ጸሳ ከላፌ፣ ቄሴታ ጊሻፔ፣ ሌዌታ ጊሻፔ ካታማ ሶሆፔ አርሼ ኬሳሶ ባጋራኔ አርሼ ጌሎሶ ባጋራ ዱዛ አቲዳ ቢታይ ሃላቃሰ ጊዶ። ሄ ቢታሰ አሆቴላይ ታማኔ ናምኡ ኪሎ ሜቲሬኔ

ባጋ። ሄ ሃላቃ ቢታይ ፑዳሃ ባጋራ ዩሁዳ ጋኪዳ ገሻን ዱጌሃ ባጋራ ቢኒያሜ ጋኪዳ ገሻን ዛዋቲስ።

²³ «ኣቲዳ ዛሬታስ ቢታይ ሃይሳ ማላ ሻኬቲስ። ኣርሼ ኬሳሶፕ ኣርሼ ጌሎሶ ጋካናስ። ኢሲ ገሻይ ቢኒያሜ ዛሬስ ኣሜቶ።

²⁴ ቢኒያሜ ዛዋራ ኦይኬቲዲ ኣርሼ ኬሳሶፕ ኣርሼ ጌሎሶ ጋካናስ ዲዛ ኢሲ ገሻይ ሲሞና ዛሬስ ኣሜቶ።

²⁵ ሲሞና ዛዋራ ኦይኬቲዲ ኣርሼ ኬሳሶፕ ኣርሼ ጌሎሶ ጋካናስ ዲዛ ኢሲ ገሻይ ዩሳኮሬ ዛሬስ ኣሜቶ።

²⁶ ዩሳኮሬ ዛዋራ ኦይኬቲዲ ኣርሼ ኬሳሶፕ ኣርሼ ጌሎሶ ጋካናስ ዲዛ ኢሲ ገሻይ ዛቢሎኔ ዛሬስ ኣሜቶ።

²⁷ ዛቢሎኔ ዛዋራ ኦይኬቲዲ ኣርሼ ኬሳሶ ባጋሬ ኣርሼ ጌሎሶ ባጋ ጋካናስ ዲዛ ኢሲ ገሻይ ጋዴ ዛሬስ ኣሜቶ።

²⁸ ጋዴ ዱጌሃ ዛዋይ ታማሬ ካታማፕ ዴንዲዲ፣ ማሪባ ቃዴሴን ዲዛ ፑልቶዛራ ካንሊዲ፣ ጊብጾ ሻፋ ካሊ ቢዲ ሜዲቲራኔ ኣባ ጋኬስ።

²⁹ «ኢንቲ ኢስራኤል ቆሞታስ ላታ ቢታ ሂስቲዲ ኢንቲ ሻካና ቢታይ ሃይሳ፤ ሃይቲ ኢስታ ጋካና ገሻ። ታኒ ኡባ ሃሪዛ ጎዳይ ሃይሳ ዮታይስ።

ካታማ ፔንጌታ

³⁰⁻³¹ «ካታማፕ ኬዚዛ ፔንጌቲ ሃይታ። ኢስቲ ኢስራኤል ዛሬታ ሱንላን ጸይጌታና። ፑዳሃ ዲርሳ ገምቤይ 2,250 ሜቲሬ ኣዱቃና፤ ሄ ገምቤዛን ኦርቤሌ ፔንጌ፣ ዩሁዳ ፔንጌኔ ሌዌ ፔንጌ ጌቲቲዛ ሄሹ ፔንጌቲ ዳና።

³² ኣርሼ ኬሳሶ ባጋራ ዲዛ ዲርሳ ገምቤይ 2,250 ሜቲሬ ኣዱቃና፤ ሄ ገምቤዛን ዮሴፌ ፔንጌ፣ ቢኒያሜ ፔንጌኔ ዳኔ ፔንጌ ጌቲቲዛ ሄሹ ፔንጌቲ ዳና።

³³ ዱጌሃ ባጋራ ዲዛ ዲርሳ ገምቤይ 2,250 ሜቲሬ ኣዱቃና፤ ሄ ገምቤን ሲሞና ፔንጌ፣ ዩሳኮሬ ፔንጌኔ ዛቢሎኔ ፔንጌ ጌቲቲዛ ሄሹ ፔንጌቲ ዳና።

³⁴ ኣርሼ ጌሎሶ ባጋራ ዲዛ ዲርሳ ገምቤይ 2,250 ሜቲሬ ኣዱቃና፤ ሄ ገምቤን ጋዴ ፔንጌ፣ ኣሴሬ ፔንጌኔ ኒፍታሌሜ ፔንጌ ጌቲቲዛ ሄሹ ፔንጌቲ ዳና።

³⁵ ካታማ ዩሾይ ሙሊራ ዋጲን 9,000 ሜቲሬ ጊዳና። ሄ ዋዴፕ ዶሚዲ ሄ ካታማይ፣ ሳዳይ ሄን ዴስ፣ ጌቲቲ ጸይጌታና» ጌስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b